

所沿改皆叔夏等裁討每立一議衆咨服之累遷成均司業后又  
詔五禮儀物司禮博士有所修革須叔夏等評處然後以聞進位  
春官侍郎中宗復位轉太常少卿爲建立廟社使進銀青光祿大  
夫累封沛郡公卒諡曰文子紹開元時歷集賢修撰遷太常初帝  
詔歲率公卿迎氣東郊至三時常以孟月讀時令於正寢二十六  
年詔紹奏月令一篇朔日於宣政側設榻東向置案紹坐讀之諸  
司官長悉升殿坐聽高宗上元三年將禘享議者以禮緯三年禘  
五年禘公羊家五年再殷祭二家舛互諸儒莫能決太學博士史  
元議禘後三年而禘又二年而禘議遂定後至開元二十七年禘  
祭五禘祭七紹奏四月已禘孟冬又禘祀禮叢數請以夏禘爲大  
祭之源自是相循五年再祭後終天子少師唐書本傳  
啖助字叔佐趙州人後徙關中淹該經術天寶末調臨海尉丹陽主

簿善爲春秋考三家短長縫紵漏闕號集傳復攝其綱條爲例統

門人趙匡陸質其高弟也助卒質其子異錄助所爲春秋集註

總例請匡損益質纂會之號纂例唐書本傳

韋彤京兆人名治禮德宗時爲太常博士先是天寶中詔尚食朔望  
進食太廟天子使中人侍祠有司不與也貞元十二年帝詔朔望  
食畀宗正太常合供彤與裴堪議曰禮宗廟朔望不祭寢園則有  
之王者弗敢以孝思之極而溢禮弗敢以肴品之多而膳味願罷  
天寶所增奉寢園以珍奉宗廟以禮帝曰是禮先帝所定今遽更  
之其謂朕何卒不廢唐書本傳

韋公肅隋觀城公約七世孫萬年人元和初爲太常博士兼修撰憲宗

耕籍詔公肅草具儀典太子太傅判太常卿事鄭餘慶言廟有二  
祖妣疑於祔祭請諸有司公肅議古諸侯一娶九女故廟無二嫡

自秦以來有再娶前娶後繼皆嫡也兩祔無嫌諸儒不能異初睿宗祥月太常奏朔望弛朝尚食進蔬具止樂後遂爲常公肅上言禮忌日不樂而無忌月王者不以私懷踰禮故禪禮徙月樂漸去其情也不容追遠而立禮反重今太常雖郊廟樂且停習是謂反重以慢神也有司禁中外作樂是無故而徹也願依經誼裁正其違詔禮官學官議咸曰宜如公肅所請制可以壽卒

唐書本傳

韋表微字子明萬年人羈州能屬文擢進士第爲翰林學士時李紳忤宰相貶端州龐嚴蔣防皆謫去學士缺人爭薦丞相所善者表微獨薦韋處厚人服其公進知制誥後與處厚議增選學士復薦路隋處厚以諸父事表微因曰隋位崇入且翁右奈何答曰選德進賢初不計私也文宗立進戶部侍郎開志沼叛詔李聽率師討之天子憂無成功表微曰以聽軍勢不十五日必破賊及捷書上

止浹日以病瘳罷學士卒始被病醫藥不能具所居堂寢隘陋旣沒弔客咨嗟篤故舊雖庸下與攜手語笑無間尤好春秋病諸儒是非紛然著三傳總例完會經趣又以學者薄師道不如聲樂賤

工能尊其師著九經師授譜

唐書本傳

柳璞字韜玉華原人學不營仕著春秋三氏異同義又述天祚長曆斷自漢武帝紀元爲編年以大政大祥異侵叛戰伐隨著之閭位者附見其左常謂杜征南春秋後序述紀里曆爲得實自餘史家皆差蔣係以爲然終著作郎

唐書本傳

宋

張載字子厚長安人少喜談兵至欲結客取洮西之地年二十一以書謁范仲淹一見知其遠器乃警之曰儒者自有名教可樂何事於兵因勸讀中庸載讀其書猶以爲未足又訪諸釋老累年究極

其說知無所得反而求之六經嘗坐虎皮講易京師聽從者甚眾  
一夕二程至與論易次日語人曰比見二程深明易道吾所弗及  
汝輩可師之撤坐輟講與二程語道學之要渙然自信曰吾道自  
足何事旁求於是盡棄異學淳如也舉進士爲祁州司法叅軍雲  
巖令政事以敦本善俗爲先每月吉具酒食召鄉人高年會縣庭  
親爲勸酬使人知養老事長之義因問民疾苦及告所以訓戒子  
弟之意熙寧初御史中丞呂公著言其有古學神宗方一新百度  
思得才哲士謀之召見問治道對曰爲政不法三代者終苟道也  
帝悅以爲崇文院校書他日見王安石石問以新政載曰公與  
人爲善則人以善歸公如教玉人琢玉則宜有不受命者矣明州  
苗振獄起往治之還朝即移疾屏居南山下終日危坐一室左右  
簡編俯而讀仰而思有得則識之或中夜起坐取燭以書其志道

精思未始須臾息敝衣蔬食與諸生講學每告以知禮成性變化  
氣質之道學必如聖人而後已以爲知人而不知天求爲賢人而  
不求爲聖人此秦漢以來學者大蔽也故其學尊禮貴德樂天安  
命以易爲宗以中庸爲體以孔孟爲法黜恠妄辨鬼神其家昏喪  
葬祭率用先王之意而傅以今禮又論定井田宅里發斂學校之  
法皆欲條理成書使可舉而措諸事業會秦鳳帥呂大防薦其學  
善發明聖人之遺旨其政略可措以復古宜還其舊職以備諮訪  
乃詔同知太常禮院與有司議禮不合復以疾歸中道疾甚沐浴  
更衣而寢旦而卒貧無以斂門人共買棺奉其喪還翰林學士許  
將等言其恬於進取乞加贈卹詔賜館職半賻載學古力行爲關  
中士人宗師世稱爲橫渠先生淳祐元年封郿伯崇祀孔子廟廷  
弟戡字天祺起進士知金堂縣養老卹窮召父老使督教子弟民

有小善皆籍紀之月吉召老者飲勞使其子孫侍勸以孝弟民化其德所至訟獄日少熙寧初爲監察御史累章論王安石亂法乞罷條例司及追還常平使者劾曾公亮陳升之趙抃依違不能救正韓絳左右徇縱與爲死黨李定以邪諂竊臺諫且安石擅國輔以絳之詭隨臺臣又用定輩繼續而來芽蘖漸盛呂惠卿刻薄辯給假經術以文奸言豈宜勸講君側書數十上又詣中書爭之安石舉扇掩面而笑戩曰戩之狂直宜爲公笑天下笑公者不少矣趙抃從旁解之戩曰公亦不得爲無罪抃有愧色遂稱病待罪出知公安縣徙監司竹監至舉家不食筭常愛用一卒其卒盜筭簞治之無少貸罪已正待之復如初略不介意其德量如此卒於官

宋史

本傳

呂大鈞字和叔

大防弟

中乙科調秦州司理叅軍改知三原縣請代

父賁入蜀移巴西縣賁致仕大鈞亦移疾不行丁外艱家居講道數年起爲諸王宮教授改宣義郎西夏郡延轉運使檄爲從事既出塞轉運使李稷餽餉不繼欲還安定取糧使大鈞請於稷謂曰吾受命將兵安知糧道萬一不繼召稷來與一劍耳大鈞性剛直曰朝廷出師去塞未遠遂斬轉運使無君父乎謂意折始許稷還未幾道得疾卒年五十二大鈞從張載學能守其師說而踐履之居父喪衰麻葬祭一本於禮後乃行於冠昏膳飲慶弔之間節文燦然可觀關中化之尤喜講明井田兵制謂治道必自此始悉撰次爲國籍可見於用雖皆本於載能自信力行載每歎其勇爲不可及弟大臨字與叔學於程頤與謝良佐游酢楊時在程門號四先生通六經尤邃於禮每欲掇習三代遺文舊制令可行不爲空言以拂世駭俗元祐中爲大學博士遷秘書省正字范祖禹

薦其好學修身如古人可備勸學未及用而卒

宋史本傳

蘇昞字季明武功人素性純茂強學篤志從張載學最久後見二程

復師事以卒其業元祐末呂大忠以布衣薦爲太常博士坐元符

中上書言事入邪籍編管饒州卒

宋史列傳

侯仲良字師聖華陰人二程舅氏無可之孫從二程遊人有欲館之

者仲良造焉則壁垂佛像几積佛書其家人又常齋素仲良遂行

嘗訪周濂溪濂溪留之對榻夜談越三日乃還自謂有得如見天

之廣大伊川驚異其不凡曰非從濂溪來耶後遊荊州胡文定留

與爲隣終焉朱文公稱其學清白勁直

關學

郭緒字天錫蒲城人幼而岐嶷讀書如素習晚調上杭簿留意邵雍

象數之學兼取揚雄所據列山易一會統元推之久而成書名

易春秋爲二十卷隆興紀元以其書上方議推恩而卒

萬姓統譜

楊天德字君美高陵人肄業太學登進士第釋褐補聊城丞累遷轉

運司度支判官京城不守流寓宋魯間十年而歸自讀書至晚歲

風節矯矯始終不少變晚讀大學解沿及伊洛諸書大嗜愛之常

語人曰吾少時精力奪於課試殊不省有此今而後知吾道之傳

爲有在也埋沒篆刻中幾不復見天日目昏不能視書猶使其子

講誦而朝夕聽之以是自樂及有疾親友往問之談笑歌詠不衰

曰吾晚年幸聞道死無恨矣卒年七十九許衡誌其墓

關學

楊奐字煥然乾州奉天人年十一母歿哀毀如成人金末舉進士不

第作萬言策指陳時病未及上而歸教授鄉里東平嚴實聞奐名

數問其行藏奐終不一詣太宗詔宣德稅課使劉用之試諸道進

士與試東平兩中賦論第一耶律楚材薦授河南路徵收稅課所長官兼廉訪使既至招致名士與之議政事約束以簡易爲事按行境內親問監務月課幾何難易若何有以增額言者與曰剝下欺上汝欲我爲之耶即減原額四之一公私便之不踰月政成時論翕然以爲前此漕司未有也在官十年請老於燕之行臺壬子世祖在潛邸驛召與參議京兆宣撫司事上書請歸卒年七十與博覽強記作文務去陳言以蹈襲爲耻朝廷諸老皆折行輩與之交關中號稱多士名未有出與右者與不治生產業而喜周人之急雖力不贍猶勉強爲之人有片善則委曲稱獎惟恐其名不聞或小過失必盡言勸止不計其怨怒

元史本傳

蕭軒字維斗奉元人性至孝出爲府史上官語不合即引退讀書南山者三十年於是博極羣書天文地理律曆算數靡不研究及門

受業者甚衆世祖分藩在秦辟軒侍秦邸軒以疾辭授陝西儒學提舉不赴後累授國子司業改集賢侍讀學士皆不赴大德十一年拜太子右諭德扶病至京師入覲東宮書酒諾爲獻以朝廷時尚酒故也尋以病力請去職卒諡貞敏軒制行甚高真履實踐教人必自小學始爲文辭立意精深言近指遠以洙泗爲本濂洛考亭爲據關輔之士翕然宗之稱爲醇儒

元史本傳

岳崧號景山邵陽人延祐中三聘不起解禽鳥語嘗讀書於卧虎崗與蕭軒友善所著有六經四書註

賈志

同恕字寬甫奉元人恕安靜端凝羈卯如成人日記數千言年十三以書經魁鄉校至元間三召不起陝西行臺御史趙世延請即奉元置魯齋書院中書奏恕領教事制可之先後來學者殆千數延祐六年以奉議大夫太子左贊善召入見東宮賜酒慰問繼而獻

書歷陳古誼盡開悟涵養之道明年春英宗繼統以疾歸恕之學由程朱上溯孔孟務浹洽事理以利於行教人曲爲開導使得趨向之正性整潔平居雖大暑不去冠帶母張夫人卒事異母如事所生父喪哀毀致目疾時祀齋肅詳至嘗曰養生有不備事猶可後追遠有不誠是誣神也可道罪乎恕家居十三年搢紳望之如景星麟鳳鄉里稱爲先生而不姓至順二年卒年七十八制贈翰林直學士謚文貞其所著曰樂菴集二十卷

元史本傳

第五居仁字士安

涇陽人見關學編

幼師蕭軒弱冠從同恕受學博通經史

躬率子弟致力農畝而學徒滿門其弘度雅量能容人所不能容嘗行田間遇有竊其桑者居仁輒避之鄉里高其行義率多化服作字必楷整遊其門者學明行修卒之日門人相與議易名之禮私謚曰靜安先生

元史同恕傳

擇字從善奉元人天資超異信道不惑其教學者雖中歲以後亦必使自小學等書始或疑爲陵節勤苦擇曰人不知學白首童心且童蒙所當知而皓首不知可乎擇尤遠禮學有質問者口講指畫無倦容士大夫游宦過秦中必往見擇莫不虛往而實歸焉世祖嘗詔之赴京疾不果行其卒也門人爲服緦麻者百餘人

元史蕭軒傳

侯均字伯仁奉元人父母早亡獨與繼母居賣薪以給奉養積學四十年羣經百氏無不淹貫每讀書必熟誦乃已嘗言人讀書不至千徧終於已無益故其答諸生所問窮索極深如取諸篋笥名震關中學者宗之用薦者起爲太常博士後以上書忤時相意不待報可即歸休田里均貌魁梧而氣剛正人多嚴憚之及其應接之際則和易欵洽雖方言古語人所未曉者莫不隨問而答世咸服

其博聞

元史蕭  
與傳

程瑁字君用涇陽人隱居不仕弱冠即以古學自力討論六籍寒暑未嘗少輟三原李子敬創學古書院延瑁講學其中遠近從遊者百餘人循循然樂道不倦學者稱悅古先生嘗戒諸子曰人性本善習之易荒古聖賢皆以驕情爲戒况凡民乎集家戒一卷以遺

子孫

醫學

明

尚士行同州人名志以字行學通五經元末隱居白水之龍崗山學者稱南崗先生與蒲城趙孟暘馬巨江等樂道講學明初孟暘爲學士薦於朝詔授本學訓導以斯文爲已任士皆翕然慶得師焉同州志馬巨江蒲城人洪武十七年以通經舉授咸寧訓導永樂初授翰林五經博士時稱鉅儒趙晉字孟暘亦蒲城人明太祖徵聘

輔導太子諸王賜春坊侍講學士以安車致仕

蒲城志

馬尚賓名貴以字行三原人光祿卿理祖也生而穎敏祖母徐教之學即奉書晝夜讀能盡識大意及長祖母徐語之曰吾聞汝外曾王父云道在中庸尚賓遂專意中庸時處士師敏深於中庸者也相與研極中庸之理吉士解栖霞嘗就問退而歎服永樂中詔求遺逸不就尚賓用周易六壬皇極諸書占事知來皆奇驗說者謂當與君平堯夫並傳云苑洛集子江字文淵博學好古事親中禮隱居教授呂柟謂其得君子之道有九焉雍大記張傑字立夫鳳翔人生有異質穎悟過人稍長以聖賢自期登正統辛酉鄉薦山西趙城訓導以講學教人爲事歲祿捐俸賑饑父歿徒跣奔歸喪葬悉以禮先是里俗多用浮屠法傑一切屏去鄉人化之後以養母遂不復仕益肆力於學恒瞑目端坐至於移時起



則取諸經子史朗然諷誦或至丙夜後已最愛涵養須用敬進學在致知二語因大書揭座右造詣日深弟子從遊者日衆乃拓家塾以五經教授名重一時或勸之著書曰吾年未艾猶可進也俟有所得爲之未晚竟未及著書而卒年五十二

關學編

宋玉字廷珍長安人自幼好學人號宋五經舉正統三年鄉舉任雙流訓導以賢能行取赴部時王振當權玉獨不爲禮授瀋府教授瀋王敬之如師動靜言語必稟而後行致仕歸惟教授鄉閭子弟從遊者甚衆

西步府志

姚顯字微之咸陽人領正統甲子鄉薦傳業成均時三上封章大略皆闢異端崇正道安社稷之謀言甚切直大名著天下大興龍寺者朝廷習朝儀之所外樹大樓題扁曰天下第一叢林以顯奏毀除人益仰重擢言職爲不利已者黜之出宰齊東民愛之如父母

歌曰清似水明似鏡齊東之人何其幸轉武城民亦愛之歌曰先有子游後有姚公律已治人同一古風後丁內外艱俱廬墓側以教鄉社子弟尋陞大僕丞顯爲人剛方正直光明磊落其制行一以聖賢爲法人與之接邪僻自爲之消比卒也士林咸痛惜焉

大

記

李錦字在中咸寧人九歲讀書知大義後遇秦州周廷芳講學得聞周程張朱爲學之要遂棄詞章之習專以主敬窮理爲事踐履醇茂關中學者咸敬服之天順壬午舉於鄉遊成均大司成邢讓深器異之後邢坐事下獄錦倡六館士伏闕抗章明其無罪名重京師錦解經平正通達不爲鑿說且善誘後學諄諄忘倦仕松江府同知卒於官貧不能爲棺殮其僚友賻之始克歸云

關學編

薛敬之字顯思渭南人生五歲愛讀書十一解屬文言動必則先賢

以積廩貢太學二尊人相繼歿徒跣奔葬風雪不避後遂病足值冬月輒發母嗜韭母歿終身不忍食韭成化丙午選山西應州知州首勸民耕稼紡績時當東作巡察田野民艱於耕種者資以牛種又務積蔬粟不三四歲粟至四萬餘石乾蔬數萬餘斤尋當饑饉應民免於死亡其既竄而復歸者三百餘家南山有虎患爲文祭之旬日間虎死於壑已酉春蕭家寨北平地有暴水湧出一寨幾至湮沒亦爲文祭告水即下洩聲如雷鳴民免於溺尤重學政數至學舍爲諸生言孔孟之旨由是應人知身心性命之學奏課第一陞金華府同知居二年致任卒敬之嗜道若飴老而彌篤好與人講又好靜坐思索凡有所得即以劄記所著思錄野錄諸書其言多有補於名教云

關學編

劉璽宜川人賦性端方博覽羣書與兄琛同舉弘治乙卯鄉試人以

公輔期之琛登進士任推官歷按察司僉事而璽方以道學自任不急進取徙家長安教授諸生人爭師事之關中以理學名者多出其門馮從吾璽外孫也少時璽口授五經昕夕誨育其後竟傳其學璽官衛輝通判有廉名兄瑛成化辛卯舉人知汝陽亦稱循吏而琛居官所至多政績長安號三劉云

宜川志

呂柟字仲木高陵人少授尚書於邑人孫昂有志聖賢之學危坐誦讀雖炎暑不廢大叅熊公李公延教其子館於開元寺聞父疾徒步歸二公以夫馬追送不及父愈構雲槐精舍聚徒講學弘治辛酉舉於鄉明年遊成均與諸同志講學寶印寺正德戊辰廷對第一授修撰時閹瑾竊政以粉榆故致賀柟却之會西夏構亂疏請上御經筵親政事不報乃引去瑾敗薦起舊職上疏勸學上嘉納未幾乾清宮災應詔言六事不報復引疾去父病侍湯藥晝夜衣

不解帶履恒無聲一年鬚髮爲白及卒哀毀逾禮既葬廬墓側旦夕焚香號泣釋服復講學東林書屋鎮守闕寥素張甚戒使者過高陵勿擾曰有呂公在也世廟即位詔起原官上御經筵柎進講值淳皇后忌辰口奏宜存繫服禮罷賜酒饌朝論躉之甲申復以十三事上言過切直謫判解州既至解以作士變俗爲任會守缺柎攝事善政犁然來學者益衆建解梁書院選少而俊秀者歌詩習小學諸儀朔望令耆德者講會典行鄉約廉孝悌節義者表其廬求子夏後教之學政舉化行俗用丕變轉南吏部郎遷國子祭酒以師道自任取儀禮諸篇令按圖習之登降俯仰鐘鼓管籥洋然改觀易聽有古辟雍之風晉南禮部右侍郎署南吏曹掾疏薦何塘穆孔暉徐階唐順之等二十人入賀會廟災自陳遂致仕歸卒之日高陵人爲罷市四方門人聞者皆爲位而哭謚文簡

臨學編

柎在南都凡八年四方士環趨講下是時海內講學者相望起而各守一先生言柎獨集取宋儒周程朱張語爲四子抄釋令學者體驗而力行之語學者曰必如是乃爲吾實學無他法門也

明史

馬理字伯循三原人弘治十一年以春秋魁鄉試再試禮闈未第游太學與呂柎崔銑交相切劘文章德義名震都下正德九年登進士授稽勲主事改文選與郎中不合引疾歸居三年復任與黃鞏諫南巡被杖未幾送母還鄉設教嗟峨精舍生徒履滿門外尋起考功郎中力持公論時稱爲真考功歷遷光祿卿生平學準程朱以主敬窮理爲主四方學徒轉相授受自縉紳士子以至田夫野叟無不欣慕之雖四夷亦聞其名安南貢使至問部郎黃清曰遠聞馬道學名所願一見今何不在仕列高麗使至亦聞馬主事爲聖朝第一人宜加厚遇乞頒賜所爲文使國人矜式其見重如此

卒年八十餘諡忠獻

名山藏

咎如心字子推三原人性穎悟讀書能悟人所不到處厭科舉之學

慨然有求道之志嘗衣冠危坐整心飭身言動應酬悉遵道義人

咸敬服年二十九而卒

萬姓統譜

王盛字懋德韓城人釋褐南戶科給事陟山西叅政受業薛河津之

門孝友清貞秉禮好學叅藩時常以暇日課士名流多出其門居

家凡喪祭悉遵朱子家禮不用浮屠法韓俗爲之一變

同州志

呂潛字時見涇陽人幼穎敏讀書解大義稍長師事呂柟言動率以

爲法嘉靖丙午薦鄉書卒業成均先是母栢病於京潛扶病西歸

病革以潛且壯命之娶潛娶而不婚日夜苦處喪次服除乃始婚

嘗與友人郭郭講學谷中洞口四方從學者甚衆辟授國子學正

時馬文莊公爲祭酒郭亦爲助教乃與郭議以呂柟爲祭酒時所

布學約力舉行之由是講讀之聲徹於橋門調工部司務卒年六

十二時從柟學者又有張節李挺節字介夫亦涇陽人父幡官通

州同知節隨父之任會湛若水講學京師節從之游湛教以隨處

體認天理大有省悟無何父幡致仕節歸受學於柟柟深器重之

生平不妄交遊獨與呂潛郭郭諸君子相切劘日坐南園草屋中

讀書窮理涵養本源至老不倦惡衣糲食淡如也挺字正立咸寧

人西安郡學生性孤直有義氣不隨時類仰嘗自誦曰生須肩大

事還用讀春秋柟歿又講學於馬理往來三原道中以盜死人皆

惜之

關學編

郭郭字惟藩涇陽人與呂潛同肆力於學以聖賢相期許父母相繼

逝居喪竭力盡瘁家計窘甚而處之裕如朝夕攻苦益潛心性命

之學或有以千金求居間者峻拒不納嘉靖戊午舉於鄉選河南

獲嘉學諭與諸生講學課藝多所造就擢國子助教遷戶部主事  
權稅九江剔弊除奸商旅胥悅出守馬湖居未三載投牒歸田讀  
書講學外他無所事卒年八十八門人私謚曰貞懿先生

關學編

王之士字欲立藍田人嘉靖戊午舉人潛心理學毅然以道學自任  
爲養心圖定氣說書之座右閉關不出者九年蒿牀糲食尚友千  
古行已必恭與人必敬謂居鄉不能善俗如先正和叔何乃立鄉  
約爲十二會赴會者百餘人設科勸糾身先不倦諸灑掃應對冠  
婚喪祭禮久廢每率諸宗族子弟一一敦行之已卯如京與諸同  
志講學崇正闢邪力肩斯道或談及二氏輒正辭拒之不少假借  
生平著述皆根柢理窟一時學者翕然宗之

賈志

劉儒字以聘宜川人性至孝父嘗倉卒被盜儒與兄自外踰垣入爭  
求代父於是盜義之釋其父嘉靖間以舉人令安邑完縣陞叙州

府同知所至皆有惠政遷慶藩左長史以禮繩王王不聽遂致仕  
儒爲學以誠一爲本辨析理義毫忽不苟子史百家言無所不通  
顧一折衷於程朱學者爭師事之太保楊兆出其門既貴每見猶  
侍立終日語人曰吾侍兩宮未若先生嚴也子光文以明經知招  
遠寬和宜民擢判真定有井出金內官監採爲民害光文奏劾內  
宦因罷役一時權貴憚之

延安府志

劉子誠字伯明宜川人幼有至性潛心經史嘉靖時舉人與溫恭毅  
砥行明經一時老師宿儒皆尊信之子誠爲學既綜六經又精羣  
緯尤與周子圖說通書得抽關啟鑰之妙歲己丑爲楊啟元擬元  
與他房陶望齡爭或因北卷欲置第二楊不平憤置之曰斯人道  
學淵懿議論瑩徹非吾曹所及因刊其卷布長安自是退講於鄉  
隨人淺深皆有成就終身無攢眉事一日臨觴不樂謂弟子誠曰

學無體用便分物理性命爲二吾學雖未見用然繕性治世放諸百世無疑也第度設施可澤於斯人便可出而仕矣尋卒學者尊

爲大劉夫子

宜川志

文在中字少白御史振之八世孫也萬曆甲戌進士廷對已共以第一人相擬江陵以策有一氣未通兩孽未除之語抑置三甲歷仕至祠部郎復以忤馮璫降調尋遷長沙別駕挂冠歸老嵩山建樂育書院日講內聖外王之學負笈從遊者甚衆性既聰敏復博極羣書下筆數萬言立就所著有觀宇觀宙天經天雅天典天引天朔天極各三十六帙生平孝友天植周恤族閭時三水賦重民貧不克充額在中申請減糧一萬邑人爲建減糧永思碑稱闕西夫子云

賈志

馮從吾字仲好長安人甫髫齡即深契王文成人心有仲尼句口誦

心維嘗以文人何如聖人廣厲同志爲德清許孚遠所器重舉進士由庶常改御史巡視中城有中貴投刺者必峻却之時神宗臨御久經筵几席塵封從吾具疏特請朝講且謂今當入覲之期萬方畢集成欲一睹清光而不可得則必疑而相議不曰皇上困於麴蘖之御而懼飲長夜必曰倦於窈窕之娛而晏眠終日雖近頒勅諭謂聖體違和美可借此自掩不知鐘鼓於宮聲聞於外天下人心豈可得而欺哉望皇上勿以天變爲不足畏勿以人言爲不足恤勿以目前之晏安爲可恃勿以將來之離亂爲勿虞上大怒欲杖之以長秋節獲免又疏逐相門狎客胡汝寧出督蘆監忤要人削籍不出門者九年燕寢三楹竟日危坐親朋罕睹其面惟問學者至一穉子肅而入坐久碾來牟剪葵韭爲供更端問難憂憂忘倦遠近從遊者日衆天啟即位與鄒元標同赴召適京師戒嚴

朝官爭遣其孥從吾獨盡室以行無何廣寧陷經撫攜手入關從  
吾謂國家無事士大夫不知節義臨難抱頭鼠竄者踵相接宜喚  
起親上死長之心非講學不可因與元標倡立首善書院集同志  
相切劘羣小側目於是兵科朱童蒙疏劾建壇講學之非從吾疏  
乞休予告回籍繼而起從吾總留臺不赴即家拜工部尚書疏辭  
奄禍益烈尋遭削奪會秦撫亦奄黨借從吾以媚奄日以窘迫爲  
事毀書院擲夫子象於城隅從吾痛切剝膚吁嗟跌坐二百日不  
就寢飲恨而卒崇禎改元贈宮保諡恭定

續表  
忠記

張舜典字心虞鳳翔人萬曆甲午舉人自諸生時潛心理學受知督  
學許孚遠後遊江南復從許講學因徧交鄒南阜顧涇陽馮少墟  
諸先輩數年始歸謁選署開州學正與諸生朝夕講論皆朱程語  
錄不以舉業爲先陞鄆陵令盡心民事細大必舉民間養生送死

之具皆備而貯之以貸貧乏創弘仁書院與諸生講學置經史數  
千卷爲令五年鄆民戴若父母陞彰德府同知致仕歸諸生從遊  
者常數百人天啟改元陞兵部武選員外上疏勸聖學遠宦寺時  
魏闡已用事舜典特指斥之遂罷歸卒於家初舜典之令鄆也時  
方承平舜典忽製軍器若干皆精好貯於庫人咸訝之及去官後  
有邊警需軍器縣以舜典所製者應之獨精利爲他邑冠人服其

先識云

賈志

趙應震字廉夫膚施人生而莊重沉默少就傅即勉強力學每進講  
必究理義所在閱五經性理諸書知聖賢理蘊在此師馮少墟先  
生爲及門第一主太和書院講學比肩從遊者皆師事之歸里談  
書清涼山寺購書萬卷執經問字者盈門應震天性純孝事孀母  
盡菽水歡簞瓢自適不受餽遺會母卒嚴冬不履而跣歲稔貧益

甚弟子或供饘粥終不屑曰菜根滋味正著述受用物手不釋卷  
日事討輯未經大用費志而歿遠邇痛悼之後二十年督學道汪  
喬年表其墓曰理學真儒趙應震之墓賈志

按陳疇演象實開理窟之精天祿石渠大啟諸經之秘厥後橫  
渠二張藍田諸呂力肩道統繼往開來此關學之所以源遠流  
長而師承有自也雖其間造詣不齊宗派不一然要皆表章聖  
訓羽翼斯文佑啟後人維持風教今撮其遺事依次列傳其有  
聞望素著德業未詳如洪武時則有蒲城石伯元藍田李恒宣  
德時則有三原雒守一弘治時則有高陵孫昂成化時則有長  
安吉人膚施趙章嘉靖時則有扶風馮侃白水石萬鐘萬曆時  
則有長安宋學三原楊春芳蓋屋楊楠延安姚衍宗鳳翔劉弘  
業華陰劉濯翼淳化王近泉崇禎時則有長安楊復亨皆以通

經講學聞於時

不朝

李顥字中孚蓋屋人父可從崇禎十四年從總督汪喬年出關征  
關敗於襄城陷陣死顥時年十五母子煢煢日不再食旣長矢  
志力學尤篤信濂洛關閩諸書以明體達用為主性純孝事母  
色養及歿哀毀幾絕葬祭悉如禮服闋訪父遺骸於襄城不獲  
為位痛哭招魂而歸康熙十二年總督鄂善修復關中書院邀  
顥至為諸生講明正學人稱二曲先生督撫薦剡交上先後奉  
旨特徵以疾辭康熙四十二年冬

六龍西狩長安

召見顥時顥已衰老遣子慎言詣行在陳情隨  
賜御書操志高潔以獎之顥復進



呈二曲集反身錄並荷

溫綸襄諭年七十有九卒顯門人如咸寧羅魁韓城程良受蒲城寧維垣邠州王吉相皆篤志力學得知行合一之旨其質美而學未逮者雒南楊堯階舜階同州馬穉士武功張志坦志坦年三十而卒顯慟之爲表其墓志坦父承烈亦學於顯

張珥字敦庵順治丁亥進士李士瓚字文伯歲貢生俱同州人不仕家居篤好正學歲戊申李顯至同州二人首執弟子禮其實皆齒倍於顯也顯力辭二人執禮如故一時謂其忘年向道有古人風士瓚年九十乃卒所著有大學正譜二卷羣書舉要二卷孝經要義一卷四書要諦四卷小學約言一卷理學宗言二卷王陳宗言二卷問疑錄一卷玉山前後集十卷

黨湛字子澄同州人性至孝父患顛疾家人莫敢進湛獨晨夕侍側父歿復廬墓三年人稱其孝居家不營生產瓦孟脫粟安之若素晚年屏居古窰中靜久有禪心每同志講集輒娓娓不倦年八十矍鑠如少年時嘗步訪李顯於蓋屋留止浹旬商証所學至丙夜無惰容既歿西安郡丞郝某爲大書理學孝子之墓以表之

王建常字仲復朝邑人爲諸生家貧力學所著述皆發明儒先排斥異說其得力尤在孝經一書許孫荃聞其名數造請初至持金幣爲壽不敢出改餽葛棉數種不受使者力請乃受其抗節如此建常同里有關獨可者逸其名李顯過朝邑嘗一見之每稱其篤實朴茂與建常在伯仲間云

王化泰蒲城人少好性命之學既長與同志諸人以學術相摩厲嘗賦靜中吟三章直抒心得讀者歎爲見道之言年七十訪李

顯於盤屋質所學又與同州白煥采共肅車迎顯尊以師禮日夕往復無倦色每自謂日暮途遠虛擲此生輒唏噓不已見者悚然煥采字泊如歲貢生厲志正學晚歲與化泰迎顯主其家日集友生會講一時同志之士奉爲宗盟其踐履切實尤篤行之士也

康呂賜字復齋武功人少入鄉校有大志欲以勲業自見久之父母相繼逝居喪如禮服闋遂絕意仕進思欲倡明絕學刻苦數十年忽若有得以致良知爲宗主以慎獨爲工夫以體用一原內外兩忘爲究竟遂名其齋曰慎獨所著有慎獨齋日錄等書宋振麟字子禎淳化人恩貢事母至孝母病盲振麟寢食不寧者三載母目復明人以其孝感性狷介博極羣書與同邑姚開先羅萬藻討論性命之學部檄授教職以疾辭康熙己未以博學鴻詞徵不起所至人爭聘爲經師所著有大學知止義說二程語錄寶鑑及詩文若干首學者宗之

文學

司馬談

秦人見本傳

爲太史公學天官於唐都受易於楊何習道論於黃

子仕於建元元封之間愍學者不達其意而師諄乃論六家之要指子曰遷生龍門耕牧河山之陽十歲誦古文二十南遊江淮上會稽探禹穴窺九疑浮沅湘北涉汶泗講業齊魯之都觀夫子遺風仕爲郎中奉使西征巴蜀以南畧印筴見明還報命太史公卒遷爲太史令抽石室金鎖之書述陶唐以來至於麟趾著十二本紀十表八書三十世家七十列傳凡百三十篇成一家言遷死後其書稍出宣帝時遷外孫平通侯楊惲祖述其書遂宣布焉至于

莽時求遷後封為史通子

漢書本傳

馮商如淳曰商長安人成帝時以能屬書待詔金馬門受詔續太史公書十餘篇師古曰劉歆十略云馮商陽陵人治易事五鹿充宗能屬文博通彊記與孟柳俱待詔頗序列傳未卒會病死

漢書張湯傳贊

註

慶虬之長安人亦為善賦嘗為清思賦時人不之貴也託以相如所

作遂大見重於世

西京雜記

班游

况子長安人

幼博學有俊材左將軍史丹舉賢良方正以對策為議

郎遷中郎將與劉向校秘書每奏事游以選受詔進讀羣書上器其能賜以秘書之副早卒有子曰嗣顯名當世嗣雖修儒學然貴老嚴之術桓生欲借其書嗣報曰若夫嚴子者絕聖棄智修生保真清虛澹泊歸之自然獨師友造化而不為世俗所役者也漁釣

於一壑則萬物不好其志栖遲於一邱則天下不易其樂不結聖人之罔不歎驕君之餽蕩然肆志談者不得而名焉故可貴也今吾子已貫仁誼之羈絆繫名聲之鞶鎖伏周孔之軌躅馳顏閔之極摯既繫學於世教矣何用大道為自眩曜昔有學步於邯鄲者曾未得其髣髴又復失其故步遂匍匐而歸耳恐似此類故不進嗣之行已持論如此

漢書叙傳

張禹字子文軹人禹父徙家蓮勺禹從沛郡施讐受易琅玕王陽膠東庸生問論語舉為郡文學甘露中諸儒薦禹詔蕭望之問禹詩易及論語大義望之善焉奏禹經學精習有師法可試事試為博士初元中立皇太子詔令禹授太子論語出為東平內史成帝即位賜爵關內侯拜給事中領尚書事河平四年代王商為丞相封安昌侯鴻嘉元年以老病乞骸骨罷就第禹為人謹厚內殖貨財

禹雖家居以特進爲天子師國家每有大政必與定議永始元延間日蝕地震尤數吏民上書言災異之應王氏專政所致上意頗然之親問禹因用吏民所言王氏事示禹禹曰災變之意深遠難見新學小生亂道誤人宜無信用上由此不疑王氏建平二年臺謚曰節侯長子宏官太常三弟皆爲校尉散騎諸曹初禹爲師以上難數對已問經爲論語章句獻之諸儒爲之語曰欲爲論念張文由是學者多從張氏餘家寢微

漢書本傳

谷永字子雲長安人父吉爲衛司馬使送郅支單于侍子爲郅支所殺永博學經書御史大夫繁延壽舉爲太常丞建始三年冬日食地震同日俱發詔舉方正直言極諫之士太常舉永待詔公車時對者數十人永爲上第擢光祿大夫元延元年爲北地太守時災異尤數永當之官上使衛尉淳于長受永所欲言永對奏天子甚

感其言永於經書汎爲疏達與杜欽杜鄴略等不能洽浹如劉向父子及揚雄也其於天官京氏最密故善言災異前後所上四十餘事專攻上身與後宮而已黨於王氏上亦知之不甚親信也永所居任職徵入爲大司農卒於家

漢書本傳

杜鄴字子夏本魏郡繁陽人武帝時徙茂陵鄴少孤其母張敞女鄴從敞子吉學問得其家書以孝廉爲郎與車騎將軍王音善鄴見音前與平阿侯譚有隙說音與成都侯商親密二人皆重鄴後以病去郎元壽元年正月朔日食詔舉方正直言扶陽侯韋育舉鄴方正鄴對未拜病卒初鄴從張吉學吉子竦又幼孤從鄴學問尤長小學鄴子林清靜好古亦有雅材建武中歷位至大司空其正文字過於鄴竦故世言小學者由杜公

漢書本傳

班彪字叔皮釋之子與從兄嗣共遊學家有賜書內足於財好古之

士自遠方至父黨揚子雲以下莫不造門唯聖人之道然後盡心焉年二十遭王莽敗世祖即位於冀州時隗囂據隴右公孫述稱帝於蜀漢天下雲擾乃著王命論以救時難知隗囂終不悟迺避地於河西河西大將軍竇融知其美德訪問焉舉茂材爲徐令以病去官後數應三公之召仕不爲祿所如不合學不爲人博而不俗言不爲華述而不作漢書敘傳彪旣才高而好述作專心史籍之間武帝時司馬遷著史記自太初以後闕而不錄彪乃繼採前史遺事傍貫異聞作後傳數十篇辟司徒王況府時東宮初建而官屬未備彪上言宜博選名儒爲太子傅帝納之後察廉爲望都長史民愛之年五十二卒官後漢本傳

班固

彪子

弱冠而孤作幽通賦永平中爲郎典校秘書專篤志於學以著述爲業以爲堯舜之盛必有典謨之篇然後揚名於後世冠德

於百王漢紹堯運以建帝業至於六世史臣乃追述功德私作本

記編於百王之末太初以後闕而不錄故探纂前記綴集所聞以

述漢書起於高祖終於孝平王莽之誅十有二世二百三十年綜

其行事旁貫五經上下洽通爲春秋考記表志傳凡百篇漢書敘傳固

字孟堅父彪卒歸鄉里固以彪所續前史未詳乃潛精研思欲就

其業郡上其書顯宗甚奇之除蘭臺令史使終成前所著書固永

平中受詔潛精積思二十餘年至建初中始成當世甚重其書學

者莫不諷誦焉自爲郎後遂見親近時關中耆老猶望朝廷西顧

固上兩都賦盛稱洛邑制度之美以折西賓淫佚之論及肅宗雅

好文章固愈得幸數入讀書禁中固以二世才術位不過郎作賓

戲以自通後遷元武司馬天子會諸儒講論五經作白虎通德論

令固撰集其事永元初大將軍竇憲以固爲中護軍與參議及憲

敗竇氏賓客皆逮考固遂死獄中

後漢書本傳

馮衍字敬通杜陵人幼有奇才九歲能誦詩二十博通羣書王莽時諸公多薦之者衍不肯仕天下兵起莽遣將軍廉丹討山東丹辟衍爲掾丹戰死衍乃亡命山東更始遣鮑永安集河北衍說永以鎮太原撫上黨永以衍爲立漢將軍扞衛并土世祖即位遣使者招衍衍不肯降後審知更始已歿乃罷兵降於河內帝怨衍不時至遂見黜頃之以爲曲陽令斬劇賊郭勝等論功當封以讒故賞不行衛尉陰興新陽侯陰就深重衍與之交結尋爲司隸從事帝懲西京外戚賓客以法繩之衍由此得罪西歸故郡作賦自厲命其篇曰顯志居貧年老卒於家所著賦誄銘說問交德詰慎情書記說自序官錄說策凡五十篇肅宗甚重其文

後漢書本傳

杜篤字季雅京兆杜陵人少博學不修小節不爲鄉人所禮居美陽

與美陽令遊數從請託不諧頗相恨令怨收篤送京師會大司馬吳漢薨光武詔諸儒誄之篤於獄中爲誄辭最高帝美之賜帛免刑篤以關中表裏山河先帝舊京不宜改營洛邑乃上奏論都賦後仕郡文學掾以目疾二十餘年不闕京師建初三年車騎將軍馬防擊西羌請篤爲從事中郎戰沒於射姑山所著賦誄弔書讚七言女誡及雜文凡十八篇又著明世論十五篇子碩豪俠以貨殖聞

後漢書本傳

王隆字文山雲陽人王莽時以父任爲郎後避難河西爲竇融左護軍建武中爲新汲令能文章所著詩賦銘書凡二十六篇

漢書本傳

田邑蓮勺人有大節涉學藝能善屬文爲漁陽太守道病徵還爲諫

議大夫

東觀記

傅毅字武仲茂陵人少博學永平中於平陵習章句作迪志詩以顯

宗求賢不篤士多隱處故作七激以爲諷建初中肅宗博詔文學之士以毅爲蘭臺令史拜郎中與班固賈逵共典校書毅追美孝明皇帝功德最盛而廟頌未立乃依清廟作顯宗頌十篇奏之由是文雅顯於朝廷毅早卒著詩賦誄頌祝文七激連珠凡二十八

篇

漢書本傳

馬融字季長茂陵人美辭貌有俊才初京兆犖恂以儒術教授融從其學博通經籍恂奇融才以女妻之永初二年大將軍鄧騭召爲舍人不應命客於涼州武都漢陽界中會羌虜騷起米穀湧貴自關以西道殣相望融旣饑困乃往應騭召四年拜校書郎詣東觀典校秘書鄧太后臨朝騭兄弟輔政俗儒以爲文德可興武功宜廢融上廣成頌以諷諫忤鄧氏十年不得調因兄子喪自劾歸太后聞之怒謂融羞薄詔除欲仕州郡遂令葉綰之安帝親政召還

郎習復在講部出爲河間王廐長史時車駕東巡岱宗上東巡頌帝奇其文召拜郎中北鄉侯即位融移病去陽嘉二年詔舉敦樸徵詣公車對策拜議郎大將軍梁商表爲從事中郎轉武都太守時西羌反叛融上疏乞自劾朝廷不能用桓帝時爲南郡太守先是融有事忤梁冀旨冀諷有司奏融在郡貪濁免官髡徙朔方得赦還復拜議郎重在東觀著述以病去官融才高博洽爲世通儒教養諸生常有千數坐高堂施絳紗帳前授生徒後列女樂弟子以次相傳鮮有人其室者初融懲於鄧氏不敢違忤勢家頗爲正直所羞年八十八卒

後漢書本傳

族孫日磾字翁叔少傳融業以才學

進典校中書歷位九卿登台輔

三輔決錄注

蘇順字孝山霸陵人和安間以才學見稱好養生術隱處求道晚乃仕拜郎中所著賦論誄哀辭雜文凡十六篇時三輔多士扶風曹

衆伯師亦有才學著誅書論四篇後漢書本傳

祝龜字元靈南鄭人年十五遠學汝潁能屬文太守張府君奇之曰

吾見海內士多矣無如祝龜者也州牧劉焉辟之不得已行授葭

萌長撰漢中耆舊傳以著述終漢中士女志

楊敷震孫華陰人震少子奉奉子敷篤志博聞議者以為能世其家敷子

衆亦能傳先業後漢書楊震傳

李歷字季子太尉固從弟少修文學性行清白與鄭康成陳元方齊

名弱冠拜新城令朝都督漢中士女志

趙岐字邠卿長陵人少明經有才藝仕州郡以廉直疾惡見憚永興

二年辟司空掾議二千石得去官為親行服朝廷從之其後為大

將軍梁冀所辟為陳損益求賢之策冀不納後舉理劇為皮氏長

會河東太守劉祐去郡而中常侍左悺兄勝代之岐耻疾宦官即

日西歸中常侍唐衡兄珪為京兆虎牙都尉岐數為貶議珪深毒

恨延熹元年珪為京兆尹岐懼禍及逃難四方自匿姓名賣餅北

海市中後諸唐滅乃出擢拜并州刺史岐欲奏守邊之策未及上

會坐黨事免因撰次以為樂冠論中平元年徵拜議郎遷太僕卿

李催專政使太傅馬日磾撫慰天下以岐為副行至洛陽日磾表

別遣岐宣揚國命時袁紹曹操與公孫瓚爭冀州紹及操聞岐至

皆自將兵數百里奉迎岐深陳天子恩德又移書瓚為言利害各

引兵去興平元年詔書徵岐會帝當還洛陽先遣衛將軍董承修

理宮室承表遣岐使荊州岐至劉表即遣兵助修宮室軍資委輸

前後不絕於是拜岐為太常建安六年卒著孟子章句三輔決錄

傳於時後漢書本傳孟子得立為博士實自岐始續文獻通考嚴象字文則

京兆人少聰博有膽智為揚州刺史同郡趙岐作三輔決錄恐時



人不盡其意故隱其書唯以示象魏志荀彧傳注

士孫瑞字君榮扶風人世為學門瑞少傳家業博達無所不通仕歷

顯位遷大司農為國三老子萌字文始亦有才學與王粲善粲嘗

作詩以贈萌有答在彙集中三輔決錄注

陳述字申伯漢中人博學多聞著釋問七篇益都耆舊傳及志位歷

三郡太守三國志  
小字誤傳

**魏**

杜寬字務叔理子杜陵人清虛元靜敏而好古以名臣門戶少長京

師而篤志博學絕於世務其意欲探蹟索隱由此顯名堂塗之士

多交焉舉孝廉除郎中年四十二而卒皇傳之義多所草創未就

惟刪集禮記及春秋左氏傳解今存於世注氏  
新書

賈洪字叔業新豐人好學有文才精於春秋左傳建安初仕郡舉計

掾應州辟時州中自參軍以下百餘人唯洪與馮翊嚴苞交通村

學最高洪歷守三縣令所在輒開除廩舍親授諸生後馬超反劫

洪將詣華陰使作露布洪不獲已為作之司隸鍾繇在東識其文

曰此賈洪作也及超破走太祖召洪署軍謀掾猶以其前為超作

露布文故不即叙晚乃出為陰泉長延康中轉為白馬王相彪亦

雅好文學常師宗之過於三卿數歲病亡三國志  
王肅傳

楊修字德祖震元孫  
華陰人少好學有俊才為丞相曹操主簿操平漢中欲

因討劉備而不得進欲守之又難為功護軍不知進止何依操出

教唯曰雞肋而已外曹莫能曉修獨曰夫雞肋食之則無所得棄

之則如可惜公歸計決矣修機決多此類操於此忌修且以袁甫

之甥慮為後患遂因事殺之所著賦頌碑讚詩哀辭表記書凡十

五篇後漢書  
楊震傳修謙恭才博是時軍國多事修總知外內事皆稱意

自魏太子已下並爭與交好臨苗侯植以才捷愛幸雅意投修數與修書往來甚數植後以驕縱見疏而植故連綴修不止修亦不敢自絕至二十四年秋公以修前後漏泄言教乃收殺之典修子囂囂子准皆知名於晉世准子嶠字國彥髦字士彥並爲後出之

俊

魏志陳思王傳注

嚴幹字公仲李義字孝懿馮翊東縣人性皆厚重建安初詔分馮翊西數縣爲左內史郡治高陵義於縣分當西屬義謂幹曰西縣兒曹不可與爭坐席今當共作方牀耳遂相附結皆仕東郡郡舉幹孝廉義上計掾義留京師爲平陵令遷冗從僕射遂歷顯職文帝即位拜執金吾衛尉卒官幹以孝廉拜蒲坂令病去官詔拜議郎以建策討高幹又追錄前討郭援功封武鄉侯遷弘農太守明帝時遷太僕數歲卒始李義以直道推誠於人故於時陳羣等與之

齊好幹從破亂之後更折節學問特善春秋公羊鍾繇不好公羊而好左氏謂左氏爲大官謂公羊爲賈誼家數與幹辯折長短繇爲人機捷善持論幹口訥臨時無以應繇謂幹曰公羊高竟爲左邱明服矣幹曰某故吏爲明使君服耳公羊未肯也魏志裴潛傳注

加淳馮翊人魏陳郡丞注漢書

漢書叙例

摯虞字仲洽長安人父模魏太僕虞少事皇甫謐才學通博著述不倦舉賢良策爲上第拜中郎時天子留心政道吳寇新平海內又安上太康頌以美晉德以毋憂解職以之召補尚書郎是時太廟初建詔普增位一等以主者承認失旨改除之虞以爲不可詔從之元康中遷吳王友時荀顛撰新禮使虞討論得失而後施行後歷秘書監衛尉卿從惠帝幸長安及東軍來迎百官奔散遂流離

廓杜之間轉入南山中糧絕饑甚拾橡實而食之後得還洛歷光祿勳太常卿時懷帝親郊自元康以來不親郊祀禮儀廢弛虞考正舊典法物粲然及京洛荒亂盜竊縱橫人饑相食虞素清貧遂以餒卒撰文章志四卷注解三輔決錄又撰古文章類聚區分為三十卷名曰流別集各為之論辭理愜當為世所重晉書本傳

韋元字祖思京兆人隱居養志恬淡寡欲博涉經史尤善屬文姚興備禮致之見與不拜興亦重其志操厚為之禮劉裕辟為相國掾亦不就十六國書本傳

**南齊**

韋纂

陵人

仕齊位司徒記室沈約嘗稱於上曰恨陛下不與此人

同時其學非臣輩也

南史韋纂傳

**北魏**

韋稜

正弟杜陵人

性恬素以書史為業博物強記當世之士咸就質疑位

光祿卿著漢書續訓三卷

梁書韋稜傳

**北魏**

楊暉字延季

津弟華陰人

性雅厚有文學孝昌初正武衛將軍加散騎常

侍安南將軍子元讓祠部郎中

魏書楊暉傳

**北周**

蘇亮字景順

綽從兄武功人

祖稚字天祐位中書侍郎玉門郡守父祐泰山

郡守亮少通敏博學好屬文與弟湛等皆著名西土一家舉二秀才亮初舉秀才至洛陽過河內常景景深器之而謂人曰秦中才學可以抗山東者將此人乎魏齊王蕭寶夤引為參軍寶夤雅相知重凡有文檄謀議皆以委之尋行武功郡事甚著聲績及長孫承業余朱天光等西討並以亮為郎中專典文翰賀拔岳為關西

行臺引亮爲左丞典機密魏孝武西遷遷吏部郎中拜黃門侍郎除中書監領著作修國史亮有機變善談笑有所籌議率多會旨記人之善忘人之過薦達後進常如弗及故當世敬慕拜侍中卒於位亮少與從弟綽俱知名世稱二蘇所著文筆數十篇頗行於

世子師以亮名重起家黃門侍郎

北史本傳

顏之儀字升幼穎悟三歲能讀孝經及長博涉羣書好爲詞賦常獻梁元帝荆州頌辭致雅贍江陵平之儀隨例遷長安周明帝以爲麟趾學士武帝初建東宮盛選師傅以之儀爲侍讀太師宣帝即位進爵爲公帝後刑政乖僻之儀犯顏驟諫雖不見納終亦不止宣帝崩劉昉鄭鐸等以隋文帝爲丞相補少主之儀拒而不從昉等草詔署訖逼之儀署不可乃代署而行之文帝後索符璽之儀曰此天子物宰相何故索之文帝將戮之以其人望乃止開皇五

年拜集州刺史在州清淨夷夏悅之有文集十卷行於世

北史本傳

傅准北地人祖照光祿大夫父譚湘東王外兵參軍准有文才善詞賦以西中郎參軍隨蕭詧之鎮官至度支尚書所著文集二十卷

有二子曰秉曰執並才兼文史

周書本傳

何妥字栖鳳西城人少機警高祖受禪除國子博士加散騎常侍進爵爲公性勁急好是非人物蘇威時兼領五職上甚親重之妥因奏威不可信任又以掌天文律度皆不稱職妥上八事以諫威大銜之上令妥考定鍾律錄三調四舞曲名又製歌辭書奏勅太常取妥節度於是作清平瑟三調聲又作八佾鞞巾拂四舞先是太常所傳宗廟雅樂數十年惟作大呂廢黃鐘妥又以深乖古意乃奏請用黃鐘議從之後出爲龍州刺史時有負笈遊學者妥皆

為講說教授之在職三年以疾請還詔許之後知學事時上方使蘇夔在太常議鐘律有所建議朝士多從之夔獨不同朝臣多排夔夔復上封事指陳得失大抵論時政損益指斥當世朋黨於是蘇威等皆坐得罪尋為國子祭酒卒諡曰肅

隋書本傳

蘇夔字伯尼

威子武功人

聰敏有口辯八歲誦詩十四詣學與諸儒議論

詞致可觀見者皆稱善及長博覽羣言尤以鐘律自命起家太子通事舍人後與鄭譯何妥議樂得罪議寢不行著樂志十五篇以見其志仁壽三年詔天下舉達禮樂源者晉王昭時為雍州牧舉夔帝謂侍臣曰唯此人稱吾所舉拜晉王友煬帝即位蠻夷來朝帝謂虞世基曰四夷率服觀禮華夏鴻臚之職須歸令望咸以夔對即拜鴻臚少卿突厥圍雁門夔為弩樓車箱以功進位通議大夫丁母憂不勝哀卒

北史蘇夔傳

常得志京兆人隋秦王記室及王薨過故第為五言詩辭理悲壯為時人所重復為兄弟論義理可稱

北史本傳

姚思廉

陳吏部尚書察之子陳亡察自吳興遷遂為萬年人思廉少

受漢書於察盡傳其業初察嘗修梁陳二史未就死以屬思廉思

廉表父遺言有詔聽續煬帝又詔修區寓圖志遷代王侍讀高祖

定京師府僚皆奔亡獨思廉侍王兵將升殿思廉厲聲曰唐公起

義本安王室若等不宜無禮衆却列階下帝義之聽扶王至順陽

閣泣辭去觀者歎曰仁者有勇謂此人乎俄授秦王府文學時思

廉在洛陽王遣使遺物三百段致書曰景想節義故有是贈王即

位改著作郎弘文館學士詔撰梁陳書思廉采謝昺顧野王等諸

家言推究綜括為梁陳二家史以卒父業加通直散騎常侍凡政

事得失許密以聞思廉亦展盡無所諱拜散騎常侍卒諡曰康

唐書

袁朗長安人陳尚書左僕射樞之子陳亡徙關中朗勤學好屬文在

陳釋褐秘書監為江總所重嘗製千字詩當世以為盛作陳後主

召入禁中使為月賦朗染翰立成又使為芝草嘉蓮二頌深見優

賞武德初授齊王文學貞觀初卒官太宗為之廢朝一日謂高士

廉曰袁朗在任雖近然其性謹厚特使人傷情因勅給其喪事有

文集十四卷從父弟承序武德中齊王元吉聞其名召為學士高

宗在藩太宗選學行之士為僚屬召守晉王友仍令侍讀加授弘

文館學士未幾卒

舊唐書本傳

杜淹字執禮

如晦叔杜陵人

材辯多聞有美名秦王引為天策府兵曹參軍

文學館學士嘗侍宴賦詩尤工及踐祚召為御史大夫勅東宮儀

與悉聽淹裁訂俄檢校禮部尚書參預朝政貞觀二年卒諡曰襄

子敬同官鴻臚卿

唐書杜如晦傳

令狐德棻華原人博貫文史高祖入關引直大丞相府記室武德初

遷秘書丞是時大亂後經籍亡散秘書湮缺德棻始請帝購求遺

書置吏補錄不數年圖典略備又建言近代無正史陳齊文籍猶

可據至周隋事多脫損今不論次各為一王史則先烈世庸後無

傳焉於是論譔歷年不就罷之貞觀三年復詔撰定五家史德棻

次周史書成遷禮部侍郎兼修國史坐事免會修晉史房元齡奏

起之德棻為先進類例多所譏定除秘書少監永徽初復為禮部

侍郎弘文館學士兼修國史高宗嘗問王霸孰先德棻曰王任德

霸任刑又問禹湯桀紂所以興亡對曰傳稱禹湯罪已其興也勃

焉桀紂罪人其亡也忽焉二主惑嬖色戮諫者造炮烙之刑此所

以亡也帝悅厚賜遷國子祭酒崇賢館學士爵爲公卒謚曰憲恒  
德棻五世孫天寶末及進士第遇亂隱南山豹林谷楊綰徵時數  
從之游綰修國史薦恒拜右拾遺兼史職撰元宗實錄哀擢詔策  
備一朝之遺大曆中遷司封郎中知制誥兼史館修撰建中初爲  
禮部侍郎貞元五年貶卒初受詔撰代宗實錄未就會貶詔聽在  
外成書元和中其子太僕丞丕獻之以勞贈工部尚書唐書本傳  
孟利貞華陰人父神慶沁州刺史以清介著名利貞初爲太子司議  
郎受詔與少師許敬宗崇賢學士郭瑜顧引董思恭等撰瑤山玉  
彩五百卷龍朔二年奏上之高宗稱善又撰續文選三十卷兄允

忠垂拱中爲天官侍郎

舊唐書本傳

徐齊聃字將道長城人世客馮翊八歲能文舉弘文生高宗時崇文  
館學士侍皇太子於芳林門時姑爲帝媿奸嫌以恩進求出爲桃

林令咸亨初詔突厥酋長子弟事東宮齊聃上書諫以爲非左右  
惟其人之義又長孫無忌以讒死家廟毀頓齊聃言齊獻公陛下  
外祖後嗣有罪不宜毀及先廟今周忠孝公廟崇飾踰制非所以  
示海內帝寤有詔復其祀齊聃善文誥帝愛之令侍皇太子及諸  
王屬文坐漏禁中事貶卒子堅字元固幼有敏性舉秀才及第聖  
曆中東都留守楊再思王方慶引爲判官方慶善禮學嘗就質疑  
晦得所未聞屬文典厚再思每目爲鳳閣舍人樣與徐彥伯劉知  
幾張說與修三教珠英時張昌宗李嶠總領彌年不下筆堅與說  
專意撰綜條彙粗立諸儒因之乃成書睿宗即位遷黃門侍郎元  
宗改麗正書院爲集賢院以堅充學士副張說知院事堅於典故  
多所諳識凡七當選次高選卒謚曰文子嶠字巨山開元中爲集  
賢院直學士遷中書舍人父子相次爲學士自祖及孫三世爲中

書舍人唐書本傳

楊炯華陰人幼聰敏博學善屬文舉神童拜校書郎為崇文館學士俄授盈川令如意元年七月望日宮中出孟蘭盆分送佛寺則天御洛南門與百僚觀之炯獻孟蘭盆賦詞甚雅麗卒官贈著作郎文集三十卷炯與王勃盧照隣駱賓王以文詞齊名海內稱王楊盧駱亦號為四傑炯聞之謂人曰吾媿在盧前耻居王後當時議者亦以為然舊唐書本傳

江融蓋屋人撰九州設險圖備載古今用兵成敗之事舊唐書魏元忠傳

富嘉謨雍州武功人舉進士與新安吳少微友善先是文士撰碑頌皆以徐庾為宗氣調漸劣嘉謨與少微屬詞皆以經典為本時人欽慕之文體一變稱為富吳體嘉謨作雙龍泉頌千蠲谷頌詞最高雅作者推重後預修三教珠英為左臺監察御史卒有文集五

卷舊唐書本傳

李適萬年人景龍中為中書舍人轉工部侍郎睿宗時天臺道士司馬承禎微至京師及還適贈詩叙其高尚之致其詞甚美當時朝廷之士無不屬和凡三百餘人徐彥伯編而叙之謂之白雲記頗傳於代尋卒舊唐書本傳適子季卿亦能文舉博學宏辭肅宗時為中書舍人代宗立進吏部侍郎河南江淮宣慰使號振職大曆中終右散騎常侍遺命以布車一乘葬季卿在朝薦進才髦與人交有終始恢博君子也唐書李適傳

蘇晉珣子璵田人數歲知為文作八卦論舉進士及大禮科皆上第先天天子嘉允始晉與洛人張循之仲之善循之上書忤武后見殺仲之神龍中謀去武三思為宋之慈等所發死晉厚撫其子漸為營



婚宦晉卒漸喪之若諸父云

唐書本傳

鄧元挺藍田人少善屬文為頓邱令有善政累授中書舍人性俊辯

機捷過人出為澧州刺史後以善政聞召拜天官侍郎

舊唐書本傳

祝琳字叔良欽明父始平人少通經頗著書終無極尉

唐書祝欽明傳

韋述杜陵人家廚書二千卷述為兒時誦憶略徧父景駿神龍中

為肥鄉令述從到官元行冲景駿姑子也為時儒宗嘗載書數車

自隨述入其室觀書不知寢食行冲異之與語前世事復詳諦如

指掌使屬文授帝輒就行冲曰外家之寶也舉進士時方少儀質

陋悅考功員外郎宋之問曰童子何業述曰性嗜書所撰唐春秋

二十篇恨未畢他惟命之問曰本求茂才乃得遷固遂上第述好

譜學故於百氏源派為詳撰開元譜二十篇張說領集賢院薦述

為直學士遷起居舍人先是詔修六典徐堅構意歲餘未有所適

及蕭嵩引述撰定述始摹周六官各領其屬事歸於職規制遂定

初令狐德棻吳兢等譏武德以來國史皆不能成述因二家參以

後事遂分紀傳又為例一篇文約事詳蕭穎士以為譙周陳壽之

流改國子司業充集賢學士累遷工部侍郎弟道迪學業亦亞述

述與道對為學士與迪並禮官摺紳高之

唐書本傳

于休烈志寧曾孫高陵人機鑿融敏善文章開元初第進士又擢制科遷比

部郎中肅宗立遷太常少卿知禮儀事兼修國史時經大盜後史

籍燔缺休烈獻五代論討著舊章天子嘉之代宗立甄別名品拜

右散騎常侍兼修國史累進工部尚書封東海郡公雖歷清要不

治產性恭儉仁愛無喜愠之容樂賢下善推轂士甚眾年老篤意

經籍嗜學不厭卒年八十一諡曰元二子益肅及休烈一時相繼

為翰林學士益天寶初及進士第肅終給事中肅子教字蹈中擢

進士元和初拜監察御史遷戶部侍郎出爲宣歙觀察使教修謹家世用文學進四子珪球瓌琮皆清顯

唐書于志寧傳

于邵萬年人天寶末第進士以書判超絕補崇文校書郎由比部郎中爲道州刺史未行徙巴州會歲饑部僚飢薄城下邵勵兵拒戰且遣使諭曉僚丐降邵儒服出賊見皆拜即引去授兵部郎中俄以諫議大夫知制誥進禮部侍郎朝有大典冊必出其手邵孝悌有行晚塗益修潔樊澤始舉賢良邵望見曰將相材也崔元翰舉進士年五十矣邵以其文擢異等曰後當司詔令已而皆然獨孤授舉博學宏詞吏部考當乙邵覆之置甲科人答其公

唐書本傳

蘇源明武功人工文辭有名天寶間及進士第累遷國子司業安祿

山陷京師源明不受僞署肅宗復兩京擢考功郎中知制誥數陳

政治得失後以秘書少監卒

唐書本傳

賈叔向字遺直京兆人代宗時常袞爲相用爲左拾遺內供奉袞退亦出爲溧水令四子登第羣以處士隱

陝東夏鄉薦之朝德宗

擢爲左拾遺代武元衡爲中丞羣與兄常牟弟庠羣皆爲郎工詞章爲聯珠集傳於時義取昆弟若五星然

全唐詩話

韋綬

貫之兄杜陵人

舉孝廉又貢進士後擢明經德宗時以左補闕爲翰林

學士密政多所參逮以母老自解職每請帝輒不悅出入八年性謹甚晚感心疾罷還第九月九日帝爲黃菊歌顧左右曰可示韋綬即遣使持往綬遽奉和附使進帝曰爲文不已豈頤養耶勅自今勿復爾終左散騎常侍弟縑有精識爲士林器許兄弟皆名重

當時

唐書韋貫之傳

韋顛字周仁諤弟益之子萬年人通陰陽象緯博知山川風俗論議典據以蔭補千牛備身歷御史補闕裴均韋貫之李絳崔羣蕭俛

皆布衣舊繼爲相朝廷典章多所資逮累遷御史中丞爲戶部侍

郎徙吏部卒所著易經解推演終始有深誼

唐書韋  
奏傳

杜牧字牧之

綜從弟  
萬年人

善屬文第進士舉賢良方正沈傳師表爲江西

團練府巡官又爲牛僧孺淮南節度書記府擢監察御史拜殿中

侍御史是時劉從諫守澤潞何進滔據魏博頗驕蹇不循法度牧

追咎長慶以來朝廷措置亡術故作罪言歷黃池睦三州刺史入

爲司勳員外郎常兼史職復乞爲湖州刺史遷中書舍人牧剛直

有奇節敢論列大事指陳病利尤切至從兄侗更歷將相而牧困

躓不自振卒年五十自爲墓誌悉取所爲文章焚之牧於詩情致

豪邁人號爲小杜以別杜甫云弟顓字勝之幼病目毋禁其爲學

舉進士禮部侍郎賈餗曰得杜顓足歡百人李德裕奏爲浙西府

賓佐德裕貴盛賓客無敢忤惟顓數諫正之及謫袁州歎曰門下

愛我皆如顓吾無今日太和末召直史館顓亦善屬文與牧相上

下

唐書  
本傳

楊收字藏之世居馮翊父遺直德宗時仕爲濠州參軍收七歲而孤

處喪若成人善屬文所賦輒就號神童及長博學彊記他藝無不

通解涇陽耕者得古鐘高尺餘收扣之曰此姑洗角也旣刮拭有

刻在兩樂果然嘗言琴通黃鐘姑洗無射三均側出諸調由羅薦

附灌木然時有安浼者世稱善琴且知音收問五絃外其二云何

曰世謂文武二王所加者收曰能爲文王操乎浼即以黃鐘爲宮

而奏之以少商應大絃收曰如子言少商武絃也且文世安得武

聲乎浼大驚因問樂意收乃取律次之以示浼浼時七十餘以爲

未始聞而收未冠也擢進士懿宗時累擢中書舍人翰林學士承

旨以中書侍郎同中書門下平章事始南蠻掠交趾調華人往屯

涉氛瘴死者十七蠻勢益張收議豫章募士三萬置鎮南軍以拒蠻悉教蹋張戰必注滿蠻不能支又峙食汎舟餉南海天子嘉其功進尚書右僕射楊元价陰加短毀罷為宣斂觀察使詔賜死後三年詔復官子鉅鑄鉅乾寧初為翰林學士從入洛終散騎常侍

鑄至戶部尚書

唐書本傳

**五代**

李懌京兆人少好學頗工文辭唐末舉進士為秘書省校書郎集賢校理天成中為中書舍人翰林學士累遷尚書右承旨時右散騎常侍張文寶知貢舉所放進士中書有覆落者乃請下學士院作詩賦為貢舉格學士竇夢徵張礪等所作不工乃命懌為之懌笑曰予少舉進士登科蓋偶然耳後生可畏來者未可量假令予復就禮部試未必不落第安能與英俊為准格聞者多其知體遷刑

部尚書分司洛陽卒

五代史本傳

**宋**

李滉字日新

清弟萬年人

幼聰敏慕王楊盧駱為文章後唐長興初吳越

王錢鏐卒詔兵部侍郎楊凝式撰神道碑令滉代草凡萬餘言文彩道麗時輩稱之晉天福中召為翰林學士契丹入汴滉陷塞北應曆十二年卒兄濤收滉文章編之為丁年集子承確主客郎中

承續職方郎中

宋史李濤傳

安儼邵陽人父廷鑑工部郎中儼負奇節善屬文舉進士授大理評事刑平政理歷秘書省著作郎帝謂曰卿文章純粹為時名器宜懋乃德故沃朕心加右司諫出知鄜州蘇州皆多良績

同州志

韓溥長安人唐相休之裔孫少俊敏善屬文周顯德初舉進士開寶三年自靜難軍掌書記召為監察御史三遷至庫部員外郎再轉

司門郎中淳化二年被病表請辭職許之溥博學善持論詳練臺閣故事多知唐朝氏族與人談亶亶然可聽號爲近世肉譜搢紳頗推重之尤善筆札人多藏其尺牘弟洎亦進士及第

宋史本傳

韓丕字太簡華州鄭人幼孤貧有志操讀書驪山嵩陽通周易禮記太平興國三年舉進士聲名籍甚嘗著孟母碑返魯頌人多諷誦之知河陽濠州丕起寒素以冲淡自處太宗甚嘉重之爲翰林學士又出知滁州卒丕純厚畏慎歷典州郡能以清介自持

宋史本傳

楊礪字汝礪鄆人曾祖守信唐山南西道節度使祖知禮後唐均州刺史父仁儼永和令勵建隆中舉進士甲科父喪服除以祿不足養母閑居無仕進意開寶九年詣闕獻書授隴州防禦推官真宗尹開封礪爲推官真宗嘗問礪何年及第礪唯唯不對後知其唱名第一自悔失問謂礪不以科名自伐甚重之拜給事中判吏部

未幾召入翰林爲學士咸平初拜樞密副使卒真宗軫悼謂宰相曰礪介直清苦方當任用遽此淪謝即冒雨臨其喪礪儻舍委巷中乘輿不能進步至其第嗟憫久之礪爲文無師法每詩一題或數十篇有文集二十卷子矯祠部郎中嶧太常博士峭太子中舍少子喁至道初刊校真宗儲邸書籍賜進士出身直史館

宋史本傳

陶穀字秀實邠州人本姓唐邕儉皆其遠祖因避晉祖諱而更爲陶遂不復其舊父渙唐末仕至刺史爲邠州帥楊崇本所害穀隨母育崇本家幼有俊才漢相李崧奇之宋興歷禮刑戶部三尚書宋之南郊法物制度皆其所定博記美詞翰滑稽好大言佛老之書陰陽之學亦能詳究

隆平集

宋浞字持正長安人曾祖擇牟平令祖贊萬年令父溫故左補闕弟溫舒職方員外郎浞幼警悟早孤與兄泌勵志篤學事母以孝聞

溫舒典耀州提待行代作牋奏詞欽而麗溫舒拊背曰此兒真國器也太平興國五年進士釋褐將作監丞咸平元年充樞密副使卒謚忠定滉風貌秀整有醞藉器識冲遠好學美文詞筆法道媚人多傳傲喜引重後進有名者又好趨人之急當世士流翕然宗仰之有文集二十卷兄泌至起居郎直史館溫舒子沆州倅喜西

京提點刑獄宋史本傳

張宗永華州人倜儻不羈善為詩寶元中知建安縣時鄭州陳相尹京兆宗永以事失公意公有別業在鄆杜間宗永知公好絕句詩乘間詣之於舍壁大書二韻莊督錄以聞公覽而善之宗永常有詩云大書文字隄防老剩買峰巒准備閒佳句往往膾炙人口

犀揮

李鷹字方叔其先自鄆徙華鷹少長以學問稱鄉里謁蘇軾於黃州

贊文求知軾謂其筆墨瀾翻有飛沙走石之勢拊其背曰子之才萬人敵也鷹再拜受教而家素貧三世未葬一夕撫枕流涕曰吾忠孝焉是學而親未葬何以學為且而別軾軾解衣為助又作詩勸風義者於是不數年盡累世之喪三十餘樞歸窆華山下益閉門讀書又數年再見軾軾閱其所著歎曰張未秦觀之流也鷹中年絕進取定居長社卒鷹喜論古今治亂條暢曲折辨而中理當喧溷倉卒間如不經意脾睨而起落筆如飛馳元祐求言上忠諫書忠厚論並獻兵鑒二萬言論西事朝廷擒羌酋鬼章將致法鷹深論利害以為殺之無益願從寬大當時雖其言

宋史本傳

**金**

邊元鼎字德舉豐州人兄元勳元恕俱有時名號三邊德舉十歲能詩天德三年第進士世宗即位張浩表薦供奉翰林德舉資稟疎

俊詩文有高意時輩少及

中州集

黨懷英字世傑馮翊人大定年中進士第除翰林待制兼修國史能屬文工篆籀當時稱爲第一學者宗之充遼史刊修官章宗即位旁求文學之士以備侍從謂宰臣曰近日制誥惟黨懷英最善再遷侍講學士承安二年致仕明年詔爲翰林學士承旨卒諡文獻

金史本傳

景覃字伯仁華陰人年十八有賦聲大定初三赴廉試後以病不就舉博極羣書有舉問者立誦數百言不休又從而講說之爲人誠實樂易不修威儀隱居西陽里以種樹爲業落拓嗜酒醉則浩歌日以爲常作詩有功樂府亦可傳伯仁老不廢書有勸以養目力者曰吾輩非讀書則無所用心要當死而後已耳晚年於易有所得年七十終於家自號渭濱野叟有集傳關中

中州集

涓大加賞異阜昌中登科蒞官亦有聲馬嵬太真墓過客題詩甚多道陵詔錄其詩得五百餘首付詞臣第之真卿詩在高等舊有錦溪集亂後不復見矣子師楊亦能詩尤工書翰

中州集

張建字吉甫蒲城人明昌初舉才行授絳州教官召爲應奉翰林文字以老乞身道陵愛其淳素不欲令去左右眷眷以之超同知華州防禦使事仍賜詩士林榮之吉甫自號蘭泉老人有集行於世其論詩云作詩不論長篇短韻須要詞理具足不欠不餘如荷上灑水散爲露珠大者如豆小者如粟細者如塵一一看之無不圓成始爲盡善吉甫詩雖不能盡如所言然亦未爲無所得也

金詩本傳

華州楊庭秀學詩於吉甫有集行世

華州志

李端甫字濟夫同州人第進士仕爲平定軍事判官工於詩有虎迹

未乾溪水近樵聲相答嶺雲深之句

中州集

雷瑄字伯威坊州人以薦書從事史館博學能文時輩少有及者并州人李汾與伯威同在史館以高寔得罪伯威作詩送之頗譏翰林諸人不能少忍至與一書生相角逐使之狼狽而去有即君未及留商隱官長從教罵廣文之句又云明日春風一杯酒與君同酌信陵墳人甚稱之

中州集

馮辰字駕之臨潼人貞祐三年進士九歲知作詩

金詩本傳

郝鼎臣字巨卿韓城人博識洽聞文章光艷名重當時泰和八年占京兆府試擢巍科金衰流落之汴元丞相耶律公爲董軍國事適汴張宴以待四方之士於是入謁大加歎賞鼎臣戊戌年京兆府學置貢院於三場內俱登魁甲尤長詞賦充本省參議兼提舉學

校事

岳松撰墓志

唐塾富平人元進士博極羣書抱負宏博學者翕然宗之稱犀峰先生

富平志

第五昌言富平人博通經書爲奉元路儒學學正

賈志

董立字植夫以明經中經元隱居教授徵拜翰林修撰輔導儲副遷司業以績著累擢陝西行臺侍御史卒謚文定

雍大記

郭良字文易華陰人洪武中舉人爲邯鄲教諭上幸國學觀所作教世子詩忠愛懇至擢北平參議永樂中征安南功加大司馬督理漕運退隱明志結廬羅敷山中雅善吟詠嘗與解大紳競敏有詩

集數卷

賈志

趙璧字子深醴泉人沉靜好學綜攬百家尤精於大學章句洪武時



碑本學訓導賈志

劉順字孝夫富平人天資英慧少家貧嘗灌園養母遇方士授以易遂大有文名構文時以木畫地代紙筆歲不給嘗負米同官山中值縣尹索諸士子章莫應也乃授漿於順授筆立成尹奇之督學者列高等薦於鄉爲夏縣知縣衣不掩膝道義朴直卓有躬行君子之風賈志

魏浩咸陽人隱居龍巖號龍巖先生博聞強識綜貫百家尤長於詩賦又同里李儼號涓濱散人性剛直嗜學通經鄉先生劉源授以大易圖序遂明數學吉凶無不應所著有擊壤後塵十卷馬志

雷霖字弘濟華陰人景泰中解元會試第二歷提學副使詩文豪宕爲時名宿西安府志

王九思字敬夫鄆人弘治丙辰進士李東陽當國爲清新流麗之詩

和平暢達之文士林宗尚九思亦學其體考選庶吉士契東陽意遂得選首授翰林檢討及李夢陽起而倡古文辭九思一洗舊習從之東陽以其文異已出爲壽州同知至則與州人士評說古文辭州人士翕然樂向九思聞美風流不拘禮節而談笑有韻下及艷曲小令亦皆新奇工美極人情之致名山藏

張鳳翔字光世洵陽人弘治己未進士官戶部主事光世生有異質落筆千萬言左手橫書瞬息滿紙與李獻吉同舉於鄉又同官戶部王公大人求識面者無虛日聲名出李上而光世故推李兄事之光世卒母七十餘歲子七歲獻吉上書孝宗請養贍其母妻孝

宗仁聖遠允行焉列朝詩集

侯自明白水人弘治中進士幼聰慧長與康海王九思何景明呂柟游博學能詩文善草書以地曹主事忤逆瑾論安慶判時值劉六

等寇襄樊浮江漢自明預畫密計以一矢斃渠魁皖城士制冊頌之官至叙瀘兵備

賈志

康鏞字振遠武功人八九歲即孝友善文辭有所著述長老爭紀頌之弱冠益深明事理曰序述不若馬遷理辨不若孟軻功澤不若伊傅是未可已矣以歲貢爲平陽府知事卒

墓誌

子海宇德涵弘治壬戌進士及第第一人授翰林修撰夙稟靈秀不事章句掇探旨

與融通大義而已嘗曰經籍古人之魄也有魂焉吾得其魂爾矣論道則以無定爲真論學則以適用爲是論文則以達質爲良劉瑾用事以海鄉人欲致之海常自疎濶其後李夢陽下獄瑾幾殺之矣夢陽妻弟曰左國玉者爲書通海乞請劉生之海謝國玉曰我固自遠於劉太監乃何惜生李子即上馬馳至瑾門門者阻之海曰我康狀元乃公里人瑾聞即攝衣出迎坐海上坐留海飲海

談笑覲瑾曰自古三秦豪傑有幾瑾愕然曰惟先生教之海曰昔桓溫問王猛三秦豪傑何以不至猛捫虱而談世務三秦豪傑舍猛其誰溫闖若此哉瑾面發赤疑其譏已因問曰於今則幾海默然屈指曰三人爾昔王三原秉銓衡進賢退不肖今則有密勿親信在帝左右瑾意指已轉發喜色因復問曰尚有一人其先生乎無謂王猛在前而吾不識海曰公何謬稱其一人者今李白也海卑卑耳瑾固問則曰昔曹操憎禰衡假手黃祖此奸雄小智李白醉使高力士脫靴可謂輕傲力士力士脫而不辭容物大度也瑾俛首思曰先生豈謂李夢陽耶此人罪當誅海即起辭瑾謝曰我知我知明日入奏出夢陽瑾諷海欲以爲吏部侍郎海固辭自是時時有匡正而亦自是益親瑾敗坐瑾黨奪官爲民

名山

德涵旣罷免以山水聲伎自娛間作樂府小令使青衣被之管弦歌以侑

觴楊侍郎廷儀過澣西留飲甚歡自起彈琵琶勸酒楊言家兄在內閣殊相念何不以尺書通問德涵怒擲琵琶撞之揚走追而罵曰吾豈效王維假作伶人借琵琶討官做耶歸田三十餘年其歿也遺囊蕭然大小鼓却有三百副其風致可思也阜字德瞻德涵兄時有神童之目卒年十九泉字子寬德涵子爲武功縣學生年二十二而夭有詩百餘篇王漢陂其婦翁爲序而刻之列朝詩集張治道字孟獨長安人穎記絕人爲諸生率試高等又嫻於詩賦議論如懸河而性剛氣豪尚奇節一時咸推服之正德甲戌登進士授長垣令三年以治行擢授刑部主事與部僚薛蕙劉儲秀胡侍並以詩名都下號西翰林夢其母病乃上疏引疾歸遂不復仕一意讀書爲文章與王九思康海一見語合數與縱論詩文遨遊終南鄠杜間遇山水勝處輒命酒歌咏或語及天人古今之際浩渺

閱肆時人莫測也家居四十年著述甚富

邱隅集

馬汝驥字仲房綏德州人正德丁丑進士選翰林庶吉士正德己卯當授官值威武南巡率同館士六七人赴關請止罰跪闕下五日拜杖出知澤州世廟即位錄諫官召還爲編修歷陞禮部右侍郎上方興禮樂諸公日聚講議仲房遇集議矢口駁正斧劈理解分宜數言之上前將大拜以病卒官有西元詩集列朝詩集仲房生平最工文辭尤練習典故論者謂不愧詞臣之選云賈志

王謳字舜夫白水人正德丁丑進士累官按察司僉事鎮宣府引疾歸卒舜夫風神散朗負氣任俠有高才而無貴仕故多煩促黷殺之音五言隱秀時可尋味七言專力學杜詩曰彭衙集自正德戊寅逮嘉靖丙戌才九年所作近千六百篇列朝詩集

王維楨字允寧又號槐野華陰人嘉靖乙未進士選庶吉士歷翰林

侍讀乞養母不許遷南國子祭酒便道省母會關中地大震遂歿  
維楨之文豁達疏宕若泓瀾流江明霞嶺天入門學司馬子長推  
尊鄉先達李夢陽躋之聖境其始載筆承明修賦頌之業海內宗  
重居十餘年戎馬生郊與士大夫講方畧論戰守又自言其爲人  
淺中狹氣蕙直樸畧平生未嘗倒心反舌亂是非淆曲直嘗論士  
大夫處世當勉立功業懷仁義之實以振靡敝而抹瘡痍其有志  
當世可知也與南禮部尚書孫陞善陞序其文曰王子產二華之  
奧區所云嶽降不虛矣名山允寧長大白皙諳知九邊要害扼腕  
時事慷慨悲壯爲文好太史公盱衡抵掌沾沾自喜論詩服膺少  
陵自謂獨得神解尤深於七言近體列朝詩集時有臨潼趙統者字伯  
一與槐野同舉進士才名相與頡頏官戶部郎中罷歸被誣繫獄  
幾二十年日以著述爲事積稿二竹麓所傳有驪山集等書西原志

趙天秩字仲禮朝邑人生而姿稟厚重六歲時父世榮遣其兄天叙  
就學秩欲往不許乃不食終日卒遣之由是誦讀恒達旦先是世  
榮從同里韓邦奇學邦奇歸自晉陽秩年始十五請從遊世榮謂  
其幼無受教地固請得學焉始至邦奇示以春秋論式數日後課  
一文即單襄公論陳亡體也大奇之又命治尚書不十五日已精  
熟試以義若老於尚書者於書一過輒記五經子史無不淹洽顧  
尤精易占爲學益勤坐室中足不踰閭同學者或笑語移時即去  
之曰光陰可惜也邦奇將以次盡傳其學癸卯冬竟卒兄天叙亦  
以奇童得名以是冬先秩卒初秩母馬氏夢二紫龍入室即飛去  
生二子皆負異才而早歿其徵蓋不爽云苑落集

胡廷器字含素三原人聰穎夙成博覽羣籍旁及書畫無不精妙與  
同縣梁爾升相友善爾升字君旭有元扈山房文集行世三原志

李蘭字幼滋咸寧人幼聰敏有神童之目舉進士官戶曹員外郎督

通州糧儲以讒歸所著詩文樂府皆傳於世

咸寧志

盧拱極字顥甫邵陽人秉姿奇傑嗜學博覽爲文與抉理窟與三原溫恭毅純相友善溫公嘗稱之曰盧公之文可與定性之書並傳其見重如此性端嚴不苟舉德行者九隆慶時應首貢讓與同學生任守成守成者孝子也鄉里稱之萬曆八年乃貢累官韓王府

審理正告歸子巨環亦有文名能世其學

宰莘退食錄

劉士龍字甫化富平人萬曆癸卯解元博學善屬文隱居盤龍寺凡經史子籍悉手錄評次幾與身等南北宿師大儒皆服其精治躬嚴謹與人交有汪洋萬頃之度著有上楊制臺藎議宋書經濟禦寇策與諸遊記香律月令等集行世

賈志

南師仲字子與渭南人萬曆乙未進士天資穎異善古文詞讀中秘

書已百典試留都得人稱盛拜南大宗伯師仲質素癯腰不滿圍隔膜見腑臟而目精炯爍神氣倍旺燃藜校錄至夜分不倦所撰制詞倣伊訓虺誥不作近來體

賈志

張學道字致卿長安人自稱竹逸山人聰穎好學於書無所不窺尤

長於詩所著有綠雲山房稿國華錄數卷

賈志

趙岬字子函一字屏國盩厔人萬曆己酉舉人家有傲山樓藏書萬卷所居近周秦漢唐故都古金石名書多在時跨一驢挂偏提搨工挾楮墨以從每遇片石闕文必坐臥其下手剔苔蘚椎拓裝潢援据考證畧仿歐陽公趙明誠洪丞相三家名曰石墨鐫華自謂窮三十年之力多都元敬楊用修所未見也

隴蜀錄聞

文翔鳳字天瑞三水人萬曆庚戌進士以副使提學山西入爲光祿少卿不赴卒於家其論學以事天爲極力排西來之教著太微以

翼易謂太元潛虛未窺其藩以辭賦爲專門絕業覃思腐毫必欲追配古人作金陵六賦以當京都其爲詩離奇聳兀不經繩削馳

騁其才力可與唐之劉又馬異角奇闔險晚作嘉蓮詩七言近體

至四百餘首亦古所未有也

列朝詩集

弟毓鳳字大彤萬曆間舉人授

武城令心慕絃歌廣敷道化未幾奉母西歸結廬於終南之御宿

川隱焉笑傲山水日與諸弟子講論勿輟著有森園集琳園集學

水園草

三水志

來復字陽伯三原人萬曆丙辰進士爲詩文敏捷如風爲人重氣好

客泛交道廣有聲薦紳間起家戶部郎歷官布政使兵備揚州歸

田病卒陽伯性通慧詩文書畫之外琴棋劍器百工伎藝無不通

曉有詩集十餘卷

列朝詩集

臨字馭仲復弟也博學宏才二難齊名以

明經任屯留縣陞蔚州守歸里有叢筆齋集三十卷

三原志

文運開字時泰三水人少有才思博雅爲一時之冠數奇不第萬曆

中授漢中訓導課士有方陞冀州學正以疾歸所至吟咏盈篋著

江漢集京野集以詩學世其家三水多習詩皆其傳也

賈志

解引樾字拙存韓城人天啟戊辰進士授翰林編修爲人孝友真摯

雄才博學不可一世闖賊入關隱居太華龍門間讀書不輟稱韓

山樵隱或龍門逸史與揚州姚思孝時相往復有逸史二老之日

所著素位篇華遊草名勝志澹園稿諸書自爲墓誌以終

韓城志

郭宗昌字引伯華州人關沮園白厓湖上地介二華之間造一舟居

之曰齋躬自謂一水盈盈與世都絕磊落崎嶇任心獨往又有別

業在鄭南即杜子美西溪與其友王承之東廡商爲南社社著園

藏六齋疏二戎記諸書趙忠毅陳徵君序之以爲似先秦古策周

官考工記遠公宗雷八闢齋文也又著金石史

隴蜀餘聞

王承之字季

安著有水陽秋諸書

賈志

黨忠富平人以舉人訓磁州遷榆次諭勤學博問盛寒暑誦讀不輟

故能淹貫六籍尤長於詩下至法律靡不究心陞伊府審理

富平志

曹森字儼然蒲城人少嗜學性直而謙博極羣書虛懷下問老而不

倦著有道學源流名臣經濟會心編三索元珠等書

賈志

康國相字芝函邵陽人弱冠負文名萬曆戊午舉於鄉崇禎時上封

事兵部尚書梁廷棟召與語奇之稱為文海武庫顧不能用後知

葦城罷歸晚年學益力文益離奇不測著述甚多遭寇亂燬於兵

宰莘退食錄

許傑咸陽人學不師授自解孝經論語及史鑑諸書尤長詩歌自成

一家鄉社子弟多所起發周貧恤孤尊賢敬老有遺藁數卷傳里

中賈志

按三秦為神臯奧區人文淵藪生斯地者類多闕通博洽之士

足以鼓吹休明潤色鴻業今按其世次列傳如左至於龜文鳥

跡肇自史皇玉筋雲頭盛於史籀關中字學厥有源流後人得

其遺意而六書八體各自成家者固代有傳人未易更僕數也

今並附載於後以見人文之盛焉如秦則有胡毋敬櫟陽獄吏

為太史令博識古文改大篆

朱文長書評

○程邈下邳人始為縣吏

得罪始皇幽繫雲陽獄益小篆方圓而為隸書三千字奏之始

皇善之命為御史以奏事繁多篆字難成乃用隸字以為隸人

佐書故曰隸書

張懷瓘書斷

○漢則有秋胡杜陵人能通尚書善為

古隸字

西京雜記

○杜操京兆人以善書知名

庾肩吾書品

○曹喜扶風

人善篆隸小異李斯見師一時

法書要錄

○徐幹字伯張平陵人官

至班超軍司馬善章草書班固與超書稱之曰近得伯張書稿

勢殊工知識讀之莫不歎息書。杜度杜陵人漢興而有草書

不知作者姓名至章帝時有齊相杜度號善作字甚安而書體

微瘦四體書勢。張芝字伯英及弟昶字文舒並善草書後漢書張奐傳芝

少持高操太尉辟公車有道徵皆不至號張有道尤好草書學

崔杜之法家之衣帛必書而後練臨池學書水爲之墨下筆爲

楷則忽忽不暇草書爲世所寶寸紙不遺韋仲將謂之草聖本傳

注文舒書類伯英時人謂之亞聖王楷虔書錄。蘇班平陵人五歲

能書甚爲張伯英所歎。趙襲字元嗣長安人爲燉煌太守與

羅暉並以能草見重關西。羅暉杜陵人官羽林監善草書著

聞三輔張伯英自謂方之有餘與太僕朱賜書云上比崔杜不

足下方羅趙有餘朱賜杜陵人時稱工書也書。三國則有韋

誕字仲將京兆人有文采善屬詞章以光祿大夫遜位文章錄誕

服膺於張伯英兼學邯鄲淳之法諸書並善題署尤精八分隸

書章草飛白入妙小篆入能兄康字元將工書子熊字季少亦

善書書。北魏則有王世弼霸城人善草隸書好愛典墳歷官中

山內史次子由字茂道好學有文才尤善草隸性方厚有名士

之風又工篆畫爲時人所服歷東萊太守魏書本傳。唐則有王駿

咸陽人工書知名尤善琴棋性嚴整官殿中侍御史舊唐書王

盧藏用長安人官黃門侍郎隸行草入能書。衛包京兆人官

尚書郎工八分小篆其作字點畫不妄發落筆必左規右矩以

倒薤篆書鶴鶴賦信由積學所致故爲書品所錄宣和書譜。五代

時則有楊凝式華陰人善文詞出時輩右喜作字尤工顛草居

洛下十年凡琳宮佛祠墻壁間題紀殆遍書。宋則有李元直

長安人學篆書數十年覃思甚苦曉字法得古意用鑱鈔筆縱



手疾書通叔其字云東坡題跋。明則有周宇西安左衛人嘉靖已

酉舉人官戶部主事博雅不羣精識古文奇字善臨池草書爲

世所重成寧志。○文在茲字少元三水人萬曆辛丑進士善八分

楷書三水志。○牛中麒字大徵武功人工書得者重如拱壁武功志

**本朝**

李楷字叔則朝邑人楷少聰慧嗜古學讀書朝萊山遇異人馬顛

仙謂當以文章名世天啟甲子登賢書屢上春官不第嘗築樓

高數丈許屏居其上命書估日送圖史手自評隲學殖益富

國初知寶應縣縣時改隸淮郡楷力請歸揚得罷解草米各項歲

省民財萬計政暇則訪古選勝題詠殆遍解官後流寓廣陵幾

二十載與江西李明睿著二李珥書久之歸里值制府修陝省

通志延至會城郊迎之楷長揖上座縱飲揮毫當事咸屬目尤

工書畫旁及釋典道藏著河濱全書一百卷

雷子霖字午天朝邑人崇禎癸酉舉人性至孝親歿哀毀幾不終

喪嗜古學爲文奇挺聲譽集流寇之亂倡衆築堡以守多所

全活順治三年土人不靖縱暴入城縣令走匿于霖以兵法部

勒堡衆擁令入城事遂定睢州湯斌爲潼關兵備雅慕之知不

可屈時造廬論道學之要所著有孝經神授篇西銘續生篇太

極圖說栢林集別世言河濱李楷稱其文以膽勝

東蔭商字雲雛華州人舉崇禎丙子鄉試意氣道上學問淹通詩

文咸有法度尤好書畫精鑒賞所至多傾倒有集十卷華山經

一卷臆畧十卷

韓詩字聖秋三原人崇禎己卯舉人官至兵部郎學問淵邃詩文

穎異寓居江南交遊皆知名士講藝課業孜孜不倦尤矜尚氣

節著有學古集明文西行世

張恂字稗恭涇陽人幼機警甫冠即盡發先世所藏書鍵戶篝燈百讀不厭又博綜詩學稍暇輒仿法書名畫落筆都似爲通人所賞崇禎癸未成進士會逆闖踞關中恂聞變遯跡壺山順治二年以先世筴讎維揚思整舊業遂南遊邗上徧交吳越諸名士十二年補授中書舍人

世祖稔其名以工畫

命兼給事毫素嘗有故人中隙者久之復來謁恂歡然道故其人方三喪未葬子女婚嫁俱未辦恂立揮五百金以贈人以是知其長者暮年尤工繪事天趣盎然客至則飛觴賦詩家人以有無告不問也所著有樵山堂詩西松館詩及雪鴻草詩文共如干卷

孫爾思字睿生西安人順治丙戌舉於鄉授鳳翔教諭嘗攝邑篆剖疑決獄邑稱神君蜀撫李國英稔其才請於

朝欲授以順慶司李不果爾思性坦易世味泊如家居臨灞岸日徜徉山水間有得即錄置奚囊中久之成帙所傳有灞上集

劉漢客字石生宜川人順治甲午貢生少儻英邁博極子史爲文深奧古卓詩歌書法皆絕人性剛方不容人過然樂與人談詩文及古今興廢娓娓不倦交遊盡一時名宿嘗與修陝西通志所著詩文多行世

溫樹珖字虞白三原人順治丁亥進士授堂邑令甫三月罷歸家居事親備極色養寧夏巡撫黃圖安稔其才欲薦之樹珖以親老辭不赴性好學嘗取天文地志國典及河漕關權兵防刑法諸書精覈條列之爲用世具甲寅乙卯間秦中不靖樹珖倡邑

人修城浚壕集鄉勇爲守禦踰年卒人知其用之未竟也子德嘉康熙戊午舉人讀書好大畧有經世志

杜恒燦字蒼舒三原人八歲能文年十七補弟子員值寇亂家中落嘗走四方負米養親鄉試中副車遂入太學名益噪念老親家居食貧因策蹇南遊時時得巨公詩文及珍玩錦綺物歸壽其親親大悅先是恒燦居京師與中翰吳煒交相得同訂觀文大社以振興古學爲志及煒使關中過焦獲復廣其社於邑中學古書院煒去恒燦主盟學者多宗之長安梁化鳳鎮崇明遣迎恒燦既至化鳳以堤成出獵恒燦陪副乘即事作平洋沙十章化鳳立命譜入鏡歌持千金起爲壽歡聲溢軍中尋遊楚遊滇復入吳久之歸卒恒燦性好客所居濱白渠南車騎冠蓋恒輻輳每酒酣耳熱潑墨揮毫無不厭所欲而去一夕悉焚所著

書弟燭急起收之得詩文如千篇今所傳春樹草堂集也

李念慈字劬菴涇陽人順治戊戌進士初授推官改知縣緣逋賦事罷歸康熙十三年滇逆作亂大兵駐荆襄念慈捧檄入楚以僭運有勞再補天門知縣十七年舉博學宏詞科復報罷遂絕意仕進念慈好吟咏詩酒唱酬一時諸名士皆傾倒所歷幕府爭延禮爲上客揮毫潑墨灑如也少拂意立去之著有谷口集張調燮字元宰咸陽歲貢生嗜學能文著有秋水編行世

王豫嘉字建侯扶風人順治辛丑進士改庶常歷官至翰林侍讀天性純孝年十四父病嘗藥惟謹入史館父病漸劇豫嘉亟請假歸日夜侍奉衣不解帶者幾二載父歿哀毀骨立服闋赴補安輿迎母張於京邸張思鄉旋復告歸母卒居喪盡禮乙卯王輔臣兵變關陝大震大學士熊賜履詣直廬握手問策豫嘉曰

賊無能爲使其長驅出棧直趨長安則成敗未可知今卷旗返平涼不過爲自守計此成擒耳因爲借箸陳扼塞控禦策旬月果平生平砥廉隅維風俗博極典籍長於書法所著有詩古文詞甚富

李栢字雲木郿縣人九歲失怙事母至孝雖備歷艱辛而色養不衰初入邑庠食餼後避荒居洋縣入太白山中屏跡讀書者數十年其學貫穿百家勃窣理窟與朝邑李楷富平李因篤齊名稱關中三李性恬淡甘貧樂志自制府以下咸慕其才希一顧以爲重同邑馮雲程事母至孝稍長治舉子業有聲順治戊子以選拔入成均授賓州判甫半載即以病乞歸里與李栢相得日徜徉山水間倡和甚適性剛介閭里有不平事必昌言力持之嘗自詫曰予一身無長物止餘勁骨少許耳無子一女適微

士李顥子慎言晚年恒寓居二曲云

孫枝蔚字豹人三原人性豪宕敦氣節博學工詩明末逆闖踞關中枝蔚感激時勢謀結鄉曲諸豪士起義討賊卒不果後遂南遊吳下流寓邗關以詩酒自娛徧交吳越諸名宿筆牀硯匣倡和無虛日康熙十七年舉博學宏詞入都以年老求免試不許及試被落南歸會

詔下吏部令視與試諸人有年高學贍者授京銜以寵其行部擬初授正字

特授內閣中書舍人以歸枝蔚爲詩沉雄奇古典至即書不事彫飾而意致灑如其自命在韓杜蘇杜諸公間餘子不屑也所著有澆堂集如干卷

李因篤字子德富平人年十一爲邑諸生丁明季之亂遂謝去肆

方爲古文辭尤長於詩歌嘗遊長安做少陵作秋興詩八首見者多擊節時往來秦晉間過從悉知名士崑山顧炎武其尤也  
康熙十七年

詔集諸儒纂修明史廷臣以因篤名上十八年授翰林院檢討未兩月即疏乞終養疏畧曰臣母年踰七旬屬歲多病隨經具呈吏部吏部謂稱親援病恐有推諉竊思已病或可僞言親老豈容假托臣雖極愚不肖詎忍藉口所生指爲推卸之端臣仰圖報君俯迫諗母欲留不可欲去未能瞻望

關廷進退維谷疏三十七上始允歸抵家後寢食湯藥每事躬親越五年母歿遂不復仕性敏絕博極羣書又好汲引後學問字者無虛刻或有過必婉詞規勉未嘗以聲色加人顧炎武嘗集杜句題贈云文章來國士忠厚與鄉人蓋實錄也生平著述甚

富有文集十五卷詩集三十五卷廣韻正四卷行世

劉芳字學海三原人幼聰穎讀書一過輒記長益與衍學使呂雲藻薦於

朝徵之不起所著有簪曝瑣言八卷蓬窻雜詠十卷

劉爾懌字雪石中部人十歲能屬文博極羣書結廬西山之唐峪洞率妻子力耕自給歷二十年徵隱逸不就又徵博學宏詞仍力辭不赴會延守陳天植延爾懌與安塞貢生韓一識同修郡志詞理簡嚴論者稱美韓亦有文名其才識與爾懌相伯仲云康乃心字太乙邵陽人少善屬文試輒冠其曹工詩甫脫稿即遠近傳播居恒敦孝友慕節義進退辭讓一以古聖賢爲準康熙乙卯舉於鄉庚辰春試不第諸大臣欲薦之固辭歸里四十二年

大駕西巡駐潼關問關中經明行修之士韓城劉蔭樞以乃心名奏  
上首肯以之家素貧與諸弟姪同居食指六十餘人朝夕拮据而意  
致灑如嘗慨前賢遺跡湮廢爲樹碑作傳記無虛日著有毛詩  
箋莘野集太乙子韓城平遙志若干卷生平與咸寧歲貢楊生  
芝交最洽生芝字時發亦學行兼優之士也

李國瑾字玉衡府谷舉人由寧州學正陞國子監典簿貧不能買  
書日取國學經史板摩娑讀之手爪盡黑久而淹貫爲世名儒  
嘗居佛寺日惟炊俸米一飯冬夜無火與一老僕共披敝裘而  
坐著有石花魚賦甚佳終大理司務

勅脩陝西通志

第六十四卷

人物十

隱逸

方伎

流寓

雜傳

陝西通志第六十四卷

人物十

隱逸

周

漢陰丈人者楚人也子貢適楚過漢陰見丈人方將爲圃畦鑿隧而入井抱甕而出灌搨搨然用力甚多而見功寡子貢曰有械於此挈水若抽其名爲槲用力甚寡而見功多丈人作色而笑曰聞之吾師有機械者必有機事有機事者必有機心機心存於胸中則純白不備純白不備則神生不定神生不定者道之所不載也吾非不知羞而不爲也子貢瞞然慚俯而不對

莊子

段干木晉人也少貧且賤乃治清節游西河師事卜子夏與田子方干木守道不仕魏文侯欲見就造其門干木踰牆而避文侯文侯





以客禮待之出過其廬而式其僕問曰干木布衣也式其廬不已甚乎文侯曰干木賢者也不移勢利懷君子之道隱居窮巷聲馳千里吾敢不式乎干木先乎德寡人先乎勢干木富乎義寡人富乎財勢不如德貴財不若義高又請為相不肯後卑已固請見與語文侯立倦不敢息文侯名過齊桓公者蓋能尊段干木敬卜子夏遊田子方故也

高士傳

**秦**

楊碩華陰人隱居華山仙谷交結名士洞習天文知秦將亡漢當興生八子俱從高祖征伐第八子喜擊殺項羽有功封赤泉亭侯餘皆將軍乃賜碩太史公

馬志

邵平者故秦東陵侯秦破為布衣貧種瓜長安城東瓜美故時俗謂

之東陵瓜從邵平以為名也

史記蕭相國世家

四皓者皆河內軹人也修道潔已非義不勳秦始皇時見秦政虐乃共入商洛隱地肺山以待天下定漢高聞而徵之不至

高士傳

上欲

廢太子立戚夫人子趙王如意呂后恐乃使建成侯呂澤劫留侯

曰為我畫計留侯曰此難以口舌爭也願上有不能致者天下有

四人四人者年老矣皆以為上慢侮人故逃匿山中義不為漢臣

然上高此四人今公誠能無愛金玉璧帛令太子為書卑辭安車

因使辯士固請宜來來以為客時時從入朝令上見之上知此四

人賢則一助也於是呂后令呂澤卑辭厚禮迎此四人四人至客

建成侯所黥布反上病欲使太子將往擊之四人相謂曰凡來者

將以有太子太子將兵事危矣乃說建成侯曰君何不急請呂后

承間為上泣言呂澤夜見呂后呂后為上涕泣而言如四人意上

擊布還愈欲易太子及燕置酒太子侍四人從太子年皆八十有餘鬚眉皓然衣冠甚偉上問曰彼何爲者四人前對各言姓名曰東園公用里先生綺里季夏黃公上大驚曰吾求公數歲公避逃我今公何自從吾兒遊乎四人皆曰陛下輕士善罵臣等義不受辱竊聞太子仁孝恭敬愛士天下莫不延頸願爲太子死者故臣等來耳上曰煩公幸卒調護太子四人爲壽畢趨去上目送之召戚夫人曰我欲易之彼四人輔之羽翼已成難動矣呂后真而主矣史記留侯世家呂后德之將官爵之四人復入商山呂氏不能留商隱說東園公姓唐名秉字宣明綺里季姓吳名實字子景夏黃公姓崔名廣字少通用里先生姓周名術字元道號稱四皓鴻書摯峻字伯陵長安人少治清節與太史遷交好峻獨退身修德隱於岍山遷旣親貴乃以書勸峻曰遷聞君子所貴乎道者三太上立

德其次立言其次立功伏惟伯陵材能絕人高尚其志以善厥身冰清玉潔不以細行荷累其名固已貴矣然未盡太上之所由也願先生少致意焉峻報書曰峻聞古之君子料能而行度德而處故悔恡去於身利不可以虛受名不可以苟得漢興以來帝王之道於斯始顯能者見利不肖者自屏亦其時也周易大君有命小人勿用徒欲偃仰從容以遊餘齒耳峻之守節不移如此遷爲李陵遊說下腐刑果以悔恡被辱峻高尚不仕卒於岍岍人立祠號曰岍居士世奉祀之不絕高士傳

楊王孫城固人學黃老之術家累千金厚自奉養生無所不致病且死令其子曰吾欲裸葬以反吾真必無易吾意死則爲布囊盛尸入地七尺旣下從足引脫其囊以身親土其子不忍往見王孫友人初侯初侯與王孫書王孫曰夫厚葬誠無益於死者而俗人競

以相高靡財單幣腐之地下或乃今日入而明日發此真與暴骸於中莖何異且裹以幣帛隔以棺槨支體絡束口含玉石欲化不得鬱爲枯腊千載之後棺槨腐朽乃得歸土就其真宅由是言之

焉用久客曰善遂躒葬

漢書本傳

成公成帝時人自隱姓名常誦經不交世利時人號曰成公成帝出遊問之成公不屈節上曰朕能富貴人能殺人子何逆朕成公曰陛下能貴人臣能不受陛下之官陛下能富人臣能不受陛下之祿陛下能殺人臣能不犯陛下之法上不能折使郎二人就受政

事十二篇

高士傳

安邱望之長陵人少治老子恬靜不求進宦號曰安邱丈人成帝聞欲見之望之辭不肯見上以其道德深重常宗師焉望之不以見敬爲高愈自退損爲巫醫於民間著老子章句扶風耿况王汲等

皆師事之從受老子終身不仕道家宗焉

高士傳

張仲蔚者平陵人與同郡魏景卿俱修道德隱身不仕明天官博物善屬文好詩賦常居窮素所處蓬蒿没人閉門養性不治榮名時人莫識唯劉龔知之

高士傳

鄭朴字子真谷口人修道靜默世服其清高成帝時大將軍王鳳以禮聘之不屈揚雄盛稱其德曰谷口子真耕於巖石之下名震京師馮翊人刻石祠之至今不絕

高士傳

時人因子真所居名爲鄭泉

雲陽

宮記

衛衡字伯梁南鄭人少師隱士同郡樊季齊以高行聞郡九察孝廉公府州十辟公車三徵不應董扶任安從洛還過見之曰京師天下之市朝也足下猶之人耳何其在遠以虛名屢動徵書若至中國則價盡矣衡笑曰時有險易道有汗隆若樊季齊楊仲桓雖應

徵聘何益於時乎苟無所則尼軻恹恹是以君平子真不屈其志其子之徒也哉吾何虛假之有安扶服之敬其言也漢中士女志

安陵清者有項仲山飲馬渭水日與三錢以償之三輔決錄

蔣詡杜陵人為交州刺史以廉直為名王莽居攝詡以病免官歸鄉

里卧不出戶卒於家漢書鮑宣傳詡歸鄉里荆棘塞門舍中有三徑不

出惟求仲羊仲從之遊二人不知何許人皆治車為業時人謂之

二仲三輔決錄

楊寶震父華陰人習歐陽尚書哀平之世隱居教授居攝二年與兩龔蔣

詡俱徵遂逃遁不知所處光武高其節建武中公車特徵老病不

到卒於家後漢書楊震傳

井丹字大春郡人少受業太學通五經善談論京師為之語曰五經

紛綸井大春性清高未嘗修刺候人建武末沛王輔等五王居北

宮皆好賓客更遣請丹不能致信楊侯陰就以外戚貴盛乃詭說

五王求錢千萬約能致丹而別使人要劫之丹既至就故為設麥

飯葱葉之食丹推去之曰以君侯能供甘旨故來相過何其薄乎

更致盛饌乃食及就左右進輦丹笑曰吾聞桀駕人車豈此邪坐

中皆失色就不得已令去輦自是隱閉不關人事後漢書本傳

高恢字伯達京兆人少治老子恬虛不營世務與梁鴻善隱於華陰

山中及鴻東游思恢作詩曰烏嚶嚶兮友之期念高子兮僕懷思

想念恢兮爰集茲二人遂不復相見恢高抗隱耀終身不仕焉高士傳

梁鴻字伯鸞平陵人受業大學家貧尚節介博覽無不通而不為章

句牧豕於上林苑中曾誤遺火延及他舍鴻乃尋訪燒者問所失

悉以豕償之其主猶以為少鴻願以身居作主人許之因為執勤

勞

不懈鄰家者老見非恒人乃共讓責主人而稱鴻長者鴻不受而去歸鄉里勢家慕其高節多欲女之鴻並絕不娶同縣孟氏女擇對不嫁鴻聘之有頃共入霸陵山中以耕織為業詠詩彈琴以自娛仰慕前世高士為四皓以來二十四人作頌因東出關作五噫之歌與妻子居齊魯之間又去適吳依大家臯伯通居廡下為人質春每歸妻為具食舉案齊眉伯通異之舍於家鴻潛閉著書十餘篇疾且困告主人曰慎勿令我子持喪歸去及卒伯通等為求葬地於要離冢咸曰要離烈士伯鸞清高可令相近葬畢妻子歸扶風

後漢書本傳

張楷字公超司隸舉茂才除長陵令不至官隱居弘農山中學者隨之所居成市後華陰山南遂有公超市五府連辟舉賢良方正不就順帝特下詔曰張楷行慕原憲操擬夷齊前此徵命未至將主者翫習於常優賢不足使其難進歟郡時以禮發遣復告疾不到性好道術能作五里霧時關西人裴優亦能為三里霧自以為不如楷從學之楷避不肯見桓帝即位優行霧作賊事覺被考引楷楷坐繫廷尉詔獄積二年恒諷誦經籍作尚書注後事無驗見原

還家

後漢書張霸傳

韓康字伯休霸陵人常遊名山採藥賣長安市中口不二價者三十餘年有女子從康買藥康守價不移女子怒曰公是韓伯休邪乃不二價乎康歎曰我欲避名乃小女子皆知有我何用藥為遂避入霸陵山中博士公車連徵不至桓帝時乃備元纁安車以聘之使者奉詔造康康不得已乃許諾辭安車自乘柴車冒晨先發至亭亭長以韓徵君當過發人修道橋見康柴車幅巾以為田叟也使奪其牛康即釋駕與之有頃使者至奪牛翁乃徵君也使者欲

陝西通志 卷之十四 五  
奏殺亭長康曰此自老子與之亭長何罪乃止康因中路逃遁以壽終

後漢書本傳

邱訢字季春扶風人少有大才自謂無伍傲世不與俗人爲羣郡守始召見曰明府欲臣訢邪友訢邪師訢邪明府所以尊寵人者極於功曹所以榮祿人者已於孝廉一極一已皆訢所不用也郡守異之遂不敢屈

高士傳

馬瑤茂陵人隱於沂山以兔置爲事所居俗化百姓美之號馬牧先

生

後漢書矯慎傳

法真字高鄉扶風郿人學無常家博通內外圖典關西號爲大儒弟子負笈嘗數百人性恬靜寡欲不涉人間事太守請見之真乃幅巾請謁太守欲以功曹相屈真曰以明府見待有禮故敢自同賓未若欲吏之真將在北山之北南山之南矣太守不敢復言凡辟

公府賢良皆不就同郡田羽薦真會順帝西巡羽又薦之帝虛心欲致前後四徵真曰吾旣不能遜形遠世豈飲洗耳之水哉遂深自隱絕友人郭正稱之曰法真名可得而聞身不可得而見迓名而名我隨避名而名我追可謂百世之師者矣共刊石頌之號曰元德先生年八十九以壽終

高士傳

樊志張南鄭人博學多通隱身不仕嘗遊隴西時破羌將軍段熲出征西羌請見志張其夕熲軍爲羌所圍因留軍中三日不得去夜謂熲曰東南角無羌宜乘虛引出住百里還師攻之可以全勝熲從之果以破賊於是狀表聞又說其人旣有梓慎焦董之識宜輔翼聖朝咨詢奇異於是詔特徵會病終

後漢書本傳

三國

扈累字伯重京兆人初平中山東人有青牛先生字方正客三輔曉

知星曆風角鳥情累隨方正遊學人謂之得其術有婦無子三輔亂隨方正入漢中漢中壤隨徙民詣鄴喪其婦至黃初元年又徙詣洛陽遂不復娶婦獨居道側以甌甑爲障施一厨牀食宿其中晝日潛思夜起仰視星宿吟咏內書人或問之閉口不肯言至嘉平中年八九十纔若四五十者縣官以其孤老給廩日五升不足食頗行備以禪糧人與不取食不求美衣弊縵服後病亡魏劉仲始者長安市僧一爲市吏所辱乃感激遂行學問經明行修流名海內後以有道徵不就人歸其高三國魏志裴潛傳注

**晉**

楊軻天水人少好易長而不娶學業精微常食粗飲水衣褐縵袍人不堪其憂而軻悠然自得劉曜僭號徵拜太常軻固辭曜亦敬而不逼遂隱於隴山曜後爲石勒所擒秦人東徙軻留長安石季龍

徵之軻以疾辭迫之乃發後歸秦州

晉書本傳

今隴州山中有軻遺跡

隴州志

**西**

韋元避吏隱長安南山武帝入關以太尉掾徵不至南史韋

**東**

馬樞字要理扶風郿人六歲能讀孝經論語老子及長博極經史尤善佛經及周易老子義梁邵陵王綸爲南徐州刺史引爲學士綸時自講大品經命樞講維摩老子周易同日發題道俗聽者二千入樞依次剖判開其宗旨然後支分流別轉變無窮綸甚嘉之將引薦於朝廷尋遇侯景之亂綸舉兵援臺乃留書二萬卷以付樞樞肆志尋覽殆將周遍乃喟然歎曰吾聞貴爵位者以巢由爲桎梏愛山林者以伊呂爲管庫東名實則芻芥柱下之言翫清虛則

批糠席上之說稽之篤論亦各從其好也乃隱於茅山有終焉之志天嘉元年文帝徵為度支尚書辭不應命及鄱陽王為南徐州刺史欽其高尚卑辭厚意令使者邀之前後數反樞不得已乃行王築別館以處之樞惡其崇麗乃於竹林間自營茅茨而居每王公餽餉辭不獲已者率十分受一樞少屬亂離每所居之處盜賊不入依託者常數百家目精洞黃能視閤中物嘗有白鷺一隻巢其庭樹馴狎欄廡時集几案春來秋去幾三十年太建十三年卒時年六十撰道覺論二十卷行於世

陳書本傳

**北魏**

魯祈扶風人遭赫連屈丐暴虐避地寒山教授弟子數百人好方術

少嗜慾

魏書釋老志

景字宣明京兆人學通經史州府交辟不就子裕字慶延文學相

傳仕齊位止樂陵令齊亡退居教授終於家

北史杜銓傳

鄭修北海人少隱於岐南几谷中依爨結宇獨處淡然屏跡人事不交世俗耕食水飲皮冠草服雅好經史專意元門前後州將每徵不至岐州刺史魏蘭根頻遣使致命修暫出見尋還山舍

魏書本傳

**北周**

韋夔字敬遠杜陵人志尚夷簡淡於榮利弱冠被召拜雍州從事謝疾去前後十見徵辟皆不應明帝即位禮敬愈厚且為詩以貽之夔答詩願謁帝大悅勅有司給河東酒一斗號曰逍遙公時晉公護廣營第宅召夔訪以政事夔仰視其堂歎曰甘酒嗜音峻宇雕牆有一於此未或不亡護不悅識者以為知言武帝嘗與夔夜宴夫賜縑帛夔惟取一疋帝以此益重之孝寬為延州刺史夔至州寬以所乘馬及轡勒與夔夔以其華飾笑謂曰舍舊錄新非吾志



也乘舊馬以歸宣帝在東宮遺書問以立身之道曼對曰儉爲德之恭侈爲惡之大願殿下察之曼少留情著述手自抄錄數十卷晚年虛靜惟以體道會真爲務宣政元年卒於家武帝遣使祭贈有加

周書本傳

唐

司馬郊字子都隱居華山五十年禽獸日遊目前有如家馴每灌園不食菜心以其傷生意及四時山果熟果大大鳥啣果小小鳥啣俱送郊齋中郊歎曰禽鳥送果甚多但可日料三十顆異日如戒及郊卒百禽聚於庭悲鳴累日而去

獨異志

孫思邈華原人通百家說善言老莊獨孤信見其少異之曰聖童也顧器大難爲用耳及長居太白山隋文帝輔政以國子博士召不拜密語人曰後五十年有聖人出吾且助之太宗初召詣京師年

已老而聽視聰瞭帝歎曰有道者欲官之不受顯慶初復召見拜諫議大夫固辭上元元年稱疾還山思邈於陰陽推步醫藥無不善孟詵盧照隣等師事之永淳初卒

唐書本傳

田游巖三原人永徽時補太學生罷歸入太白山母及妻皆有方外志與共棲遲山水間自蜀歷荆楚愛夷陵青溪止廬其側長史李安期表其才召赴京師行及汝辭疾入箕山居許由祠旁自號由東隣頻召不出高宗幸嵩山遣中書侍郎薛元超就問其母賜藥物絮帛帝親至其門游巖野服出拜儀止謹朴帝令左右扶止謂曰先生比佳否曰臣所謂泉石膏肓煙霞痼疾者帝悅因勅游巖將家屬乘傳赴都拜崇文館學士進太子洗馬裴炎死坐素厚善放還山蠶衣耕食不交當世惟於韓法昭宋之間爲方外友云

唐書

本傳

武攸緒則天兄惟良子也恬淡寡欲好易莊周書少變姓名賣卜長

安市得錢輒委去

唐書本傳

高太素商山隱士累徵不起在山中構道院二十餘間太素起居清  
心亭下皆茂林秀竹奇花異卉每至一時即有猿一枚詣亭前鞠

開天遺事

躬而啼不易其候太素因目之爲報時猿其性度有如此

王休居太白山下日與僧道異人往還每至冬時取溪水漱其精瑩

開天遺事

者煮建茗共賓客飲之

郭休字退夫太白山隱士有運氣絕粒之術於山中建茅屋百餘間

有白雲亭鍊丹洞注易亭修真亭朝元壇集神閣每於白雲亭與

賓客看山禽野獸即以槌擊一鐵片子其聲清響山中鳥獸聞之

開天遺事

集於亭下呼爲喚鐵

吳筠字貞節華陰人通經誼美文詞舉進士不中性高鯁不耐

沉浮於世去居南陽倚帝山天寶初召至京師請隸道士籍乃入

嵩山依潘師正究其術南游天臺觀滄海與有名士相娛樂文辭

傳京師元宗遣使召見大同殿與語甚悅勅待詔翰林獻元綱三

篇帝嘗問道對曰深於道者無如老子五千文其餘徒喪紙札耳

復問神仙治鍊法對曰此野人事非人主宜留意筠每開陳皆名

教世務以微言諷天子天子重之羣沙門嫉其見過而高力士素

事浮屠共短筠於帝筠亦懇求還嵩山詔爲立道館安祿山欲稱

兵乃還茅山因東入會稽剡山大曆十三年卒弟子私謚爲宗元

先生

唐書本傳

韋况

韋况子萬年人

少隱王屋山孔述睿以諫議大夫召薦况爲右拾遺不

拜未幾以起居郎召半歲輒棄官去徙家龍門除司封員外郎稱

疾固辭元和初授諫議大夫勉諭到職數月乞骸骨以太子左庶

友

卷之十四 人物十

子致仕卒况雖世貴而志冲遠不爲聲利所遷當時重其風操

唐書

華安石傳

崔觀城固人以儒自業身耕耨取給老無子乃以田宅貲財分給奴婢各爲業而身與妻隱南山夫婦嘯詠相視爲娛文宗時左補闕王直方薦觀高行詔以起居郎召辭疾不至

唐書本傳

**五代**

鄭元素華原人少習詩禮避亂南遊居廬山青牛谷高卧四十餘年採薇食蕨絃歌自若構椽剪茅於舍後會集古書至千餘卷

南唐書

**宋**

鄭雲叟本名邀棄家入少室山聞西岳有五粒松脂淪入地千歲化爲藥能去三尸因居華陰與李道殷羅隱之友善道殷有釣魚之術釣而不餌又能化石爲金雲叟目擊其事而不求

續世說

碧雲洞

在岳之東乃鄭雲叟羅隱之窟士端隱居之所鄭邀南燕人天成中以拾遺詔不起賜號逍遙先生羅隱之新淦縣玉笥山玉梁觀道士來居華山一觴一咏高情自適天福中賜號希夷先生翟士端字表正齊人博通九經祥符中真宗幸汾陰詔不起無疾而逝七日肢體猶溫鄭隱字明處堯之奉符人左臂有黑黥子如北斗狀常居王刁三洞自冬涉春不出人咸異之祥符中真宗祀后土還駐驛驛下賜號貞晦先生又賜歸山歌

華岳全集

真宗祀汾陰時召

華山隱士鄭隱敷水隱士李寧隱以經術爲業過道士傳辟穀鍊氣之法修習頗驗居華山王刁巖踰二十年冬夏常衣皮裘寧精於藥術老而不衰常以藥施人人以金帛爲報輒拒之大中祥符四年賜號貞晦先生上並作詩以賜贈以茶藥繒帛獨隱辭賜物

不受

宋史方技傳

人物十

人物十

七

王子華同州人博學能文尤工詩景德中與華山隱者齊人翟士端  
兗人鄭隱南燕人鄭邀臨江羅隱之等號五高士爲一時名流所

推重

賈志

陳搏字圖南亳州真源人不求祿仕以山水爲樂居華山雲臺觀又  
止少華石室每寢處多百餘日不起因世宗好黃白術有以搏名  
聞者命華州送至闕下從容問其術對曰陛下當以致治爲念奈  
何留意黃白之事乎世宗不之責命爲諫議大夫不受太平興國  
中來朝太宗待之甚厚九年復來朝上益加禮重宋琪等從容問  
曰先生得元默修養之道可以教人乎對曰搏山野之人非有方  
術可傳今聖上龍顏秀異正君臣協心同德興化致治之秋勤作  
修煉無過於此琪等以其語白上上益重之賜號希夷先生端拱  
初忽謂其弟子賈德昇曰汝可於張超谷鑿石爲室吾將憩焉

年七月石室成搏手書表曰臣搏大數已終已於今月二十二日

化形張超谷中如期而卒七日肢體猶溫有五色雲蔽塞洞口彌

日不散搏好讀易手不釋卷能逆知人意人咸異之

宋史本傳

真人隱於睡馮翊寇朝一常事真人得睡之崖畧後還鄉惟睡而

已郡南劉垂範往謁其從者以睡告垂範坐寢外聞齧軒之聲雄

美可聽退而告人曰寇先生睡中有樂乃華胥調雙門曲也或曰

未審譜記何如垂範以濃墨塗紙滿幅題曰混沌譜云即此是也

清異錄

种放字明逸洛陽人沉默好學父嘗令舉進士放辭以業未成父卒  
與母隱居終南山豹林谷之東明峰以講習爲業淳化二年陝西  
轉運使宋惟幹言其才詔召之放稱疾不起轉居窮僻人跡罕至  
太宗嘉其節賜以緡錢使養母咸平元年母卒放水漿不入口三

日廬於墓側詔賜錢帛米助其喪四年兵部尚書張齊賢言放孝行純至簡朴退靜詔赴闕放辭不起明年齊賢守京兆復請加旌賁即遣供奉官周旺齋詔赴闕九月放至對崇政殿詢以民政邊事放曰明王之治愛民而已餘皆謙讓不對即日授左司諫直昭文館六年春表暫歸山詔許其請將行遷起居舍人十月遣使撫問國其林泉居處以獻景德元年七月來朝二年擢爲右諫議大夫上表乞爲少養疾許之大中祥符元年判集賢院拜給事中二年四月歸山四年正月復來朝拜工部侍郎放屢至闕下俄復還山人貽書嘲其出處之跡放不答王嗣宗守京兆放乘醉慢罵之嗣宗屢遣人責放不法仍條上其事放遂徙居嵩山八年十一月乙丑忽取前章疏稿悉焚之召諸生會飲酒數行而卒上甚痛悼親製文遣內侍宋致祭歸葬終南

宋史本傳

宋澥長安人有清節不仕與种放魏野遊多篇什酬唱

宋史本傳

高懌字文悅荆南高季興四世孫幼養於外家通經史百家之書聞种放隱終南山乃築室豹林谷從放受業放奇之不敢遽以弟子行與同時張蕘許勃號南山三友會詔舉沉淪知長安寇準薦之辭不起景祐中錄國初侯王後懌推其弟欣得官及范雍建京兆府學召懌講授諸生席間嘗數十百人杜衍嘗請賜處士號乃命爲大理評事懌固辭仁宗嘉其守號安素處士賜良田五百畝文彥博表其經術該通有高世之行可以勵風俗詔賜第一區嘉祐中除光祿寺丞復固辭夢道士持素書聘爲白鹿洞主

宋史本傳

李植字化光京兆人觀察使士衡之孫自幼好道不樂婚宦工畫山

水劉原父嘗贊之

圖繪寶鑑

楊冲遠興元人元符中張浚試吏興元與楊用中別問公往來梁洋

其人士有可與遊者乎用中曰楊冲遠可與爲師凌至遠與交

府志

安世通青城山道人本西人其父有謀策爲武官數以言干當路不用遂自沉於酒而終世通隱居青城山中不出吳曦反乃獻書於成都帥楊輔曰世通雖方外人竊以爲公得曦敕即當還書誦其家世激以忠義因而散金發粟興仗義之師以順討逆誰不願從今悠悠不決所謂婦人女子之悲停囚長智吾恐朝廷之大失望也輔不能從遂東如江陵請吳獵舉兵討曦未幾曦敗獵使蜀薦士以世通爲首云

宋史本傳。按四川通志云安世通本陝西人

**金**

岳行甫字仁老鄜州洛川人在閩中最有詩名泰和初有以仁老時病詩達之道陵者道陵大加賞異授以官不就士論高之詩百餘

篇佳句甚多

中州集

**元**

楊恭懿字元甫奉元人力學強記尤深於易禮春秋父歿水漿不入口者五日居喪盡禮宣撫司以掌書記辟不就至元七年與許衡俱被召恭懿不至衡日稱譽恭懿之賢詔遣使召之以疾不起十一年太子下教中書俾如漢聘西皓者以聘恭懿丞相爲書致命乃至京師旣入見世祖勞其遠來又親詢其鄉里氏族無不周悉十二年侍讀學士徒單公履請設取士科詔與恭懿議之恭懿言今欲取士宜勅有司舉有行檢通經史之士試以經藝論策帝善之會北征恭懿遂歸田里十六年詔安西王相敦請赴闕入見詔與太史院改曆十七年進奏曰臣等更造新曆一依前賢定論是日方跪帝命許衡及恭懿起曰無自勞也授集賢學士兼太子院

事十八年辭歸二十年以太子賓客召二十二年以昭文館學士召二十九年以議中書省事召皆不行三十一年卒年七十元史本傳

員炎字善卿同州人負奇氣不事生產大德二年故人楊紫陽憫其窶用監嵩州酒炎薄之長揖而去嘗遊河朔以詩名詩稿酒瓢外

無長物

賈志

駱天驥字飛卿長安人博涉羣書遊心翰墨樂道邱園不求聞達馬志

張全字之美涇陽人自幼好讀書不求聞達以山水文籍自娛雖在

布衣邑人待之如公輔

馬志

第五勝愚字仲學富平人元末不悅仕進鑿洞山中甘貧樂道日與

同志優游於山水間學者稱為第五夫子

賈志

楊儼字敬夫涉獵經史元末隱陳倉谷中淡然無宦情明初累徵不

起

賈志

閻正叔侯伯正俱渭南人泰定中同舉進士正叔授五經博士伯正

授太常博士後以世亂棄官隱居田里洪武初並被徵至京深衣

幅巾入見以年高辭不願仕明太祖見其鬚眉皓然禮之使歸俱

以壽終於家

賈志

黃奮字熙載華陰人洪武初為博士教世子旋歸常乘牛車賦詩飲

酒郭司馬良師事之

賈志

侯文禮白水人為入質直長厚言動不苟鄉里無少長皆敬憚之有

相競輒就質平無不傾服洪武初累薦不起

賈志

折鼎獨神木人洪武初以人材薦辟授河南按察司僉事過中部喜

曰此地可居乃卜築於縣西之村晦跡高蹈婆娑泉石居人亦莫

之知一日官府徵夫役曰往役義也從之役愆期當罰度不能免

乃曰君無咎我我河南按察司僉事也尹驚詫禮而歸之自是人莫知其終

延安府志

李琛寧羌衛人性恬靜樂道工詩文不求聞達年八十餘終

馬志

郭琦漢中人弘治中領鄉薦任河南訓導陞解州學正持身清苦教士有方逆瑾聞其名召之琦托疾不應後瑾誅諸應聘者坐累琦不與焉人服其先見

馬志

劉价中部人性甘淡泊恬素自守卜隱東莊引水灌竹著書自娛縣

令胡熹三造其廬閉戶不納尋遊入西山年至八十卒

賈志

王生逸其名咸寧雍端惠公泰幼與生同學泰既貴過家往訪之時生已棄學業農矣遇諸塗謂曰雍泰猶念貧賤之交乎如不棄予當約期過汝泰敬諾至期肅冠帶以俟生布衣毳毳背隻雞持瓢酒而至據席正坐泰以兄事之酌飲必跪生受之亦不辭

續文獻通考

孟彥施綸倪玳俱咸寧人同舉正德八年鄉試時劉瑾以秦人橫作

威福彥等皆一上春宮不復再試隱居讀書以終其身

賈志

高延俊米脂人賦性高邁博學能文以明經選沔縣訓導力辭不赴

卜居園東山谷四圍種菊讀書彈琴著述甚富

米脂志

王維藩鄜人神姿清異家苦貧無書從人借讀後竟淹貫嘉靖甲子舉於鄉或勉以就職藩曰入官以行道也其次爲祿養親今道既未成而親又不吾待五斗祿將焉用之聞者歎服教授里中爲子弟講孝弟之學遇人急難必竭力赴之曰吾非好名實惡夫世之以死生貴賤二其心者後以壽終

賈志

黃如箴咸寧人高才能文章善聲律隱於終南山自謂太乙逸叟又

同里趙時中事父母至孝世味淡泊結廬種竹自號翠微生

賈志

孫太初年十八入終南山繼入太白山嚙草木居息石崖下時有所



得走山最高峰持古松根扣巨奇石以歌慎蒙山志太白山人莫知

其所自來人問其姓名曰我姓孫一元名問其字曰我字太初問

何以稱太白山人曰我秦人也嘗棲太白山之巔於是稱太白山

人山人善詩有超逸才嘗出秦四遊南走吳越吳會人爭禮敬山

人山人固善說清虛又崖頭飄鬚望之如神仙中人於是愈禮敬

山人一日病且革屬其友曰死葬我佳山幸題墓曰明詩人孫一

元之墓已而山人甦起而憤曰幾負我志而吳越人以是覘知山

人初無羽化術稍稍疑避而山人顧益說世務用世之士益喜之

舉人施侃者雅喜山人而病其放說之居山人然之買田苕溪之

傍又說之婚則婚侃妻妹張氏是時建業劉麟寬與吳克陸崑暨

山人結社遊苕溪五隱山人始講吾儒性命之學無何卒

三十七 李夢陽太白山人傳

王汝霖字九谷華陰人性孝友博學有文名避跡華陰山之麓以詩

賦自娛嘉靖登極詔求隱逸有司累薦不起台府高其節贈扁旌

廬著有松隱漫稿草木靈異錄賈志

馬天章字季襄三原人少從學於溫恭毅立志端亮孝事孀母善詩

賦尤工篆隸栖遯衡門不求聞達人謂烟姿霞韻既有田遊巖復

有馬季襄實先後輝映云三原志

梁文映三原人明經溫恭毅居總憲欲薦於朝文映固辭酣歌退隱

人高其節三原志

董旭兆長安人讀書彈琴淡於世味草書得二王遺意以布衣終賈志

王之翰字宗卿華陰人少司馬之良之兄也之良官南贛巡撫治績

卓然之翰獨淡於榮利教授生徒有貧者輒資給之笑傲林泉不

治生產時人擬之韋敬遠云子弘睿戊午舉人不樂仕進築漱園

華麓優游其間以詩文自娛

賈志

劉鉦冠永清俱中部人鉦萬曆戊午舉人官保定通判永清天啟辛

酉恩選官汾州同知皆以清介耿直不能俯仰隨時掛冠歸里鉦

卜居於燬泉谷永清隱於邑東龍灣之陽布衣糲飯彈琴著書以

自娛足跡不入城市人並美之鉦子世諫舉明經亦高節不仕

賈志

張鑛張鑛中部人俱舉明經鑛任武邑縣知縣不樂爲吏即解印歸

屏跡自晦終身不出鑛授通判不就官卜居北原貧窘蔬食毫無

愠色時稱爲兩逸士

賈志

楊清張暨辰俱宜君人清以恩選赴廷對時魏璫方煽清拂袖西歸

隱身不出植花種竹飄飄然有遺世之思暨辰嘗從馮少墟講學

見朝政日紊乃杜門晦迹歲當舉明經不應布袍蔬食窮約終身

賈志

恩及岐清澗人閉戶讀書不計功名或手持一卷笑傲山水間自

義皇上人尤喜施予弗事產業及貢期不就廷對林泉自適隱居

終身

清澗志

師功凱字雲菴清澗人天性孝友有隱志不求聞達少慕黃老之術

居華山以醫活人弗責報夢帝錫以佳嗣果生子遂謝絕人世遍

遊名山不返

清澗志

張曰炳字晦叔同州人知府守訓季子性醇篤好學凡圖緯書數至

稗官醫卜靡不綜獵恬於勢利不就有司試或諷之傲然不屑與

馬林友善日夕揚扝古文辭郡中風雅一振爲文典古華瞻卓有

矩矱著張晦叔詩集八卷武成考一卷

同州志

費甲鑄字子范咸寧人爲人曠逸不羈植竹築圃以邱壑自怡賓客

往來接談忘倦獨不喜談世務事兄甲鏞尤盡禮好吟詠工書畫

所著有西湖草行於世

賈志

于養麟興平歲貢李景貞洋縣進士闖逆陷長安皆棄家遠遁

賈志

晉國柱字擊衡長安人少受講於馮恭定以闖變高隱卒之日門人

諡曰真孝先生時同時高隱身不仕者郟陽訓導党國柱扶風人

代州知州党玳城固人華陰王弘學潼關楊賓楊嘗有辭貢文當

事者高其義讓

賈志

魏淵淵字空空隱居華嶽性朴誠恬靜甘淡泊絕口不言世務足不

出山者三十餘年後其子以淵淵老三至嶽頂欲迎還就養淵淵

決志不歸其子泣請移綿山乃許之終不至家後無疾而卒

賈志

劉緹中部人力行篤學苦志清修舉明經不仕家貧自甘不受餽遺

爲廬於沮水之旁教受生徒學者稱爲許西先生

中部志

流寓

太師疵少師疆武王東觀兵歸居二年太師疵少師疆抱其樂器而

奔周

史記周本傳

甯戚衛人居約時客遊於秦郟有遺跡

賈志

泉深有流水繞於門庭之間僉曰此齊相甯戚所築水也故宅遺

址猶有存者

金高宴食水碑記○按甯戚飯牛歌全是倦游歸來語意則流寓秦郟亦當日應有之事今郟縣以堡名

甯曲非無自也至戰志云甯戚有相牛經一卷傳之百里奚後奚得此以要秦穆公則近於荒誕矣

夷吾晉侯使賈華伐屈夷吾不能守盟而行將奔狄郟芮曰不如之

梁梁近秦而幸焉乃之梁

左傳

晉太子圉爲質於秦秦妻之子圉將逃歸謂羸氏曰與子歸乎對曰

子晉太子而辱於秦子之欲歸不亦宜乎寡君之使婢子侍執巾

櫛以固子也從子而歸棄君命也不敢從亦不敢言遂逃歸

左傳

晉公子重耳之及於難也晉人伐諸蒲城蒲城人欲戰重耳不可曰保君父之命而享其生祿於是乎得人有人而校罪莫大焉吾其奔也遂奔狄從者狐偃趙衰顛頡魏武子司空季子狄人伐廆咎如獲其二女叔隗季隗納諸公子公子取季隗生伯儵叔劉以叔隗妻趙衰生盾處狄十二年而行及楚楚子乃送諸秦秦伯納女五人懷嬴與焉奉匱沃盥既而揮之怒曰秦晉匹也何以卑我公子懼降服而囚他日公享之子犯曰吾不如衰之文也請使衰從公子賦河水公賦六月趙衰曰重耳拜賜公子降拜稽首公降一級而辭焉衰曰君稱所以佐天子者命重耳重耳敢不拜左傳○從亡五人史記有先軫無顛頡

由余戎王使由余於秦由余其先晉人也亡入我間繆公賢故使由余觀秦繆公問內使廖曰隣國有聖人敵國之憂也由余賢奈何

廖曰君爲由余請以疏其間留而莫遣以失其期戎王怪之必疑

由余君臣有間乃可虜也繆公因與由余曲席而坐傳器而食問

其地形與其兵勢終年乃歸由余史記秦本紀

晉先蔑奔秦

春秋

晉襄公卒靈公少晉人以難故欲立長君晉人使先

蔑士會如秦逆公子雍秦康公送公子雍於晉多與之徒衛穆嬴

日抱太子以啼於朝宣子與諸大夫皆患穆嬴且畏偁乃背先蔑

而立靈公敗秦師於令狐先蔑奔秦士會從之先蔑之使也荀林

父止之弗聽及亡荀伯盡送其帑及其器用財賄於秦曰爲同寮

故也士會在秦三年不見士伯其人曰能亡人於國不能見於此

焉用之士季曰吾與之同罪非義之也將何見焉及歸遂不見晉

人患秦之用士會也使魏壽餘僞以魏叛者以誘士會執其帑於

晉使夜逸請自歸於秦秦伯許之履士會之足於朝秦伯師於河

西魏人在東壽餘曰請東人之能與夫二三有司言者吾與之先使士會士會辭曰晉人虎狼也若背其言臣死妻子為戮無益於君不可悔也秦伯曰若背其言所不歸爾帑者有如河乃行纔朝贈之以策曰子無謂秦無人吾謀適不用也既濟魏人譟而還秦人歸其帑其處者為劉氏

左傳

四飯缺適秦播鼗武入於漢

論語○按朱註云漢漢中此漢中在與漢之間即禹貢壻冢導漾東流為漢處

也春秋之末地應屬楚然武避地而去萍踪無定云入漢者亦猶詩咏伊人在水一方之意未如其稅駕何所安如不為褒沔之遊

故與入秦之缺並載之

下商字子夏衛人少孔子四十四歲孔子既没子夏居西河教授為

魏文侯師

史記仲尼弟子本傳

所居石室在飛浮山當河之中隨水消長為

高下

賈志

扁鵲勃海郡鄭人也姓秦氏名越人視病盡見五藏癥結名聞天下

來入咸陽聞秦人愛小兒即為小兒醫隨俗為變秦太醫令李醜

自知伎不如扁鵲使人刺殺之至今天下言脉者由扁鵲也

史記本傳

蘇秦者東周洛陽人也西至秦秦孝公卒惠王方誅商鞅疾辯士弗

用

史記本傳

蘇秦說秦王書十上而說不行黑貂之裘敝黃金百鎰盡

資用乏絕去秦而歸

戰國策

太子完頃襄王使太子完入質於秦秦留之數年王病太子不得歸

史記春申君傳

楚王子質於秦不得歸作思歸歌曰去千乘之家國作咸

陽之布衣

怨錄

燕太子丹者故嘗質於趙而秦王政生於趙其少時與丹驩及政立

為秦王而丹質於秦秦王遇燕太子丹不善故丹怨而亡歸

史記刺客傳

燕太子丹質於秦秦遇之無禮不得意欲歸秦王不聽謬言曰

令烏頭白馬生角乃可丹仰天歎烏即白頭馬為生角秦王不得

已而遣之

冊府元龜

陸賈楚人以客從高祖定天下有口辯常使諸侯孝惠帝時呂太后

用事陸生自度不能爭乃病免以好時田地善可家焉有五男乃

出所使越得橐中裝賣千金分其子子二百金令為生產陸生常

安車駟馬從歌舞鼓琴瑟侍者十人寶劍直百金謂其子曰與汝

約過汝汝給吾人馬酒食極飲十日而更所死家得寶劍車騎侍

從者一歲中往來過他客率不過再三過數見不鮮無以恩公為

也竟以壽終

史記本傳

司馬季主楚人卜於長安東市宋忠賈誼同與之市游卜肆中司馬

季主閒坐弟子三四人侍方辯天地之道日月之運陰陽吉凶之

本二大夫再拜謁司馬季主使弟子延之坐坐定司馬季主復理

前語數千言宋忠賈誼瞿然而悟獵纓正襟危坐曰先生何行之

汚司馬季主曰騏驥不與罷驢為駟鳳凰不與燕雀為羣賢者亦

不與不肖者司列公等喁喁何知長者之道乎於是再拜而辭

史記本傳

灌夫字仲孺潁陰人為中郎將數月坐法去後家居長安長安中諸

公莫弗稱之

史記灌夫列傳

李廣者隴西成紀人為將軍下吏當斬贖為庶人家居數歲廣家與

故潁陰侯孫屏野居藍田南山中射獵嘗夜從一騎出從人田間

飲還至霸陵亭霸陵尉醉呵止廣廣騎曰故李將軍尉曰今將軍

尚不得夜行何乃故也止廣宿亭下

史記本傳

司馬相如者蜀郡人也字長卿口吃而善著書常有消渴疾與卓氏

婚饒於財其進仕宦未嘗肯與公卿國家之事稱病閒居不慕官

爵既病免家居茂陵天子曰相如病甚可往從悉取其書若不然後失之矣使所忠往而相如已死

史記本傳

相如將聘茂陵人女為妾

卓文君作白頭吟以自絕相如乃止

西京雜記

朱買臣字翁子吳人家貧隨上計吏為卒將重車至長安詣闕上書

書久不報待詔公車糧用乏上計吏卒更乞匄之邑子嚴助貴幸

薦買臣拜中大夫坐事免久之召待詔拜會稽太守初買臣免待

詔常從會稽守邸者寄居飯食拜為太守買臣衣故衣懷其印綬

步歸郡邸直上計時會稽吏方相與羣飲買臣入室中守邸與共

食食且飽有頃長安廐吏乘駟馬車來迎買臣遂乘傳去

漢書本傳

任安樂陽人少孤貧因為人將車之長安留求事為小吏未有因因

占著名數家於武功武功扶風西界小邑也谷口蜀剗道近山安

以為武功小邑無豪易高也安留代人為求盜亭父後為亭長邑

中人出獄安為分麋鹿雉兔部署老小當壯劇易處眾人皆喜曰

任少卿分別平有智畧明日復合會會者數百人任少卿曰某子

甲何為不來乎諸人皆怪其見之疾也後乃為衛尉掾舍人

史記田叔傳

王吉字子陽琅邪舉虞人少時學問居長安東家有大棗樹垂吉庭

中吉婦取棗以啖吉吉後知之乃去婦東家聞而欲伐其樹隣里

共止之因固請吉令還婦里人為之語曰東家有樹王陽婦去東

家棗完去婦復還其屬志如此

漢書本傳

樓護字君卿齊人父世醫也護少隨父為醫長安出入貴戚家護誦

醫經本草方術數十萬言長者咸愛重之共謂曰以君卿之材何

不宦學乎繇是辭其父學經傳為京兆吏數年甚得名譽護為人

短小精辯議論常依名節聽之者皆竦與谷永俱為五侯上客母

短小精辯議論常依名節聽之者皆竦與谷永俱為五侯上客母

死送葬者致車二三千兩閭里歌之曰五侯治喪樓君卿舉方正  
爲諫大夫擢天水太守復爲廣漢太守

漢書本傳

蔡順字君仲汝南人少孤事母至孝王莽末中原大亂順奉母西入  
關避居華西廣鄉原即今渭南東原也會歲饑順採桑椹供養赤  
眉賊向關中順遭之賊衆見其桑椹黑赤異器問故順曰黑者供  
母赤者自食賊驚曰孝子也乃遺米三斗牛一蹄禮之使歸食母

西安府志

承宮字少子琅邪姑幕人少孤勤學不倦遭天下喪亂遂將諸生避

地漢中

後漢書本傳

孔季彥魯人父臨晉令禧卒於官遂留華陰有答張太常備德君子

及楊太尉震大儒之問

西安府志

蔡邕字伯喈陳留人初邕與司徒劉劭素不相平叔父衛尉質又與

將作大匠楊球有隙球即中常侍程璜女夫也璜使人飛章言邕

質數以私事請託於劭劭不聽於是詔下邕質於洛陽獄劾棄市

事奏中常侍呂強愍邕無罪請之帝有詔減死一等與家屬髡鉗

徙朔方楊球使客追路刺邕客感其義皆莫爲用又賂其部主使

加毒害所賂者反以其情戒邕故每得免居五原安陽縣邕前在

東觀與盧植韓說等撰補後漢記因上書自陳奏其所著十意帝

嘉其才高會明年大赦乃宥邕還本郡邕自徙及歸凡九月焉

後漢書本傳

丁蘭河內人寓居平陵後人名其居地曰孝子門

馬志

李堅曹植擊舞詩序云漢靈帝鼓吹有李堅者能擊舞遭世荒亂播

越關西隨將軍段熲先帝聞其舊伎下書召堅堅年踰七十云

晉書

樂志



王粲字仲宣山陽高平人曾祖襲祖暢皆爲漢三公獻帝西遷粲徙長安左中郎將蔡邕見而奇之時邕才學顯著貴重朝廷常車騎填巷賓客盈坐聞粲在門倒屣迎之粲年既幼弱容狀短小一坐盡驚邕曰此王公孫有異才吾不如也吾家書籍文章盡當與之年十七司徒辟詔除黃門侍郎以西京擾亂皆不就

三國魏志本傳

青牛先生初平中山東人有青牛先生字正方客三輔曉知星曆風角鳥情常食青菘莞華年似五六十者人或親識之謂已百餘歲

矣建安十六年三輔亂南入漢中漢中壞入蜀

三國志管志傳注

寒貧者本姓石字德林安定人建安初客三輔是時長安有宿儒樂文博者門徒數千德林亦就學始精詩書後好內事於衆輩中最元默十六年關中亂南入漢中不治產業不畜妻孥嘗讀老子五千文及諸內書晝夜吟咏二十五年漢中破隨衆還長安遂癡愚不復識人食不求味冬夏常衣弊布連結衣體如無辨勝目如無所見獨居窮巷小屋無親里人與之衣食不肯取郡縣以其鰥窮給廩日五升食不足頗行乞乞不取多人問其姓字不肯言因號之曰寒貧或素有與相知者往存恤之輒拜跪由是人謂其不癡

魏畧

周統字孟威少有節操歷梓潼太守寧康初蒞堅將楊安寇梓潼統遣送母妻爲堅將邀而護之統遂降於安堅欲以爲尚書郎統曰蒙國厚恩以至今日老母見獲失節於此母子獲全秦之患也雖公侯之貴不以爲榮况卽任乎堅乃止太元三年統潛至漢中堅追得之後徙於太原

晉書本傳

北魏

陝西通志

卷五十四 人物十

三

賀狄干代人登國初道武遣狄干致馬千匹結婚於姚萇萇死與立止狄干而絕婚干在長安因習讀書史通論語尚書諸經舉止

風流有似儒者

北史本傳

寇讚字奉國上谷人因難徙居馮翊萬年姚泓滅秦雍人千有餘家

推讚爲主歸順拜魏郡太守

魏書本傳

胡叟字倫許安定臨涇人少聰慧好屬文以姚氏將衰遂入長安觀風化隱匿名行懼人見知時京兆韋祖思少閱典墳多蔑時彥待叟不足叟拂衣而出祖固留之遂歸主人賦韋杜二族一宿而成

時年十八人皆奇其才畏其筆叟孤飄坎壈未有仕路遂入漢中

刺史馮翊吉翰頗相禮接授末佐不稱懷未幾入蜀

北史本傳

游明根字志遠雅從祖弟廣平任人幼年遭亂爲櫟陽王氏奴主使牧羊明根以壺漿倩人書字路邊書地學之長安鎮將竇瑾見之

呼問知其姓名乃告雅雅贖之

北史游雅傳

馮熙信都人生於長安爲姚氏魏母所養以叔父樂陵公邈因戰入蠕蠕魏母携熙逃避至氐羌中撫育年十二好弓馬有勇幹氐羌皆歸附之魏母見其如此將還長安始就學問從師受孝經論語好陰陽兵法及長遊華陰河東二郡間性汎愛不拘小節人無士庶來則納之後至侍中太師

魏書外戚傳

李預字元凱太和初歷馮翊太守解郡遂居長安羨古人殮玉法乃採訪藍田躬往攻掘得若環璧雜器形者大小百餘頗有蒼黑者亦篋盛以還至而觀之皆光潤可玩乃椎七十枚爲屑食之經年云有效驗而世事寢食皆不節又好酒損志及病篤謂妻子曰吾尸體必當有異勿速殯令後人知殮服之妙時七月中旬長安毒熱預停尸四宿而體色不變妻常氏以玉珠二枚啗之因瘞其口

都無穢氣舉斂於棺堅直不傾

北史李先傳

薛拔

辨孫汾陰人

尚文成女西河長公主拔弟子驎駒舉秀才除中書博

士始拔尚主有賜田在馮翊驎駒徙居之遂家於馮翊之夏陽

北史本傳

李昶頓邱臨黃人父遊有才行屬亂奔江左昶於太祖世已當樞要

及晉公護執政委任如舊昶以父在江南身寓關右自少及終不

飲酒聽樂時論以此稱焉

周書本傳

檀翥字鳳翔高平人好讀書善屬文能鼓瑟司州牧城陽王元徽以

翥爲從事非其好也尋謝病客遊三輔

周書李昶傳

蕭大圖梁簡文帝子也大寶元年封樂梁郡王元帝改封晉熙郡王

于謹軍至元帝令大圖兄大封充使請和大圖副焉其實質也出

至軍所信宿元帝降魏恭帝二年客長安太祖以客禮待之并賜

田宅奴婢牛馬粟帛等俄而開麟趾殿招集學士大圖預焉

周書本傳

王褒字子淵琅琊臨沂人有重名於江左大軍征江陵元帝出降褒

出見柱國于謹謹甚禮之褒曾作燕歌行妙盡關塞寒苦之狀元

帝及諸文士並和之競爲淒切之詞至此方驗褒與王克劉毅宗

懔等數十人俱至長安太祖喜曰昔平吳之利二陸而已今羣賢

畢至可謂過之又謂褒及王克曰吾王氏甥也卿等並吾之舅氏

當以親戚爲情弗以去鄉介意於是授褒克等車騎大將軍儀同

三司資籛甚厚褒等亦並荷恩賜忘其羈旅初褒與梁處士汝南

周弘讓相善及弘讓兄弘正自陳來聘高祖許褒等通親知音問

褒贈弘讓詩并致書

周書本傳

庾信字子山南陽新野人梁元帝即位加散騎常侍來聘於我屬大

軍南討遂留長安江陵平陳氏與朝廷通好南北流寓之士各許

還其舊國陳氏請信等十數人高祖惟放王克殷不害等信及褒

並留不遣世宗高祖雅好文學特蒙恩禮信雖位望通顯常有鄉

周書本傳

關之思乃作哀江南賦以致其意

殷不害字長卿陳郡長平人江陵陷與王褒庾信俱入長安自是蔬

食布衣枯槁骨立見者哀之大建七年自周還朝其還也周留其

長子僧首因居關中禎明三年京城陷僧首來迎不害道病卒

陳書本傳

姚察吳興武康人父上開府僧垣知名察於大建初除散騎侍郎左

通直報聘於周初梁季淪沒僧垣入於長安至是得與僧垣相見

將別之際絕而復蘇見者莫不歎歎

陳書姚察傳

徐文遠偃師人父徹梁秘書郎尚元帝女安昌公主而生文遠屬江

陵陷被虜於長安安貧無以自給其兄休書為業文遠日閱書

於肆博覽五經尤精春秋左氏傳

舊唐書儒學傳

劉行本沛人起家武陵國常侍遇蕭修以梁州北附遂與叔父璠同

歸於周寓居京兆之新豐每以諷讀為事

隋書本傳

**蕭**

蕭允字叔佐蘭陵人後主拜光祿大夫及隋師濟注遷於關右是時

朝士至長安者例並授官惟允與尚書僕射謝朏辭以老疾隋文

帝義之並厚賜錢帛尋以疾卒於長安

陳書本傳

孔紹安越州山陰人少與兄紹新俱以文詞知名陳亡入隋徙居京

兆郡縣閉門讀書誦古文集數十萬言外兄虞世南歎異之紹新

嘗謂世南曰本朝淪陷分從湮滅但見此弟竊謂家族不亡矣

隋書本傳

書文苑傳

盧照鄰范陽人拜新都尉因疾去官處太白山中以服餌為事唐書文苑傳

照鄰始去新都寓於京城鄱陽公主之廢府時詔徵太白山隱

士孫思邈亦居此府思邈時年九十餘視聽不衰照鄰自傷年饒

強仕而沉疾困憊乃作病梨樹賦冊府元龜

員半千字榮期齊州人累封平原郡公樂山水自放開元九年遊堯

山沮水間愛其地遂定居卒年九十四即葬焉唐書本傳

王維字摩詰太原祁人得宋之間藍田別墅在輞口輞水周於舍下

與道友裴迪浮舟往來強琴賦詩嘯詠終日嘗聚其田園所為詩

號輞川集唐書本傳維母亡表輞川第為寺唐書本傳摩詰少以詞學知

名有高致信佛理藍田南置別業以水木琴書自娛善畫山水人

物嘗於清源寺壁畫輞川圖巖岫盤鬱雲水飛動唐書本傳是圖蓋

維平生得意畫也予觀唐史暨維集所謂竹館柳浪等皆可考江

山雄勝草木潤秀使人徘徊撫卷而忘倦浩然有結廬終焉之想

而不知秦之非吾土也物之移人觀者如是劉因輞川圖記

杜甫字子美其先自襄陽徙河南甫舉進士不第困長安會祿山亂

天子入蜀甫避走三川肅宗立自鄜州羸服欲奔行在為賊所得

至德三載亡走鳳翔謁上拜右拾遺時所在寇奪甫家寓鄜驛年

難窶孺弱至餓死因許甫自往省視從還京師出為華州司功參

軍關輔饑輒棄官去唐書杜甫傳

牛僧孺八代祖弘相隋封奇章郡公贈文安侯長安南下杜樊鄉東

文安有隋氏賜田數頃書千卷尚存公年十五依以為學數年業

就杜樊川集

張詢南海人不第後流寓長安以畫自適國繪寶鑑

張策字少逸河西燉煌人少好浮圖之說乃落髮為僧居長安慈恩

寺黃巢犯長安策乃返初服奉父母以避亂邠州王行瑜辟觀察支使晉王李克用攻行瑜策與婢肩與其母東歸

五代史本傳

**宋**

呂黃汲郡人爲比部郎中後知巴西縣致仕因葬京兆藍田遂家焉

河南通志

邵雍洛陽人嘗占籍商洛結廬天柱山商守給天柱山戶帖與之唱

和又寓居鳳州嘗登郡樓賦詩而去

馬堯夫

遊商愛南秦川風土

卜居八年與州守宋郎中友善時以詩酒酬答一日州守延賞牡

丹時章惇爲商洛令議論縱橫堯夫言見蓓蕾而知花之高下者

知花之次也見根葉而知花之高下者知花之上也因陳天人理

數之學章惇服

商州志

呂希純河南人紹聖初以屯田員外郎分司南京後居金州杜門讀

書不以夷險繫心

馮志

**金**

李懋不知何許人有異術正大間游京兆行省完顏合達愛其術

金史

本傳

李汾字長源平晉人系出雁門避亂入關京兆尹子容愛其才招致

門下留二年去之涇州謁張公信甫一見即以上客禮之自是游

道日廣關中無一人敢與相軒輊者長源以詩爲專門之學其所

得如三輔樓臺失歸燕上林花木怨啼鶻等句同輩作七言詩者

皆不及也有關中往來詩十數首道其流離世故妻子凋喪道塗

萬里奔走狼狽之意雖詞旨危苦而耿耿自信者故在

中州集

**元**

毛冲蜀人原任普潤縣尹後謝政隱於岐山周公廟談詩論禮不求

聞達鄰邑諸向道者多與之遊居數十年還籍

岐山志

**明**

常存字惟德開平王遇春從子累功授親軍侍衛指揮洪武初從遇春入關以久在兵間思脫塵網遂謝去寓居蒲城之白堂山賢相

鄉西安府志

羅性字子理泰和人洪武初中鄉貢進士授德安府同知坐擅用棗

木染軍衣為陳寧所劾謫戍西安行橐橛虛怡然就役既至達官

貴人咸加敬禮諸生從學甚衆是時四方老師碩儒在西安者數

十人吳中鄒奕獨曰合吾輩所讀書庶幾羅先生之半

名山藏

晉漢臣洪洞人愍王時為紀善慕終南之勝遂卜居江村後陞審理

卒於王事葬村西

賈志

石無用字琴月南安人善詩尤工書往來江漢蒲團杖笠片雲孤鶴

寓洋之鄧都山五雲宮

洋縣志

俞安期字美長吳江人寓居京兆詩名重海內著有琴琴閣集雍勝

畧并纂唐類函諸書

賈志

祝世喬字子遷江西金谿人方襁褓時父神谷遠遊久未歸世喬年

十五獨行尋父歷楚及秦數瀕危殆先是楚有楊某者德神谷瘵

其疾思報之及見世喬亟欲妻以女世喬辭去之西秦西秦山高

地寒值嚴冬皸瘃無完膚自分必死久之乃遇父於鞏昌西和道

中父子相抱而泣觀者咸為酸感奉父至高陵始卜室焉世喬雖

窮途孤旅讀書不輟後以選貢授南康通判佐郡有聲移家隸籍

咸寧

馮少墟集

方伎

**周**

偃師西域人周穆王西巡將還未及中國有獻工人名偃師王問曰  
 何能偃師曰臣惟命所試然臣已有所造願王先觀之王曰日與  
 俱來吾與若俱觀之翼日偃師謁見王王曰若與偕來者何人耶  
 對曰臣所造能倡者王驚視之趣步俯仰信人也巧夫領其頤則  
 歌合律捧其手則舞應節于變萬化惟意所適王以為實人也與  
 盛姬內御並觀之技將終倡者瞬其目而招王之左右侍妾王大  
 怒立欲誅偃師偃師太懾立剖散倡者以示王皆傅會革木膠漆  
 白黑丹青之所為王諦料之內則肝胆心肺脾腎腸胃外則筋骨  
 支節皮毛齒髮皆假物也合會復如初王試廢其心則口不能言  
 廢其肝則目不能視廢其腎則足不能步王始悅而歎曰人之巧  
 乃可與造化同功乎詔式車載之以歸列傳偃師縛草作人能為之  
 走文苑彙編按方伎非秦產者不錄但偃師來自遐方人貢之  
 後供奉周京終老於此直省各志既無從收錄入之流寓生平

術藝又湮沒不彰故特與土著並列於篇自周  
 秦以迄隋唐遠人以方伎傳者凡得五人云

商南本黃帝之昆孫以地得姓周初封子男於商精數學周髀衍其  
 說為算經國語曰司商賈志

卜徒父秦太僖公十五年秦伯伐晉卜徒父筮之吉涉河侯車敗詰  
 之對曰大吉三敗必殺晉君其卦遇蠱曰千乘三去三去之餘獲  
 其雄狐夫狐蠱必其君也蠱之貞風也其悔山也歲三秋矣我落  
 其實而取其材所以克也實落材亡不敗何待三敗及韓戰於韓  
 原秦獲晉侯以歸左傳

卜招父梁太惠公之在梁也梁伯妻之梁嬴孕過期卜招父與其子  
 卜之其子曰將生一男一女男為人臣女為人妾故名男曰圍女  
 曰妾及子圍西質妾為宦女焉左傳

伯樂善相馬秦穆公謂曰子之年長矣子姓有可使求馬者乎對曰



臣之子皆下材也臣有所與九方臯此其於馬非臣之下也穆公見之使行求馬三月而反報曰已得之矣在沙邱穆公曰何馬對曰牝而黃使人往取之牡而驪穆公不悅謂伯樂曰敗矣子所使求馬者物色牝牡尚弗能知又何馬之能知也伯樂曰若臯之所觀天機也得其精而忘其粗若臯之相馬乃有貴乎馬者也馬至果天下之良馬也

列子

醫緩

秦人

成公十年晉侯疾病求醫于秦秦伯使醫緩爲之未至公夢

疾爲二豎子曰彼良醫也懼傷我焉逃之其一曰居盲之上膏之下若我何醫至曰疾不可爲也在盲之上膏之下攻之不可達之不及藥不至焉不可爲也公曰良醫也厚爲之禮而歸之

左傳

醫和人

秦昭公元年

晉侯求醫於秦秦伯使醫和視之曰疾不可爲也是謂近女室疾如蠱非鬼非食疾心喪志良臣將死天命不祐公

曰女不可近乎對曰節之天有六氣降生五味發爲五色徵爲五聲淫生六疾六氣曰陰陽風雨晦明也分爲四時序爲五節過則爲菑陰淫寒疾陽淫熱疾風淫末疾雨淫腹疾晦淫惑疾明淫心疾陽物而晦時淫則生內熱惑蠱之疾今君不節不時能無及此乎趙孟曰誰當良臣對曰主是謂矣主相晉國於今八年晉國無亂諸侯無關可謂良矣和聞之國之大臣榮其寵祿任其大節有菑禍興而無改焉必受其咎今君至於淫以生疾將不能圖恤社稷禍孰大焉主不能禦吾是以云也趙孟曰何謂蠱對曰淫溺惑亂之所生也於文皿蟲爲蠱穀之飛亦爲蠱在周易女惑男風落山謂之蠱皆同物也趙孟曰良醫也厚其禮而歸之

左傳

醫鈞者秦之良醫也爲宣王割座爲惠王治痔皆愈張子之背腫請鈞治之曰背非吾背也任子治焉遂愈

子尸

裂裔始皇元年騫霄國獻刻玉善畫工名夷使含丹青以激地即成  
魘魅及詭怪羣物之象刻玉爲百獸之形毛髮宛若真銘其臆前  
記以日月工人以指畫地長百丈直如繩墨方寸之內畫四竇五  
岳列國之圖又畫爲龍鳳騫翥若飛皆不點睛或點之必飛走始  
皇嗟曰刻畫之形何得飛走使以淳漆各點兩玉虎一眼睛旬日  
失之不知所在明年西方獻兩白虎各無一目始皇發檻視之疑  
是先所失者乃刺殺之檢其胸前果元年所刻玉虎也

畫記作

裂夷

周仁其先任城人以醫見景帝爲太子時爲舍人積功遷至太中大夫  
夫景帝初立拜仁爲郎中仁爲人陰重不泄常衣弊補衣溺袴故

不爲潔清以是得幸入卧內於後宮秘戲仁常在旁上時問人仁  
曰上自察之然亦無所毀景帝再自幸其家家陽陵上所賜甚多  
然終常讓不敢受也諸侯羣臣賂遺終無所受武帝立爲先帝臣

重之仁乃病免以二千石祿歸老於家子孫咸至大官

漢書本傳

楛生安陵袁盎家居多怪乃之楛生所問占

漢書袁盎傳。按袁盎家安陵。楛生秦

時賢士善術者也

袁盎傳注

許博昌安陵人善陸博寶嬰好之常與居處其術曰方畔揭道張張  
畔揭道方張究屈元高高元屈究張三輔兒童皆誦之法用六箸  
以竹爲之長六分或用二箸博昌又作大博經一篇

西京雜記

蓋元西域武帝平西域得胡人善蹴鞠者蓋元便捷跳躍帝好而爲

之羣臣不能諫

彈碁經序

徐禹長安武帝元封七年曆紀廢壞廼造漢太初曆元鳳三年太史

令張壽王言黃帝調曆漢元年以來用之今陰陽不調更曆之過

詔課諸曆疏密長安徐禹治太初曆第一壽王治黃帝調曆皆疏

濶又言黃帝至元鳳三年六千餘歲長安單安國安陵栢育治終

始言黃帝以來三千六百二十九歲不與壽王合故曆本之驗自

漢曆初起盡元鳳六年三十六歲而是非堅定漢書律曆志

古掾曹京兆學從橫揣摩弄矢搖九檣蒲之術爲都掾史四十餘年

善詭譎二千石隨以諧謔皆握其權要而得其歡心趙廣漢爲京

兆尹黜之終於家京師排戲皆稱古掾曹西京雜記

毛延壽杜陵人陳敞平陵人劉白新豐人陽望下杜人樊育長安人

並永光建昭中畫手時元帝後宮既多使圖其狀每披圖召見諸

宮人競賂畫工錢帛獨王嬙貌麗意不苟求工人遂爲醜狀及匈

奴求漢美女上按圖召昭君行帝見昭君貌甚悔之而籍已定乃

窮其事畫工皆棄市籍其家賞皆巨萬毛延壽畫人老少美惡皆

得其正陳敞劉白並工牛馬飛鳥衆勢但人物不及延壽陽望樊

育亦善畫尤善布色歷代名畫記按本傳畫手共六人其

丁緩長安常爲滿燈七龍五鳳雜以芙蓉蓮藕之奇又作卧褥香爐

一名被中香爐本出房風其法後絕至緩始更爲之爲機環轉運

四周而爐體常平可置之被褥故以爲名又作九九層博山香爐

鏤爲奇禽怪獸窮諸靈異皆自然運動又作七輪扇連七輪大皆

徑丈相連續一人運之滿堂寒顛西京雜記

杜夫子杜陵善奕棋爲天下第一人或譏其費日夫子曰精其理者

足以大裨聖教西京雜記

篩翁者長安善相馬者也於邊郡求得駿馬騎以入市去來人不見

也後勞問之因請觀焉翁曰諸卿無目不足示也桓譚新論

山子道

馮胡人

博物志曰漢世馮胡山子道王九真郭凱等善圍棋

志魏武帝本紀注

**馬鈞**

扶風人

巧思絕世傳元序之曰馬先生天下之名巧也為博士居

貧舊綾機五十綜者五十躡六十綜者六十躡先生患其喪功費

日乃皆易以十二躡為給事中與常侍高堂隆驍騎將軍秦朗言

及指南車明帝詔先生作之都內有地可為園患無水以灌之乃

作翻車令童兒轉之灌水自覆更入更出其巧百倍於常其後人

有上百戲者能設而不能動帝問可動否曰可動其巧可益否曰

可益受詔作之以大木彫構使其形若輪平地施之潛以水發設

為女樂舞象至令木人擊鼓吹簫作山嶽使木人跳丸擲劍緣繩

倒立出入自在百官行署春磨鬪雞變巧百端見諸葛亮連弩曰

巧矣未盡善也作之可令加五倍又患發石車敵人之於樓邊懸

濕牛皮中之則墮石不能連屬而至欲作一輪懸大石數十以機

鼓輪為常則以斷懸石飛擊敵賊使首尾電至嘗試以車輪懸瓠

甕數十飛數百步先生之巧雖古公輸般墨翟王爾近漢世張平

子不能過也

魏志社稷傳注

**王彫**

新平人

初符堅即偽位彫陳說圖讖堅大悅以彫為太史令嘗言

於堅曰謹按讖云古月之末亂中州洪水大起健西流惟有雄子

定八州此即三祖陛下之聖諱也又曰當有草付臣又土滅東燕

破白虜氏在中華在表案圖讖之文陛下當滅燕平六州願徙汧

隴諸氏於京師三秦大戶置之於邊地以應圖讖之言堅訪之王

猛猛以彫為左道惑眾勸堅誅之彫臨刑上疏曰臣以趙建武四

年從京兆劉湛學明於圖記謂臣曰新平地古顛頊之墟里名曰雞間記云此里應出帝王寶器其名延壽寶鼎顛頊有云河上先生爲我隱之於咸陽西北吾之孫有草付臣又土應之湛又云吾嘗齋於室中夜有流星大如半月落於此地斯益是乎願陛下誌之平七州之後出於壬午之年至是新平人得之以獻器銘篆書文題之法一爲天王二爲王后三爲三公四爲諸侯五爲伯子男六爲卿大夫七爲元士自此以下考載文記列帝王名臣自天子王后內外次序上應天文象紫宮布列依玉牒版辭不違帝王之數從上元人皇起至中元窮於下元天地一變盡三元而止堅以彫言有徵特贈光祿大夫

晉書符堅載記

**北** 周澹廓人多方術尤善醫藥爲太醫令太宗嘗苦風頭眩澹治得愈

由此見寵位至特進賜爵成德侯

魏書本傳

趙胡

京兆人

宣武靈皇后胡氏司徒國珍女也產之日赤光四照京兆

山北縣有趙胡者善卜相國珍問之胡云賢女有大貴之表方爲

天地母生天地主勿過三人知也

魏書皇后傳

王伯達

扶風人

盧淵年四十嘗詣長安將還諸相餞送者五十餘人別

於渭北有相者扶風人王伯達曰諸君皆不如此盧郎雖位不副

實然德聲甚盛望踰公輔後三十餘年當制命關右願不相忘後

淵果爲安南將軍督關右諸軍事相者年過八十詣軍門請見言

叙平生未幾拜儀曹尚書

魏書本傳

**南**

韋鼎字超盛京兆杜陵人少通脫博涉經史明陰陽逆刺尤善相術仕梁遭父憂哀毀過禮殆將滅性侯景之亂兄昂卒於京城鼎負

屍出寄於中興寺求棺無所得鼎哀憤慟哭忽見江中有物流至鼎異之往見乃新棺也因以充殮元帝聞之以爲精誠所感侯景平歷中書侍郎陳武帝在南徐州鼎望氣知其當王遂寄孥焉因謂曰後四歲梁其代終天之曆數當歸舜後明公天縱神武繼絕統者無乃是乎帝大喜因而定策及受禪拜黃門侍郎轉廷尉卿大建中爲聘國主使至德初鼎盡貨田宅寓居僧寺友人問其故答曰江東王氣盡於此矣吾與爾當葬長安期運將及故耳初鼎之聘周也嘗與高祖相遇鼎謂高祖曰觀公容貌故非常人神鑒深遠亦非羣賢所逮歲一周天老夫當委質願深自愛及陳平待遇甚厚高祖命鼎還杜陵鼎考校昭穆自楚太傅孟以下二十餘世作韋氏譜七卷開皇十二年除光州刺史以仁義教導務弘清靜部內肅然咸稱其神

隋書本傳

來和字弘順長安人少好相術所言皆驗高祖微時詣和相和謂高祖曰公當王有四海及爲丞相拜儀同既受禪進爵爲子和同郡韓則嘗詣和相和謂之曰後四五當得大官人初不知所謂則至開皇十五年五月而終人問其故和曰十五年爲三五加以五月爲四五大官權也和言多此類著相經四十卷

隋書本傳

楊伯醜馮翊人好讀易隱於華山開皇初被徵入朝見公卿不爲禮無貴賤皆汝之人不能測也高祖召與語竟無所答賜之衣服至朝堂捨之而去嘗有張永樂者賣卜京師伯醜每從之遊永樂爲卦有不能決者伯醜輒爲分析爻象尋幽入微永樂嗟服自以爲非所及也伯醜亦開肆賣卜國子祭酒何妥嘗詣之論易聞妥言倏然而笑曰何用鄭元王弼之言乎久之微有辨答所說辭義皆異先儒之旨而思理元妙論者以爲天然獨得非常人所及也竟

以壽終

隋書本傳

臨孝恭京兆人明天文算術高祖甚親遇之每言災祥之事未嘗不

中上因令考定陰陽書官至上儀同

隋書本傳

宇文愷字安樂

新弟夏州人

家世武將諸兄並以弓馬自達愷博覽書記

解屬文多伎藝高祖踐祚詔領營新都副監高頴雖總大綱凡所

規畫皆出於愷上建仁壽宮拜仁壽宮監煬帝即位遷都洛陽以

愷為營東都副監尋遷將作大匠愷揣帝心宏侈於是東都制度

窮極壯麗帝大悅之進位開府拜工部尚書及帝北巡欲誇戎狄

愷為大帳其下坐數千人帝大悅又造觀風行殿上容侍衛者數

百人離合為之下施輪軸推移倏忽有若神功帝彌悅前後賞賚

不可勝紀卒諡曰康

隋書本傳

何稠字桂林國子祭酒安之兄子父通善琢玉江陵平隨安入長安

開皇中累遷大府丞稠博覽古圖多識舊物波斯嘗獻金線綿袍

組織殊麗上命稠為之稠錦成踰所獻者上甚悅時中國以絕琉

璃作匠人無敢措意稠以綠瓷為之與真不異尋加員外散騎侍

郎開皇末桂州俚李光仕為亂詔稠討之以勳授開府仁壽初文

獻皇后崩稠與宇文愷參典山陵制度稠性少言善候上旨由是

漸見親昵大業初煬帝將幸揚州敕稠討閱圖籍造輿服羽儀送

至江都稠於是營黃麾三萬六千人仗及車輿輦輅皇后鹵簿百

官儀服依期而就送於江都帝善之以稠守太府卿領少府監遼

東之役帝遣稠造橋二日而就初稠制行殿及六合城至是帝於

遼左與賊相對夜中施之高麗望見謂若神功稍加至右光祿大

夫從幸江都遇宇文化及亂歸於大唐授少府監卒

北史本傳

唐

李淳風岐州雍人父播仕隋棄官爲道士號黃冠子以論譏自見淳風幼爽秀通羣書明步天曆算貞觀初以將仕郎直太史局制渾天儀詆摭前世得失遷太史丞太宗得秘識言唐中弱有女武代王以問淳風對曰其兆既成已在宮中又四十年而王夷唐子孫且盡帝曰我求而殺之奈何對曰天之所命不可去也徒使疑似之戮淫及無辜且四十年而老老則仁雖易姓不能絕唐若殺之復生壯者則陛下子孫無遺種矣帝采其言止淳風於占候吉凶若節契然當世術家意有鬼神相之非學習可致終不能測也以勞封樂昌縣男撰麟德曆代戊寅曆候者推最密自秘閣郎中復爲太史令卒

唐書本傳

閻讓字立德以字行萬年人父毗爲隋殿內少監本以藝進故立德與弟立本皆機巧有思武德初爲秦王府士曹叅軍遷尚衣奉御

製袞冕六服腰輿傘扇咸有典法貞觀初歷將作少匠護治獻陵拜大匠即洪州造浮海大船五百艘遂從征遼攝殿中監規築土山破安市城師還至遼澤淖不可通立德築道爲橋梁無留行帝悅賜子良厚又營翠微玉華二宮擢工部尚書永徽五年領徒四萬治京城卒謚曰康立本顯慶中以將作大匠代立德爲工部尚書總章元年拜右相初太宗與侍臣泛舟春苑池見異鳥容與波上悅之詔坐者賦詩而召立本俾狀閣外傳呼畫師閻立本時已爲主爵郎中俯伏池左研吮丹粉望坐者羞悵流汗歸戒其子曰吾文辭不減儕輩今獨以畫見名與厮役等若曹慎毋習然性所好雖被屈亦不能罷也旣輔政無宰相器時姜恪以戰功擢左相故時人有左相宣威沙漠右相馳譽丹青之嘲謚文貞立德孫知微爲豹韜衛將軍武后時突厥默啜請和親后遣知微攝春官尚



書護送武延秀聘其女默啜怒非天子子因延秀挾知微入寇朝廷以知微賣國夷其族子則先以武三思塔免死元宗在藩時以善割家寵開元中有司奏擬供奉姚崇以爲則先刑戮家不可留

京師詔曰朕在外日嘗驅使宜令供奉

唐書本傳

尉遲乙僧土火羅國胡人也貞觀初其國王以丹青巧妙薦之闕下今慈恩寺塔前面中間功德又凹堙花西面中間千手千眼菩薩精妙之極光宅寺七寶臺後面畫降魔象千怪萬狀實奇蹤也然其畫功德人物花草皆是外國之象無中華禮樂威儀之德

唐書

乙僧父跋質那時人以跋質那爲大尉遲乙僧爲小尉遲畫外國及菩薩小則用筆繁動如屈鐵盤絲大則灑落有氣槩僧棕云外國鬼神奇形異貌中華罕見要之澄思用筆雖中華道殊然氣正跡高可與顧陸爲友

歷代名畫記

那羅爾娑婆

中天竺人

王元榮倂中天竺王阿羅維那順詣闕兼得術士那

羅爾娑婆言壽二百歲太宗奇之館於金殿門內造延年藥後卒

於長安

西陽雜俎

馬稼師

武功人

善相長安主簿蕭璿與縣尉李嶠李全昌同詣求決馬

生云三人俱貴達大李少府位極人臣聲名振耀南省官無虛任三入中書小李少府亦有清資得五品以上要官位終卿監蕭主簿晚達亦大富貴從今後十年家有大難兄弟並流唯公與一弟獲全又十年之後方却得官遇大李少府在朝堂日當得引用小李少府入省官時爲其斷割後璿離長安任作秘書郎則天旣貴皇后王氏破滅蕭璿是其外姻舉家流竄嶺南唯璿與弟瑗配遼東無何有處置流移使出嶺南者俱死唯遼東者獲全兄弟二人因亡命十餘年至神龍初再蒙洗滌其時李嶠作相於街中忽逢

璿使人問是蕭秘書耶因謂之曰公豈忘武功馬生之言乎於是擢用時小李少府作刑部員外判還其家蕭公竟歷中外清要命

錄

韋善俊維南人武后時長齋奉道法飲其藥者病即愈世稱為藥王

賈志

楊元禧

華陰人

為尚舍奉御善醫武后所信愛

唐書楊元禧傳附

韋慈藏

京兆人

甄權後以醫顯者京兆韋慈藏

唐書甄權傳附

裴知古雍州人善樂律為太樂令神龍元年正月享太廟樂作知古

密語萬年令元行冲曰金石諧婉將有大慶在唐室子孫乎是月

中宗復位人有乘馬者知古聞其嘶曰馬鳴哀主必墜死見新婚

者聞珮聲曰終必離訪之皆然

唐書李嗣真傳

嚴善思朝邑人父延通儒術該曉圖讖善思傳延業舉銷聲幽藪科

及第隱居十年武后時權監察御史方酷吏構大獄以善思為詳

審使平活八百餘人原千餘姓長壽中按囚司刑寺罷疑不實者

百人來俊臣等誣以罪謫交趾得還是時李淳風死候家皆不效

詔善思以著作佐郎兼太史令聖曆二年熒惑入輿鬼后問其占

對曰大臣當之是年王及善卒長安中熒惑入月鎮犯天關善思

曰法當亂臣伏罪而有下謀上之象歲餘張柬之等起兵誅二張

中宗時皇后擅政嘗語姚崇曰韋氏禍且塗地相王所居有華蓋

紫氣必位九五公善護之睿宗立語聞召拜右散騎常侍開元十

六年卒

唐書本傳

韋鑿

京兆人

工龍馬妙得精氣弟鑿工山水松石鑿子鷗工山水高僧

奇蟲老松異石筆力勁健風格高舉善小馬牛羊山原俗人知鷗

善馬不知松石更佳也咫尺千尋駢柯攢影烟霞翳薄風雨颺颺

輪囷畫偃蓋之形宛轉極盤龍之狀歷代名畫記韋偃京兆人寓止蜀

川善畫馬韓幹之亞也故杜甫歌云韋侯別我有所適知我憐君

畫無敵戲拈秃筆掃驕驄歛見騏驎出東壁好古者收得畫品錄

定為妙品益州名畫錄○按名畫記偃作鵬取其世系  
清斷事迹明淨故用之題名當以偃為正

車三華陰人善卜相進士李蒙宏詞及第入京注官至華陰縣官令

車三見諸公云此是李蒙宏詞及第欲注官去看得何官車云公

意欲作何官蒙云愛華陰縣尉投官相賀於曲江舟上宴會諸公令

不信及至京畢注華陰縣尉投官相賀於曲江舟上宴會諸公令

蒙作序日晚序成史翹先起於蒙手取序看裴士南等十餘人又

爭起看序其船偏遂覆沒李蒙士南等並被沒溺而死定命錄

韋無忝京兆人與其弟無縱以畫稱無忝在明皇朝以畫馬及異獸

擅名時外國有以獅子來獻者無忝一見落筆酷似其真百獸望

而辟易明皇嘗遊獵一發中兩犯於元武北門命無忝傳寫之遂

為一時英妙之極官至左衛大將軍宣和畫譜

法明同州僧善寫貌開元中嘗在內廷畫人物僧蓮儒畫譜

王生宣平坊者李揆以進士調集京師聞宣平坊王生善易筮往問之

王生每以五百文決一局而來者雲集自辰至酉不得次揆時持

一縑晨往生於几下取一緘書可十數紙授之曰君除拾遺可發

此緘揆藏之至開元中詔揆試文詞其一曰紫絲盛露囊賦二曰

答吐蕃書三曰代南越獻白孔雀表揆自午及酉而成翼日授左

拾遺旬餘乃發王生之緘視之三篇皆在其中遽命駕往宣平坊

訪王則竟不復見矣唐鍾輅前定錄

滿師西京僧善九宮大理卿王璿嘗問之師云公某月當改官似是中

書門下甚近玉階璿自謂黃門侍郎未可得也給舍又已過矣後

果改爲金吾將軍常侍玉階

定命錄

張萱京兆人善畫人物於貴公子與閨房之秀最工其爲花蹊竹榭點綴皆極妍巧以金井梧桐秋葉黃之句畫長門怨甚有思致又能寫嬰兒於大小歲數間定其面目髻稚又貴賤氣調與骨法各別宣和畫譜萱尤長於寫嬰兒其畫婦人以朱暈耳根爲別國繪寶鑑保壽寺本高力士宅天寶九載捨爲寺河陽從事李泳性好奇古與僧善嘗至此寺觀庫中舊物忽於破瓮中得物如被幅裂汗至觸而塵起泳徐視之乃畫也因以州縣圖三及縑三十換之令家人裝治大十餘幅訪於常侍柳公權方知張萱所畫石橋圖也元宗賜力士因留寺中後爲鬻畫人宗牧言於右軍尋有小使領軍卒數十人至宅宣勅取之即日進入帝見之大悅命張于雲韶院西陽雜俎路生長安人賣卜於市有趙自強來選就生卜焉生云公之官若非

重日即是重口後又卜生云公官九日不出十二日出至九日宰相果索吏部由曆至十二日勅出爲左拾遺拾遺字各有一口又補闕王冕訪卜生云九月當入省官有禮字時禮部員外陶翰在座乃曰公即替人九月陶病請假勅除王禮部員外後又令卜云必出當爲倉字官果貶溫州司倉賈志

韓幹藍田人少時嘗爲酒家送酒王維兄弟未遇每貰酒幹常徵債戲畫地爲人馬維精丹青奇其意乃與錢二萬令軟畫十餘年今寶應寺有幹畫尤入神段成式寺塔記韓幹長安人天寶初入爲供奉時

陳閔畫馬榮遇一時明皇令師之幹不奉詔曰臣自有師今陛下內廐馬皆臣師也明皇益奇之後師曹霸畫馬得骨肉停勻法傳染入縑素弟子孔榮頗得其法國繪寶鑑幹閒居之際忽有一人朱衣元冠而至曰我鬼使也聞君善圖良馬願賜一匹幹立畫焚之數

日因出有人揖而謝曰蒙君惠駿足亦有以酬効明日有人送素  
縑百疋不知其來幹收而用之獨異志建中初有人牽馬訪醫稱馬

患脚以二千求治其馬毛色骨相馬醫未嘗見笑曰君馬酷似韓

幹所畫者真馬中固無也因請馬主遠市門一匝馬醫隨之忽值

韓幹幹亦驚曰真是吾設色者乃至舍視其所畫馬本脚有一點

黑缺方知畫通靈矣馬醫所獲錢用歷數年乃成泥錢西陽雜俎嘉祐

中一貴人使江南携韓馬一匹行及回渡采石磯風大作三日不

可過欲過又大作於是禱於中元水府廟是夕夢神告留馬當相

濟翼日詣廟獻之風止乃渡畫史。按幹係京兆藍田人羣書言  
之詳矣名畫記作大梁人并誌之

考傳

賈昌長安宜陽里人生七歲趨捷過人能搏柱乘梁善應對解鳥語

元宗在藩時樂民間清明節鬪雞戲及即位治雞坊兩宮間索長

安雄雞金毫鐵距高冠昂尾千數養於雞坊選六軍小兒五百人

使教飼民家傾產市雞以償雞直貧者弄假雞帝出遊見昌弄木

雞於雲龍門道旁召入爲雞坊小兒三尺童子入雞羣壯者弱者

勇者怯者水穀之時疾病之候悉能知之雞畏而馴使令如人中

謁者王承恩言於元宗召試殿庭即日爲五百小兒長天子甚愛

幸之金帛之賜日至其家當時號爲神雞童八月五日千秋節大

合樂於宮中或於洛元會與清明節率皆在驪山至日羣樂具舉

六宮畢從昌冠雕翠金華冠錦袖繡袴執鐸拂導羣雞叙立廣場

顧盼如神樹毛振翼礪吻磨距抑怒待勝進退有期低昂不失勝

負既決隨昌雁行歸於雞坊教猱擾龍之徒歟昌席寵四十年恩

澤不渝及亂昌變姓名依佛舍洎建元三年於長安東門外鎮國

寺東偏構小舍居之以老陳鴻東城  
父老傳

謝阿蠻

新豐人

新豐進女伶謝阿蠻善舞上與妃子就按於清元小殿

寧王吹玉笛上羯鼓妃子琵琶馬仙期方響李龜年觱篥張野狐

篥篥賀懷智拍板自旦至午歡洽異常曲罷妃子命侍兒紅桃取

紅粟玉臂支賜阿蠻後上自成都還復幸華清宮從官嬪御多非

舊人上命阿蠻舞凌波曲舞罷上凄然垂涕

太真外傳

馬二孃

長安人

天寶末長安有馬二孃者善考召兗州刺史蘇詵與馬

氏相善初詵欲爲子兼求婚盧氏謂馬氏曰盧氏三女未知誰佳

幸爲致之令其母自閱視馬氏乃於佛堂中結壇考召須臾三女

魂悉至馬云大者非不佳不如次者必當爲刺史婦乃娶次女天

寶末萊至永寧令死於祿山之難其家憇馬氏失言後二京收復

有詔贈萊懷州刺史

廣異記

楊坦楊仙喬並長安人好圖佛寺鬼神坦子爽亦善之

歷代名畫記

盧楞伽長安人學道於吳道元祖才力未及九善作經變相入蜀名

益著乾元初嘗於大聖慈寺畫行道僧顏真卿爲之題名時號二

絕又嘗畫莊嚴寺三門竊自比道元總持壁一日道元忽見之驚

歎曰此子筆力常時不及我今乃相類精爽盡於此矣居一月楞

伽果卒

國繪寶鑑○按名畫記楞伽作楞伽

周昉字景元長安人寓意丹青德宗召畫章敬寺神初落墨時撤去

帷帟使往來縱觀之又寺接國門賢愚畢至或言妙處或指摘未

至衆目助其得失昉隨所聞改定月餘是非語絕遂下筆成之無

復瑕類當時推爲第一昉爲諸像精意至於感通夢寐示現相儀

傳諸心匠此殆非積習所能致至於傳寫婦女則爲古今之冠其

稱譽流播往往見於名士詩篇文字中

宣和畫譜

郭汾陽壻趙縱侍郎

嘗令韓幹寫真衆稱其善復請昉寫之二者皆有能名汾陽嘗以

二畫張於坐側未能定其優劣一日趙夫人歸寧汾陽問此畫誰也云趙郎復曰何者最似云二者皆似後畫者爲佳蓋前畫者得趙郎狀貌後畫者兼得趙郎情性笑言之姿耳後畫者乃昉也汾陽喜曰今日乃決二子之勝負令送錦綵數百疋以酬之昉平生畫墻壁卷軸甚多貞元間新羅人以善價收置數十卷持歸本國開誌昉傳家閥閱窮丹青之妙善畫貴遊以物作士女多爲穠麗豐肥之態蓋其所見然也圖繪寶鑑

邊鸞京兆人攻丹青長於花鳥折枝之妙古所未有貞元中新羅國獻孔雀解舞德宗召於元武門寫貌一正一背翠彩生動金鈿遺妍若運清聲宛應繁節後於澤潞貌五參連根精妙之極近代折枝花居其首也畫斷

二叟趙操相國懽尊子性疎狂不慎因盜驢私竄南出啟夏門

俄屆南山漸入深遠操繫驢山木獨行二十里忽遇人居有二白髮叟謂操曰汝既至可少留操顧其室內妻妾孤幼不異俗世操甚安焉月餘二叟謂操曰勞汝入都汝所乘驢貨之可得五千用此依吾所約買之而還操出山見其驢尚在貨之果得五千因探懷中所示之書惟買水銀耳操即爲交易歸舍二叟以雜藥燒煉俄化爲黃金因以此術示之於操自爾半年二叟徐謂操曰汝可歸三年之後當與汝會及家相國薨再宿矣服闋因別昆仲遊於江湖至今無羈於世從學道者甚衆操終無傳焉集異記

段善本

長安

琵琶馬上樂器貞元中有康崐嶠第一手遇長安大旱

詔移南市祈雨天門街市人廣較勝負鬪聲樂街東有康崐嶠琵琶必謂街西無敵遂令崐嶠登樓彈一曲新翻羽調其街西亦建一樓東市大誚之及崐嶠度曲西市樓上出一女郎抱樂器先云

我亦彈此曲兼移在楓香調中及下撥聲如雷其妙入神崑崙驚拜請爲師女郎更衣出見乃僧也蓋西市豪族厚賂莊嚴寺僧善本姓段以定東鄜之聲翼日德宗召入令陳本藝乃令教授崑崙段請崑崙彈一調及彈師曰本領何雜兼帶邪聲崑崙驚曰段師神人也段奏曰且遣崑崙不近樂器十年使忘其本領然後可教詔許之後果盡段之藝樂府雜錄元載子伯和勢傾中外福州觀察使寄樂妓十人既至半歲不得送使者窺伺門下有琵琶康崑崙最熟厚遺求通既送妓伯和一試奏盡以遺之先有段和尚善琵琶自製西梁州崑崙求之不與至是以樂之半贈之乃傳焉今曲調

梁州是也幽州鼓吹

田佐元魏縣人憲宗末年銳於服解詔天下搜訪奇士佐元自言有奇

術能變瓦礫爲黃金自白衣授本縣令冊府元龜

韓志和

後國

飛龍衛士善雕木作鸞鶴鷓鴣之狀飲啄動靜與真無

異以闕揆置腹內發之則凌雲奮飛可高三尺至一二百步外方始却下兼刻木作猫兒以捕鼠雀飛龍使異其機巧以事奏上觀而悅之志和更雕踏床高數尺飾以金銀綵繪謂之見龍床置之則不見龍形踏之則鱗鬣爪牙俱出及始進上以足履之龍天矯若得雲雨上怖畏令撤去志和伏上前曰臣愚昧驚忤聖躬願別進薄技以贖死罪遂於懷中出一桐木合子方數寸中有蠅虎子數不啻一二百其形皆赤云以丹砂啗之故也乃分爲五隊令舞涼州上令召樂以舉其曲虎子盤迴宛轉無不中節每遇致詞處則隱隱如蠅聲曲終纍纍而退若有尊卑等級志和臂虎子令於上前獵蠅數百步內如鷓捕雀罕有不獲上賜以雜綵銀碗志和出宮門悉轉施他人不逾年竟不知所在杜陽雜編



惟瑛

京師僧

吳郡陸賓于舉進士在京師有一僧曰惟瑛者善聲色兼

知術數每言事無不驗寶曆二年春賓于欲罷舉歸吳惟瑛謂曰君來歲成名不必歸矣但取京兆薦送必在高等賓于難之惟瑛曰君成名必以京兆薦送七月六日若食水族必殊等及第矣賓于乃書於牖間日省之數月後因於靖恭北門候一郎官遂迴憇從孫聞禮之舍聞禮喜迎曰向有人惠鯉魚方欲烹之賓于素嗜魚但令具羹至者輒盡後日因視牖間所書字則七月六日也遽命駕詣惟瑛且給之曰將遊蒲關故來訪別惟瑛笑曰水族已食矣遊蒲關何為賓于因取薦京兆果得殊等明年入省試畢又訪惟瑛惟瑛曰君已登第名籍在十五上下狀首姓李名合戈脚時正月二十四日賓于言於從弟符將書壁間後月餘放榜狀頭李卻賓于名在十六惟瑛又謂賓于曰君當食祿於吳越之分有一

事甚速賓于不喻其意及從事於越半年而終

前定錄

趙公祐長安人寶曆中寓居蜀城工畫人物尤善佛像天王神鬼贊

皇公鎮蜀之日賓禮待之

益州名畫錄

公祐太和間著畫名温其公祐

子幼而穎秀家學益工筆法臻妙德齊温其子襲二世之精藝奇

蹤逸筆為時推許光化中詔許王建於成都置生祠命德齊畫西

平王儀仗殿上畫后妃嬪御皆極精妙昭宗喜之遷翰林待詔

寶鑑

常棗長安人咸通中路巖牧蜀棗入蜀巖賓禮甚厚棗畫道釋人物

尤得時名喜為上古衣冠不墮近習衣冠益古則韻益勝當時有

伏羲畫卦神農播種陳元達鎖諫等圖皆傳世之妙亦詩人諷諫

之義也宜後世有傳焉

宣和畫譜

重引棗子僖宗幸蜀回鑾之日蜀民

奏請留御容於大聖慈寺陳敬瑄表進重引御容一寫而成內外

官屬無不歎駭謂爲僧繇後身尋授殿前翰林待詔賜緋魚袋益州名畫錄

呂堯竹處並長安人工畫佛道人物僖宗朝爲翰林待詔廣明中扈

從入蜀長安成都皆有畫壁圖畫見開誌

趙鄂鄜州人武陵醫士梁新仕至尚醫奉御有朝士詣之梁奉御曰風

疾已深請速歸處置家事朝士惶懼策馬歸時有鄜州馬醫趙鄂

新到京都自榜姓名云攻醫術朝士下馬告之鄂言疾已危與梁

生所說同謂曰只有一法請官人喫消梨不限多少咀訖不及捩

汁而飲或希萬一朝士以書留質消梨馬上旋斃到家旬日惟喫

消梨頓覺爽朗訪趙生感謝又訪梁奉御具言得趙生教也梁公

驚異遂召趙生資以僕馬錢帛廣爲延譽官至太僕卿北夢唐時

京城有醫人忘其姓名有一婦人從夫南中曾誤食一蟲常疑之

由是成疾頻療不損請看之醫者知其所患乃請主人媵媪中謹

密者一人預戒之曰今以藥吐瀉但以盤盂盛之當吐時但言有

一小蝦蟆走去然切不得令病者知是誑給也其媵僕遵之此疾

永除上全

王敬傲長安人前翰林待詔能碁善琴風骨清峻敬傲在鄴中數歲時

李山甫文筆雄健名著一方適於道觀中與敬傲相遇山甫曰幽

蘭淥水可得聞乎敬傲即應命而奏聲清韻古感動神爽曲終敬

傲潛然返袂云憶在咸通王庭秋夜供奉至尊之際不意流離於

此因別彈一曲坐客彌加悚敬山甫命酒停絃從容問曰向所操

者何曲也王生曰其家習正音奕世傳受常所操弄人衆共知唯

稽中散所受之曲人皆謂絕於洛陽東市余得自先人名曰廣陵

散山甫由是常目待詔爲王中散也後又遊常山是時節帥王鎔

年在幼齡初秉戎鉞方延多士以廣令名待詔琴棋亦見禮於賓榻歲時供給莫不豐厚或揮絃動軫必承禮遇敬傲每戴危冠著高屐優遊嘯詠冬月亦葛巾單衣體無綿纈日醺酣於市人咸異之聞昭宗返正辭歸帝里後不知所終敬傲又能衣袖中翦紙爲蜂蝶令飛滿四座或入人襟袖以手攬之即復於故所當時咸疑其有神仙之術

耳目記

刁光印長安人天復中避地入蜀工畫龍水竹石花鳥貓兔黃荃孔雀皆門弟子嘗於大慈寺承天院內窻邊小壁四堵上畫四時花鳥體製精絕後黃居寀重裝飾之亦有圖軸傳於世

圖畫見開誌

趙元德長安人天復中入蜀雜工佛道鬼神山水屋木遇唐季喪亂之際得隋唐名手畫樣百餘本故所學精博有漢高祖過豐沛盤車講學豐稔圖傳於世忠義元德子事孟蜀爲翰林待詔雖從父

訓宛若生知蜀後主嘗令畫關將軍起玉泉寺閣作地祭一座垂

昂盈拱向背無失蜀主命匠氏較之無一差者其精妙如此嘗與

高道興黃荃輩畫成都寺壁甚多

圖畫見開誌○按元德一本作德元

馬處謙

扶風人

病瞽父俾其學易以求衣食嘗於安陸鬻筮自給有一

人謁筮謂馬生曰子之筮未臻其妙我有秘法能從我學之乎馬生隨往受星算之訣凡一十七行因請其爵里乃云胡姓恬名誠之曰子有官祿終五十二歲幸勿道我行止於王侯之門馬生得訣言事甚驗趙匡明棄荆入蜀因隨至成都王先主嘗令杜光庭密問享壽幾何對曰主上受元陽之氣四斤八兩果七十二而崩四斤八兩即七十二兩也官至中郎金紫亦五十二而殞

北夢瑣言

強紳

鳳州人

妙於三戒尤精雲氣屬王氏初併秦鳳張黃於通衢強公

指謂孫光憲曰悠悠梁蜀後何爲哉於時蜀兵初攻岐山謂其日

夕屠之強曰秦王非四海之主雖然死於脯下乃其分也蜀人終不能尅秦而秦川亦成邱墟矣後秦王令終王氏絕祚果叶強生言有鹿盧躡術自云老耄矣無人可傳其書藏在深隱處古杉樹中因與孫光憲偕詣開樹皮發蠟緘取出一通絹書選吉辰以授爲強姬止之謂孫少年慮致發狂俟三年方議可否

北夢瑣言

李靄之華陰人工畫山水寒林有江鄉之思鄴帥羅中令厚禮之爲建一亭爲掇毫之所名金波亭時號金波李處士也有賣藥修琴

歸山圖野人荷酒寒林并山水卷軸傳於世

圖畫見開誌

靄之畫貓尤

工蓋畫貓者必在花下靄之獨畫在藥苗間豈非幽人逸士所寓

耶

宣和畫譜

五代

廣微者華州僧也知術數末帝在河中廣微嘗密謂房嵩曰相公極

貴然明年有大厄極危如得濟此凡事不可言明年果有楊彥溫

之變

冊府元龜

張濛岐州瞽者自言知術數不龜不筮言事太白山神其神祠元魏時崔浩廟時事否秦人之休咎濛於神傳吉凶之言房嵩酷信之末帝在岐陽嵩引濛謁見聞帝語乃駭然曰非人臣也令嵩詢其時即傳神語曰三珠併一珠驢馬没人驅歲月甲寅午中興戊巳土嵩請解曰神言予不知也長興四年五月府廨諸門無故自動濛見嵩未交言先問嵩衙署小異勿怪不出三日有恩命其夜報至封潞王及帝被疑除鎮甚懼再三質濛濛備保無恙及帝入雒受太后冊宰相讀文惟應順元年歲次甲午四月庚午朔帝迴視房曰張濛神言不亦異乎帝令嵩共術士解三珠一珠事言三珠三帝也驢馬無人驅失主也帝即位以濛爲將作少監同正賜金

紫冊府元龜

孟繼瑜長安醫工帝留守時暴疾以醫效乃攝任洎帝起兵鳳翔繼瑜在長安謁見從至洛屢進方藥年內改諸寺少卿翰林諸醫莫

得為比

冊府元龜

陳立京兆人家世為醫後唐明宗朝為太原少尹集平生驗方七十  
五首并修合藥法百件號曰要術刊石置於太原府衙之左以示  
於眾病者賴焉冊府元龜

關仝一名種

長安人

畫山水早年師荆浩晚年筆力過浩遠甚尤喜作

秋山寒林與村店野渡幽人逸士漁市山驛使見者不復有市朝  
抗塵走俗之狀蓋其脫畧毫楮深造古淡如詩中淵明琴中賀若  
非畫工所能知當時郭忠恕亦神仙中人亦師事仝故筆法不墮  
近習仝於人物非所長於山間作人物多求胡翼為之故仝所畫

村堡橋約色色備有翼因得以附名於不朽也

宣和畫譜

關畫木葉間

用墨搵時出枯梢筆蹤勁利學者難到

關畫見

支仲元鳳翔人工畫人物有老子誠徐甲蕭翼賺蘭亭商山四皓等

圖傳於世

關畫見

仲元多畫道家與神仙像亦物外人也又喜作

碁圖松下林間對棋者率有思致宣和畫譜仲元畫人物極工筆法師

顧陸緊細有力清潤不俗宋高宗題作晉六朝者多仲元所作

寶鑑

朱繇長安人工畫佛道酷類吳生雒中廣愛寺有文殊普賢像長壽

寺井河中府金真觀皆有畫壁

關畫見

畫道釋皆以道子為法獨

繇不惟妙造其極而時出新意動人耳目國朝武宗元嘗在雒見  
其所畫壁云文殊隊中舊有善財童子于酷愛其筆法玩之月餘  
不忍去今遂失其童子所在信其畫亦神矣弟子趙裔亦知名

宣和

畫譜

杜子瓌華陰人精意道釋因畫圓光自謂得意非丹青家所及每詫於流輩曰我作圓光時心遊海上遐想日出扶桑滄滄涼涼其狀若此故脫畧筆墨使妍淡無迹宜他人所不能到也論者以為信然子瓌研吮丹粉尤得其術故綵繪特異宣和畫譜

杜覲龜秦人避地居蜀事王衍為翰林待詔博學強識善畫佛像人物始師常棨後舍舊學自成一家故筆法凌轢流輩棨亦莫能接

武也敬安覲龜子事孟蜀為翰林待詔生平妙於佛像尤能傅彩

益州名畫錄載為杜子瓌子未知孰是圖繪寶鑑○按覲龜父子

黃休復名畫錄以為避祿山亂者誤

李處士關右石晉時能畫馴狸復能補端硯百碎者實歸旬日即復

舊如新琢成畧無瑕類世莫得其法珍珠船

張及之京兆人畫犬馬花鳥頗工作犬得敦龐之狀無搖尾乞憐態

圖繪寶鑑

跋異汧陽人工畫佛道鬼神洛中福先寺有畫壁圖畫見

施璘字仲寶藍田人工畫竹有生意為當時絕技圖繪寶鑑

衛賢長安人事江南李後主為內供奉工畫人物臺閣初師尹繼昭

後服膺吳體有望賢宮滕王閣盤車水磨等圖圖畫見賢畫高崖

巨石則渾厚可取而皴法不老為林木雖勁挺而枝梢不稱其本

論者少之妙處亦人稀及圖繪寶鑑

杜韜京兆人少為富商師衛賢深得其要賢後延為東榻所畫與賢

伯仲圖繪寶鑑

麻衣道者錢若水為舉子時見陳希夷於華山希夷曰明日當再來

麻衣道者錢若水為舉子時見陳希夷於華山希夷曰明日當再來

麻衣道者錢若水為舉子時見陳希夷於華山希夷曰明日當再來

麻衣道者錢若水為舉子時見陳希夷於華山希夷曰明日當再來

若水如期往見有一老僧與希夷擁地鑪坐僧熟視若水久之不語以火箸畫灰作做不得三字徐曰急流中勇退人也若水辭去希夷不復留後若水登科爲樞密副使年才四十致政希夷初謂若水有仙風道骨意未決命老僧觀之僧云做不得故不復留老僧麻衣道者也希夷素所尊禮云聞見前錄

范寬

一名中正

字中立華原人風儀峭古進止踈野常往來京洛喜畫山

水始學李成既悟乃歎曰吾與其師於人者未若師諸物吾與其師於物者未若師諸心於是居終南太華岩隈林麓之間覽其雲烟慘淡風月陰霽難狀之景默與神遇一寄筆端千巖萬壑恍然如行山陰道中天下皆稱寬善與山傳神宜與關李並馳方駕也關中人謂性緩爲寬中立不以名著以俚語行故世傳范寬山水宣和范畫林木或側形如偃蓋 是一種風規畫屋既遠以墨籠

染後世目爲鐵屋

圖畫見聞志

寬始師李成又師荆浩山頂好作密林

水際作突兀大石黃懷玉華原人有足疾時人目爲跛子學范寬頗有其格樹木斂剝人物清灑然大約失之工圖繪寶鑑劉翼耀州呼爲劉評事學范寬有自得處不知者以爲寬筆

趙光輔耀州人太宗朝爲畫院學士工畫佛道人物兼精蕃馬筆鋒

勁利名刀頭燕尾張翼者一名鈐函人善畫蕃馬及人物師趙光

輔得其筆法

圖繪寶鑑

史序字正倫京兆人善推步曆算太平興國中補司天學生雍熙二年廷試中選者二十六人序爲之首命知算造又知監事後累遷夏官正修儀天曆上之又嘗纂天文曆書爲十二卷以獻賜金紫俄權監事大中祥符三年卒序慎密勤職在監三十年未嘗有過

宋史本傳

許道寧京兆人性跌宕不羈畫山水法李成獨造其妙可與營邱抗衡亦工傳神每見人寢陋者必戲寫貌於酒肆識者皆笑之爲其人毆擊至碎衣敗面竟不悛後遊太華見其峰巒峭崿始有意於山水清潤高秀穠纖得法不愧前人矣杜祁公帥長安道寧恃其技犯公公怒捕之時种叔誼守環州道寧乃往投誼杜公聞之笑曰道寧真善自爲謀者乃貽書种公俾善遇之在環歲餘乃歸環學從祀弟子乃道寧所作筆也子舅吳順圖有道寧畫終南積雪圖八幅真絕品也亡於兵火惜哉長安涼榭大屏面亦道寧所作殊奇偉墨莊漫錄。按圖畫見開志道寧長安人山水家法作河間人考宋張士遜有詩曰李成絕世范寬老惟有長安許道寧其爲秦人無疑矣

成宗道長安人工畫人物兼善刻石凡長安壁傳吳筆皆臨摹上石其跡細如絲髮而不失精神體段有所集吳生三清像與左右侍

衛宛如吳作或云因能勒石後轉而爲畫也又改武洞清長沙羅

漢三元皆能捨短求長自出新意過於長沙遠矣畫

陶裔鄜人工畫花竹翎毛形製設色亞於黃筌爲圖畫院祗候祥符

中畫御座屏展稱旨尋改翰林待詔圖畫見開志

李隱五原人工畫山水大中祥符末營會靈觀命隱寫五嶽山形於壁及畫山水於五殿屏展觀其危峰疊嶂遠水疎林可謂盡美圖畫

見開志

甘風子關右人佯狂垢污恃酒好罵酒酣耳熱大叫索紙以細筆作人物頭面動以十數然後放筆如草書法以就全體頃刻而成妙合自然多畫列仙之流題詩其後傳觀旣畢往往毀裂而去好事者藏匿一二豪富求之唾罵不與或經年不落一筆故流傳者極少一日忽別素與遊者歸則薰浴題頰擲筆而逝畫



龍章櫟陽人工畫佛道人物兼工傳寫尤善畫虎曾有貨藥人楊生  
檻中養一虎章因就視寫之故畫虎最臻形似子淵有父風見圖畫志

李宗成鄜時人工畫山水寒林學李成破墨潤媚取象幽奇林麓江  
皐尤為盡善有風雨江山拜月圖四時山水松栢寒林等圖傳於

世圖畫見開志

王易鄜州人工佛道人物學隣李元濟圖畫寶鑑

曾若虛隴州道士善醫尤得鍼砭之術里有寡婦再適人遭疾且卒  
經日而心間尚暖家人因奔詣若虛哀祈往救既至引鍼鍼之即  
時而蘇良久乃能語曰始者夢故夫相隨出郭外遠歷郊野橋梁  
復入叢林草莽展轉不捨俄而故夫為一物刺中其足不能履步  
由是獨行忽若夢覺郡人詣若虛詢之若虛曰向之所鍼乃黃帝

鍼入邪穴也西齋話記

雷宗道商州人工雜畫尤長於佛像山水似郭熙熙圖繪寶鑑

甯濤華陰敷水人師范寬多作關右風景其巧過寬而渾厚藏蓄不  
及也樓觀人物纖悉畢呈失于太顯畫繼久中濤子也兼畫人物深

得出俗之態筆意不減其父但多平遠道路之景不起峰頂同蒙  
亨華州人初為僧兵火後偶其兄從軍遂置軍中學其鄉人甯濤

得典型也全

邠州父老唐羯鼓曲今惟邠州父老能之有大合蟬滴滴泉之曲予  
在鄜延時尚聞其聲涇原承受公事楊元孫因奏事回有旨令召  
此人赴闕元孫至邠而其人已死羯鼓遺音遂絕沈存中筆談

鳳翔老尼寇萊公好拓枝舞會客必舞拓枝每舞必盡日時謂之拓  
枝顛今鳳翔有一老尼猶萊公時拓枝妓云當時拓枝尚有數十

遍今日所舞柘枝比當時十不得二三老尼尚能歌其曲好事者往往傳之夢溪筆談

老麻關中人熙寧間以花鳥稱非蜀之居禮也畫鑑

侯封邠人工畫山水寒林始學許道寧不能踐其老格然而筆墨調

潤自成一體亦郭熙之亞圖畫見開志

李希成華州人慕李成遂命名初入圖畫院能自晦以防忌嫉比已

補官始出所長眾雖睥睨無及矣畫鑑

胡奇長安人長於蘆雁何承相文續家有四幅圖可觀畫鑑

張衍長安人年八十以術遊士大夫間章子厚蔡持正官州縣時許

其為宰相蒲傳正薛師正米顯皆以執政許之紹聖初伯溫官長

安因論范忠宣公命衍曰范丞相命甚似其父文正公僅作參知

政事耳伯溫又問時為監司者張芸叟陸孝叔邵仲恭吳子平數

公命衍曰皆帶職正郎員外郎耳取進於此即不可獨仲恭數促

其後芸叟為侍郎孝叔待制未幾皆謫官孝叔帥熙子平帥秦彛

卒仲恭邯鄲移常州卒年五十五三公皆直龍圖無一不如衍言

者衍病伯溫見之則曰數已盡某日當死凡家事悉處之矣已而

果然邵伯溫聞見前錄

劉浩居華陰愛作雪驢水磨故事人物多布叙景致意象幽遠筆法

輕清畫鑑

張通廊延人畫仙佛古今畫鑑

王冲隱名持字正叔長安人長於翎毛學崔白顏魯公鹿脯帖後有

題跋妙於筆法蓋其人也嘗於邵氏見竹棘雪禽二軸極清雅上

題云正叔為伯起作伯起名振其兄也畫鑑

賀正延安人出自戎籍畫人物山水古木怪松得郭熙筆法圖繪宣

和初建寶正宮一時名手畢呈其技有忌正者推為講堂照壁正亦不辭日醉酒於門眾工皆畢中使促正正以幕圍壁揮却其徒不數日成作雪林高八尺觀者歎賞眾工歛衽

符道隱長安人畫山水寒林

古今畫鑑

雍熾字幼山興元人善山水作岩崖枯木雲氣墨梅佳

畫鑑

田北鄜州人作泥孩兒名天下態度無窮效之不能及一對至直十縷

一牀至三十千一牀者或五或七也小者二三寸大者尺餘無絕

大者予家舊藏一對卧者六小字云鄜州田北製紹興初避地東

陽山中歸則亡之矣

老學庵筆記

虞學士伯生亦有記言其精絕古今

畫鑑

陳道輔京兆人好寫墨竹自號夜江散人

國繪寶鑑

宋

蘭公和尚涇陽人嫻儒經有才力巧於射藝金元間賊遍起蘭公以

射藝救人者甚眾

雲陽志

王弘毅字子遠淳化人唐王珪裔也總角通詩書善屬文元兵克汴

避難習醫後歸元管勾太醫院事治疾如神年四十即求退隱谷

口之文川結廬溪上壽七十五而終

淳化縣志

胡瓚字元禮京兆人官至衡州路同知善丹青墨竹

國繪寶鑑

雷祥白水人能醫善陶所造磁器精工絕人世所謂雷公器是也土

人間掘得祥遺器形製古質色綠沉隱秀或微作花墳起以手摩

娑復白潔無凸窪迹方之宣哥諸窰不啻過之

賈志

邊武字伯京京兆人善墨戲花鳥

國繪寶鑑

劉純字宗厚洪武中居咸寧博學工文辭喜吟咏深明醫道作醫經

小學等書

賈志

郭伯郁鄜縣人精通天文曆數善識緯之術任欽天監春官正名重京師洪武十七年清類天文分野書成頒賜秦晉諸王有漏刻博士元統欲推行大統曆積分之數乃言曰皇上承運以來曆雖以大統爲名而積分猶授時之數然授時曆法以至元辛巳爲曆元至今洪武甲子積一百四年以曆法推之得三億七千一十九萬九千七百七十五分經云大約七十年而差一度每歲差一分五十秒辛巳至今年遠數盈漸差天度擬合修改蓋七政之源有遲疾順逆伏見不齊其理深奧實難推演臣聞磨勘司令王道亨有師郭伯郁者陝西鄜縣人精明九數之理深通曆學之源若得此人推大統曆法庶幾可成一代之制蓋天道無端惟數可以推其

機天道至妙因數可以明其理是理因數顯數從理出可相倚而不可相違臣等職在觀占推步以驗民時誠不敢以膚淺之學自用願得博聞洽見之人任之上是其言

賈志

張徵字以周三原人精通方脉天順間舉爲太醫院醫生術屢取效

尋授御醫院判

三原志

齊惠咸寧人咸寧處士郭理不與人苟合與遊者人人嚴憚惠喜奕人有篤病當奕不肯廢見處士來即罷奕應病者病者得惠醫皆生凡病者因其奕皆來趨處士惠之醫與處士之方正渢然徧關

中

康對山集

王金字芝山西安人年十七遇道人墮水救歸嚴事之已道人携入終南授以奇秘試輒驗時屬世廟好方伎金以白衣召見爲言三元大丹稱旨歷官太常出入禁闈二十年世廟賓天廷議金等進

藥不謹論刑新鄭高文襄再疏申雪得減戍閩海後數年歸依文襄以居遂爲鄭人李空同夢陽與交厚贈以芝山子辭云

河南通志

郭文英韓城人少爲人牧羊以戶匠乏人至京抵役久之以巧力聞見知世廟每一工竣則序勞晉秩累階至工部右侍郎賜二品服文英聰慧善詼諧嘗會諸搢紳談及發科經書輒笑自謂不佞起家木經衆爲絕倒

韓城志

李萬庫渭南人世號金鍼李同州丁牧母以哭夫表明越十年遇金鍼雙眸復炯炯時馬文莊公爲文紀事而丁牧贈詩云十年春色暗中度一旦看花識春暮呼兒呼婦觀容顏恍惚猶疑夢中寤自萬庫歿其術不傳

渭南志

管澤字子民咸寧學生父揖正德中進士官山左巡撫蒞任五月翕然稱治未幾以疾歸澤躬侍湯藥因精研岐黃應手輒效遠近求

醫者甚衆由是以醫名聞關輔所著有後垣元機効方藏於家

天元禪師名現本漢中人後駐錫西山潭柘寺精素難脉理及八法

神鍼諸症鍼下即瘳於傷寒胎產起死恒多宮禁大璫咸里貴人

皆尊事之

續文獻通考

梁時元涇陽人善寫山水得石田筆意

涇陽志

張碧山涇陽人精於八法神鍼能起疲瘡亥了凡習術於其門

涇陽志

王尚德西安右衛人幼敏慧博覽經史過目不忘善詩賦尤精醫術

秦肅王疾諸藥弗瘳徵德至進藥一七而愈王曰神醫也遂奏請

授廸功郎秦藩醫正兼宜川郃陽兩王府教授事教子孫七人入

庠以壽終

賈志

路從廣字一元澄城人初任安邑改司儀封河務去積水開沃地歷寶慶通判致政歸惟挾一鶴素精繪事一時目爲關中鸞全有畫

譜行世

澄城志

天啟丙寅從廣任臨清嘗於闕廂壁間畫虎崇禎中

有諷經道士至夜三鼓時見虎雙眸炯然從壁而下抖擻跳躍若

將攫人道士愕然不知所措急取劊柴斧格之倏忽躍上乃壁間

畫虎也遲明說其事州人觀者如堵迄今臨摹其圖者甚衆競貴

售之

同上

梁世鰲字化字渭南人少力學弗售見李伯時西園雅集圖而悅之

殫精竭思十年伎成寫照宛似遊長安轟動貴人漸聞大內值上

念太后令老內侍口授形容而筆之圖成酷肖上感慟懸之內殿

朝夕禮焉授鰲武英殿中書洵異數也

縣志

柴定向字少池涇陽人善識風水能於數十里外望地氣知休咎嘗

過學宮見育才坊廢請於縣令曰此坊復建必科第蔚興次年丙

子果中鄉榜十人爲投棚太學生王中伯公卜地其山峰峻拔占

者以爲不利向曰此將軍山也嘗有以武成名者後果驗年九

七歲髮色如童

涇陽志

王某秦人嘗爲商結隊偕發忽剪徑賊至衆潰亂王笑曰行耳我在

欲何爲者叱馭前進寇至近皆僵立不動若有膠其脛者駭汗登

立而已王行遠寇轉動得逸去蓋以秘術拘制之也又嘗宿旅店

主人應對稍忤時邸中有妓女數輩王怒遽捉一妓投井中衆號

客殺人有知其術者勸主人前謝王意解呼妓使出則固在室中

也

鹽園雜志

本朝

王辰字公輔朝邑人父經商南中溺死徒跣千里求屍不得自以

終天抱痛絕意仕進性嗜山水遂以畫名得右丞家法家貧每

乘興潑墨自給鄉人李楷雷于霖極器重之

姜鎮蒲城人親喪廬墓六載幼習醫夢闈壯繆授以盧扁之術醫術遂神名聞關中

**雜傳**

**商**

崇侯虎帝謂文王詢爾仇方同爾兄弟以爾鈞援與爾臨衝以伐崇

墉

詩大雅

崇侯虎譖西伯於殷紂曰西伯積善累德諸侯皆嚮之將

不利於帝紂乃囚西伯於羑里閔天之徒患之乃求奇怪物獻之

紂紂大悅乃赦西伯曰譖西伯者崇侯虎也西伯於是伐崇侯虎

作豐邑自岐下而徙都豐

史記周本紀

正義曰崇國在豐鎬之間詩云

既伐于崇作邑於豐是也

周本紀注

**周** 暴公何人斯刺暴公也暴公爲卿士而譖蘇公故蘇公作是詩以絕

之

詩小雅

暴蘇皆畿內國名也

朱建楚人爲淮南王黥布相初布欲反時問建建諫止之布不聽漢

既誅布聞建諫之高祖賜號平原君家徙長安爲人辯有口刻廉

剛直行不苟合義不取容辟陽侯行不正欲知建建不肯見及建

母死貧未有以發喪辟陽侯乃奉百金稅列侯貴人以辟陽侯故

往賻凡五百金久之人或毀辟陽侯惠帝欲誅之辟陽侯困急欲

見建建辭曰不敢見君建乃求見孝惠幸臣閼孺說曰君所以得

幸帝天下莫不聞今辟陽侯幸太后道路皆言君讒欲殺之今日

辟陽侯誅旦日太后含怒亦誅君君何不言帝出辟陽侯閼孺從

其計果出辟陽侯孝文時淮南厲王殺辟陽侯以黨諸呂故孝文

聞其客朱建爲其策使吏捕欲治遂自剄文帝聞而惜之曰吾無

殺建意也乃召其子拜為中大夫使匈奴單于無禮罵單于遂死

匈奴中

漢書本傳

趙禹麋人以佐史補中都官用廉為令史以刀筆積勞稍遷為御史上以為能至大中大夫與張湯論定諸律令作見知吏傳得相監自此始張湯者杜人其父為長安丞出湯為兒守舍還而鼠盜肉父怒笞湯湯掘窟得鼠及餘肉劾鼠掠治傳爰書訊鞠論報并取鼠盜肉具獄磔堂下父見之視其文辭如老獄吏大驚遂使書獄父死後湯為長安吏給事內史為甯成掾調茂陵尉武安侯為丞相徵湯為吏薦之天子補御史治陳皇后巫蠱獄深竟黨與於是上以為能遷大中大夫與趙禹共定諸律令務在深文拘守職之吏已而禹遷中尉徙少府湯為廷尉兩人交驩禹為人廉倨舍母食客公卿相造請禹禹終不報謝務在絕知友賓客之請孤立行

一意而已見文法輒取亦不覆案求官屬陰罪湯為人多詐舞智以御人治淮南衡山反獄皆窮根本遷御史大夫會渾邪等降漢大興兵伐匈奴縣官空虛湯承上指請造白金及五銖錢籠天下鹽鐵排富商大賈出告緡令鉏豪強兼并之冢舞文巧詆以輔法百姓不安其生騷動縣官所興未獲其利姦吏並侵漁於是痛繩以罪自公卿以下至庶人咸指湯會人有盜發孝文園座錢丞相青翟朝與湯約俱謝湯念獨丞相以四時行園湯無與也不謝上使御史案其事湯欲致其文丞相見知丞相患之三長史皆害湯合謀曰吾知湯陰事使吏捕案湯左田信等曰湯欲奏請信輒先知之居物致富與湯分之天子使使簿責湯湯不服於是上使趙禹責湯禹讓湯曰君所治夷滅者幾何人矣今人言君皆有狀天子欲令君自為計何多以對簿為湯乃自殺

史記酷吏傳



杜周南陽杜衍人

從茂

少言重遲而內深刺骨爲廷尉其治大抵放

張湯善候伺上所欲擠者因而陷之上所欲釋久繫待問而微見

其寃狀二千石繫者新故相因不減百餘人郡吏太府舉之廷尉

一歲至千餘章章大者連逮證案數百小者數十人遠者數千里

近者數百里會獄吏責如章告劾不服以掠笞定之於是聞有逮

證皆亡匿獄久者至更數赦十餘歲而相告言大抵盡詆以不道

以上廷尉及中都官詔獄逮至六七萬人吏所增加十有餘萬後

爲執金吾逐捕彘引羊衛皇后昆弟子刻深上以爲盡力無私遷

御史大夫周久任事列三公兩子夾河爲郡守家貲累鉅萬治皆

酷暴惟少子延年行寬厚云

漢書本傳

田延年字子賓先齊諸田徙陽陵以材畧給事大將軍莫府霍光重

之遷長史出爲河東太守姦邪不敢發入爲大司農會昌邑王嗣

立淫亂霍將軍與公卿議廢之莫敢發言延年按劍廷叱羣臣即

日議決宣帝即位以決疑定策功封陽成侯先是茂陵富人焦氏

賈氏陰積炭葦諸物昭帝大行用度未辦延年奏言商賈或豫收

方上不祥器物冀其疾用欲以求利非民臣所當爲請没入縣官

奏可富人亡財者皆怨出錢求延年罪初大司農取民牛三萬兩

爲僦載沙便橋下送致方上車直千錢延年上簿詐增僦直車二

千凡六千萬盜取其半焦賈兩家告其事下丞相府議霍將軍召

問延年抵無是事將軍曰即無事當窮竟延年自刎死

漢書本傳

田廣明字子公鄭人以郎爲天水司馬遷河南都尉以殺伐爲治郡

國盜賊並起遷爲淮陽太守歲餘故城父令公孫勇與客胡倩等

謀反詐稱光祿大夫從車騎數十言使督盜賊止陳留傳舍廣明

發兵皆捕斬焉上以廣明連擒大姦徵入爲大鴻臚擢兄雲中爲

淮陽太守昭帝時廣明將兵擊益州還徙衛尉後出爲左馮翊治有能名宣帝初立爲御史大夫歲餘以初連將軍將兵擊匈奴出塞至受降城受降都尉前死喪在堂廣明召其妻與姦既出不至質引軍空還下太僕杜延年簿責廣明自殺闕下兄雲中爲淮陽守亦敢誅殺吏民守關告之坐棄市

漢書本傳

陳遵字孟公杜陵人祖遂元帝時爲廷尉遵舉能治劇補郁夷令與扶風相失自免去槐里大賊趙朋霍鴻等起遵爲校尉擊朋鴻有功遵嗜酒每大飲賓客滿堂輒關門取客車轄投井中雖有急終不得去遵大率常醉然事亦不廢畧涉記傳瞻于文辭性善書與人尺牘主皆臧去以爲榮請求不敢逆所到衣冠懷之惟恐在後凡三爲二千石王莽敗客池陽更始至長安大臣薦遵爲大司馬護軍使匈奴單于欲脅詘遵陳利害爲言屈直單于大奇之會更

始敗遵留朔方爲賊所敗時醉見殺

漢書本傳

原涉字巨先祖父武帝時以豪傑自陽翟徙茂陵涉父爲南陽太守涉父死讓還南陽賻送行喪冢廬三年由是顯名京師舉能治劇爲谷口令谷口聞其名不言而治先是涉季父爲茂陵秦氏所殺涉自劾去官欲報仇谷口豪傑爲殺秦氏亡命歲餘逢赦出郡國豪傑及長安五陵諸爲氣節者皆歸慕之涉自以先讓賻送得名而令先人墳墓儉約非孝也乃大治起冢舍費用皆叩富人身衣服車馬纜具妻子內困專以賑施貧窮赴人之急爲務涉上冢奴買肉乘涉氣斫傷屠者茂陵守令尹公知涉名豪欲以示衆厲俗新豐人王游公素嫉涉說尹公墮壞涉冢舍涉遂劫游公父及子斷兩頭去涉性似郭解外溫仁謙遜而內隱好殺王莽末兵起諸王薦涉能得死士莽召見拜鎮戎大尹長安敗更始將軍申徒建

請涉相見大重之故茂陵令尹公瓊涉家合者爲建王簿涉使客刺殺主簿欲亡去建遣兵徵取涉於車上遂斬涉哀平間郡國處處有豪傑其名聞州郡者霸陵杜君敖池陽韓幼孺馬嶺繡君賓西河漕中叔皆有退讓之風中叔子少游復以俠聞於世云

漢書本傳

呂布字奉先九原人丁原屯河內以布爲主簿甚見親待董卓誘布殺原并其兵以爲騎都尉稍遷至中郎將卓行止常以布自衛嘗小失卓意卓拔手戟擲之布拳捷得免由是陰怨卓王允時密謀誅卓因告布使爲內應許之乃刺殺卓李傕等攻長安布戰敗奔袁術復去從張楊於河內楊諸將欲圖之布懼投袁紹布將士多暴橫紹患之布歸張楊道經陳留太守張邈與陳宮等迎布爲兗州牧據濮陽郡縣多應之曹操引軍擊布盡收諸城布東奔劉備時備與袁術相拒術欲引布擊備乃與布書送米二十萬斛布大

悅即勒兵襲下邳備敗走布患術運糧不至乃迎備屯小沛術懼爲子求婚於布布遣女沛相陳珪恐徐揚合從爲難未已往說布布乃絕婚術怒遣大將張勳等與韓暹楊奉連勢攻布布用珪策與暹奉書許破術兵悉以軍資與之遂共擊勳等於下邳大破之建安三年布復從術攻劉備於沛操自將擊布布欲降宮等阻之曹軍壅沂泗以灌其城三月布乃降見曹曰明公所患不過於布今服矣令布將騎明公將步天下不足定也操命緩布縛備曰不可明公不見布事丁原董卓乎遂縊殺之

後漢書本傳

李休字子朗有智畧張魯前爲鎮北將軍休爲司馬家南鄭時漢中有甘露降子朗見張魯精兵數萬人有四塞之固遂建言赤氣久衰黃家當興欲魯舉號魯不聽會魯敗太祖以其勸魯內附賜爵關內侯歷上黨鉅鹿二郡守拜儀郎子勝少遊京師雅有才智與

曹爽善爽輔政徵爲洛陽令累遷滎陽太守河南尹勝前後所宰

守未嘗不稱職後遷荊州刺史魏勝出爲荊州刺史詣宣王宣王

稱疾困篤勝不能覺謂之信然宣王收爽勝伏誅夷三族魏志曹爽傳

孟他扶風人靈帝時中常侍張讓專朝政讓監奴典護家事他仕不

遂乃盡以家財賂監奴奴與共結親積年家業爲之破奴慙問他

所欲他曰欲得卿曹拜耳奴許諾時賓客求見讓者或累日不得

通他甫到衆奴皆迎車百拜徑將他車獨入衆人悉驚異他與讓

善爭以珍物遺他他得之盡以賂讓讓喜他又以蒲桃酒一斛遺

讓讓即拜涼州刺史他生達後入蜀三輔決錄注達副法正迎先主先

主因念達留屯江陵蜀平以達爲宜都太守建安二十四年命達

從秭歸北攻房陵房陵太守蒯祺爲達兵所害達將進攻上庸恐

難獨任乃遣劉封自漢中乘沔水下統達軍與達會上庸太守申

耽舉衆降封與達忿爭奪達鼓吹達恚遂表辭先主率所領降魏

魏文帝善之以達領新城太守遣襲封封走還成都三國蜀志劉封傳魏

申儀拜魏興太守太和中儀與孟達不和數上言達有二心於蜀

達反儀絕蜀道使救不到達死魏咸熙元年達子興爲護督軍徙

還扶風三國蜀志劉封傳注

**晉**

楊佺期華陰人漢太尉震之後曾祖準太常自震至準七世有名德

祖林有才望父亮終梁州刺史以貞幹知名佺期沉勇果勁而兄

廣及弟思平等皆強獷粗暴自云門戶承籍江表莫比時人每排

抑之恒慷慨切齒欲因事際以逞其志佺期少仕軍府領衆屯城

固苻堅將潘猛拒守康回壘佺期擊走之拜河南太守苻堅將寶

衝攻皇天塢佺期擊之累戰皆捷進號龍驤將軍以疾去職荊州

刺史殷仲堪引爲司馬仲堪與桓元舉衆應王恭軍事一委佺期朝廷以佺期爲都督梁雍秦三州諸軍事雍州刺史仲堪元皆有遷換於是俱還尋陽結盟不奉詔朝廷復仲堪本職乃各還鎮佺期仲堪與桓元素不穆佺期欲與仲堪襲元仲堪內疑苦止之不得舉隆安三年桓元舉兵討佺期先攻仲堪仲堪急召佺期佺期曰江陵無食可來見就共守襄陽仲堪給之曰比來收集已有儲矣佺期率衆赴焉既至仲堪惟以飯餉其軍佺期大怒不見仲堪明日乘艦出戰元拒之不得進會元諸軍至佺期退走餘衆盡沒佺期與兄廣俱死弟思平從弟尚保孜敬俱逃劉裕起義始歸國歷位州郡孜敬爲人剽銳果於行事爲梁州刺史經襄陽見魯宗之侍衛皆佺期之舊憤見辭色宗之參軍劉千期於座面折之因大怒抽劍刺千期立死宗之表而斬之思平尚保後亦以罪誅楊

氏遂滅

晉書本傳

宋

魯爽郿人祖宗之雍州刺史宋武帝討劉毅宗之會江陵自以非武帝舊隸有自疑之志北奔入姚氏病卒父軌隨父入姚氏武帝定長安軌北奔魏魏以軌爲荊州刺史爽少有武藝軌死代爲荊州刺史粗中使酒數有過失太武怒將誅之爽懼密懷歸南計次第秀小字天念頗有意畧仕魏以軍功爲中書郎與爽俱來奔文帝以爽爲司州刺史秀爲滎陽潁川太守孝武帝即位爽謀反左將軍薛安都刺殺之

南史本傳

杜幼文

驥子杜陵人

太宗初以軍功爲驍騎將軍封邵陽縣男後以發太

尉廬江王禕謀反事拜黃門侍郎出爲梁南秦二州刺史廢帝元徽中爲散騎常侍幼文所莅貪橫家累千金女伎數十人絲竹盡

夜不絕與沈勃孫超之居止接近常相從又與阮佃夫厚善廢帝不能平於是率宿衛兵誅幼文等

宋書杜騏傳

**北** 寇彌萬年人為尚書郎為陽城王徽所親愛永安末徽避尔朱兆脫身南臺歸命於彌彌不納遣人加害時論深薄之

魏書寇讚傳

**北** 孫騰字龍雀石安人少而質直明解吏事魏正光中北方擾亂間關危險得達秀容屬尔朱榮建義隨榮入洛尋為高祖都督府長史高祖為晉州騰為長史高祖平鄴授騰相州刺史天平初入為尚書左僕射內外之事騰咸知之時西魏遣將寇南充詔騰為南道行臺率諸將討之騰虺怯無威畧失利而還又除司徒武定中使於青州括浮遊戶口遷太保騰早依附高祖契濶艱危勤力恭謹深見待信及高祖置之魏朝寄以心腹遂志氣驕盈與奪由已求納財賄不知紀極在鄴與高岳高隆之司馬子如號為四貴非法專恣騰為甚焉武定六年薨

北齊書本傳

**隋**

宇文忻字仲樂本朔方人徙京兆幼而敏慧年十二能左右馳射驍捷若飛高祖龍潛時與忻情好甚協及為丞相恩顧彌隆尉迥作亂以忻為行軍總管進臨相州斬獲畧盡直趣鄴下迥軍大敗及平鄴城以功加上柱國是後每參帷幄出入卧内禪代之際忻有力焉忻既佐命功臣頗經將領有威名於當世上由是微忌焉以謹去官陰圖不軌謀洩伏誅

隋書本傳

蘇威字無畏

綽子武功人

周文帝時襲爵美陽縣公隋文帝受禪徵拜太子少保俄兼納言初威父綽以國用不足為征税法頗稱為重歎

曰所爲者正如張弓非平世法也後之君子誰能弛乎威至是奏減務從輕典時高頰與威同心協贊政刑大小無不籌之遷吏部尚書兼祭酒律令格式多威所定拜尚書右僕射國子博士何妥奏威朋黨復言威以曲道任其從父弟徹肅等罔冒爲官上令按之事皆驗免威官爵未幾復拜納言仁壽初拜右僕射時天下大亂威知帝不可匡正甚患之屬帝問盜賊事宇文述曰盜賊少威曰臣非職司不知多少但患其漸近帝不悅裴蘊希旨奏威典選濫授人官於是除名其年從幸江都宇文化及弒逆以威爲開府儀同化及敗歸李密密敗歸東都王世充僭署太師威自以隋室舊臣遭逢喪亂所經之處皆與時消息以求容免太宗平王世充威請謁見稱老病不能拜上遣人數之曰公隋朝宰輔政亂不能匡救致令品物塗炭君弒國亡見李密世充皆拜伏蹈舞今旣老病無勞相見入長安至朝堂請見又不許終於家威行已清儉然每至公議惡人異已無大臣體所修格令章程頗傷煩碎論者以爲非簡久之道大業末年尤多征役至於論功行賞威每承望風旨輒寢其事時羣盜蜂起郡縣有奏聞者又訶詰使人令減賊數故出師攻討多不克捷由是遂致敗亂爲物議所譏

隋書本傳

唐

侯君集三水人太宗在藩引入幕府數從征伐建成元吉之誅也君集之策居多貞觀四年遷兵部尚書參議朝政君集出自行伍素無學術及被任遇方始讀書典選舉定考課並有時譽高昌王麴文泰過絕西域詔以君集爲交河道行軍大總管討之遂平其國君集初破高昌未奏請輒配沒無罪人又私取寶物有司請推其罪詔下獄中書侍郎岑文本疏奏乃釋君集殊怏怏尋與諸功臣

同畫像凌烟閣時庶人承乾在東宮恐有廢立數問以自安之術君集遂贊承乾陰圖不軌及事發被收羣臣爭請誅之太宗謂君

集曰與公長訣矣遂斬之籍其家

舊唐書本傳

楊纂字續卿

弘禮族父華陰人

大業時第進士高祖度河上謁長春宮遷累

侍御史後爲吏部侍郎有俗才抑文雅進黜吏度時舞數以自進

終戶部尚書

唐書楊弘禮傳

羅藝字子延襄陽人家京兆之雲陽父榮隋監門將藝剛愎不仁勇攻戰大業中自稱幽州總管宇文化及至山東遣使招藝藝斬使者爲煬帝發喪時竇建德高開道亦遣使於藝藝謂官屬曰建德等皆劇賊不足共功名唐公民望所係王業必成吾決歸之武德二年奉表以地歸詔封燕王藝弟監門將軍壽以兵從請入朝帝厚禮之拜左翊衛大將軍藝負其功不少屈秦王左右嘗至其營

藝疾辱之時突厥橫放籍藝威名詔以本官鎮涇州太宗即位進

開府儀同三司藝內懼乃圖反稱密詔入朝治中趙慈皓統軍楊

岌謀誅藝藝敗左右斬之壽時爲利州都督亦及誅

唐書本傳

豆盧欽望萬年人祖寬隋梁泉令高祖定關中率豪姓進款擢累殿

中監子懷讓左衛大將軍欽望累官越州都督擢尚書左僕射平

章軍國重事居宰相積十餘年方易之三思等怙勢宣烝窺間王

室缺冀非常不能有所裁抑獨謹身自全卒年八十

唐書本傳

姚璿字令璋

思廉孫萬年人

少孤力學永徽中舉明經第補太子宮門郎遷

中書舍人武后時擢夏官侍郎坐從弟敬節叛貶桂州長史后方

以符瑞自神璿取山川草樹名有武字者以爲上應國姓哀類以

聞后大悅擢文昌左丞證聖初加秋官尚書明堂火后欲避正殿

應天變璿奏此人火非天災也不宜避正殿貶常禮后乃更御端



門大酺燕羣臣與相娛樂遂造天樞著已功德命璿督之功費浩廣見金不足乃斂天下農器并鑄以功賜爵一級坐累下遷益州長史始蜀吏暴貪璿適發之無所容貸后聞降璽詔慰勞浮屠理中謀據劔南有密告者詔璿按其獄疑似捕逮株聯數千入道路寃譟拜地官冬官二尚書久之致仕卒

唐書姚思廉傳

韋巨源與安石同系

萬年人

有吏幹武后時累遷夏官侍郎同鳳閣鸞

臺平章事其治委碎無大體神龍初以吏部尚書同中書門下三品時要官缺執政以次用其親巨源秉筆當除十人楊再思得一餘皆諸宰相近屬再思喟然巨源曰時當爾爾士大夫莫不解體尋遷侍中貝州大水刺史宋璟議免其租巨源以爲蠶桑可輸由是河朔人多流徙者景龍二年韋后自言衣笥有五色雲巨源勸中宗宣布天下帝從其言因是大赦巨源見帝昏惑乃與宗楚

客等推據祥妖陰導韋氏行武后故事俄遷尚書左僕射仍知政

事帝方南郊巨源請后爲亞獻而自爲終獻及臨淄王平諸韋亂

兵殺之

唐書本傳

竇懷貞

始平人

少詭激仕累清河令有治狀神龍中進左御史大夫兼

檢校雍州長史會歲除中宗夜宴近臣謂曰聞卿喪妻今繼室可乎懷貞唯唯俄而禁中竇扇障衛有衣翟衣出者乃韋后乳媪王所謂昔國夫人者故蠻婢也懷貞納之世謂媪壻爲阿翁時懷貞每謁見奏請輒自署皇后阿翁人或謂爲國翁軒然不慚以自媚於后又附宗楚客安樂公主等以取貴位韋后敗斬妻獻其首賈濠州司馬景雲初以殿中監召再遷侍中方太平公主干政懷貞日詣主第刺取所欲睿宗爲金仙玉真二公主營觀諫者交疏不止惟懷貞勸成之躬護役作弟維鑿諫曰公位上衮當思輔天子

而計校瓦木厠身工匠間使海內何所瞻仰不答督繕益急時語曰前作后國奢後為主邑丞言事公主如邑官屬也元宗受禪進左僕射與太平公主謀逆既敗投水死然生平所得俸祿悉散親族敗時惟米數石而已性諂詐宦者用事尤所畏奉或見無鬚者誤為之禮從子就舉明經為鄴令百姓德之

唐書本傳

祝欽明字文思始平人擢明經為東臺典儀拜著作郎為太子率更令中宗在東宮欽明兼侍讀授太子經中宗復位擢國子祭酒同中書門下三品進禮部尚書封魯國公桓彥範崔元暉袁恕已敬暉等皆從受周官大義朝廷尊之以匡親忌日為御史中丞蕭至忠所劾貶申州刺史入為國子祭酒景龍三年天子將郊欽明與國子司業郭山暉陰迎韋后意謬立議后當助天子祀天神祭地祇帝果用其言以皇后為亞獻帝與羣臣宴欽明自言能八風舞

帝許之欽明體肥醜據地搖頭睨目左右顧盼帝大笑吏部侍郎盧藏用歎曰是舉五經掃地矣景雲初侍御史倪若水劾奏欽明等腐儒無行以諂佞亂常不宜在朝乃貶饒州刺史欽明於五經為該淹自見坐不孝免無以澡板乃阿附韋氏圖再用又坐是見逐諸儒羞之後入為崇文館學士卒

唐書本傳

王嶼方慶六世孫咸陽人少為禮家學元宗在位久推崇老子道好神仙事廣修祠祭廡神不祈輿上言請築壇東郊祀青帝天子入其言擢為祠祭使輿專以祠解中帝意有所讓板大抵類巫覡漢以來葬喪皆有瘞錢後世里俗稍以紙寫錢為鬼事至是輿乃用之肅宗立累遷太常卿又以祠禱見寵乾元三年拜同平章事乃奏置太一壇勸帝身見九宮祠帝嘗不豫太卜建言崇在山川輿遣女巫乘傳分禱天下名山大川巫皆盛服中人護領所至干託

州縣賂遺狼籍卒贈閩府儀同三司

唐書本傳

元載字公輔岐山人天寶初策高第補新平尉累遷戶部侍郎李輔國妻載宗女也因相締昵拜同中書門下平章事代宗立輔國勢愈重數言其才進拜中書侍郎未幾判天下元帥司馬盜殺李輔國載與其謀復結中人董秀刺取密旨探微揣端無不諧契魚朝恩驕橫震天下與載不叶乃乘間奏誅朝恩初四鎮北庭行營節度使寄治涇大曆八年吐蕃寇邠寧議者謂涇州不足守載嘗在西州具知河西隴右要領乃言於帝曰國家西境極於潘原吐蕃防戍乃在摧沙堡而原州界其間草薦水甘舊壘存焉請徙京西軍戍原州乘間築作二旬可訖是爲斷西戎脛朝廷高枕矣田神功沮短其議帝疑不決載智畧開果久得君以爲文武才畧莫已若外委主書卓英倩內劫婦言縱諸子關通貨賄京師要司及方面皆擠忠良進貪猥開南北二第室宇奢廣帳帟什器名姝異伎雖禁中不逮帝深戒之載卒愍然不悅會李少良上書詆其醜載奏殺少良道路目語帝積怒大曆十二年收載賜自盡妻王及子伯和仲武季能並賜死發其祖父冢斲棺棄屍籍其家董秀卓英倩悉論死英倩弟英璘家金州州人緣以授官者百餘豪制鄉曲聚無賴以伺變恃載權牧宰莫敢問載敗盜庫兵據險叛詔發兵討捕刺史孫道平禽殺之

唐書本傳

楊炎字公南天興人祖哲以孝行稱父播舉進士退居求志炎文藻雄蔚豪爽尚氣父喪廬墓終喪爲司勳員外郎遷中書舍人元載與炎同郡炎又元出也親重無比會載敗坐貶道州司馬德宗即位拜門下侍郎同平章事初定令有租賦庸調法開元承平久不爲版籍百役並作賦斂之司數四莫相統攝權臣巧吏託進獻爲

賊盜者動萬萬計故課免於上而賦增於下炎疾其弊乃請為兩稅法戶無主客以見居為簿人無丁中以貧富為差其田畝之稅則以大曆十四年墾田之數為準而均收之夏稅盡六月秋稅盡十一月歲終以戶賦增失進退長吏而尚書度支總焉天下利之炎素德元載思有以報之復議城原州節度使段秀實謂方農事不可興功炎怒追秀實為司農卿又以劉晏劾載已坐貶乃出晏忠州用庾準為荆南節度使誣晏殺之朝野側目李正己表請晏罪炎乃遣腹心分走諸道聲言宣慰而實自辯言晏往嘗傳會姦邪帝自惡之帝聞使中人復其言於正己還報信然帝意啣之盧杞秉政罷為尚書左僕射其子弘業賂狼籍杞按之並得他過貶崖州司馬賜死初炎矯厲志節頗得名既傳會元載忤害根中不能自止睚眦必讐果於用私終以此及禍

唐書本傳

竇參字時中刑部尚書誡四世孫

平陵人

學律令為人矜嚴特直以蔭

累為萬年尉同舍嘗夕直者聞親疾惶遽參為代之會失囚京兆按直簿劾其人參曰彼往參當坐乃貶江夏尉入皆義之進大理司直接江淮獄入為御史中丞德宗數召見語天下事或決大議帝器之俄以中書侍郎同中書門下平章事領度支鹽鐵使參無學術不能稽古立事惟樹親黨多所訶察四方畏之於是淄青李納厚饋參外示嚴畏實賂帝親近為間左右爭毀短參申參族子也為給事中參特愛之每議除授多訪於申申或泄之以招權賂所至人目之為喜鵲帝聞戒參曰卿他日必為申所累不如出之以掩物議參曰臣無強子姪申雖疎屬臣素親之不忍遠出請保無他犯帝曰而雖自保如外言何參固陳丐初陸贄與參不平吳通元兄弟與贄軒輊不得申舅嗣虢王則之與通微等善遂共譖

費帝得其姦遂申爲道州司馬貶麥郴州別駕宣武劉士寧餉參絹五千湖南觀察使以狀聞帝怒貶麥驩州司馬賜死於邕州而

杖殺申

唐書本傳

韋渠牟萬年人少慧悟涉覽經史初爲道士復爲僧興元中韓滉鎮

浙西奏授試秘書郎累轉四門博士貞元十二年四月德宗誕日御麟德殿召渠牟及道士萬參成沙門譚延等十二人講論儒道釋三教渠牟枝詞游說捷口水注上謂其講辨有素聽之意動數日轉秘書郎旬日遷右補闕歲終遷右諫議大夫延英奏事率漏下五六刻上笑語欵狎往往外聞渠牟形神佻躁無士君子器志尚不根道德頗張恩勢以招趨嚮上旣偏聽浮薄率皆本術進以

附渠牟遷太府卿又轉太常卿卒

舊唐書本傳

于頔字允元後周太師謹七世孫蔭補千牛累遷湖州刺史部有湖

陂異時溉田三千頃久廢頔行縣命修隄闕歲獲秬稻蒲魚無慮萬計州地庫濕薄葬者不掩樞頔爲坎瘞枯骨千餘人頔以安未幾改蘇州爲政有績然暴橫少恩俄遷大理卿爲陝虢觀察使益自肆峻罰苛懲官吏惴恐參軍姚峴不勝虐自沈於河貞元十四年拜山南東道節度使時吳少誠叛頔率兵自唐州戰吳房朗山取之禽其將李粲又勝之濯神溝於是請升襄州爲大都督府廣募戰士儲良械擱然有專漢南意公斂私輸持下益急而慢於奉上俄擅以兵取鄧州天子未始誰何初襄有梟器天下以爲法至頔驕蹇故方帥不法者號襄樣節度憲宗立權綱自出頔稍懼願以子尚主帝許之遂入朝拜司空同平章事時宦者梁守謙幸於帝頗用事有梁正言者與頔子敏善敏因正言厚賂守謙求頔出鎮久不報敏怒其給責所饋誘正言奴支解之家童上變詔頔

貶恩王傳子敏竄雷州至商山賜死次子季友奪二官正及方免官久之拜戶部尚書又坐季友居喪荒宴削紫金光祿大夫鬱鬱不得意卒方長慶時通豪俠欲事河朔以策干宰相元稹而李逢吉黨謀傾執政乃告稹結客刺裴度事下有司驗無狀方坐誅

唐書

杜亞字次公京兆人肅宗在靈武上書論當世事擢校書郎再遷諫議大夫遷給事中常袞惡之出爲江西觀察使德宗立召還亞意必任台宰倍道進與人語皆天下大政或以事祈謁輒相然可帝知不悅罷爲陝虢觀察使興元初拜淮西節度使至則治漕渠引湖陂築防庸入之渠中以通大舟夾隄田因得溉灌人皆悅賴然雅意丞弼厭外官往往不親事日夜召賓客言嘯流連方春南民爲競渡戲亞欲輕駛乃繫船底使篙人衣油綵衣沒水不濡觀沼

華遂費皆千金自是府財耗竭貞元中罷歸以檢校吏部尚書守東都病風痺且廢猶欲固寵奏墾苑中爲營田可減度支歲粟詔許之先是苑地可耕者皆留司中人及屯士占假亞計窘更舉軍帑錢與旬人至秋取菽粟償息輸軍中貧不能償者發困窘畧盡流亡過半又賂中人求兼河南尹帝審其妄賜還卒

唐書本傳

王遂

備孫咸陽人

好興利操下以嚴累遷鄧州刺史會兵宿淮西亟財賦

籍遂幹強拜宣歙觀察使蔡已平師東討李師道爲檢校左散騎常侍兼御史大夫始調兵食歲三百萬俄而賊誅遂簿羨賞百萬以獻帝高其能即拜遂沂兗海觀察使遂資編刻杖扑皆踰制盛夏治署舍墻垣程督慘峭裨校王弁殺之自知留事帝拜弁開州刺史至徐州械送京師斬東市監軍上遂所製杖出示於朝爲戒

唐書王琳傳

韋執誼京兆舊族幼有才及進士第對策異等授右拾遺年踰冠入翰林爲學士便敏側媚得幸於德宗帝誕日皇太子獻書浮屠象帝使執誼贊之太子賜以帛執誼到東宮謝太子卒見無所藉言乃曰君知王叔文手美才也執誼由是與叔文善順宗立以疾不親政事叔文用事乃擢爲尚書左丞同平章事叔文與王伾居中竊命執誼奉行因迷奪朝權執誼旣爲所引然外迫公議欲示天下非黨與者乃時時異論相可否密謝叔文曰不敢負約欲共濟國家事爾叔文數爲所梗遂成仇怨憲宗受內禪貶執誼爲崖州

司戶參軍死

唐書本傳

杜元穎如晦五世孫貞元末及進士第以右補闕爲翰林學士敏文辭憲宗特所賞歎穆宗以元穎多識朝章尤被寵拜同平章事甫再期出爲劔南西川節度使敬宗驕僻元穎每欲中帝意以固幸

乃巧索珍異獻之踵相躡於道斂取苛重至削軍食以助裒畜又給與不時戍人寒飢於是人人咨苦戎備不修太和三年南詔乘虛襲戎雋等州遂入成都大掠數日去由是斥爲循州司馬死貶

所

唐書杜如晦傳

韋綬字子章萬年人有至性然好不經喪父饒臂血寫浮圖書建中末爲長安尉朱泚亂羸服走奉天拜華陰令三遷職方郎中穆宗爲太子綬入侍讀遷諫議大夫方太子幼綬數爲俚言以悅太子他日侍太子爲帝道之帝怒曰綬當以經義輔導太子而反語此朕何賴焉外遷虔州刺史穆宗立召爲尚書右丞集賢院學士出入禁中怙寵甚俄爲山南西道節度使入辭乞賜錢二百萬官子元弼太常丞帝以舊恩許之綬耄而貪不能事軍政綱維亂弛卒

諡謬醜

唐書本傳

令狐瀆

絢子華

避嫌不舉進士絢輔政瀆與鄭顥為姻家怙勢驕倨

通賓客射取四方貨財皆側目無敢言懿宗嗣位數為人白發其

事絢因丐瀆與羣進士試有司詔可是歲及第長安尉累遷詹事

府司直湮阨不振死

唐書令狐楚傳附

五代

敬翔字子振馮翊人少工書擢為館驛巡官太祖與蔡人戰汴郊翔

謀畫多中太祖欣然謂得翔之晚太祖奉昭宗自岐還長安昭宗

召翔與李振升延喜樓勞之拜翔太府卿太祖即位以翔為金鑾

殿大學士翔深沉有大畧從太祖用兵三十餘年細大之務必關

之翔亦盡心勤勞晝夜不寢自言惟馬上乃得休息太祖崩友珪

立以李振代翔為崇政使莊宗入汴詔赦梁羣臣振邀翔欲俱入

見翔夜止高頭車坊將旦左右報曰崇政李公入朝矣翔歎曰李

振謬為丈夫矣復何面目入梁建國乎乃自經而卒

五代史本傳

韋震字東卿萬年人初名肇為人彊敏有口辯事梁太祖為都統判

官昭宗幸石門太祖遣震由號畧間道奉表行在昭宗賜名震太

祖已破兗鄆遂攻吳大敗於清口太祖懼諸鎮乘間圖已乃諷杜

洪鍾傳王師範錢鏐等薦已為元帥且兼求領鄆州昭宗初不許

震彊辯敢大言語數不遜昭宗卒許梁以鄆州太祖遂兼四鎮表

震鄆州留後昭宗遷洛震入為河南尹六軍諸衛副使以病瘖守

太子太保致仕太祖受禪改太子太傅末帝即位加太師卒

五代史本傳

傳

劉景巖延州人為丹州刺史晉高祖起兵太原唐廢帝調民七出一

卒為義兵延州節度使楊漢章發鄉民赴京師將行景巖遣人激

怒之義兵亂殺漢章迎景巖為留後晉高祖即位即拜景巖節度



使景巖從事熊敷爲人多智陰察景巖跋扈難制因語景巖以爲邊地不可以久安爲陳保名享利之策言邠涇多善田其利百倍宜多市田射利以自厚景巖信之歲所獲甚多景巖使敷朝京師敷乃言景巖不宜在邊可徙之內地乃移景巖邠州又徙武勝景巖乃悟敷爲賣已開運三年景巖罷武勝以太子太師致仕居華州契丹犯京師以周密鎮延州景巖乃還故里而州人遂密立高允權允權妻劉氏景巖孫女也允權妻歲時歸省景巖謂曰高郎一縣令而有此州其可保乎允權意惡之乃誣其反而殺之長子行琮德州刺史亦被誅次子行謙允權婦翁也爲奏言非劉氏子遂免不誅

五代史本傳

姚顛字百真長安人少憊不修容止舉進士事梁爲中書舍人唐莊宗滅梁貶復州司馬已而以爲散騎常侍兼吏部尚書左丞廢帝擇宰相拜顛同平章事顛爲人仁恕不知錢帛數御家無法在相位謹嚴無所爲唐制吏部分爲三銓尚書曰尚書銓侍郎二人曰中銓東銓天成中詔三銓合爲一顛爲相復分爲三選人多不便之往往遮宰相喧訢不遜顛無如之何晉高祖立罷爲戶部尚書

卒

五代史本傳

楊思權邠州新平人事梁爲控鶴軍使莊宗滅梁以爲甲夾馬都指揮使明宗時秦王從榮爲河東節度使使思權爲北京步軍都指揮以佐佑之從榮素驕多不法時宋王從厚爲河南尹謙恭好禮明宗遣人語從厚之善以諷勉之從榮謂思權曰我將廢矣奈何權曰公有甲士而思權在何患也乃勸從榮募死士以爲備明宗召思權還京師後爲羽林都指揮使將兵戍興元潞王從珂反鳳翔興元張虔釗會兵討賊思權攻城西破兩關城從珂登城呼外

兵告以已非反者軍士反逐虔劍思權因呼其衆曰潞王真吾主也即擁軍士入城降從珂乃出紙於懷中曰願志臣姓名以爲驗從珂即書曰可弼寧節度使廢帝立即拜思權靜難軍節度使後

爲左衛上將軍卒

五代史本傳

趙瑩字元暉華陰人爲人純厚美風儀事梁將康延孝爲從事晉高祖爲保義軍節度使以瑩掌書記自是徙鎮常以瑩從高祖將起兵瑩勸高祖無反高祖即位累拜中書出爲晉昌節度是時出帝童昏馮玉等用事以瑩柔弱易制復引爲相契丹滅晉瑩從出帝北徙虜中爲太子太保子易則易從當其北徙與易從俱易則留

事漢官刑部郎中

五代史本傳

蘇逢吉長安人漢高祖鎮河東父悅爲高祖從事逢吉常代悅作奏記悅言之高祖高祖以爲節度判官高祖性剛嚴賓佐稀得請見

逢吉獨入終日侍立高祖書閣中兩使文簿盈積莫敢通逢吉輒取內懷中伺高祖色可犯時進之高祖多以爲可以故甚愛之然爲人貪詐無行喜爲殺戮高祖嘗生日遣逢吉疏理獄囚祈福謂之靜獄逢吉入獄無輕重曲直悉殺之以報曰獄靜矣高祖建號拜同平章事時制度草創逢吉素不學問隨事裁決出其意見不施德政時天下多盜逢吉草詔下州縣凡盜所居本家及鄰保皆族誅由是殺人滋濫嘗從高祖征鄴數使酒辱周太祖太祖恨之隱帝立太祖起兵官軍敗逢吉自殺於民舍

五代史本傳

宋

竇真固字體仁白水人父專後唐左諫議大夫真固能屬文同光中舉進士授河東節度推官時晉祖在藩以真固廉介甚重之及即位擢爲戶部員外郎就拜中書舍人少帝即位遷禮部尚書知貢

舉舊制進士夜試繼以三燭長興二年改令晝試貞固以晝晷短難盡士材奏復夜試擇士平允時論稱之改刑部尚書漢祖入汴貞固率百官見於滎陽西初營宗廟帝以姓自漢出遂襲國號尊光武爲始祖並親廟爲五詔羣臣議貞固上言陛下重興漢祚伏請立高曾祖禰四親廟更立始祖在四廟之外尊高皇帝光武皇帝爲始祖法文王武王不遷之制用歷代六廟之規庶合典禮漢祖從之論者以爲非禮拜司徒門下侍郎平章事隱帝即位加司徒楊邠史弘肇王章樹黨恣橫專權凌上貞固但端莊自持不能規救周祖兵起貞固遂詣周祖周祖登位加兼侍中俄罷相守司徒封沂國公世宗即位以范質爲司徒貞固遂歸洛陽蓋爲編民宋初貞固詣范質求任東宮三少質不爲奏乃還洛病困自爲墓誌卒

宋史本傳

王易簡字國寶萬年人性介特寡合曾祖肫劍州刺史祖遠連州刺史父貫唐州刺史易簡少好學工詩梁乾化中舉進士召爲右拾遺上書忤旨出爲鄧州節度推官後唐同光中爲魏王府記室叅軍明宗即位周帥羅周恭辟爲掌書記府罷退居華陰作小隱詩二十首秦王從榮聞而重之召爲祠部員外郎晉初拜御史中丞吏部侍郎判吏部銓晉祖在大梁臺省湫隘易簡奏舉故事得元省錢二百萬繕治省署及造器物周初遷禮部尚書俄改刑部判兵部顯德四年致仕宋初加少保卒子景讓進士及第至尚書郎

宋史本傳

蘇曉武功人父瓚仕後唐歷秘書少監長興初曉辟鄧州從事漢祖鎮太原表爲觀察使歷屯田郎中宋乾德三年出爲淮南轉運使建議權斬黃舒廬壽州茶置十四場規其利歲八百餘萬婚潤寶

三年改西川轉運使仍掌京城市征擢拜左諫議大夫七年監在

京商稅九年卒曉深文少恩當時號爲酷吏及卒無子有一女甚

鍾愛亦先曉卒人以爲深刻所致

宋史本傳

崔嶧字之才長安人進士及第知遂州建議瞿塘峽置關如劔門以

察奸人徙提點刑獄嘉陵江歲調民丁治堤塌嶧更用州兵代役

文州蕃卒數剽攻邊戶嶧請守臣歲時行邊益募勇壯伺其發一

切捕擊之後無復內寇就除河東轉運使會更錢法潞州民大擾

推其首惡誅之人心遂定後遷集賢院學士知河中府嶧所至貪

奸比老益甚至河中請老以刑部侍郎致仕卒

宋史本傳

王陶字樂道萬年人第進士嘉祐初爲監察御史裏行神宗立拜御

史中丞郭逵以簽書樞密宣撫陝西詔令還都陶言韓琦置遠二

府至用太祖故事出師刼制人主琦必有姦言惑亂聖德願罷遠

陶始受知於琦帝初臨御陶料必易置大臣欲自規重位故視琦

如仇力攻之帝徙陶爲翰林學士出知陳州入權三司使呂公著

言其反覆不可近以東宮舊臣加觀文殿學士帝薄其爲人不復

用元豐三年卒陶微時苦貧寓京師其友姜愚氣豪樂施一日大

雪念陶奉母寒荷一鋪刻雪行二十里訪之陶母凍坐日高無炊

烟愚亟解所衣錦裘質錢買酒肉薪炭又捐數百千爲之娶陶旣

貴尹洛愚老而喪明往謁之意陶必念舊哀已陶對之邈然但出

尊酒而已愚大失望歸而病死聞者益薄其爲人

宋史本傳

姚古

兗子五

以邊功官累熙河經畧靖康元年金人逼京城古與种

師中俱勤王种師道與古子平仲先已率兵入衛兩家子弟各不

相下平仲恐功獨歸种氏乃夜刼幹離不營反爲所敗粘罕陷隆

德府以古爲河東制置种師中副之古總兵援太原師中援中山

河間諸郡古進兵復隆德府威勝軍扼南北關師中與金人戰互有勝負太原圍不解師中進師平定乘勝復壽陽榆次朝廷數使人趣師中戰約古及張灝兩軍齊進而二人失期不至師中敗而死金人迎古于盤陀古兵潰退保隆德中丞陳過庭奏古罪不可恕詔安置廣州

宋史姚兒傳

劉延慶保安軍人世爲將家數從西伐立戰功積官至鄜延路總管遷節度從北伐以宣撫都統制督兵十萬渡白溝延慶行軍無紀律郭藥師叩馬諫不聽至良鄉遼將蕭幹帥衆來延慶與戰敗績遂閉壘不出藥師曰幹兵不過萬人今悉力拒伐燕山必虛願得奇兵五千倍道襲取令公子三將軍簡師爲後繼延慶許之藥師先入燕城幹舉精甲三千巷戰三將軍光世渝約不至藥師失援敗走延慶營於盧溝橋南明旦見火起以爲敵至燒營而奔相蹂踐死者百餘里自熙豐以來所儲軍實殆盡燕人作賦及歌誚之靖康之難延慶分部守京城城陷引秦兵萬人奪開遠門以出爲追騎所殺

宋史本傳

光世字平叔延慶次子初以蔭補三班奉職累陞

鄜延路鈐轄康王即位以功加檢校少保命討李成執其謀主陶子思加檢校太保殿前都指揮使苗劉爲亂素憚光世遷淮南制置使張浚在平江馳書諭以勤王不從呂頤浩遣使說之乃引兵會韓世忠破之命爲江東宣撫使受杜充節制光世言受充節制有不可者六帝怒詔毋入光世殿門光世始受命隆祐太后在南昌議者謂金人自蘄黃渡江陸行二百里可至命光世移屯江州爲屏蔽光世既至日置酒高會金人自黃州渡江凡三日無知者此金人至遂遁授浙西安撫大使知鎮江府光世言安撫控制一路若但守鎮江則他郡有警不可離任望別除守臣光世專充安

撫使從便置司時光世慮金人必過江故預擇便地帝覺之止許增辟通判金兵留淮東光世畏其鋒楚州被圍已百日帝手札趣光世援楚者五竟不行但遣王德鄴瓊將輕兵以出時奏殺獲而已授檢校太傅張浚言其沈酣酒色不恤國事乞賜罷斥光世引

疾罷

宋史本傳

鄭建充字仲實其先京兆人占籍鄜州仕宋累官知延安府事天會七年來降仍知延安府宋劉光烈來攻建充擊破之遷京兆府路兵馬都監敗宋曲端於彭原高昌宗據延安爲宋守建充擊之盡復城邑復知延安軍府事朝廷以地賜宋爲宋環慶路經畧安撫副使仍知寧州天眷復取陝西仍以爲經畧安撫使知慶州從破甘谷城改平涼尹時營建南京宮室大發河東陝西材木浮河而

下筏工多沉溺有司不敢以聞乃誣以逃亡錮其家建充白其事錮者得釋建充性剛暴常畜獠犬十數奴僕有罪旣笞已復噬犬齒之骨肉都盡郡省部文移有不應法度輒置之坐下或即毀裂由是在位者銜之軍胥李換誣充藏甲欲反死於獄中長子懇亦死焉

金史本傳

明

呂震字克聲臨潼人洪武中鄉舉入太學朝廷行天下則壤均賦震承檄之兩浙報命稱任使擢山西按察僉事入爲戶部主事尋出爲北平按察僉事成祖潛邸恭順有勞及即位累擢刑部尚書轉禮部命兼領戶兵二部事震深中寡言當其獨坐深念以手指刮眉毛則必有精思密計諸官屬相誠無敢白事主事尹昌隆白震事震獨坐不應少選復前震怒拂衣起曰君自行之何以問爲昌

隆不得請有語以公舊事東宮皇太子素重公何不取令旨行之  
昌隆從其計震怒奏昌隆上爲下昌隆獄尋赦復官後數年谷王  
謀反以王嘗保奏昌隆爲長史坐昌隆與謀下公卿雜問昌隆力  
辨震折之夷其族仁宗朝加太子太保宣德元年病而疽宛轉病  
呼曰尹相尹相家人問故曰尹昌隆守而欲殺我震竟死名山藏  
王命字子將同州人嘉靖己酉舉人慷慨有膽畧乙卯歲凶地震盜  
賊所在鈔掠命時宅憂糾宗守望其弟弗良即勒令自盡於是威  
望大著州使君聞之就命問計因假之事權命乃墨衰仗劍巡行  
鄉聚訪緝大小偷或挺或刺死者枕藉道路以目盜賊雖少戢然  
中多濫及無辜亦有斃於睚眦者後銓知蔚州不久卒官同州志

勅脩陝西通志

第六十五卷

人物十一

釋道

人瑞

NATIONAL CENTRAL LIBRARY, TAIWAN, R.O.C.



陝西通志第六十五卷

人物十一

釋道

**上古**

尸昆修行於延之清涼山忽有鸛逐雀墮座下尸昆懼鸛饑割肉飼之乃去曰佛弟子乃相試耳

延安府志

**晉**

法慧關中人方直有戒行入嵩高山事浮圖密為師晉建元元年卒襄陽止羊叔子寺不受別請每乞食輒齋繩牀自隨遇雨以油帔自覆雨止唯見繩牀不知慧所在後征西庾禕恭鎮襄陽素不奉法聞慧有非常之迹甚嫉之慧預告弟子曰吾宿對尋至誠勸眷屬令勤修福善後二日果收而刑之年五十八臨死語衆人云吾



死後三日天當暴雨至期果洪注城門水深一丈

續文獻通考

道安姓魏氏常山扶柳人苻堅遣苻平南攻襄陽安獲於堅既至住長安五重寺初堅承石氏之亂至是四方畧定欲平一江左堅弟平陽公融等並切諫終不能迴會堅出東苑命安同載顧謂安曰朕將與公南遊吳越涉會稽觀滄海不亦樂乎安對曰陛下應天御世有八州之富宜棲神無為與堯舜比隆今欲以百萬之師求厥田下之士非愚心所知也堅曰順時巡狩亦著前典若如師言則帝王無省方之支乎安曰若鑿駕必動可先幸洛陽抗威蓄銳傳檄江南如其不服伐之未晚堅不從前軍大潰於八公山堅單騎而遁如所諫焉建元二十一年二月八日忽告衆曰吾當去矣齋畢無疾而卒

高僧傳

僧涉西域人苻堅時入長安虛靜服氣不食五穀日能行五百里言未然之事驗若指掌能以秘咒下神龍每旱堅常使之咒龍請雨俄而龍下鉢中天輒大雨卒於長安後大旱移時苻堅歎曰涉公

在豈憂此乎

晉書本傳

僧朗京兆人少而遊方問道後於金輿谷崑崙山中別立精舍內外屋宇數十餘區聞風而造者百有餘人朗孜孜訓誘不倦秦王苻堅欽其德素遣使覲遺堅後沙汰衆僧乃別詔曰朗法師戒德冰霜學徒清秀崑崙一山不在搜例谷中舊有虎人常執杖結羣而行及朗居之猛獸歸伏晨行夜往道俗無滯至今呼爲朗公谷卒山中年八十有五

賈志

鳩摩羅什天竺人年七歲出家從師受經日誦千偈博覽五明諸論及陰陽星算妙達吉凶言若符契性率達不拘小檢專以大乘爲化苻堅聞之密有迎什之意遣驍騎將軍呂光西伐獲什至涼州

堅為姚萇所害於是在涼州積年姚興破呂隆乃迎什待以國師之禮仍使入西明閣及逍遙園譯出衆經無不究其義旨沙門慧獻才識高明常隨什傳寫什每為論西方辭體商畧同異嘗講經於草堂寺興及朝臣大德沙門千有餘人肅容觀聽什忽下高坐謂興曰有二小兒登吾肩慾障須婦人興召宮女進之一交而生二子興嘗謂什曰大師聰明超悟天下莫二何可使法種少嗣遂以妓女十人逼令受之爾後不住僧坊別立解舍諸僧多效乃聚針盈盆引諸僧謂之曰能食此者可畜室因舉七進針諸僧愧服乃止什死於長安興如逍遙園依外國法以火焚尸薪滅形碎惟舌不爛

晉書本傳

僧肇京兆人才思幽元善談說羅什至姑臧肇自遠從之著般若無知論羅什讀之稱善時廬山隱士劉遺民見肇此論曰不意方袍

復有平叔以呈遠公遠公歎曰未嘗有也

馮志

時鳩摩羅什為姚興

所敬於長安草堂寺集義學八百人重譯經本羅什聰辨有淵思達東西方言沙門道彤僧畧道恒道禰僧肇曇影等與羅什共相提挈發明幽致諸深大經論十有餘部更定章句辭義通明沙門共所相習道彤等皆識學洽通僧肇尤為其最羅什撰譯僧肇常執筆定諸辭義注維摩經又著數論皆有妙旨學者宗之

魏書釋老志

本朝雍正十一年四月二十六日

勅封大智圓正聖僧禪師

道融時師子國有婆羅門馱其書至長安乞與僧辨論羅什謂道融曰子可以當之融乃密使人錄其書目一覽即誦尅日議論秦王與公卿大集婆羅以能博觀為誇融數其目並秦地經史三部之什乘勝嘲曰卿未聞秦地有博學者乎於是婆羅門再拜而去

續文

獻通考

道若以奉律精苦為秦王所重時僧尼萬數頗多愆濫以若為國僧

正綱領之僧有官自若始

續文獻通考

慧菟不知何許人止長安大寺戒行澄潔多栖處山谷脩禪定之業

有一鬼作異形菟皆隨言遣之後冬時天甚寒雪有一女子來求

寄宿形貌端正自稱天女以上人有德天遣我來相慰喻欲動其

意菟厥志貞確一心無擾謂女曰吾心若死灰無以革囊見試女

遂凌雲而逝顧歎曰海水可竭須彌可傾彼上人者秉志堅貞不

可易也後以晉隆安三年與法顯俱遊西域不知所終

高僧傳

佛馱耶舍罽賓國婆羅門種年十五誦經日至萬言羅什至乃從學

阿毘曇論十誦律後入長安姚主別立省寺於逍遙園供養一無

所受時什譯出十住經師更相徵決辭理方定師尊亦善解毘婆

沙論時號赤髭論主秦弘始中譯出四分律長阿含經義熙八年

來廬山入社復還本國

蓮社高賢傳

曇邕姓楊氏關中人形長八尺雄武過人南投廬山依師遠公內外

典籍無不綜習立茅屋於山西以自居弟子曇果澄思禪門一夕

夢山神求受戒果曰家師在此可往求之少時邕忽見一人著袷

衣風神端雅從者三十許人乞授戒師以果先夢知是山神乃為

說法授五戒畢神以外國二鋤為贖禮謝而去師後往荊州行化

卒於竹林寺

蓮社高賢傳

**白**

佛馱跋陀羅姓釋迦迦維羅衛國人年十六博學羣經深達禪律與

迦達多遊罽賓時姚秦沙門至罽賓觀法眾清淨慨然東顧曰孰

能遂我祈請化流東土僉應之曰跋陀羅其人也慧嚴乃邀師同

行從鳩摩羅什於長安秦太子泓請師於東宮集衆說法忽謂弟子曰吾見本國五舶俱發衆謂妄言因擯之與弟子慧嚴慧觀等四十餘人至廬山香谷遠公請師於東林譯出禪教諸經後西適江陵果見天竺五舶至宋元嘉六年念佛而化塔於廬山北嶺

高賢傳

道生魏氏鉅鹿人幼從竺法汰出家年在志學便登講座後與僧叡慧嚴慧觀等從羅什受業闍中乃立誓不受報及頓悟成佛義又著二諦論佛性常有論佛無淨土論應有緣論又以法顯三藏所翻泥洹經先至經云除一闍提皆有佛性謂是經來未盡耳乃唱闍提之人皆得成佛僧黨以爲背經遂擯而遣師正容誓曰若所說背經當見身厲疾若與實相不背願舍壽之日據獅子座及後大經至諸師皆媿服元嘉十一年於廬山升座說法將畢衆見塵尾紛然墮地隱几而化宛若入定諸師聞之益信前誓有證翌日葬於廬山西阜

稽古錄

曇無成姓馬扶風人家世避難移居黃龍年十三出家履業清真神悟絕倫聞什公在關負笈從之既至見什什問沙彌何能遠來答曰聞道而至什大善之於是經停務學慧業愈深姚興將亡關中危擾乃憇於淮南中寺涅槃大品常更互講說受業二百餘人著實相論又著明漸論宋元嘉中始卒

高僧傳

智猛新豐人稟性端明厲行清白少襲法服脩業專至聞天竺國有釋迦遺跡遂結同心沙門十五人發跡長安歷鄠善龜茲于闐諸國至華氏國阿育王舊都有大智婆羅門名羅閱見猛至問秦地有大乘學否猛答悉大乘學羅閱懺歎猛得大泥洹梵本一部又得僧祇律一部及餘經梵本以甲子歲發天竺還涼州出泥洹本

得二十卷元嘉末卒於成都

高僧傳

僧道京兆人初爲姚興欽重出入同輦後宋孝武悅其賢躬爲壽春

立光山寺勅開講首

續文獻通考

**南齊**

僧宗姓嚴馮翊人晉氏喪亂其先四世祖移居秦郡年九歲爲瑗公

弟子諮承慧業晚又受道於斌濟二法師善大涅槃及勝鬘維摩

等經每至講說聽者將近千人妙辯不窮應變無盡魏王元宏遙

挹風德屢致書並請開講齊世祖不許外出造太昌寺以居之建

武三年卒

高僧傳

**梁**

慧球姓馬氏扶風人世爲冠族年十六出家住荊州竹林寺事道馨

爲師稟承戒訓履行清潔後入湘州麓山專業禪道頃之與同學

慧度俱適京師諮訪經典後又之彭城從僧淵受成實論年二十

三還荆土講集相繼學侶成羣訓勗之功有譽當世天監三年卒

高僧傳

慧彌姓楊氏華陰人漢太尉震之後年十六出家入終南山剪茅結

宇以爲栖神之宅時至則持鉢入村食竟則還室禪誦如此者八

年後觀化京師止於鍾山定林寺習業如先戒範精明獎化忘倦

凡造山禮拜者皆爲說法提誘足不出山三十餘年曉夜習定常

誦般若六時禮懺必爲衆先梁天監十七年終於山舍葬於寺南

立碑頌德

高僧傳

**北齊**

惠始姓張家本清河聞羅什出新經遂詣長安見之觀習經典坐禪

於白渠北晝則入城聽講夕則還處靜坐三輔有識者多宗之劉

義真去長安赫連屈丐追敗之道俗咸見坑戮惠始身被白刃而體不傷衆大怪異言於屈丐屈丐以寶劍擊之又不能害乃懼而謝罪統萬平到京師世祖每加禮敬始自習禪至於歿世五十餘年未嘗寢卧或時跣行雖履泥塗足色鮮白世號之曰白脚師

釋老志

閻那屈多西天竺人文帝時至長安大興善寺奉勅譯法華等經

獻通考

晉安姓郭涇陽人少出家周氏滅法隱終南山梗梓谷隋文創曆廣募遺僧時谷中三十餘僧皆應詔惟安自守林壑時行村聚惠益生靈後棲子午豹林谷淵之側解困度阨止疾起生往往奇驗社人有殺生者常倍價贖之令勿殺不得即引刀自割胙肉曰此彼

俱肉耳猪食糞穢爾噉之况人食米理足貴也衆驚恚放之其感

發慈善率此類以大業五年終於靜法禪院

續高僧傳

彭淵姓趙氏武功人年十三出家靈裕法師擅步東夏乃從而問焉居履法堂目不尋文口無談義門人初未齒之裕異其器宇召入私室與論名理對答如影響身心如鐵石裕大嗟賞遂同居宴寢論道說義終日竟夜兩情相得頓寫幽深後屏迹終南置寺結徒裕後勅召入朝徑投淵寺帝爲卜西南坡阜足稱福地淵從焉今之寺墟是也大業七年卒

續高僧傳

法慶煬帝時在長安先天寺造丈六夾桂像未成暴亡時寶昌寺大智亦卒三日而還良久云見宮殿若王者見法慶在一像前語曰法慶造像未畢何乃令我死檢簿者曰命祿俱盡像曰須成我矣可給荷葉以終其身言訖大智再生衆異之往問法慶亦話其驗

竟不能食每旦食荷葉一枚齋時三枚如此五年功就而卒

桂苑叢談

曇詢姓楊華陰人年二十二遠訪巖隱遊至白鹿山北林落泉寺逢

曇淮禪師剃髮後移住鹿土谷修禪枯泉重出麋鹿繞院學徒慶

瑞嘗值虎鬪執錫語云同居林藪計無大乘幸各分路虎低頭受

命而去每入禪定七日為期或稱自有禪踪斯人罕擬武德五年

弟子靜休等建塔立碑

賈志

志超姓田氏馮翊人方孩即喜禮佛年十七削髮雲遊至五臺一老

人點悟曰子後當佛至介休華嚴寺講經脩養侍者摩斯供厨後

入綿山仙窟五龍聽法白鹿白兔紛紛前導至抱腹岩中禪定有

青衣童子奉古佛舍利供養貞觀初旱太宗禱雨不應長安父老

向各名山求禱及禪師師令拜侍者摩斯斯方浙米將米汁向西

少灑令急回曰霑足矣果應太宗召入長安不就遂瞑目而化後

駕至岩麓興國寺知己化詣岩行禮時山霧迷漫善衆未審名號

祝天顯示修霧開恍見金字牌云空王古佛太宗乃賜佛號後歲

早禱雨輒應

山西通志

曇藏姓楊氏華陰人年十五二親為姻媾遂逃亡山澤莫知投造但

念觀音尋聞鐘聲忽見僧寺因求剃落即出門行百步迴望不見

乃西奔隴上求法為務晚還京邑於旌善寺行道受戒又徃山東

名稱普聞及返京師住光明寺論發新異大唐御世造寺會昌召

為上座貞觀譯經又召為證義皇儲失御召入宮受菩薩戒翌日

即瘞勅賜絹數百段皇后疾又請入宮受戒施物極多貞觀九年

終於會昌寺

續高僧傳

法誠終南山悟真寺僧萬年人事沙門僧和為師和亦鄉族之所推



奉嘗有人欲害和夜詣門見房內猛火騰焰升帳遂即追悔誠奉  
佩訓最常誦法華夢感普賢勸書大教既寤即重觀工匠令書八  
部般若香臺寶軸莊嚴成就又於寺南橫嶺造華嚴堂鑿山堙壑  
列棟連甍前對重巒右臨斜谷吐納雲煙實奇觀也弘文館學士  
張孝靜善書翰誠請寫藏經齋潔勤奉大致感應靈禽異獸馴擾  
精虛貞觀十四年忽謂侍者曰諸行無常法緣有竭九品往生斯  
言驗矣言畢口光燭於檀奄然而化高僧傳

會通萬年人少欣儉素苦節戒行終始不渝投豹林谷潛隱誦法華  
經至藥王品便欣厭捨私積柴木誓必行之以貞觀末年靜夜林  
中積薪為窟誦至藥王便令下火風驚焰發烟火俱盛卓爾跏坐  
聲誦如故尋西南有白光流入火聚身方偃仆至曉身火俱滅乃  
收其骨為起塔銘高僧傳

慧圓唐貞觀三年杖錫來山陽之天竺山造雲蓋寺栖止說法道成

坐脫百年後人見於終南山曰余天竺山慧圓師也匡廬惠遠異

世異地今同居此釋氏叢話

法順姓杜氏萬年人為隋文帝所重月給俸供之有病者對之危坐

少頃即愈生而聾者與言即聰啞者與語即能言狂顛者使人領

住向之禪定少選即拜謝而去又嘗臨溪侍者懼不可濟順率同

涉水即斷流其神迹類此太宗素敬之嘗引入宮禁妃主戚里諸

貴奉之如生佛集華嚴法界觀門弟子智嚴尊者傳其教續文獻通考

慧融字圓照姓張氏南陽人幼而精進落髮後奉勅入京住普光寺

時遊終南山逢雪深厚不能上忽有一虎耳俯伏慧融知其意

乃乘之虎遂負融而上常有雙鳥於山林中前行引路永徽初遷

神本寺寺僧望慧融房舍上五色光起及於山中見慧融縱火焚

身肌骨總銷唯心不爛

高僧傳

靜之姓趙高陵人性樂出家隨父任蜀父亡乃見心弟身具覺力隱彭門山光化寺又入靈巖山利州道禪師請入劍閣小時鼻塞百方無驗有僧令誦般若多心經萬遍恰至五千肉便落後遇疾苦依前得瘥乃撰諸家觀門為一卷要約精最後學重之顯慶三年召入西明別立禪府利州本寺柱樹忽凋胡桃自拔佛殿無故北面仰地德動幽靈若此顯慶五年終於西明

鎮高僧傳

沙門元奘俗姓陳鄆師人少有操行貞觀三年因疾挺志往五天竺國凡經十七歲至貞觀十九年二月十五日方到長安足所親踐者一百一十一國探求佛法咸究根源凡得經論六百五十七部佛舍利並佛像等甚多京城士女迎之填城溢郭時太宗在東都乃留所得經像於弘福寺有瑞氣徘徊像上移晷乃滅遂詣駕朝

謁太宗謂之曰法師行後造弘福寺其處雖小禪院虛靜可為翻譯之所太宗御製聖教序高宗時為太子又作述聖記並勒於碑麟德中終於坊州玉華寺元奘撰西域記十二卷見行於代著作郎敬播為之序

大唐新書

道宣姓錢丹徒人弱冠出家專精克念晦迹終南所居號為白泉寺隋末遷豐德寺貞觀中隱沁部雲室山乾封二年十月安坐而化

賈志

法琳唐武德中終南山宣律修持戒律時有法琳道人飲酒食肉不擇交游至有妻子律師在城內法琳過之律師不禮焉或謂律師曰彼菩薩地位非師所知律師乃改觀後法琳醉造律師直坐其牀吐于床下律師不敢嫌法琳手取功德錢納之袖中沽酒市肉錢盡復取律師見即與之後唐高祖聽道士言將滅佛法法琳與

諸道士競論道士慙服佛法得全琳之力也

感通

窺基字洪道姓尉遲長安人年十七奉勅爲元奘弟子始住廣福寺尋奉勅選聰慧穎脫者入大慈恩寺躬事奘師學諸佛法常造玉文殊像及金寫大般若經皆獲瑞應永淳二年卒於慈恩寺翻經

院賈志

洪昉本京兆人幼而出家遂證道果志在禪寂亦以講經爲事嘗爲鬼王授八關齋戒帝釋講大涅槃經言辭典暢備宣宗旨時則天在位命徵昉至天申供養數月則天謂昉曰師遂無一言教弟子乎昉言曰惟願陛下無多殺戮大損果報則天信受之昉年過下

壽卒於陝中

紀聞錄

萬迴閩鄉人姓張氏兄戍安西絕音問父母日涕泣迴朝徃夕返弘農抵安西萬餘里以萬里而迴故名萬迴後則天召語事多驗臨

終大呼遣求本鄉河水弟子徬徨失措迴曰堂前是河水便於塔

下掘井忽然河水湧出飲竟而終塔今在香積寺

咸寧縣志

僧伽大師西域人姓何氏龍朔中至泗州臨淮縣建寺化行江表景龍二年中宗遣使迎師入內道場尊爲國師尋出居薦福寺京畿無雨師將瓶水汎洒俄頃陰雲驟至甘雨大降中宗大喜詔賜所脩寺額爲晉光王寺御筆親書至四年三月二日端坐而終中宗令於薦福寺起塔漆身供養俄而大風歛起臭氣遍滿中宗問曰是何祥也近臣奏曰僧伽大師化緣在臨淮恐是欲歸彼處故現此變中宗默然心許頃刻之間奇香郁烈即送至臨淮起塔供養

紀聞錄

儀光禪師本唐室之族也父瑯琊王與越王起兵伐天后不克而死師方襁褓乳母抱而逃後數歲天后聞瑯琊王有子購之急乳母

將至岐山界中具告本末因與流涕而訣乳母既去師莫知所之  
遇一老僧獨行呼師曰小子汝身家被滅將何所適又曰出家閒  
曠且無憂畏汝欲之乎因攜至桑陰下削髮又出袈裟令服之將  
行指東北有伽藍汝詣彼謁寺主云我使爾為其弟子言畢老僧  
已亡師如言趨寺寺主駭其所以因留之向十年遇唐室中興求  
瑯琊王後因出詣岐州李使君師從父也見之悲喜奏是瑯琊王  
子命至京引見慰問賞賜優給復以為王師不願中宗降勅令廣  
領徒衆尋山置蘭若禪師性好終南山居於興法寺又於諸谷口  
造禪菴蘭若及數處或入山數十里從者僧俗嘗數千人禪師既  
證道果常先言將來事是以人益歸之開元二十三年終道命於  
少陵原南面鑿原為室而封之所封之處遂建天寶寺弟子輩留  
而守之

紀開  
錄

普寂義福神秀弟子

按神秀姓李氏師引  
忍天下謂之北宗

並為時人所重普寂姓馮

氏蒲州人神秀奇之盡以其道授焉開元十三年勅普寂於都城  
居止二十七年終於都城興唐寺及葬傾城哭送閭里為空義福  
姓姜氏銅鞮人初止藍田化感寺處方丈之室二十餘年未嘗出  
宇外後隸京城慈恩寺神秀禪門之傑未嘗聚徒開堂至普寂始  
於都城傳教二十餘年人皆仰之

舊唐書  
方伎傳

無畏三藏天竺人初自天竺至所司引謁元宗謂曰師來欲何方休

息耶三藏進曰臣在天竺時嘗聞大唐西明寺宣律師持律第一  
願往依止元宗可之宣律禁戒堅苦焚脩精潔三藏飲酒食肉言  
行盡易往往乘醉喧競穢汚茵席宣律頗不能甘忽中夜宣律捫  
虱將投於地三藏半醉連聲呼曰律師律師撲死佛子耶宣律知  
為異人整衣作禮師事焉

開天傳  
信記

龍血禪師唐開元間自蜀之洋卓錫於祈子山西麓創寺說法醴泉湧出傳有龍化老人聽講入定後遺蛻陞塔藏之洋縣志

法秀居京師遊於咸鎬之間以勸率衆緣多成善務後不知所終志不空本北天竺婆羅門族幼隨叔父觀光東國天寶五載終夏愆陽

詔令祈雨空奏立孔雀王壇未三日雨已浹洽帝大悅一日大風卒起詔空禳止請銀瓶一枚作法加持須臾戢靜賜號曰智藏至

德初鑾駕在靈武鳳翔空常密奉表起居肅宗亦密遣使者求秘

密法洎收京反正之日事如所料代宗即位恩渥彌厚永泰中沐浴倚卧而寂茶毘火滅收舍利數百粒其頂骨不燃中有舍利一顆半隱半現勅於本院別起塔焉賈志

太白山有胡僧不知幾百歲者長數寸身不製縵帛衣以草葉恒持楞伽經雲壁迥絕人跡罕到嘗東峰有鬪虎弱者將死僧杖而解

之西湫有毒龍久而爲患僧器而貯之商山趙叟采茯苓深入太白嘗值此僧本嘉州集

南岳懷讓杜禪師金州人嘗詣曹溪參六祖忽然有悟後居般若寺間沙門道一常習坐禪師往庵前磨碾云欲作鏡一曰磨碾豈得

成鏡師曰坐禪豈得作佛一遂求教天寶三年圓寂謚大慧禪師續文獻通考

抱玉師以道行聞居長安中師而事者千數每夕獨處一室闔戶徹燭嘗有僧於門隙視之見有慶雲自口中出後年九十卒時方大

暑而其尸無萎敗唐宰相第五琦與師善及卒來治喪將以香乳灌其口已而祥光自口出晃然四照或曰佛有慶雲祥光今抱玉

師有之真佛矣宣室志

純陀大曆三年三月萬年縣鎮國寺有胡僧純陀自言六百載遺弟

子持衣鉢傳奉皇帝帝遣中書以紫衣賜之

續文獻通考

法照生於洋縣之釋子山遊南岳師長老承遠得法而歸居北山巖石下日夜精意念阿彌陀佛每念佛嘗有化佛空中顯見聲不加大聞於長安代宗遣使者以禮迎禁中賜號德宗問曰佛留下法衆生歸依何門法照答曰諸佛在心頭迷人向外求內懷無價寶不識一生休帝大悅

洋縣志

京兆興善寺惟寬祝禪師信安人白居易嘗問禪師何以說法師曰無上菩提者被於身為律說於口為法行於心為禪其致一也元

和十二年示寂謚大徹禪師

續文獻通考

神湊藍田人具戒於南嶽希操參禪於鍾陵大寂大曆八年詔配江州興果寺從僧望移隸東林寺元和十二年卒師自興果訖東林一孟齋一榻居衣麻寢管如坐七寶檀施來無虛月盡歸寺藏與

大衆共之目前無長物禮佛四十九年凡十二時未嘗闕一門人

道達等封墳建塔白居易為銘

豫章書

惟則長孫禪師京兆人居天台山佛窟巖嗣忠禪師法嘗曰聖人如影百姓如夢孰為死生元和中示寂

續文獻通考

懷暉漳州謝氏子初受業於同安正寂院宣宗詔往京兆章敬寺傳燈錄載有自性光明不與一切和合等語元和十三年示滅

福建通志

東草師長安平康坊菩提寺有僧不言姓名常負束藁坐卧于寺西廊下不肯住院經數年寺網維或勸其住房曰爾厭我耶其夕遂以束藁焚身至明唯灰燼耳無血管之臭衆方知為異人遂塑灰

為僧於佛殿上世號為東草師

酉陽雜俎

素和尚長安興善寺僧不出院轉法華經三萬七千部夜嘗有狼子聽經齋時有烏鵲就案取食

酉陽雜俎

佛陀禪師居鳳翔府法門寺常持一串數珠念三種名號一釋迦二

元和三佛陀自餘是甚麼梳躡邱乃過一珠終而復始事迹異常

人莫能測

指月錄

興元西墅有蘭若上座僧常飲酒食肉羣輩皆效焉一旦多作大餅

招羣徒入尸陀林以餅裹腐尸肉而食數啖不已衆僧掩面走上

座曰汝等能食此肉方可食肉自此緇徒精進

雲溪友議

有佛陀薩者其籍編於岐陽法門寺嘗獨行岐隴間衣黃持錫貌類

童騃好揚言於衢中或詬辱羣僧皆怒焉其資膳裘紵俱乞於

里人里人憐其愚厚與衣食以故資用獨饒於羣僧陀薩亦轉均

於里中窮餓者焉開成五年夏六月陀薩召里中民告曰我今夕

死矣汝爲我塔瘞其尸果端坐而卒於是里中之人建塔於岐陽

之西岡上漆其尸而瘞焉

宣室志

澄觀字大休俗姓夏侯氏會稽人年九歲禮本州寶林寺體真大

師爲師越一朞解通三藏十有一歲歷講涅槃淨名諸經洞悉

幽微宿齒嘆異年滿受具於曇一大師研究律藏又於常照禪

師受菩薩戒又叅無名大師融印宗說復依東京大詵和尚聽

受元旨詵深契之曰法界盡在汝矣師念五台爲文殊道場遂

委身栖托閣錫大華嚴寺者十年凡儒家經子史傳及老莊寓

言靡不兼綜博覽擬著華嚴大疏於般若院見一金像卓立空

際夢寐中若或指授覺而下筆如有神助疏就將闕忽夢爲龍

頭枕南臺尾蟠北臺須臾化作多龍奮迅分散經疏流通兆於

茲矣製隨疏演義鈔四十卷隨文手鏡一百卷又爲鄭公餘慶

韋公舉孟公簡白公居易著十七卷文皆所以發明華嚴之旨

也師生於元宗開元戊寅德宗貞元丙子賜紫已知受清涼國

師號憲宗元和與寅授僧統印至文宗開成己未春三月示寂世歷九宗師禮七帝俗壽一百二僧臘八十三形長九尺四寸垂手過膝目夜發光凡著述所流傳者總四百餘卷大經前後講五十餘遍無遮大會十有五設上足弟子海岸虛寂爲首稟受學徒殆將千衆惟東京僧睿圭峯宗密獨得真傳遺命窆於終南石室時有西域梵僧在葱嶺見二使者足不履地以呪止而詰之曰余北印土文殊堂神於東土取華嚴菩薩大牙供養及至奏啟石室驗之唯三十九齒色若冰霜闍維之際得舍利數千粒舌若紅蓮火不能變其神異多類此文宗命裴公美撰碑塔謚妙覺

元沙門印重脩  
祖塔刊石記

本朝雍正十二年十月十五日奉

清涼觀著封妙正真乘禪師仍著該地方官致祭一次

終南山惟政禪師得法於普叔結廬太乙唐文宗嗜蛤蜊海民供蔬甚勞一日御饌中有劈不張者帝以其異即焚香禱之乃開見菩薩形儀梵相具足遂貯以金粟檀合賜興善寺令僧衆瞻禮問羣臣曰斯何祥也或奏師可備顧問乃召師問其事師曰此啓陛下信心耳經云以此身得度者即現此身爲說法帝曰菩薩身已現第未聞說法師曰陛下觀此爲常耶非常耶信耶非信耶帝曰希有之事朕深信焉師曰陛下已聞說法竟帝大悅詔留師內道場師累乞歸乃詔住聖壽寺武宗甫即位師忽入終南隱居人問何故曰吾避仇矣後闍維收舍利四十九粒而建塔焉

指月錄

宗密姓何西克縣人少通儒書元和二年印心於圓和尚又受具於極律師太和二年慶成節徵入內殿問法要賜紫方袍爲大德尋請歸山會昌元年正月六日坐滅於興福塔院著圓覺金剛華嚴



涅槃諸疏抄及法義類例禮懺修證圖傳纂略又集諸宗禪言為禪藏總叙之並酌答書偈議論等凡九十餘卷裴休有圭峰禪師碑銘在盤屋縣賈志

弘辨禪師京兆大薦福寺僧唐宣宗問禪宗何有南北曰慧能神秀俱弘忍弟子慧能居南而神秀在北故曰南頓北漸非禪宗有南北號也又問諸佛書名義隨問而答賜紫方袍號圓智禪師續文獻通考

子成號妙明霸陵人少習儒術長從釋氏洞明本宗嘗註心經五日成萬二千言辭理精當尤善詩詞咸寧縣志

如觀禪師披剃於漢中精嚴寺海東和尚之大弟子也善禪定釋子皆宗之欲示寂令童子煮茗既熟次中路而師已寂童子亦執茗立化焉漢中志

了覺禪師萬年人得法於洞山价初至洞山山問近離何處曰湖南又問途中還見異人否曰若是異人不涉途中山深器之間堂僧問淨名大士入不二法門旨趣何如曰山僧未敢舉明又問若是即事理不分答曰扁舟已過洞庭湖四川總志

居誨禪師京兆人居潭州大光山初造石室長坐不卧麻衣草屨忘身為法續文獻通考

元安禪師麟遊人夾山將寂時語曰石頭一枝看看滅矣師曰不然他家自有青山在山曰苟如是即吾宗不墜續文獻通考

五

阿闍黎胡僧住鳳翔行高知前事末帝在藩屢與僧言甚重之清泰元年七月遣供奉官鄭延遂往鳳翔召之二年十月鳳翔言僧闍黎卒帝嗟惜之命翰林學士為誌銘唐府元龜

休靜禪師京兆華嚴寺僧洞山謂汝向南住有一千人向北住止三百後住福州華嚴衆滿一千未幾後唐莊宗徵入輦下大闡元風其徒果止三百叙後諡寶智禪師

續文獻通考

僧朗爲蜀王氏時梁州天旱祈禱無驗僧子朗詣州云能致雨乃具十石甃貯水僧坐其中水減於頂者凡三日雨足州將王宗儔異禮之檀越雲集後莫知所適僧令鵠他日於興州見之因問其術曰此閉氣耳習之一月就本法於湫潭中作觀與龍相繫龍爲定力所制必致驚動因而致雨然不如甃中爲之保無他害

北夢瑣言

善靜禪師京兆府永安縣僧本王氏子有僧辭洛浦浦曰四面皆山向何處去僧不對師時爲園頭代爲措語曰竹密豈妨流水過山高那阻野雲飛師甚喜後知其園頭語對衆稱曰莫輕園頭他日座下有五百人後住永安果應寂後諡靜悟禪師

續文獻通考

京兆府重雲智暉禪師得法白水事之十年還洛京愛中灘佳山水創屋以居號溫室院日以施水給藥爲事梁開平五年忽欲至圭峰山脩然深住坐巖石間如嘗寢處顧見磨衲數珠銅瓶椶笠觸之即壞斂目良久曰此吾前身道具也因就其處建寺以酌夙心方雜草有祥雲出衆峰間遂名曰重雲節度使王彥超徵時嘗從師遊欲爲沙門師熟視曰汝世緣深當爲我家垣墻彥超後果鎮永興申弟子之禮周顯德三年夏詣永興與彥超別囑以護法彥超泣曰公遂忍棄弟子乎師笑曰借千年亦一別耳七月二十四日跏趺而化

指月錄

紹巖禪師住杭州真身寶塔寺雍州劉氏子也吳越王命師開法署

了空大智常照禪師開寶四年寂

續文獻通考

法天本中天竺摩伽陀國僧來至鄜州與河中梵學僧進共譯經義始出無量尊勝二經七佛贊知州王通從潤色之法天獻於闕下

宋太祖召見賜紫衣袍

續文獻通考

倒流菩薩不知何許人嘗坐蒲團逆湮而上旋涅槃於邠州之景村

相傳宋天聖中事有塔存

續文獻通考

文通慧姓張氏脫俗白雲寺師令掌厠盥盆忽有市鮮者沃於盆文

偶擊之仆地死文懼奔華州總持寺久之爲長老忽曰三十年前

一段公案今日當了遂趺坐以待時張浚統兵至關中一卒持弓

矢至法堂瞠目視文將射之文笑曰老僧相候久矣語以故卒悟

曰冤冤相報何時了劫劫相纏豈偶然不若與師俱解釋如今立

地往西天視之已立化矣文即索筆書偈云三十三年飄蕩做了

幾番模樣誰知今日相逢却是從前夙障善畢泪然而化

續文獻通考

元

詳悟號圓通高僧也能悟禪教至元十一年於富平金粟山右石穴

遂禪定焉其徒頌之曰樂水樂山爲仁爲智今骸尚在穴中

賈志

明

順禪師長安人俗姓弓洪武初來五臺普光禪寺師無念德公嘗夜

中見自身在文殊會中聞種種偈誦後雲遊名山還至五臺永樂

初跣趺而逝

名山藏方外記

寶金姓石乾州永壽縣之名冒六歲依雲寂溫法師爲弟子既受具

入西蜀晉雲山中師事海真禪師大領道要出叅諸方憇峨眉山

採啖松柏脇不沾席者三年自是入定或累日不起嘗趺坐大樹

下溪水橫逸人意其溺死水退燕坐如平時惟衣濕耳一日聞伐

木聲通身汗下歎曰妙喜大悟十有八小悟無算豈欺我哉急往

證海真海真歎曰無用和尚有云無用應出三虎一彪一彪者豈非爾耶爾往朔方道大行也先是寶金在定中見一山甚秀麗重樓傑閣金碧絢爛諸佛五十三菩薩行道其中招寶金曰此五臺山秘魔巖也前身脩道靈骨猶存爾何忘之既寤遂遊五臺就山建靈鷲菴來學之僧多至千餘應元順帝召居宣州敬亭山寶金既有道行兼習天文太祖起兵時過宣州聞其名往訪之跌坐不起上異之問以向導果決勝如其言

名山藏方外記

文機洪武初率徒衆飛錫山陽之天竺山歲庚申卜隱淨雲寺露宿

不避風雨能馴猛虎

山陽志

無壞禪師西域人與秦愍王有宿緣卓錫黔川南普光寺夜擊木魚聲達王宮王異之遂往見師與語恍然悟前生事命席禮師師携石甌炊餅石甌煮水飲食王從者千人皆過後示寂又有一西域

僧貌絕類師來遊於此踪跡詭異或飲食無算或累日不食飲之酒數斗不醉或自遺矢取雜鉢中並食之一居士欲從之遊師指矢令食有難色師笑舍之去後所遺矢處輒生白蓮花人謂無壞

化身遊戲

隴蜀餘聞

惟安號普門郿人年十歲爲人牧羊有省遂薙髮受戒叅方至普陀元旦挑柴忽風吹前後際斷因走五臺禮空印和尚深有發明行脚至黃山道聲洋溢宮庭胥仰後北遊至秉願禪院示寂

江南通志

趙老自號山主天順間覺悟禪宗居明月山頂以藥餌濟人有疾請

者乘虎以往一方依之如思邈云其蟬蛻骨在山寺西室

富平縣志

東明禪師成化間至紫陽之五郎河見山水清奇林壑幽勝結庵居

焉面壁焚脩端坐而化今東明庵乃其所創建者也

紫陽志

卧雪老僧弘治中京口人錢寶者善醫嘗遊齊魯間遇一老僧能卧

大雪中雪爲不積問其年數百歲矣後尹蓬頭客錢氏錢偶言僧狀尹曰吾師祖也別來久尚無恙耶已而尹去老僧復至錢爲述尹語僧曰是吾孫也徐出度牒示錢則唐大中四年所給已八百年矣僧秦人不知名字

香祖筆記

老九晉人不傳姓名嘉靖初寓蘇村寺或數日不飲食體貌魁梧言辭慷慨人稱曰老九或曰以邊帥而隱居者嘉靖十年之後愛少華峰時來寓華州東關南岡下道院既數年郡人皆以爲高僧無求於世諸大夫往觀之見其雙目炯炯笑而不言年過九十猶步走如飛寓二十年不知所往

華州志

水齋嘉靖中持靜商州羅漢洞檀越請供齋師曰吾日飲水一盃不須穀食衆供水一載時有蟒漸長將出洞噬人師仗劍覓之蟒前後遁避師掛袖洞前自立洞後蟒趨見袖返洞後師迎斬之是夜

投崖飛昇遺蛻民收葬

商州志

清忠和尚壽寧寺禪僧性慧博學時引藏乘語擬議六經多有合者詩翰亦奇警縉紳先生聞而禮之三年前自言嘉靖庚戌歲當休

屆期坐化

延綏志

悟緣字萬休涇陽人剃度江南爲雪浪門人後遊京師住圓通庵神廟間奉李太后懿旨護藏西歸開講文塔寺

涇陽志

華和尚波羅堡接引寺住持日以誦禪爲事於萬曆年間坐化是日有人在靖邊遇華隻履西行甚急今於堡西南建塔俗呼新寺溝

延安府志

張騰霧商州龍駒寨人萬曆中將生父夢蓮花寺僧人來家霧生而喜靜且好善樂施年五十重脩蓮花寺工竣霧持靜於內知州龔淳慕其名便道詣主霧拜謁不復起視之已立化矣淳驚異即書

偈曰爾從何來從蓮花來爾從何去從蓮花去納懷中葬之商州志

東陽禪師萬曆中卓錫商州棗花南洞持靜二十年初大水泛漲絕

食七日毫無饑色嘗施藥濟人遠近全活者甚眾將化去凡事皆

前知商州志

淨瑄商州大雲寺僧號瑞光精聲韻工繪畫常禁步閱藏一日沐浴

著新衲登座召諸弟子誦經而化商州志

張禪僧延長太平寺僧萬曆年間人貌甚奇古好參禪樂施濟造十

方經堂及滲金佛五部經南遊普陀造香木佛歷五臺名山有積

輒施後入定窅然坐化而終延安府志

深毓字思元內秘禪宗外現講師法席所至雲集萬人嘗說楞嚴經

金剛孝行鈔孟蘭盆鈔又彌陀疏鈔所詣在蓮池交光兩尊宿之

間一時秦士大夫多與之遊賈志

善道法師採大藏中卷得觀無量壽佛經乃專心念佛篤志精研晝

夜不輟遁跡終南山修般若三昧數年見寶閣瑤池宛然在目後

入定中觀綽禪師三罪綽禪師靜思往咎洗心悔謝久之道出定

謂綽曰師罪滅矣白光照之當往生相也道行化京師歸者如市

後圓寂時有天樂異香賈志

烏思由西竺來自言常受菩薩戒於烏思藏同行三人皆類有道者

欲往清涼山尋文殊遺跡住於榆林城西誦經持咒晝夜不輟惟

日中一食而已後入五臺而寂延綏志

顛和尚長安人蹤跡詭異蜀臬某迎之成都禮拜甚恭而往往面斥

之言無忌憚嘗食犬肉帽簷插花一枝引羣丐遊行市中入昭覺

見雪丈禪師詼嘲不屑禪師頗敬憚焉一旦騎馬出城數里語麈

吏曰吾歸矣徑舍騎徒步去臬追贖不受往來秦蜀棧中所至輒

畫達摩像施人歸至長安數日遂坐化

隴蜀餘聞

懶翁仕名任義本蜀李氏子避難寓隴州後官彭州太守忽自歎曰

三生原是出家人一念差來墮縉紳破衲蒲團瓢笠杖依前還我水雲身遂棄妻子掛冠而遁混迹緇流歸隱於隴州方山結廬岩壑徜徉嘯傲似唐之懶殘而詩歌梵音絕類寒山子門人於石壁樹葉間尋得其遺跡刻拾唾錄一集傳世壽八十一一日沐浴整衣與大眾別行者道坐脫耶翁曰我不喜打坐行者道立化耶翁曰你也管我不住大眾求偈翁豎起拳頭曰會麼眾無語翁笑曰不是這箇道理老夫天堂也去得地獄也去得言訖自卧而逝白雲繞室異香三日不散

隴州志

神尼高祖以大統七年六月癸丑夜生於馮翊般若寺紫氣充庭有

尼來自河東謂皇妣曰此兒所從來甚異不可以俗間處之尼將

高祖舍於別館躬自撫養皇妣嘗抱高祖忽見頭上角出遍身鱗起皇妣大駭墜高祖於地尼自外入見曰驚我兒致令晚得天下

隋書文

帝紀 隋神尼者名智山蒲坂劉氏女少出家有戒行文帝誕日

忽至名帝為那羅延將帝躬自撫養及帝年七歲曰佛法將滅神明已西兒當大貴神來有日後周滅二教尼隱皇家戒行不改帝踐祚重興佛法每以神尼為言歿後即葬寺中為起金浮屠又改所居般若寺為大興國寺

山西通志

呂尼正統親征也先陝西呂尼迎駕諫曰不利上怒叱武士交捶之尼跌坐以逝及蒙塵數數見尼媿媿有所說時時授上餅餌駕返居南宮又數數見尼媿媿有所說復辟後詔封皇姑建寺賜額曰

順天保明寺後殿祀姑肉身跌坐愁容一媪也萬曆初年頂猶熱歲輔通志

苗氏榆林衛百戶王受璽妻家貧夫亡不嫁舍旁有地可築圃種菜自給晨起灌園輒喃喃誦佛經不置口後跌坐而逝未逝前數日圃中卉草皆開小花青色如芙蓉一夕而落香氣經旬不散氏無子兄子苗可進好義人也恒負薪水助之以功授戎車營守備闖亂隱商山不知所終延綏鎮志

寂憇不知何許人卓錫膚施縣靜因庵四時不著履終日禮禪願治十七年端坐入定火從口出而逝

楊禪字慈容膚施縣萬壽寺僧好參禪持五戒甚嚴一日謂徒曰吾今日當去去後火之須臾跌坐而逝其徒舉火火光中結紅蓮數十朵佛像數十尊火熄乃止

祖來字皈宗膚施縣人其母臨產時憂元奘排闥直入遂生祖來形貌奇古七歲披剃清涼山之延壽洞誦大藏孔雀諸經咒悉能記憶嗣歷遊五臺諸名山歸足不履城市者三十載年八十跌坐而逝

賀佛延長千谷驛人幼嬉戲遇佛輒作禮人異之及長父母與婚即道走晉中為僧與人不晉接晝夜立如山止或詰之不語康熙十三年自晉歸即屏居清澗山中一目端坐而化七日不仆鄉人祀之

性耀字洞然榆林人薊鎮總兵官吳國俊弟少小厭薄紛華及長欲為之娶不顧即剪落為僧住十方院諦誦經論流賊之亂杖錫南去開戒於嵩山龍潭寺河南尊事之稱龍潭和尚於康熙



六年化去

寂蓮漢陰人鉢無宿糧糧盡則啖黃精以飽居蓮花寺寺在萬山中屏絕塵境性好遊勿問晝夜興至輒往雖巉巖峭壁跣足飛步因號赤脚禪師一日與寺衆僧約某月日將化去屆期遂積柴坐焚頂上現五色光空中聞鼓樂聲云

寂宗鎮安龍興寺僧有戒行康熙九年忽一日晨起呼其徒曰今日有客至吾當迎之隨整衣帽端坐而逝

許靈康熙十一年至鎮安紅山洞蓋竹庵終日靜坐時有巨蛇蜿蜒坐下聽僧持誦歷三年跌坐而化

超古號蜀叟本蜀人順治十八年投栖山陽天柱山能消毒蛇驅猛虎鑿石藏經詠詩說偈確有見道處

王嗣運朝邑人嗜浮屠學順治初年已八旬一日坐街頭假寐農夫李百能過而見之至田又見其芸驚問之答曰我固在田也百能仍視街頭寐如故由是人大異之有感屬病祟求為驅伏運曰我安能學方士伏邪耶懇之力始往將入門呼佛者三聞有聲吼曰吾無生矣怪遂滅順治十六年壽九十一無疾而終康熙十年里人李成林遷流閩中不得歸忽遇嗣運於市慰之曰行矣不久將歸成林潸然不復知嗣運死既久方疑之壬子邑紳張好奇典試入閩攜成林歸其言果驗

景理鶴本慶陽人順治末至朝邑居阿石村之大廟終日靜坐數十年如一日卒之日晨起呼弟子曰今日之酉吾去矣汝輩喪葬依常禮勿為鬼怪壞我末路至時沐浴更衣端坐而逝

松山祝髮朝邑沙橋寺戒律精嚴河濱李楷為構精舍朝夕焚脩李將南遊送之沙橋并携所購梵典五千卷藏之寺後即危坐

涅槃縑衆環繞合掌而逝

通賀韓城人少嗜浮屠學剃度後即師事鑿如聽講楞嚴法華諸

經三年盡得其義聞

世祖設龍華會於五臺首往受于佛戒至京止憫忠寺會

文皇后違和選名僧諷經通賀與焉

后既愈

賜紫衣一襲時名僧報恩卓錫江南遂南遊問道瞑目趺坐者七日

豁然頓悟西歸閉關藍田之寶泉寺歲旱禱雨輒應甲戌臘月

整衣沐浴說偈而逝

**山苦**

偓佺槐里采藥人也食松實形體生毛數寸許能飛行捷步後不知

所終典平志偓佺以松子遺堯堯不暇服也松者簡松也時人受服

者皆至二三百歲列仙傳

馮夷華陰潼鄉人得仙道化為河伯傳物志稟華之精食惟八石乘龍

隱淪往來海客若是水仙號曰河伯郭弘農馮夷贊

**三代**

真行子禹時出降於商山授禹九疇書及靈寶五符治水真文續文獻通

考

蘇林嘗師華山仙人仇先生仇先生者湯時木正也服胎食之法於

還神守魄之事大得其益周季通元洲上御傳

青鳥公彭祖弟子入華陰山中學道積四百七十一歲服金液而昇

天列仙全傳

李八百蜀人居筠陽五龍岡歷夏商周年八百歲又動則行八百里

里人因號為李八百修煉於華陰山石室丹成還蜀續文獻通考

杜冲字元逸鎬京人棲元學道德穆王爲脩觀建祠置冲爲道士冲閒居幽室吟咏道德經二十餘年感真人展先生降於寢所授九華丹方一函又感真人李君授以大上素靈洞元大有妙經遂乃洞觀衆妙通冥達幽莫測其涯

太極真人傳

馮長驪山人周宣王時爲柱下史觀天文之變乃退隱攝生遇鄧真

人授以靈書功行垂成復遇彭真人授以太上隱書遂得仙平王

三十年化去

列仙

乞食公者西岳真人馮延壽周宣王時史官也

楚莊王時市長宋永子常洒掃一市時有乞食公入市經日乞而

歌曰天廷發雙華山源障陰邪清晨安天馬來詣大真家人無

那隱又以減百魔一市無解者獨來子忽悟疑是仙人乃棄官追

逐積十三年授以中山之道

列仙傳。按馮延壽即馮長

弄玉秦穆公女善吹簫與簫史共登樓吹簫作鳳凰音鳳從天而降

後升天去

帝王世紀

蕭史周宣王時人遊終南山遇異人授長生術教

以吹簫歸告父母願入道父母聽之宣王史籍散亂蕭能文著本

末以備史之不及人以史目之實無名秦穆公有女名弄玉善吹

笙無和者孟明薦史因召見女呼試之一吹而清風生再吹而彩

雲迎三吹而鳳凰來女亦三吹如史所感願嫁之於是合宴西殿

笙簫間奏曲未終鳳凰忽下二仙乘之而去

藍屋縣志

老子楚苦縣人姓李氏名耳字伯陽諡曰聃周守藏室之史也其學

以自隱無名爲務居周久之見周之衰乃遂去至關關令尹喜曰

子將隱矣強爲我著書於是老子乃著書上下篇言道德之意五

千餘言而去

史記本傳

老子將去而西出關關令尹喜占風氣逆知當

有神人來過乃掃道四十里見老子而知是也老子在中國都未

有所授知喜命應得道乃停關中具以長生之事授喜喜又請教

誠老子語之五千言喜退而書之名曰道德經行其道亦得仙神

傳。按棲觀仙傳載老子度關事應  
在周昭王時今按史記叙於春秋之末

關令尹喜善內學隱德脩行時人莫知老子西遊喜先見其氣知有神人當過物色而遮之果得老子老子亦知其奇為著書授之尹

喜亦自著書九篇號曰關尹子列仙傳尹喜天水人少好學善天文

秘緯仰觀俯察莫不洞徹涉覽山水於菴屋聞仙里結草為樓以望氣後老子入關迎至樓觀授道德五千言告以通神變化之道

號文始先生盤陘縣志

紫衣真人不傳姓氏結廬西鄉天山山喜服紫衣後仙去漢中志

茅濛字初成咸陽人即東鄉司命君盈之高祖也濛觀周室將衰不

求進於諸侯常歎人生若電流出處宜及其時於是師北郭鬼谷

先生授長生之術後入華山脩道合藥乘龍駕雲白日昇天先是

其邑歌謠曰神仙得者茅初成駕龍上昇入太清時下元洲至赤

城繼世而往在我盈帝若學之臘嘉平秦始皇聞之因改臘為嘉

平洞仙傳盈字叔申年十八棄家入恒山積六十年思念至道寢與

妙論彷彿見太元玉女把玉札携至西城見王君從王君見王母

王母告以玉珮金璫之道太極元真之經又有陰陽二景符與太

上法遂歸句曲邦人因改句曲為茅君山時二弟固襄在官聞盈

元跡渺邁於是棄官還家渡江求兄盈並授以上道至漢平帝二

年帝命盈為司命東卿治赤城玉洞之府二弟留治此山爾乃風

雨以時五禾成熟疾癘不起暴害不行司命真君傳

馬成子扶風人周秦間慨然有脩道志棄家入伯陽川遇一童子授

以胎元煉氣法乃入蜀鵠鳴山隱居洞中忽一人杖策至曰此山

鵠鳴子當登仙矣乃授以神丹曰氣為內丹藥為外丹子受仙童內丹今復受吾外丹不當為高真乎言訖乘氣去成子服之遂白日昇天

續文獻通考

伯山甫雍州人入華山中精思服食時時歸鄉里省親二百年不老至人家數人先世以來善惡功過有如目見又知方來吉凶言無不效

神仙傳

裴元仁夏陽人年十餘歲精思讀經嘗詣佛圖道人支子元見而謂曰吾善相人子目中珠子真似北斗瑤光星自背以下象如河魁既有貴爵又當神仙因以仙人蔣先生神訣五首授之元仁再拜還歸精思行之積十一年夜視有光年二十三州辟主簿後遷冀州刺史有仙人乘白鹿從天下庭中曰我南嶽真人赤松子也聞

子好道故來相過勤存五靈別當授子真道元仁遂棄官委家登太華山入西洞元石室中積二十二年見五老人各賜神芝經卷元仁服芝讀經十旬之間視見萬里之外能日步千里乃遊行天下東到青邱遇谷希子青帝君還太山遇司命君西到流沙遇太素真人在空山之上遂留空山積十一年太素真人曰子道成矣因詣太素宮受書為清靈真人

鄧雲子清靈真人傳

脩羊公魏人居華陰山石室有懸石榻卧其上石盡穿陷畧不動時取黃精食之後以道干景帝帝禮之使止邸中數歲道不可得有詔問公何日發語未訖化為白石羊題其脇曰脩羊公謝天子後置石羊於通靈臺上復去不知所在

列仙傳

脩羊公石榻在嶽之西

北仙谷中石室

雜勝畧

劉憑沛人有軍功封壽光金鄉侯學道於稷邱子年三百餘歲有少

谷嘗到長安有百餘人隨憑行於山中逢賊數百人拔刃張弓四  
 合圍之須臾大風折木飛沙揚塵賊衆皆頓地反手背上張口短  
 氣欲死憑責之皆叩頭乞命奔走去武帝聞之詔徵而試之云殿  
 下有怪可治否憑曰此易耳至夜帝偽使人作之憑於殿上以符  
 擲之皆面捨地以火焯口無氣帝大驚曰此非怪也朕以相試耳  
 乃解之後入太白山中數十年復歸鄉里顏色更少神仙傳

巫炎字子都北海人武帝出見子都於渭橋頭上鬱鬱紫氣高丈餘  
 帝詔東方朔使相此君有何道術朔曰此君有陰道之術武帝屏  
 左右問之遂授其法於帝帝頗行其法不能盡用之然得壽最長  
 於先帝也神仙傳

孟歧清河之逸人也年可七百歲語及周初事了然如目前岐侍周  
 公昇壇上岐以手摩成王足周公以王笏與之岐嘗實執每以衣  
 袂拂拭笏厚七分今鏡斷恒切桂葉食之聞帝好仙披草來謁洞冥記

車子侯扶風人漢武帝愛其清淨積遷其位至侍中一朝語家云我  
 今補仙官此春應去至夏當暫還還少時復去如其言武帝思之  
 乃作歌曰嘉幽蘭兮延秀華妖媯兮中唐華斐斐兮麗景風徘徊  
 兮流芳皇天兮無慧至逝兮仙鄉天路遠兮無期不覺涕下兮露

裳洞冥傳

李充馮翊人自言三百歲荷草畚負五嶽真圖而至帝禮待之亦號  
 負圖先生焉洞冥記

衛叔卿者中山人也服雲母得仙漢武帝閒居忽有一人乘雲車駕  
 白鹿從天而下來集殿前帝驚問為誰答曰吾中山衛叔卿也帝  
 曰子朕臣也可前共語叔卿默然不應忽焉不知所在帝悔悵遣

使者梁伯至中山推求叔卿得其子名度世即將還見帝曰臣父委家而去已四十餘年云當入太華山帝即遣使者與度世共求其父到山下輒火不能上積數十日度世齋戒獨上於絕巖之下望見其父與數人博戲於石上紫雲鬱鬱度世望而再拜言故叔卿曰帝不識道而反欲臣我不足告語終不復往汝歸當取吾齋室西北隅大柱下玉函中神素書按方合藥道成來就吾於此勿爲漢臣亦不復語帝也度世於是辭去後掘得玉函封以飛仙之香乃五色雲母遂合藥服之仙去神仙傳

王仲都漢人學道於梁山遇太白真人授以虹丹能禦寒暑漢元帝召至京師試其方術嘗以嚴冬之月從帝遊令仲都單衣乘馱馬車於上林昆明池環水馳走帝御狐裘猶覺寒仲都貌無變色背上氣蒸又當盛夏曝之日中圍以十爐火口不稱熱身不流汗後

仙去桓君山著新論稱其人

神仙傳

赤須子豐人豐中傳世見之云秦穆公主魚吏也數言豐界災害水旱十不失一劉向從受業好食松實天門冬石脂齒落更生髮白還黑後往吳山下十餘年莫知所之列仙傳

谷春櫟陽人成帝時病死而尸不寒後忽出櫟南門及光門上而入太白山民爲立祠於山嶺春秋來祠中山宿焉水經注

劉根字君安長安人少明五經以成帝綏和二年舉孝廉除郎中後棄世學道入嵩高山石室崢嶸峻絕直下五千餘丈冬夏不衣身毛長一二尺顏色如十四五歲人每與坐或時忽變著高冠元衣人不覺之王莽時衛府君使府掾王珍問起居數得見每見根書符了有所呼召似人來取或聞推問有人答對及鞭撻聲悉莫測其端也根後入雞頭山仙去神仙傳按後漢書方術傳劉根係潁川人葛稚川作神仙傳又云京兆

人雅川博洽有據故錄之云

唐公昉王莽居攝二年爲郡吏遇真人賜以神藥時去家百餘里轉影即至鄉人驚白府君府君遣吏收昉妻子昉告其師師以藥飲其妻子塗其屋柱須臾大風雲霧拔宅仙去

城固縣志

李八百知漢中

唐公昉有志欲教授之乃先往試爲傭公昉愛異之八百乃病困欲死公昉爲迎醫合藥費數十萬錢又轉作惡瘡徧體臭惡不可近公昉爲之流涕八百曰吾瘡得三十斛美酒浴身當愈公昉卽爲具酒著大器中八百起入浴瘡卽愈體無餘痕乃告曰吾仙人也子有志故此相試今當授子度世之訣乃使公昉夫妻并三婢以其浴酒自浴卽皆更少以丹經一卷授公昉公昉入雲臺山中作藥藥成服之仙去

神仙傳

戴孟本姓燕名濟字仲微漢明帝時人入華山受裴君玉珮金瑞經

及受石精金光符復有太微黃書能周遊名山

神仙傳

矯慎字仲彥茂陵人少學黃老隱遯山谷因穴爲室仰慕松喬導引之術年七十餘不要忽歸家自言死日及期果卒後人有見慎於燉煌者或云神仙焉

後漢書逸民傳

馬明生臨淄人姓和字君實少爲賊傷殆死忽遇一女子云太真夫人也與藥一丸服訖卽愈乃自號馬明生後得安期生丹經神方入華陰山脩煉漢靈帝時太傅胡廣試以國事皆驗

續文獻通考

靈壽光扶風人年七十餘得朱英丸方合而服之頗得其妙轉更少壯年如二十時漢獻帝建安元年光已二百二十歲常寓江陵胡田家無疾而卒田殯埋之百餘日人復見在小黃寄書與田田得書發棺無所有惟履在

神仙傳

呼子先漢中關下卜師老壽百餘歲臨去呼酒家老嫗曰急裝當與



姬共應中陵王夜有仙人持二茅狗來至呼子先子先持一與酒家姬得而騎之乃龍也上華陰山列仙傳

李仲甫豐邑人少學道於王君服水丹有效兼行遁甲能隱形年百

餘歲轉少初隱百日一年復見形後遂長隱但聞其聲與人對語

飲食如常仲甫有相識人相去五百餘里常以張羅自業一日張

羅得一鳥視之乃仲甫也語畢別去是日仲甫已復至家在民間

三百餘年後入西嶽山不復還神仙傳

魯女生長樂人初餌胡麻及朮絕穀八十餘年道成一旦與知友故

人別云入華山去後五十年先相識者逢女生華山廟前并令謝

其鄉里故人神仙傳

赤谷巴戎人爲碧雞祠主簿能作水頰煉丹與硝石服之三十年反

如童子毛髮生皆赤後數十年上華山取馮餘糧餌賣之累世傳

見之手掌中有赤斧焉列仙傳

南陽文氏其先祖漢中人值亂逃華山中饑困欲死有二人教之食

朮遂不饑數十年乃來還鄉里顏色更少氣力轉勝抱朴子內篇

青谷先生不知何許人常脩行九息服氣之道後合爐火大丹服之

得道入華山洞仙傳

平常生不知何所人數死復生爲華陰門卒列仙傳

陳安世京兆人爲權叔本家傭賃叔本好道有二仙人託爲書生從

叔本遊叔本不覺其仙人也久而意怠叔本在內方食二仙來詣

門問安世叔本在否答曰在入白叔本其婦使安世出答言不在

二人曰前云在旋言不在何也答曰大家教我云耳二人善其識

實乃問安世汝好道乎汝審好道明日早會道北大樹下安世承

言早往期處三期之而安世報早至知可教乃以藥二丸與安世

誠之曰汝歸勿復飲食別止於一處安世承誠叔本見安世不復食但飲水止息別位疑非常人乃執弟子禮朝夕拜事安世教之叔本後亦仙去神仙傳

劉道偉少入蟠冢山學道積十二年遇仙人試之將二大石約重萬斤以一白髮懸之使道偉卧其下顏色無異心安體悅又十二年遂賜以神丹服之昇天洞仙傳

郎宗字仲紱安邱人後居華山服胡麻得道續文獻通考

翟法言雲陽人詣蜀棲霞宮採藥得道能召灘神楊雲外與翟法言相繼得道於棲霞宮亦雲陽人四川總誌

王順採藥於終南山今終南有王順祠歲旱禱雨輒應神仙通鑑

吳睦長安人少爲縣吏人多訟之睦遜入山林饑乏累日行至石室遇異人命學種黍及胡麻備驅使經四年遂授其道長安志

陰生長安中渭橋下乞兒常止於市中乞市人厭苦以糞洒之旋復在里中衣不見汚如故長吏知之械收繫著桎梏而續市中乞又械欲殺之乃去洒者之家室自壞殺十餘人故長安中謠曰見乞兒與美酒以免破屋之咎搜神記

鍾離簡咸陽人爲郎中與弟權俱入華山得道白日昇天列仙全傳權號

谷和子一號真陽子又號雲房先生歷仕漢及魏晉首遇上仙王

元甫再遇華陽真人授秘訣遂棄世事於縣東四十里真陽洞脩煉登仙續文獻通考

吳丹鄴邑人十一歲母死居墓側五年哭聲振林木間後遇異人傳

煉服術曹操召拜左奉駕郎不就遊終南山得篆文十六曰孝哉

吳丹卓行異人以番而鳳致道之所乃遊番至餘干吳鳳岡遂結

茅居之西江舊志

王暉魏時人居華嶽熊羆常種黃精蒼朮後以道術傳王法冲尸解而去嘗著秘訣人莫能曉賈志

薊子訓有異術魏正始中有人於長安東霸城見與一老公共摩挲銅人相謂曰適見鑄此已近五百年矣見者呼曰薊先生少住並應之視若遲徐而走馬不及水怒注

杜契字廣平京兆人建安初渡江依孫策後孫權用爲立信校尉黃武二年學道師介琰受黃白術久能隱形遁迹後居茅山之東時與弟子採伐貨易山場市里人不能知後入洞中得仙洞仙傳

路光漢順帝時人歷三國堅心慕道晉武帝太康五年往華山仙掌

峰脩煉夢老君賜玉鑰匙書符行功治病驅邪後昇天去賈志

梁謚扶風人初事鄭法師於樓觀晉惠帝永興二年老君命真人尹軌降於樓觀授以煉氣隱形之法及水石還丹術謚乃隱於終南山丹成能飛行變化一日謂門人曰有友召我於南峰今往矣輒冠服而出雲氣繚繞不見其形惟鼓吹之音隱隱從空去列仙全傳

王嘉字子年隴西人清虛服氣不與世交石季龍之末至長安隱於終南山符堅累徵不起公侯已下咸躬往參詣隨問而答辭如識記事過皆驗堅南征遣使者問之嘉曰金剛火強使者還告堅不悟復遣問世祚云何曰未央明年癸未敗於淮南所謂末年有殃也姚萇入長安禮嘉如符堅故事萇與符登相持問嘉曰吾得殺符登定天下否嘉曰畧得之萇怒曰得當云得何畧之有遂斬之先此釋道安謂嘉曰世故方殷可以行矣答曰卿其先行吾負債

未果至是戮死所謂負債者也及甚死其子與字子畧方殺登畧得之謂也嘉死日人見之隴上晉書本傳王嘉隱於東陽谷鑿崖穴而

居弟子傳業者數百人亦皆穴處石季龍兵亂棄其徒眾至於長安潛隱終南山結菴廬而止門人聞而復隨之乃遷於倒獸山十六

國春秋○按倒獸山一名元峯山在渭南縣東南三十七里

孟筮洛陽人有左慈劉根之術持堅召詣長安惡其惑眾命符融誅之俄欽至融留之遂大譙羣僚酒酣目左右收欽欽化為旋風飛

出第外頃之有告在城東者融遣騎追之垂及忽然已遠或有兵眾距戰或澗溪騎不得過遂莫知其所在晉書本傳

馬儉扶風人博通經史持秦甘露中從孫微學道授五符真文斷穀服水行氣導引遂役使萬靈制御羣邪姚萇聞而異之往召不至給以香燭年九十八馮志

劉少翁曾數入太華山禮拜向山如此二十年忽一旦得見西嶽丈

人授其仙道續博物志

南北朝

麻衣子姓李名和紺髮美姿入終南山過道者遺以道劉宋大明初

百有一歲坐逝續文獻通考

寇謙之字輔正早好仙道有仙人成公興謂謙之曰先生有意學道

豈能與興隱遁謙之從之興乃令謙之潔齋三日共入華山令謙

之居一石室自出採藥還與謙之食藥不復饑魏書釋老志

李順興杜陵人年十餘乍愚乍智言未來事時有中者家常為齋方

食器用不周順興言昆明池有大荷葉可取盛餅食所居去池十

數里日不移影順興負荷葉而歸舉坐驚異後稍出城市嘗冠道

士冠號李練好飲酒但不至醉得人所施輒散乞貧人蕭寶夤反

召問曰朕王可幾年對曰天子有百年者百日者及寶貨敗裁百日也有侯終德者寶貨之黨順興稱其必敗終德棒殺順興置城隍中頃之起活如初俄至太傅梁覽家庭中卧以布衫倒覆身上後覽被誅以衣倒覆果如順興之形周文至溫泉順興乞溫泉東驪山下二畝地未幾至温湯卒於其地初大統十三年順興謂周文曰可於沙苑北作一老君象面北作笑狀周文曰何為曰今笑破蠕蠕時未解及蠕蠕滅周文憶其語遂作順興象於老君側

本傳

強練不知何許人先是李順興語默不恒好言未然事當時號李練世人以強類之故亦呼為練焉恒寄住諸佛寺兼歷造王公邸第所至人敬信之晉公護未誅前練手持一瓢到護門外抵破曰瓢破子苦時柱國平高公侯伏龍恩深被任委練至龍恩宅呼其妻

元氏及妾媵婢僕等並令連席而坐諸人苦辭不肯練曰一側人耳何有貴賤遂逼就坐未幾護誅諸子皆死龍恩亦伏法仍籍沒其家建德中每夜上街衢樹邊大哭釋迦牟尼佛或至申旦如此者累月聲甚哀苦俄而廢佛道二教大象末又以一無底囊歷長安市肆告乞市人爭以米麥遺之練張囊受之隨漏於地或問之練曰但欲使諸人見盛空耳至隋開皇初果移都龍首山城遂空廢後莫知其所終

北史本傳

韋節杜陵人後魏時棄官謁趙法師入華山因號華陽子餌黃精撰三洞議序老子易論周武帝賜號精思法師有白鶴臨壇天和四年忽彩雲如蓋覆其廬上節曰吾當乘此而去遂化昇

續文獻通考

焦道廣周武帝時道士獨居雲臺峰辟粒餐霞常有青鳥報未然之事周武帝親詣山庭臨軒問道因於谷口置雲臺觀道廣欲構

房廊精思所感石上湧出神土用盡復生

雍勝畧

王延字子元扶風人師焦真人授三洞秘訣周武帝召至都久之請還山嘗苦乏油乃置一器經夕自滿文帝禪位置仙都觀詔延主之謂門人曰吾欲歸西嶽乃委化於觀中帝遣使護葬西嶽及就塋但空棺而已

賈志

王褒字子登范陽人開皇中辭

乞求道乃入華陰山精思一十八年

感太極真人西梁子下降極飢飯方并服雲牙法復五年太極真人王總正復降以上清經三十一卷付子登并將子登遊五嶽觀名山備受上法

上清經述

華陰雲臺觀劉法師於貞觀中鍊氣絕粒迨二十年每三元設齋則

見一人衣縑掖面鰲瘦來居末坐齋畢而去如此者十餘年衣服顏色不改法師異而問之對曰余姓張名公弼住蓮花峰東隅法師請同往公弼怡然從之遂隨行至一石壁下一徑濶數寸法師與公弼側足而立公弼以指扣石壁中遂劃然開一門門中有人曰何故引外人來公弼曰此靈臺劉法師也與余久故可豐食遣之其人遂取一盃水以肘後青囊中刀圭粉和之以飲法師飲畢而饑渴之想頓除公弼曰余昨云中甚樂盍爲戲令法師觀之其人以水喫東谷中俄有蒼龍白象各一對舞舞甚妙威鳳彩鸞各一對歌歌甚清頃之公弼送法師理法師至觀處置事畢却尋公弼則步步險阻杳不可階法師痛恨遂成腰疾公弼更不復至

矣

續元怪錄

羅通微臨晉人少時採薪山中遇闔使君寀謂曰子骨相可學長生

遂冠褐五老山學步虛絕粒貞觀中忽一日謂人曰我當歸明日大會士度俄雷震地下青龍躍出遂跨龍飛去

列仙全傳

匡智長安人貞觀間棄妻子與姪大郎往廬山修煉居七日有老人

曰此山陰地仙不可得南有名山陽地可往居之乃至吉州望見

義山忽有樵夫引二人登山曰此山安穩勉力精脩遂於送龍洞

尾立二壇朝夕禮斗既數年中元節上昇而去大郎更立第三壇

亦朝夕禮斗次年七月七日尸解事聞勅鄉人祀焉

胡濬菴碑記

杜懷謙貞觀中道士居雲臺山側之長春石室斷穀不食好吹長笛

令人多買笛一吹即投於巖下笛盡更棲息巖中累月不動自號

長春先生

賈志

薛尊師者家世榮顯則天末為陽翟令精心歸道棄官入山邑小胥唐臣願從之杖策負囊往嵩山口忽遇一人自云姓陳云知近有

仙境當入山求之知所詣即來相報期以五日既而過期十日不

至薛遂緣磴入谷行數日俄覩一禪室中有老僧於僧床下見藤

蔓緣壁出戶僧指蔓視薛遂視蔓出戶其蔓旁巖壁不絕經兩日

猶未盡忽至石室中有道士數人其陳山人亦在笑謂薛曰子之

志可教也遂指授道要問其所云終南山紫閣峰下去長安城七

十里尊師道成後入京居於昊天觀元風益振開元末時已百餘

歲忽告門人曰天帝召我為八威觀主無病坐亡顏色不變遂於

本院中造塔弟子唐臣後亦為國師焉

原化記

韋善俊京兆人生十三歲遇道士韓元最授以秘要嘗過壇墟店遇

黑犬旋繞不去因畜之呼為烏龍一日謂弟子曰太上召我我去

矣其犬忽長數丈化為龍乘之而去

列仙全傳

李筌號達觀子居少室山好神仙之道嘗至嵩山虎口巖得黃帝陰

符經其本糜爛筌抄讀數千遍不曉其義因入秦至驪山下逢一老母敝衣扶杖神狀甚異路旁見遺火燒樹因自言曰火生於木禍發必尅筌驚問之母曰吾受此符已三元六周甲子矣少年從何得之筌再拜具告所得母曰少年額骨貫於生門命輪齊於日角血脉未減心影不偏性賢而好法神勇而樂智正吾弟子也於是坐於石上與筌說陰符之義久之母曰日已晡矣吾有麥飯相與爲食袖中出一鉢令筌谷中取水及還已失母但留麥飯數升於石上筌後入名山訪道不知所終

神仙感遇傳

成真人開元末有中使自嶺外迴謁金天廟奠祝畢戲問巫曰大王在否曰不在關外三十里迎成真人耳中使遽令人候之有一道士弊衣負囊自關外來問之姓成以驛騎載之到京密奏焉元宗召入館於蓬萊院詔問道術及所脩之事皆不能對半歲餘懇求歸山自內殿挈布囊徐行而去所司掃灑其居改張幃幕見壁上題曰蜀路南行燕師北至本擬白日昇天且看黑龍飲渭以事上聞上默然良久頗追思之其後祿山起燕聖駕幸蜀皆如其識

拾遺

仙傳

申宗開元中進士張佐嘗南次鄆杜郊行見有老父乘青驢背鹿革囊自斜迤合路佐試問所從來叟笑而不答至再三叟曰吾壽永者耳遂促走佐亦僕馬趨之至逆旅佐貰白酒將飲試就請叟曰此正所好何子解吾意耶飲訖佐徐請願先生賜言叟曰吾字文周時扶風人也姓申名宗慕齊神武因改宗爲歡從燕公于謹征梁元帝於江陵軍旋夢青衣二人謂余曰呂走天年人向主壽不千吾乃詣占夢者於江陵市占夢者曰呂走廻字人向主佳字也豈子佳乃壽也時留兵屯江陵遂陳情於校尉拓跋烈許之自是



周行天下迨茲二百餘歲所見異事甚多並記在鹿革中因啟囊出二軸書佐不能讀其夕佐畧寢及覺已失叟後數日有人於炭谷湫見之叟曰爲我致意張君佐遽尋之不復見

元怪錄

李元明皇時華山採藥以食性復好酒山下人多以酒與之忽一日騎白鹿舉手謂山下人曰我今去遊天臺三老人遮道留之元與藥三丸服之皆一百五十歲

賈志

傳仙宗長安人性沉默好道有神人告以脩真地遂乘青驪赴平岡隱焉開元間詔赴闕上問卿何道致此對曰守以恬淡行以簡易又問金丹曰惠及民物即長生也久之還山乾道二年沐浴登榻而逝邑人王念還自成都見其乘青驪於簡州道上

四川總志

田真人碑沒其名富平人修煉美原田村曉服食變化術里人碑其處曰田真人拔宅處

賈志

契虛本姑臧李氏子自孩提好佛氏法律年二十七髡髮衣褐居長安佛寺中及祿山破潼關元宗幸蜀契虛遁入太白山採柏葉食之自是絕粒一日有道士喬君來詣謂契虛曰師神骨孤秀當遊遊仙都請備食於商山逆旅中遇柝子餽焉或有問所詣者第言願遊稚川柝子當導師去契虛即往商山舍逆旅中備甘旨以俟柝子僅數月遇柝子百餘俱食畢而去一柝子年甚少謂契虛曰吾師安所詣乎契虛曰願遊稚川柝子曰稚川甚近師能偕我去乎於是俱至藍田其夕即登玉山陟危險逾岩巘至一洞二人俱入洞中昏晦不可辨見一門在數十步外遂望門去既出洞外風日恬煦山水清麗見一高山道徑危峻契虛眩惑不敢登柝子曰仙都且近何爲徬徨即挈手去既至山頂見有城邑宮闕柝子指語此稚川也已而至一殿上有具簪笏者憑玉几而坐侍衛環列

呵禁甚嚴。絳子命契虛謁拜曰：此稚川真君也。真君召契虛訊曰：爾嘗絕三彭之讎乎？契虛不能對。真君曰：慎勿久留於此。絳子引契虛歸，因廬於太白山絕粒，吸氣貞元中徙居華山下，竟不知所

在宣室志

韋集代宗因晝寢夢一人謂曰：西嶽太華山中有黃帝壇，即日詔遣監察御史韋君馳驛詣山尋訪。至山下店中，韋君聞房中嗽聲，問何人遣視之？乃有一老父，韋君訪老父何姓，答曰：姓韋。韋君邀與同席，老父因訪韋父官諱，又訪高祖為誰，韋君曰：高祖奉道不仕，隋朝入此山中，不知所在。老父喟然歎曰：吾即爾高祖也。吾名集，有二子，爾即吾小子曾孫也。韋君涕泣再拜，老父問韋君今何之，韋君曰：奉勅於此山求黃帝壇，不審翁能知此處否？老父曰：蓮花中峰西南上有一古壇，髣髴餘址，此當是也。但不定耳。遂與韋君

同宿，明日入山，至山足，隨老父行里許，到室，見三姬，老父曰：此爾祖母及二祖姑也，相見甚喜，謂曰：年代遷變，一朝遂見元孫，欣慰久之。遂與老父上山，直至中峰西南隅，果有一壇，韋君洒掃拜謁，立標記而迴，却到老父石室，辭出，遂下山，具以事奏代宗，歎異遣韋君齋手詔入山求覓，遂失舊路，訪山下故老，皆云不知韋君望山慟哭而返。代宗悵恨，具以事跡宣付史館。異聞錄。按逸史載唐德宗建中初有楚

州司馬楊集至華陰遇越公弟其事與此相同，恐一事而傳聞異詞，故不復載。

許棲巖岐陽人，舉進士，習業於昊天觀。時韋舉鎮蜀，巖將為入蜀之計，欲市一馬，自入西京訪之，有蕃人牽一馬，瘦削而價不高，因市歸，泊登蜀棧，棲巖與馬俱墜崖下，積葉承之，幸無所損，尋其崖下見一洞穴，行而乘之，約十餘里，忽及平川，花木秀異，池沼澄徹，有一道士卧於石上，二玉女侍之，巖問云：是太乙真君巖，即以行止

白君曰爾好道乎曰讀莊老黃庭而已命坐酌小盃以飲之曰此石髓也嵇康不能得爾得之矣居半月思家求還太乙以所乘馬送之謂曰此馬吾洞中龍也子有仙骨故得值之到人間放之渭曲勿復留之既別遂巡已達號縣問鄉人年代已六十年出洞時二玉女託買號縣田婆針乃市之繫馬鞍上放之化龍而去棲巖幼在鄉里已見田婆至此惟田婆容狀如舊亦仙人也棲巖大中末年復入太白山去

奇傳

陳休復者號陳七子貞元中來居褒城多變化之術褒人好事少年常求學其術勤勤不已休復與出郊外坐大樹下語道未竟忽然暴卒須臾臭敗眾皆驚走莫敢迴視自此不敢干之嘗狂醉市中褒帥李讜怒而繫於獄忽不食而死尋還家復在市中讜時加禮焉為築室於褒城江之南岸遺與甚多畧無受者河東柳仲郢相國周墀燕國公高駉擁旄三川皆添加禮敬書幣相屬蜀相燕公使人致書至褒城延休復使人經旬方達休復當日已至成都又有一休復與使者偕行未嘗相捨燕公詰於使者益奇待之中和三年大駕還京休復亦至闕下田晉公軍容問至京國幾年安寧曰二十果自問後二十日再幸陳倉後於道中寄詩與田晉公曰夜坐空庭月色微一樹寒梅發兩枝及駕至梁洋邠帥朱玫立襄主監國寒梅兩枝驗矣自是衛駕詣都多在西縣三泉褒斜以來屯駐歲餘卒於家葬於江南山下數月好事者掘其墓無復有所見休復在長安駕駐華州休復亦至興德府矣

仙傳拾遺

裴航秀才長慶中因下第遊於鄂渚同載有樊夫人乃國色也因賂侍妾裊煙求達詩一章久而無答夫人後使裊煙持詩一章曰一飲瓊漿百感生元霜搗盡見雲英藍橋便是神仙窟何必崎嶇上

玉清航覽之愧佩而已後抵襄漢航飭裝歸輦下經藍橋驛側因渴甚見茅屋有老嫗航揖之求漿嫗咄曰雲英擎一甌漿來俄於輦箔下出雙玉手捧甌航接飲之真玉液也因還甌遽揭箔觀一女子航驚怛植足而不能去因白嫗願娶嫗曰我今老病昨有神仙遺靈丹一刀圭但須玉杵白搗之百日方可就吞君約娶此女者得玉杵白吾當與之航謝去至京國訪玉杵白數月餘遇一貨玉老翁曰近得號縣藥舖卞老書云有玉杵白貨之郎君懇求如此吾當為書道達航媿荷珍重果獲杵白遂擊而抵藍橋嫗大笑曰更為吾搗藥百日方議婚好航搗藥日足嫗持而吞之遂擊女入山謂航曰但少留此逡巡車馬僕隸迎航而往別見一大第帳幃屏帷珠翠珍玩莫不臻至航就禮訖引見諸賓多神仙中人也有有仙女髮髻霓衣云是妻姊航拜訖女曰裴郎不憶鄂渚同舟乎

航驚謝後問左右曰是小娘子姊雲翹夫人劉綱仙君之妻也嫗遣航將妻入玉峰洞中居之餌以絳雪瓊英之丹體性清虛毛髮紺綠神化自在超為上仙太和中友人盧顥遇於藍橋驛之西因說得道之事奇傳

嚴士則建州刺史穆宗朝為尚衣奉御頗好道午日於終南山採藥迷路然林岫深僻風景明麗有茅屋數間出於松竹之下窺籬隙內見有一人於石榻偃卧士則推戶直造其前乃攝衣而起士則具陳資糧已絕迫於枵腹請以飲饌救之隱者自起於梁間脫紙囊啓其中有百餘顆如扁豆之形俾於藥室取鐺拾薪汲水以一粒煮之良久微有香氣視之已如掌大曰可食矣渴則取鐺中餘水飲之復曰汝得至此當由宿分他時位至方伯兼獲長生之道士則告歸曰去此三二里與採薪者相值可隨之而去此至國門

不遠既出果有人採薪路側纔經信宿已及樊川既還輦轂不喜更嘗滋味日覺氣壯神清有驂鸞馭鶴之意盧僕射聞方伯之說因以處士奏官自梓州別駕作牧建溪時年已九十到郡周歲即解印歸羅浮及韋宙相公出鎮江南使人訪之猶在山谷

劇談錄

韋卿材太和中選授江淮縣宰出京日離灞漣行一二十里外覺道路漸異林木蔥蒨似非人間頃之有謁於馬前者如州縣候吏問韋自何至此俄頃復有一人至謂前謁者曰既至矣則須速報上公却走而去遂巡遽聲連呼曰上公出韋下馬趨入門侍衛嚴肅擬於王侯見一人年可四十歲平上幘衣素服命坐慰勞久之謂韋曰某因世亂百家相亂竄避於此衆推爲長強謂之上公爾來數百年亦無號令約束但任自然而已公不可久留命取絹十疋贈之韋出門上馬却尋舊路迴望亦無所見至明則已有官路逆

旅暫歇詢之於人無能知者取絹視之光白可鑑韋遂裹却入京

詣親友具述其事因以絹分遺親愛約其處在驪山藍田之間蓋

地仙也

尚書故實

金可記新羅人賓貢進士性沉靜好道俄於終南山子午谷葺居手植奇花異果極多常焚香靜坐誦道德及諸仙經不輟後三年思歸本國航海去後來却入終南大中時昇天而去

續仙傳

呂岳初名紹先蒲州人一云關右人屢舉進士不第後於長安道中遇真陽語紹先曰子所居終南山有洞可從行頃刻到一峰真陽飲紹先以元和之酒坐石談元曰子從予奉道當名岳字洞賓遂將洞中書朝夕觀覽真陽授以上真元訣道成仙去今洞在樓觀

說經臺左

盤屋縣志

杜光庭字賓至杜陵人舉制科不中入天台爲道士僖宗召見賜紫

衣出入禁中上表乞遊成都隱青城山白雲溪卒於蜀年八十五  
顏貌如生世以爲尸解有文千卷

宋居白  
幸蜀記

王老坊州宜君縣人居於村墅頗好道一日有藍縷道士造其門王  
老延禮之居月餘日相歡洽俄患遍身惡瘡王老看療逾年道士  
謂王老曰此瘡但得數斛酒浸之自愈王老爲精潔釀酒及熟道  
士以大瓮盛酒入瓮三日方出鬚髮俱黑肌若凝脂王老合家視  
之驚異道士曰此酒可飲王老飲之初瓮酒五斛餘及窺存三二  
升清美異常其時方撻麥王老與妻子并持麥人共飲皆大醉於  
是祥風忽起綠雲如蒸屋舍草樹全家人物雞犬一時飛去空中  
猶聞撻麥聲數村人共觀望驚歎風定其傭力持麥人乃遺在別  
村樹下後亦不食皆得長生宜君縣西三十里有昇仙村在焉

傳

仙傳

杜昇字可雲杜陵人莫測其年壽顏甚悅澤常遊城市間好於水碓  
及盆中以沙書龍字浮而左右轉或叱之則飛起高丈餘隱隱若  
雲霧作龍形呼之復下水中冬則卧雪中三兩日人以爲斃矣檢  
之徐起抖擻而行若醉醒也杜孺休爲蕪州牧聞可雲在城市延  
入郡齋咨以道術可雲曰但以政化及人慈愛爲意况今多事宜  
遠兵傷道術詎可問也後軍亂孺休果爲兵傷而斃可雲亦被殺  
頃之但有舊布衫一領斫破在地後數日人見入江西市中醉吟  
沙書如故

續仙  
傳

田鸞家居長安聞道者有長生術入華山見黃冠禮謁祈問隱訣黃  
冠指柏樹示之曰此即長生藥也鸞取柏葉曝乾爲末服至六七  
日未有他益但覺煩熱至二年餘病瘳頭目如裂舉身生瘡鸞意  
終不捨七八年後瘳病益甚諸瘡潰爛黃水遍身如膠忽自云體

今小可須一沐浴遂命置一斛溫水於室中數人昇卧斛中遂於斛中寢三日方寤呼人起之身上諸瘡皆已掃去光彩鮮明自云初寢夢黃冠數人持旌節導引謁上清遍禮古來列仙皆謂曰柏葉仙人來此遂授以仙術自此絕穀隱於嵩陽年百二十三歲無疾而終異香滿室

化源記

杜子華信州李員外虞嘗與秀才楊稜遊華山窮搜巖谷時李公及楊君俱有棲遁之志每遇幽賞吟詠移時俄至一小洞欲窮其跡少窮至洞口川巖草樹不似人間亦有耕者更二里餘有佛堂李公等因徃求宿逡巡見有紫衣乘小馬從者四五呵路而至曰得到此何也此處偏陋請至某居處遂同徃到一府署因自言曰某姓杜名子華遇仙侶居此已數百年矣因止宿飲饌皆甚精豐留連累日遣使者導之而返

逸史

賣藥翁不知其姓名常提一大葫蘆賣藥人告疾皆與之稱效後於長安賣藥抖擻葫蘆已空內只有一丸出極大有光明安掌中謂人曰百年人間賣藥過却億兆人無一肯把錢買藥吃今須自吃却藥纔入口足下五色雲生風起飄飄飛騰而去

續仙傳

寶真人字子明少出家學道於漢中斗山後昇仙去山巔有奉真觀

漢中志

何尚翁畧陽人修真於仙人關道成飛昇關以此名

漢中志

譚峭字景升幼而聰明及長好黃老諸子及周穆漢武茅君列仙傳靡不精究一旦告父出遊終南山父以南山近京都許之自終南太白太華迤邐遊歷不復歸寧父母以其堅心學道乃聽其所從後丹成服之入青城而去

續仙傳

劉哲字元英號海蟾子事燕王劉守光爲相喜黃老一日有道人自稱眞陽子來謁海蟾待以賓禮道人爲演清靜無爲之宗金液還丹之要竟索雞卵十枚金錢十文一文置几上累十卵於金錢若浮圖狀海蟾驚曰危哉道人曰居榮祿履憂患其危殆甚盡以其錢劈破擲之辭去海蟾大悟循跡終南山下丹成尸解有白氣自頂門出化鶴冲天賈志

丁少微亳州眞源人爲道士隱華山潼谷密邇陳搏所居與搏齊名志尚清潔善服氣多餌藥年百餘歲康強無恙太平興國三年召赴闕以金丹巨勝南芝元芝爲獻留數月遣還山七年冬卒宋史方技傳

張夢乾孟店鎮人老而好道有離俗之志遇劉海蟾授以仙術一日

辭村人曰遲十日中午吾將飛去衆以爲狂及期登槐杪吐沫斗餘貓犬舐之相隨翬舉有涇陽商人即於是日午見夢乾於雲南

涇陽縣志

抱一鳳州人嘗遇一老人篋中取物餌之狀如蘆菔又與之小瓢中有葉如綠豆戒曰遇有疾者施之自是絕粒眞宗召見賜名抱一

漢中志

于元隱莫知所從來遇駝頭道者授大洞經十一章後有老人導之與遊鷄足山山裂得洞洞昏黑不可入忽目光穿隙見石匣一探匣得書乃玉注大洞三十九章經老人口授秘訣又十餘年來鳳翔稍與世接遠近奔湊郡守召與語異之延於家元隱求一室置大斛貯水爲戶睡三月守日遣人伺之又三月忽坐水斛中臨叩吳伸道以職事如秦過於途歎語移時至秦以語守守駭曰安有



是就視則尚寐也大觀元年詔赴闕既而屢辭還山即清平軍上清太平宮構別位以居補道藏真玉注自為迴風混合百神圖居常以大洞真經五行六字氣轉相傳授僂僂者起行羸瘵者充盛四方言大洞者皆以元隱為師又築觀於耀州三原之脩真鄉詔名崇真觀未去前五日歸舊庵易衣側卧拳手結印而後逝

宋任諱于

真庵碑記

羅道人不知何許人嘗遊洛交遇異人得秘訣預知休咎劉延慶重之靖康二年忽大哭於市別隣里及汴梁陷二帝北行乃哭之日

也馮志

白雲片鶴金明人為道士自稱為白雲片鶴宣和初遊汴見趙鼎遂大呼曰中興名相入驚異之他日又遇鼎曰吉陽相逢後鼎至紹興五年果為相有重名晚竄於吉陽忽與白雲相見白雲曰尚憶

昔之言乎公將歸矣未幾鼎卒

馮志

姬洞明號抱真子居華山文仙谷紹興丙子中秋前一日謂門人劉裕之曰張翁驪姥待吾久矣言訖怡然化去

賈志

石泰常州人號杏林又號翠元子遇張紫陽得金丹之道初紫陽得道於劉海蟾海蟾曰異日有為汝脫羶解鎖者以道授之後紫陽以所傳非人三遭禍患乃作悟真篇行於世復雁鳳州太守怒誣以事坐黥竄經邠境酒肆中遇杏林告以故杏林曰邠守泰故人也為之先容獲免紫陽感之盡以道法傳於杏林道成亦作還元篇行於世壽一百三十七紹興二十八年中秋日尸解後二年有人復見杏林於羅浮山

列仙全傳

泰以醫藥濟人不受謝令植杏一株

以遂成林人因號石杏林云

扶風志

薛道光一名式一名道原陝府鷄足山人字太源嘗為僧法號紫賢

一號昆陵禪師雲遊長安雅意金丹尊養宋徽宗崇寧五年丙戌冬寓郿遇石杏林傳授口訣真要乃註解悟真篇作復命篇及丹髓歌行世壽一百十四歲尸解作頌云鐵馬奔入海泥蛇飛上天蓬萊三島路元不在西邊明年沙道昭復見紫賢於霍童山賈志

郭尚竈一名郭馬兒興安人賣酒翠光臺下有道人呂姓常飲尚竈肆中尚竈不取其值如此數年道人授藥一丸投龍窩水中即成酒道人去後數年復來携尚竈往香溪煉丹浴於銷金池中從翠

光臺飛去

興安州志

王嘉號重陽子咸陽人妊二十四月而生體貌雄偉美鬚髯倜儻尚義不拘小節嘗醉於甘河會二人披髮被毡其年貌同一師訝之從而懇請其人授修真口訣再遇於醴泉師趨拜之邀師飲問其鄉閭年姓答曰濮州人年二十一不告其姓留秘語五篇令嘉讀

畢焚之且曰速去東海投譚捉馬俄失所在乃捐妻子行旬鄆杜終南間舉止若狂後別構庵於南時村一夕自焚其庵鄉里驚救方躍舞而歌携鐵錘乞食出關抵寧海郡人馬宜甫執弟子禮師名之曰鈺會譚玉者以宿疾來見因請為弟子未幾領馬鈺登崑崙山言曰是有烟霞洞我先世脩道之所命鑿之其器具之朽者與玉井池尚在時棲霞邱公投謁師賜名處機又劉公者來謁師一見輒契名以處元師至南京與眾別云今可赴師真之期矣奄然而逝馬鈺嗣其教與譚劉邱相繼為宗盟而全真學者稱鍾呂劉為三祖又以師為祖師元至元六年賜重陽全真開元真君

左編

李靈陽京兆人博學好仙遇至人授以抱一符火大丹之訣與玉蟾

重陽為友

列仙全傳

**金**

趙抱淵道號還元子俗呼曰摩歌延安鷄川人自幼不凡志在方外嘗遇有道之士傳秘訣後詣劉真人素不讀書一日夢真君賜以道德二篇先生吞之入腹自此天性明朗詩詞歌咏若湧泉之流注遂來終南叅重陽祖師至晚年還鄉於迎祥觀住坐泰和五年作如夢令詞末句云相別相別來歲暮春時節次年上遣使者召先生赴關先生沐浴正衣冠而逝是夜正春分之際

金詩本傳

然逸期字守約涇陽人至驪山遇了真子默有所契後遊商顏卜築三陽草庵居十餘年西遊太白延祥觀士庶持紙幅求翰墨甚多或者辭色頗倨即書二詩付之持歸披讀了無一字翌日詣師白其事師曰再讀當有所見展視墨跡儼然驚悔拜謝節度使曳刺金紱在鄧病篤夢異人飲以法水寤而即愈聞師歷商過鄧使數人邀於路至則駭曰乃夢中所遇之異人也居浙川石門下語之曰比歲吾將行矣其年冬命道侶次第坐高歌起舞時及四鼓端坐而蛻

金詩本傳

**元**

邱處機號長春子登州棲霞人金大定丁亥謁重陽王真君嘉於寧海請為弟子戊申召見闕下隨還終南山金主召不起宋使來召亦不起太祖遣近侍劉仲祿持手詔致聘至行在所命掌天下道教至燕居太極宮

魏耕錄

大定丁亥重陽自陝右來真人師之重陽既逝真人乃遊秦隴戢志磻溪戊申金世宗徵赴闕特旨住全真堂

雲山集

長春子穴居磻溪日乞一食行則一簑人謂之簑衣先生

陳時可長春本行碑○按處機與譚處端劉處元王處一郝大通馬鈺鍾離孫不二七子皆齊人重陽行化至齊同時入道元史雜老志載之甚詳並未言其入陝列仙傳載重陽化後諸子廬墓終南亦未見顯化寶蹟茲從碑文內摘錄長春一傳賈志各傳俱刪

又同州志載今西庵里有處端親書龜乳二字筆力道勁大定二十年事也列仙傳云今高唐州有處端手跡大書龜乳二字未知孰是並識於此

白道元峪口人貌古質厚肩背隆然人呼為井穀轆嘗遇馬丹陽於途次與語若合宿契遂傳真訣蹈水如履平地日行千里足下無跡嘗歌曰橫顧四條椽在世八十年若要跟尋我直至白骨邊後八十無疾而卒既而舉葬棺空無尸旬日人見在白骨寺邊往來

方驗歌言

涇陽縣志

董守志元太祖時人字寬甫號凝陽居汧隴慕神仙感遇真陽純陽海蟾屢加點化晚築庵於隴山低村一日祥雲覆地疾雷震天謂其徒曰仙師邀會蓬萊矣遂逝

隴州志

劉仙不知何許人脩煉於橫山石穴中白日飛昇後人因名其穴為

古仙洞

韓城志○按賈志富平石壘山巔曰陽石洞洞前有石砌山田數畝相傳劉仙種蔬處其何代何名俱未詳附誌於

此

白守一本太山寨窠溝人自幼禮還元趙真人為師號碧然子至元四年五月金明不雨碧然子至即雨當道奏聞勅賜潤澤真人後入華峰隱迹一日呼門童囑之曰吾當去矣遂沐浴整衣冠而逝

延安府志

吉志通邵陽人幼穎悟師喬潛道及潘清客博學多聞後居武當山十年不火食但餌黃精蒼朮精神清徹行步如飛一日召弟子戒以珍重修道言訖曲肱而逝時中統甲子歲也

續文獻通考

李妙成岐山人古澹清淨每懷方外之志元時築靜明菴藏脩汧陽服氣煉神年踰大耋童顏不衰晨昏有鶴周旋其室人皆異焉莫

知所終後人名其結庵處為悟仙莊

岐山志

吳翠巖受道於游搏霄得全真術又得王玉陽秘訣遍訪名山至橫

山以為勝地居石室中不畏寒暑嘗聞朱子敬齋箴知脩道真訣  
聞孟子存心養性事天知虔事上帝無過於此其後亦曰元刻石  
山中韓城志

**明**

坐雪道人不言姓名朝邑程濟微時墅外有小祠值大雪深無人跡  
濟入取火先有道士戕然危坐因饋之食將去投書一卷曰子忠  
臣也習此可免禍其書皆符咒秘籙濟習之遂成異術周旋於靖  
難之禍朝邑志

張君實人目為邈邈張在金時修煉寶鷄縣之金臺觀洪武初復來  
寶鷄與西關道士李白雲交契有童子張朝用者君實問知其先  
世謂曰吾識爾高祖始生時童子善自愛越月北行朝用與白雲  
送之其後時往來長安土洞名山藏方外記張刺達相傳宋時為華州椽

嘗從州守入華山謁陳搏叙坐訖復設榻於左似有所伺已而一  
道人至出棗三枚以青者投守守持以與椽椽啖之自後得道國  
初時往遊人間每顯異蹟徐模林永樂時長安西郭土室中有道  
人神情朗異鬚張如戟身垢不堪自曰姓張西郭人因號為邈邈

張喜與郭民劉寡蕩遊嘗以身垢為丸治人疾病後他適給事中  
胡濙奉命訪張三丰遇寡蕩言狀以為即三丰也長安縣志永樂間三

丰遇生員張恪於周公廟朝陽洞敝衣垢面恪不為禮時大雪方  
炊飯三丰須臾自外持菜至如新換於圃云自成都取來恪出視  
雪中無迹知為仙將別去乃告恪曰吾元元子張三丰也問所欲  
曰苦無記性乃吹耳連囑曰吾令汝聰明自是讀書過目輒不忘  
後舉永樂甲午解元岐山縣志

邱元青富平人住持五龍宮洪武初以薦授監察御史力辭轉太常

卿使從郊祀上宿齋宮詔以雨暘之事奏對有驗

名山藏○按元青仙跡未著然

拜官不受視嘉靖中陶仲文邵元節諸方士有薰蕕之別嗣法三丰不虛也

孫碧雲馮羽人入華州半截山受張三丰之教

華州志

碧雲結茆書堂

山成祖召見賜袍笏敕聽歸山臨別賜贊及詩又命訪張三丰賜敕四道其徒爲建萬壽宮貯諸法物

賈志

宗喜嚴延安人性質古朴住太清宮年踰八十永樂五年三月二十

六日更衣焚香盤趺而坐曰來由此門去由此路一脚不失回頭

即悟鼻壘雙柱而逝旬日顏色不改

四川總志

孫演書字洞鳴甘泉人雅意林壑遊華山得希夷先生先天之學豫

知休咎修真太和山菴藥醫人童顏鶴髮後跌坐羽化

甘泉志

劉宗道三原人爲元通觀道士能役使鬼神祈禱雨澤又能以數知

人生死名曰癸亥數後慶王大集陝西僧道修追薦事衆既集宗

道徐至是日天甚晴霽衆皆樹搗榜具金袈裟法衣作樂迎經

於道宗道但設兩具端坐而已須臾大雨驟至衆搗榜俱盡金衣

俱濕俄晴霽宗道始行事其日惟宗道一壇在焉慶王以爲神以

金冠餽之葬時有二鶴翔柩上若送葬然

賈志

陳玉宇無壞成化間朝邑柳村人事親至孝親歿負土築墳廬墓三

年有仙術能分身知未來事頗以藥施人冬時掖布往市有餓孳

者默念得陳師遺布而我拾之可活矣須臾遂遺其布夜有穿窬

盜即先知置物所穿之處嘗推車至旅舍主人晨興適田至午方

憶有宿客急歸啓戶扃鑰如故人車不知從何而出村東西社各

構樂樓同時上梁皆請陳師至各自矜能得陳師後知其皆至也

衆盡驚平陽梁侍御私訪其家答以偈曰我本華山希夷子一轉

南菴去楚州後入華山今饒益寺塔中其蛻骨也

朝邑志

從鉉安陸人正統八年母夢湘子入室而生骨相奇偉篤好黃老之術辭父遊太和山復遊嵩華遇異人授大還丹雲跡靡定萬曆中郡守阮屏麓遊太華失路遇鉉指引見道貌軒舉問其姓氏年里已百六十歲矣後入華山絕巖不知所終

湖廣通志

尹蓬頭名從龍華州人囊有宋理時度牒弘正間來金陵寓邸中輒閉關卧多者逾月少亦五六日後起能分身嘗鍵戶寢有終南黃道人來留青鞋去後數日尹起問弟子曰有黃師來何言弟子獻所贈尹曰是知我當遠行也無何當事懼其詭異遣卒押歸華州過鐵鶴觀騎一鶴飛去

江南通志

董仙不知其名往來城市言事多徵驗夕宿咸寧金花落土洞中冬夏不著衣惟裹牛皮人呼爲牛皮董每詢其自不答自作詞云摧殘形體不穿衣只是裹牛皮跣足傲寒饑便悟徹重元上機十年

吃飯十年還盡一志更無移行滿跨雲歸並不管人間是非後僵死洞中身首俱另鄉人瘞之嗣後又見在王渠漾溪庵裹牛皮如故正德間遍辭鄉人不知所之

賈志

劉偉朝邑人成化中舉人任文水知縣文水多豪彊號難治偉獨以誠心直道爲理久之衆庶傾心向化擢御史持法平允出知兗州卒

賈志

偉生好神仙比疾病命其子曰即死毋埋我及卒鄉人有自

遠方還者多出道中見之寄問其家因不敢葬其甥韓邦奇爲山西僉事方視事偉從中道緩步而前曰汝弟邦靖可速令歸僚友相視駭愕令人跡之至一遠寺中止明日求之竟不見邦靖不以

養病歸卒劉氏聞之發棺視惟一屨在焉

楊儀高披異纂

逍遙子嘉靖二十年間自東來榆林科頭赤脚隆冬不寒即大雪端坐於地竟夕不移汗猶津津出人餽之食則食雖不餓累日亦無

所需人叩之惟領之不語居榆三月而去日午出城未刻有人在

二百里外遇之後竟莫知所終

延綏志

鞋幫子佳咸寧鳳樓原金淳沱村時村民陳氏館之甚勤日飲酒醉  
卧街衢人觸之即大詈日與兒童嬉戲為樂以舊鞋幫百納為衣  
冬夏服之有與新衣輒給貧乏人問其姓名自云鞋幫子萬曆時  
一日往城乞黃紙錢百餘自糊於身遍體咸具是夜卒鄉人齎錢  
為棺瘞焉後陳氏貿易於蜀復遇之談笑詈罵如故回鄉語人發  
棺視之惟餘鞋幫衲衣紙錢而已

賈志

蓬谷道人由來無考萬曆年衣羽衣持杖雲遊過大河足不履地飛  
身而過至中部黃帝廟和二丰詩有萬壑烟雲連帝塚九天春色

映龍城之句

延安府志

一烝字幼朔號海伺子不知何許人貌甚古數更姓名人不能測萬

曆四十六年春副使陳性學許汝魁鎮將杜文煥敦請邀致授以  
服氣煉神存真知命之道云能脩此則可證隆砂八百之數每於

指光中見未來事後一旦飄然去

延綏志

幼朔姓彭氏多往來吳楚

間後不知所終

錢謙益列朝詩集

胡載道河南人萬曆丁丑進士歷官四川監軍道好丹砂寓於石泉

數年丹成尸解去

石泉志

玉風不知何許人萬曆乙巳雲遊至葭州南五里白雲山童顏鶴髮  
隱居避靜施藥濟人神木大叅陳性學聘之談及符錄秘訣無不  
輒應獨居一室七日不火隆冬袖出青麥歲早有禱即應後韓城  
尚書薛貞奏上勅賜道經一藏封為玉風真人後不知所之

延安府志

劉常泰咸寧人出家丹陽宮後棲大興山蓬頭赤腳採草木食嘗於  
萬仞壁間畫真武像人皆異之有一鹿常隨坐卧人犯劉者抵觸



之問以世情一咄而已山中作鐵橋畢曰可謝世矣歸故宮坐化

咸寧志

王華子姓俞名道精於易理或日數食或數日不食於羅谷深處廣植花木建藏易洞日夕卧其中一日謂其徒曰我將去矣具浴盥漱畢整衣端坐而逝

長武志

王輔榆林人應襲千戶讓與其弟經脩煉形氣嘗遊武當山深谷中習靜年八十餘步履若飛弟經往迎之歸榆林年餘謂經云我於某日還山乃遍辭親知至日端坐而化有自米脂來者遇輔道上

延綏志

三無道人姓曹氏咸寧縣人少從軍冀州見殺死人更衣不僵惻然遂棄家從清虛子遊授以道術居終南太乙宮崇禎十一年遇賊被磔死後人自蜀道回見在武侯廟賣藥

咸寧志

張雨號清虛子貌清古寡言笑絕煙火食常携一瓢居華之東峰石洞中崇禎癸未十月初六李闖入關之夕跌坐而逝自書其瓢曰我姓張名雨慶陽人年六十四數字而已迨甲申春正月十五猶端坐如生

賈志

**秦**

毛女在華陰山中獵師世世見之形體生毛自言秦始皇宮人秦亡入山避難遇道士谷春教食松葉遂不饑寒身輕如飛所止巖中有鼓琴聲云列仙傳眉之彭山進士有宋籌者與故叅知政事孫抃同赴舉至華陰大雪天未明過華山下有牌堠云毛女峰者見一老媪坐堠下鬢如雪而無寒色時道上無一行者不知其所從來雪中亦無足跡孫與宋相去數百步宋先過之亦怪其異而莫之顧孫獨留連與語有數百錢掛鞍盡以予之既追及宋道其事宋

悔復往求之已無所見是歲孫第三人及第而宋老死無成東坡志林

蔡元長自長安易鎮西川道華山舊聞毛女之異思得一見向曉

從者見嶽廟燒紙錢爐中有物甚異以告元長亟往視之乃一婦

人也遍身皆毛色如紺碧而髮若漆目光射人顧元長曰萬不為

有餘一不為不足言訖而去其疾如飛王明清投轄錄

**西河**

西河神女神仙伯山甫外甥也山甫見其多病與之藥女時年已七

十稍稍還少色如嬰兒漢遣使行經西河於城東見一女子答一

老翁頭白如雪跪而受杖使者怪而問之女子答曰此妾兒也妾

舅伯山甫得神仙之道隱居華山中慈妾多病以神藥授妾漸復

少壯此兒妾令服藥不肯致此衰老妾恚之故杖耳女仙傳

南陽公主漢元帝女下嬪王咸綏和閻王莽秉政謂咸曰國危世亂

但當退而脩身咸不能從公主遂結廬華山歲餘精思丹道聚雲

氣冉冉而去咸追之漠然無迹忽於嶺上見遺朱履一隻取之已

化為石後人名其峰曰公主峰述異記

**唐**

索姑扶風人性至孝清正恬淡不喜塵俗事嘗懷超世之志久之其

父貿易隴西姑請為買白馬及父歸次日五鼓姑乘馬馳去遺線

於路至盤屋青山跌坐而化家人隨線迹之得其處居人神之為

立廟焉扶風志

**宋**

陝西子仙姑傳云得道術能不食年約三十許不知其實年也陝西

提刑陽翟李熙民逸老正直剛毅人也聞人所傳甚異乃往清平

軍自驗之既見道貌高古不覺心服因曰欲獻茶一盃可乎姑曰

不食茶久矣今勉強一啜既食少頃垂兩手出玉雪如也須臾所食之茶從十指甲出凝於地色猶不變逸老令就地刮取且使嘗之香味如故大奇之

熈真子

華山有郭仙姑年二百六七十歲曾事陳希夷又常隨呂公遊於世

癸辛雜識

**明**

華山玉女峰女冠楊氏名妓也少年入山食松皮或枵腹坐即大雪

七日不粒亦無恙竟日夜尸坐如寐其玉女殿右韓姑遺蛻歿幾

三十年雖槁不腐以杖擿其足亦不僵蓋楊氏師也

王履宿玉女峰記

張仙姑中部河西人居常知未來事人莫識其所從一夕聞空中有人呼曰張仙姑張仙姑笑曰此必呂公岳也開戶視之遂飛身昇

天

延安府志

仙姑萬曆時洵陽縣北露金坪民間女臨嫁時天將曉驅鷄飛過洵河南至碓下洞中坐化人聞鷄鳴尋見之遂名為仙姑碓

洵陽志

**本朝**

林道士萬曆時人隱山陽之下高山石龕知未來事能興雲雨時訓人忠孝廉節不好人學已來學者輒拒之順治二年山中人共見其入三鳳山古洞方入石門即闔後歲旱禱洞外許入乃入洞取水即雨有取水者未得請直入始苦黑頃之朗如霽日別一天也見二人偉然儒服對奕額曰汝來求雨外間已得雨矣盍行乎其人叩謝出果大雨如注

韓可精朝邑人明末避寇棄家去晚歸動止有異常栖息沙中後居長安昌村村中水苦不可食為指地鑿井獲甘泉天旱禱立應村人遁主之隣有徵逋甚急可精使從往河東視其弟子至

則其人甫宦歸將行奉多金為壽止取一餅金付從者遂行弟  
 子目留從者以金盡與之至途忽相失獨行遇盜所得金盡被  
 劫惟先餅金在抵家適償所逋人以是益怪之當事禮請謝不  
 往士大夫從商畧文史欣然往復叩以二氏學終不置一語冬  
 月有販夫露宿可精憐之使卧榻旁無火具而汗不止嘗辟殺  
 數月面色益瑩潤年八十餘跌坐而化後有人見於新豐道上  
 云

人瑞 按詩咏介翁禮稱就見所以引年重齒彰太平之瑞也但歷  
 世衰遠載籍多湮漢唐以來史缺有間矣今搜羅舊志叙次

自宋為始焉

**宋**

房寅韓城人為容貌古朴善咒禁之術年一百一十歲解去 韓城志

李茂蒲城翔鸞鄉人先世籍隴右後由鎬徙蒲八傳而為翁喜遨遊

太華太白間掃一室揮麈而談茶鐺酒壺有名士大夫風壽百有

七歲 蒲城志

**明**

趙光裕三原人由掾吏為留守衛經歷原邑有温家河無渡行人苦

之裕開路建橋往來稱便里人呼為趙公渡壽百歲 三原志

辛朝涵渭南人壽百歲 渭南志

閻禮同州七里村人弘治中壽一百九十歲齒髮步履俱不衰 同州志

員澤同州通川里人壽百有一歲 同州志

張守志同州雁羗里人壽百三歲視聽食息如少年 同州志

李準朝邑人壽百十二歲 同州志

吳良朝邑人壽百有十歲 同州志

尚苗朝邑人壽百歲 同州志

趙謹朝邑人國子生歷利津邱縣主簿五十致仕百歲乃卒

苑落集

陳仲載韓城人爲人孝友敦義讓喜施捨壽一百有二孫環正直好

義壽一百三歲屢舉鄉飲賓

韓城志

樊整永壽人兄遺幼子一歲整撫育成立以已產付之壽至百歲有

五鄉人稱爲百歲翁

賈志

董遇和神木人壽百歲給冠帶爲壽官

神木志

雷氏渭南人萬曆丙辰進士劉芳祖母也芳官行人奉使出都值氏

百歲壽抵家稱慶衣冠大集一時以爲盛事

渭南志

魏氏邵陽任朝選妻少寡守節年八十八歲始旌後年百三歲乃卒

子守成隆慶二年以孝行選貢授壺關訓導未幾棄官歸養時母

年八十餘矣

邵陽志

解氏賈世成妻韓城人生平樂行善事壽一百五歲邑令左懋第扁

其廬曰人瑞石鳳臺又扁曰百有四歲

韓城志

薛氏王應車妻韓城人年二十二夫亡守節壽一百有二

韓城志

劉氏中部人適三原趙瀛蚤歲苦節稱未亡人八十四年壽百十二

歲後子以進士歷官戶部郎至山東參政

中部志

**本朝**

咸陽老人張姓一云本姓名李興河南鄧州人明季遭寇亂入關

初居咸陽馬跑泉敗寇中與人傭不計值康熙初就蘓家莊古

寺下編茅以居老人駘背兒齒出入嬉遊歷數十載有少容生

於明萬曆二十年至康熙四十七年春計百又十七歲矣

上聞之召見

賜御書長年人瑞四字遣歸巡撫鄂海率僚屬構亭奉

御書以榮之

陝西通志 卷之五 四  
宋君厚盤屋人雍正二年壽一百歲旌表

毛奇盤屋人勇敢絕倫明末流寇翻山鶴等盤踞劫掠縣令糾鄉勇禦之奇先登陷陣殺賊無算

國初總督孟喬芳募勇士入川勦寇授守備隨大兵入川累立戰功陞重慶府都司未兩月箭瘡大作乞歸享年百歲

井天培朝邑南留社人年一百二十歲

解款中韓城人好施樂善人稱解佛壽百歲無病而逝

馮養虎蒲城人雍正二年壽一百四歲旌表

常美蒲城人雍正二年一百二歲旌表

武振華蒲城人雍正二年旌表時年一百六歲

何恕邠州安化里人有隱德喜種藝足跡不履城市子孫百餘皆以勤儉世其業順治庚寅年百歲強健如六旬以上者

屈運通葭州庠生康熙四十二年奉

勅建百歲坊

王氏長安人呂君昇妻雍正二年壽一百二歲旌表

梁氏咸寧民張蕭菴妻年二十夫亡撫孤守節矢志不移壽一百二十有一其生卒皆壬申歲也

呂氏三原生員侯于桂妻少嫻女則夫亡教子成武進士授臨清都司封恭人康熙甲子孫愴復舉武鄉試第一氏壽至百歲無

疾而逝

任氏盤屋生員何器妻年二十五歲夫歿撫孤成立孫年中崇禎癸酉舉人氏生於明嘉靖丁未歿於

國朝順治六年壽一百三歲守節七十八載建坊旌表

梅氏盤屋人馬復學妻雍正五年壽一百五歲旌表

卹氏醴泉人劉芳節妻夫亡守節康熙五十三年壽一百二歲奉旨建貞壽坊

李氏醴泉民王家相妻年三十八而寡撫孤三貴三仁俱克成立雍正十一年氏百有七歲奉

勅建貞壽坊

特賜銀幣旌表

劉氏鳳翔人程希舜母年百餘歲希舜幼而孤事母至孝賀賊亂希舜負母携孫而走倏遇賊泣請曰寧殺我與我孫勿傷我母我母守節婦也賊並釋之食負養親承歡無間母年百餘希舜亦年七十餘矣

李氏洵陽人黎金妻雍正二年撫臣以一百一歲請旌

張氏朝邑生員麻出表妻少嫻內則治家諸事修潔壽百歲談故

明萬曆以來事悉有條理子孫繁衍皆能稟母教云

薛氏韓城陳守分妻初字守分值守分商於外十年不歸傳已死父母欲嫁之不從至年二十六守分歸始完娶閨門雍穆子孫繩繩壽一百有四邑令魏步南表其門曰百有餘歲

李氏華州人亳州知州劉澤溥母澤溥順治壬辰進士治亳有惠政李氏壽百歲毫人間關稱祝時去亳已二十年矣

馬氏武功生員康做俶妻年二十七而寡撫二子既長咸授室生孫二子旋歿次媳奉姑守節亦歿家故貧因子婦婚喪益致懸磬氏飲泣撫諸孫衣食不克艱苦逾昔後孫曾繩繩以服賈起家氏年至百齡猶健飯捷步操作如少壯時

奉內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和

崇內平至百餘餘動地對是絲計收復執和



學習進士楊鐸



勅脩陝西通志

第六十六卷

人物十二

列女一

NATIONAL CENTRAL LIBRARY, TAIWAN R.O.C.

陝西通志第六十六卷

人物十二

列女一

**上古**

任姒神農氏母有嬌氏女登為少典妃遊華陽有神龍首感生炎帝

長於姜水

史記五帝本紀注  
姜水在今寶雞

**夏**

女志夏禹母有莘氏女是生高密

史記夏本紀注○今鄆陽南二十里有古莘國

**周**

太姜者王季之母有邠氏之女太王娶以為妃生泰伯仲雍王季貞

順率道淵智非常太王謀事必與太姜

劉向列女傳

太任文王之母摯仲氏中女王季娶以為妃太任之性端一誠莊惟



德之行及其有娠目不視惡色耳不聽淫聲口不出敖言生文王而明聖君子謂太任為能胎教列女傳

太姒者武王之母禹後姒氏之女在郃之陽在渭之涘仁而明道文王喜之親迎於渭及入旦夕勤勞以進婦道號曰文母文王理外

文母治内生十男自少及長未嘗見邪僻之事史記管蔡世家註

穆姬者秦穆公之夫人晉獻公之女晉惠公立使納群公子曰公族者君之根本秦與晉戰獲晉侯以歸穆姬聞之乃與太子榮公子

弘女簡璧衰經履薪以迎且告穆公曰上天降災使兩君匪以玉帛相見乃以與戎婢子娣姒不能相教以辱君命晉君朝以入婢

子女以死惟君其圖之公懼乃舍諸靈臺列女傳

伯嬴者秦穆公之女楚平王夫人昭王之母也吳入郢昭王亡吳王閭閻盡妻其後宮次至伯嬴伯嬴持刀曰妾聞生而辱不若死而

榮妾以死守不敢承命吳王退舍伯嬴與其保阿背永巷之門皆不釋兵三旬秦救至昭王復君子謂伯嬴勇而精一列女傳

**秦**

孟姜同官人適范植僅三日植赴役長城姜送寒衣至城下植已死姜尋夫骨無辨嚙指血驗得之郡國志負遺骸歸至被禍道中山巔

渴甚號哭山忽出泉因名曰哭泉在今同官城北未幾死西山石穴中邑人憐之并其夫遺骸偕葬有祠墓側馬志文女信命不

**漢**

隨清娛太史司馬遷侍妾趙之平原人年十七事遷會遷有事去京

編居於同後遷故亦憂傷暴故清娛墓誌銘

楊敞夫人敞華陰人昌邑王淫亂大將軍光與車騎將軍張安世謀

廢王更立議既定使大司農田延年報敞敞驚懼不知所言延年

起至更衣敬夫人遠從東廂謂敬曰此國大事今大將軍議已定使九卿來報君侯君侯不疾應與大將軍同心猶豫無決先事誅矣延年從更衣還敬夫人與延年參語許諾請奉大將軍教令遂共廢昌邑王立宣帝

前漢書楊敬傳○按敬夫人司馬遷之女龍門人

節女者長安大昌里人妻其夫有仇人欲報而無道徑聞其妻仁孝有義乃劫其妻之父使要其女爲中詞父以告女女計念不聽則殺父不孝聽之則殺夫不義不孝不義皆不可行於世欲以身當之乃佯許諾曰旦日在樓上新沐東首臥則是矣請開戶牖待之乃告其夫使卧他所因自沐居樓上東首開戶而臥夜半仇家果至斷頭持去明而視之乃其妻之頭也仇人哀之以爲有義遂釋不殺其夫

列女傳

賈逵姊平陵人遠年五歲明惠過人其姊韓瑤之婦嫁瑤無嗣而

居焉亦以貞明見稱聞里中讀書旦夕抱遠隔籬而聽之遠靜聽不言姊以爲喜至年十歲乃暗誦六經曰憶昔姊抱遠於籬間聽

鄰家讀書今萬不遺一

拾遺記

班昭扶風曹世叔妻同郡班彪之女昭字惠班一名姬博學高才世叔早卒有節行法度兄固著漢書未竟而卒和帝詔就東觀踵成之數召入宮令皇后諸貴人師事焉號曰大家鄧太后臨朝與聞政事以出入之勤特封子成關中侯時漢書始出多未能通者同郡馬融伏於閣下從昭受讀作女誡七篇馬融善之令妻女習焉昭女妹曹豐生

註昭婿之妹也

亦有才惠爲書以難之辭有可觀年七十餘卒皇太后素服舉哀使者監護喪事所著賦頌銘誄問注哀辭書論上疏遺令凡十六篇子婦丁氏爲撰集之作大家讚焉

後漢書列

女傳

孟光扶風平陵孟氏女肥醜而黑力能舉石曰擇對不嫁至年三十  
父母問其故曰欲得賢如梁伯鸞者鴻聞而聘之始以裝飾入門  
七日而鴻不答光乃跪請牀下鴻曰我欲褻褐之人可與偕隱者  
耳光曰以觀夫子之志耳妾自有隱居之服乃更為椎髻布衣操  
作而前鴻喜曰此真梁鴻妻也能奉我矣字之曰德曜名孟光共  
入霸陵山中以耕織為業咏詩彈琴以自娛東出關過京師至吳  
依臯伯通居廡下為人貧春每歸光為具食不敢於鴻前仰視舉  
案齊着伯通異之乃舍之於家鴻疾卒葬畢歸扶風後漢書梁鴻傳  
馬倫汝南袁隗妻扶風馬融之女也字倫少有才辯融家世富豪裝  
遣甚盛隗問之曰婦奉箕帚而已何乃過珍麗乎對曰慈親垂愛  
不敢逆命君若欲慕鮑宣梁鴻之高者妾亦請從少君孟光之事  
矣隗既寵貴當時倫亦有名於世年六十餘卒倫妹芝亦有才義

少喪親長而追感乃作申情賦云

後漢書列女傳

友娣邵陽任延壽之妻字季兒兄季宗與延壽爭葬父事延壽與其  
友田建陰殺季宗建獨坐死延壽會赦乃以告季兒季兒曰殺夫  
不義事兄之仇亦不義與子同枕席而殺吾兄又縱兄之仇何面  
目以生而戴天履地乎乃告其大女曰汝父殺吾兄義不可以留  
又終不復嫁矣吾去汝善視汝兩弟遂自經而死馮翊王讓聞之  
令縣復其三子而表其墓

後漢書列女傳

穆姜漢中陳文矩妻同郡李法姊字穆姜有二男而前妻四子文矩  
為安眾令喪於官四子以母非所生憎毀日積而穆姜慈愛溫仁  
撫字益隆衣食資供皆兼倍所生長子與遇疾困篤親調藥膳恩  
情篤密與疾久乃瘳於是將三弟詣南鄭獄陳母之德狀已之過  
乞就刑辟縣言之於郡郡守表異其母獨除家徭遣散四子許以

修革自後訓導愈明並爲良士穆姜年八十餘卒臨終勅諸子曰  
吾弟伯度智達士也所論薄葬其義至矣又臨亡遺令賢聖法也  
今汝曹遵承勿與俗同增吾之累諸子奉行焉

後漢書列女傳○  
按穆姜漢中士女

志作安眾令程祇  
妻今從後漢書

秦瑛南鄭楊相妻大鴻臚劉巨公女也有四男二女相亡教訓六子  
動有法矩長子元珍出行醉母十日不見之曰我在汝尚如此我  
亡何以帥羣弟子元珍叩頭謝過次子仲珍白母請客既至無賢  
者母怒責之仲珍乃革行交友賢人兄弟爲名士秦瑛之教流於  
三世四子才官隆於先人故時人爲語曰三苗止四珍復起

漢中  
士女

杜泰姬南鄭人趙宣妻也生七男七女若元珪稚珪有望五人皆令  
德其教男也曰中人情性可上下也昔西門豹佩常以自寬宥子

賤帶弦以自急故能改身之恒爲天下名士戒諸女及婦曰吾之  
孕身在乎正順及其生也恩自于撫愛其長之也威儀以先後之  
體貌以左右之恭敬以監臨之懃恪以勸之孝順以內之忠信以  
發之是以皆成而無不善汝曹庶幾勿忘吾法也後七子皆辟命  
察舉牧州守郡而漢中太守南鄭令多與七子同歲季考上計無  
不修敬泰姬執子孫禮

漢中士  
女志

李文姬南鄭趙伯瑛妻太尉李固女賢而有智聞固免密與二兄謀  
豫藏弟燮托言還京師有頃難作下郡收固二子二兄受害文姬  
乃告父門生王成曰君執義先人有古人之節今委君以六尺之  
孤李氏存滅其在此矣成感其義乃將燮乘江東下入徐州界內  
令燮姓名爲酒家傭而成賣卜於市陰相往來十餘年間燮遇赦

還

後漢李  
固傳

韓樹南南鄭人趙子賤妻也子賤初爲郡功曹李固之誅二子託服藥死具棺器欲因出逃子賤畏法救更驗實就殺之及固小子變得還子賤慮變報仇賃人刺之變覺告郡殺子賤初樹南諫子賤子賤不從及臨死許共并命兄弟嫂侍婢視守之經百餘日乃怠曰兄嫂念一死萬不得生不敢復圖死也上下以爲信然無幾時於幕下自殺

漢中士女志

禮珪成固陳省妻也楊元珍之女生二男長娶張度遠女惠英少娶荀氏皆貴家豪富禮珪救二婦曰吾先姑母師也常言聖賢必勞民者使之思善不勞則逸逸則不才吾家不爲貧也所以粗食給吾者使知苦難耳二婦再拜奉教從孫奉上微慢珪抑絕之感悟革行遭亂流行宗表欲見之必自嚴飾從子孫侍婢乃引見之曰此先姑法也四時祭禮自親養牲釀酒曰夫祭禮之尊也年八十

九卒惠英亦有淑訓母師之行者也

漢中士女志

陳順謙成固人適鄧令曹寧十九寡居長育遺孤八十餘卒兄弟陳規著書嘆述之惠謙適張亮則在扶風官下吏白欲重禁嚴防以肅非元修訪於惠謙惠謙曰恢弘德教養廉免恥五刑三千蓋亦多矣又何加也兄弟伯思學仙道惠謙戒之曰君子疾歿世名不稱不患年不長也且夫神仙愚惑如繫風捕影非可得也伯思乃止陳伯臺稱云女尚書之後耳

漢中士女志

禮修趙嵩妻張氏女也姑酷惡無道遇之不以禮修終無慍色及寧父母父母問之但引咎不道姑卒感悟更慈愛之鄉人相訓曰作婦不當如趙伯高婦乎使惡姑知變可謂婦師矣後姑病女來省疾姑却之曰我死固當絕於賢婦手中後遭米賊嵩死乃碧塗面亂首懷刀託言病賊不逼也養遺生女依父叔立義終身者也

漢中

蘇伯玉妻作盤中詩寄夫云姓者蘇字伯玉家住長安身在蜀

漢詩評

志士女

嚴氏杜有道妻字憲京兆人貞淑有識量年十三適杜氏十八而殤

居子植女韉並孤藐憲誓不改節撫育二子教以禮度植遂顯名

於時韉亦有淑德傳元求為繼室憲許之時元與何宴鄧颺不睦

晏等每欲害之憲曰晏等驕侈必當自敗司馬太傅獸睡耳尋晏

等果為宣帝所誅元前妻子成年六歲隨其繼母省憲謂咸曰汝

千里駒也必當遠至以其妹之女妻之感後有名於海內其知人

之鑒如此年六十六而卒

晉書列女傳

蘇氏竇滔妻武功人陳留令蘇道賢之第三女也名蕙字若蘭善屬

文智識精明儀容妙麗年十六歸於滔滔甚敬之苻堅時滔為秦

州刺史被徙流沙蘇氏思之因織錦為迴文詞

十六國春秋本傳

張氏苻堅妾不知何許人明辨有才識堅將寇江左羣臣切諫不從

張氏進曰妾聞聖王之取天下有因成無因敗今朝臣上下皆言

不可陛下復何所因也妾聞人君有伐國之志者必上觀乾象下

採衆祥天道崇遠非妾所知以人事言之未見其可秋冬已來每

夜犬嗥雞鳴廐馬驚逸武庫兵器作聲吉凶有兆願陛下詳而思

之堅與兵張氏請從堅果大敗於壽春張氏乃自殺

晉書列女傳

楊氏苻丕妻征東左司馬楊膺之妹慕容永殺丕以楊氏為上夫人

楊氏不從引劔刺永為永所殺

十六國春秋

毛氏苻登妻武都人河州牧毛興之女美而勇壯善騎射登為姚萇

所襲營壘既陷毛氏猶彎弓跨馬率壯士數百與萇交戰殺賊七

百餘人衆寡不敵為萇所執萇欲納之毛氏罵曰吾天子皇后安



肯為賊羌所辱何不速殺我因仰天大哭曰姚萇無道先害天子  
今又欲辱皇后皇天后土寧汝容乎萇怒殺之十六國春秋

裴氏杜乂妻娶居養后以禮自防甚有德音裴氏壽考百姓號曰杜

媪

晉書杜乂傳曰杜乂杜媪人咸望之

楊氏呂纂妻弘農人美豔有義烈纂被呂超殺楊氏與侍婢十數人  
殞纂於城西將出宮趨慮齋珍物出外使搜之楊氏厲聲曰爾兄  
弟不能和睦手刃相屠我旦夕死人何用金寶超又問玉璽所在  
楊氏怒曰盡毀之矣超將妻之謂其父桓曰后若自殺禍及卿宗  
桓以告楊氏楊氏曰大人賣女於氏以圖富貴一之已甚其可再  
乎遂自殺晉書列女傳

王整姊霸城人嫁為衛敬瑜妻年十六而敬瑜亡父母舅姑咸欲嫁

之誓而不許乃截耳置盤中為誓乃止遂手為亡婿種樹株墓前

柏樹忽成連理一年許還復分散所住戶有燕巢常雙飛來去後

忽孤飛女感其偏栖乃以纓繫脚為誌後歲果復來猶帶前纒雍

州刺史西昌侯藻嘉其美節乃起樓於門題曰貞義衛婦之閭南史

列女傳

**北魏**

趙氏武功縣孫道温妻万俟醜奴圍岐州久之無援趙謂城中婦女

曰州城方陷義在同憂遂相率負土晝夜培城城竟免賊北史列女傳

**北齊**

夏侯氏皇甫和母漢中人夏侯道遷之女才明有禮則親授和以經

書和深沉有雅量尤明禮儀卒濟陰太守北齊書皇甫和傳

**隋**

人物十二

于氏韓觀妻河南人也字茂德年十四適十八觀從軍没于氏哀毀骨立慟感行路每朝夕奠祭皆手自捧持及免喪其父以其幼少無子欲嫁之誓不許遂以夫孽子世隆為嗣身自撫育愛同已生訓導有方卒能成立自孀居以後親族之家絕不往來蔬食布衣不聽聲樂以此終身隋文帝聞而嘉嘆下詔褒美表其門閭長安中號為節婦門卒於家

北史列女傳○按于氏夫韓觀史未註籍但據長安中號為節婦門一語應是長安人

覃氏上郡鍾氏婦夫死年十八事後姑以孝聞數年間姑及伯叔皆相繼死覃氏家貧無以葬躬自節儉晝夜紡績十年而葬八喪為州里所敬文帝聞而賜米百石表其門閭

北史列女傳

唐 王氏新豐人楊慶妻世充兄之女慶以河間王子為郇王守棗陽陷

於世充故世充妻之用為管州刺史太宗攻洛陽慶謀與王歸唐謝曰鄭以我奉箕帚者綴公之心今負恩背義自為身謀可若何至長安則公家婢耳願送我還東都慶不聽王謂左右曰唐勝則鄭滅鄭安則吾夫死若是生何益乃飲藥死

唐書列女傳

李氏郿人王珪母始珪微時李嘗曰兒必貴然未知所與遊者何如人試與偕來會房元齡杜如晦過其家李闕大驚較其酒食喜曰二客公輔才汝貴不疑

唐書王珪傳

李氏楊三安妻高陵人舅姑亡三安又死子幼孤寡晝夜紡凡三年葬舅姑及夫兄弟凡七喪遠近嗟涕太宗聞而異之賜帛三百段遣州縣存問免其徭役

唐書列女傳○按冊府元龜作涇陽人

上官氏楚王靈龜妃下邳士族也靈龜出繼哀王後而舅姑在妃朝夕侍奉謹甚凡珍美非經獻不先嘗靈龜卒將葬前妃無近族議

者欲不舉妃曰逝者有知魂可無託乎乃脩禮合葬聞者嘉嘆喪除兄弟共論妃少又無子可不有行泣曰丈夫以義婦人以節我未能殉溝壑尚可御粧澤祭他胙乎將自剗刎衆遂不敢強

傳

唐書列女

劉氏涇陽人田伯明之伯母伯明少孤劉氏年十九而孀居操行貞

固撫育伯明恩義甚篤及劉以壽終伯明廬於墓側

冊府元龜

姚女澄城人嫂李氏不得於姑每鞭笞輒以自蔽將適人忽危坐而

逝嫂亦慟哭死里中立祠祀焉

賈志

王氏楊紹宗妻華陰人在祿而母亡繼母鞠愛父征遼歿繼母又卒

王年十五乃舉二母柩而立父像招魂以葬廬墓左永徽中詔賜

物段并粟以闕表門

唐書列女傳

韋氏雍州司法參軍楊謹故妻鄜州刺史吉甫之女其父初嬰赤疾

累月不解衣而寢及父卒一慟而絕帝嘉其至行儀鳳三年特賜

縑帛仍令編入國史

冊府元龜

范氏宜君人夫死不嫁事姑孝姑患病久不痊忽聞肉香欲食甚急

氏割左膊肉深至骨以奉姑病隨愈事聞旌表鄉人以割骨名村

馬志

秦氏高敞妻敞為趙州刺史默啜攻州陷示以寶帶異袍曰降我賜

爾官不降自死敞視秦秦曰君受天子恩當以死報賊一品官安

足榮自是皆瞑目不語默啜知不可屈乃殺之

唐書列女傳○按高敞萬年人

殷氏頰真卿長安人少孤母殷躬加訓導

唐書頰真卿傳

紹蘭長安民郭行先女適巨商任宗為賈於湘中數年音信不達紹

蘭見雙燕戲於梁間長吁淚下語燕欲憑附書於壻燕子飛鳴上

下似有所諾遂飛泊滕上蘭乃吟詩小書其字繫於燕足燕遂飛

鳴而去任宗時在荊州忽見一燕飛鳴泊於肩上見有書繫足上解而視之乃妻所寄也宗感而泣下遂歸首出詩示蘭後張說傳其事開元天寶遺事

董氏金城女家無兄弟孝養不嫁父亡廬於墓側凡六載天寶四載二月表其門閭賜以粟帛冊府元龜

韓氏柳公綽妻公綽華原人氏韓臯女也善訓子仲郢幼嗜學嘗和熊膽丸使夜咀嚼以助勤唐書柳公綽傳

竇氏奉天縣人竇氏二女伯娘仲娘幼有志操住邠州接界永泰中草賊數千人入村行劫聞二女有容色姊年十九妹年十六藏於

巖窟間賊徒擬為污辱乃先曳伯娘出行數十步又曳仲娘出賊相顧自慰行臨深谷伯娘曰我豈受賊污乃投於谷賊方驚駭仲娘又投於谷谷深數百尺姊尋卒仲娘脚折首破血流被體氣絕

良久而蘇賊義之而去京兆尹第五琦感其貞烈奏之詔旌表門閭仍長免丁役二女葬事官給京兆戶曹陸海首賦詩以美之唐書

王霞卿藍田人才華清贍節行尤高進士鄭殷曩旅於會稽寓唐安寺樓見壁間霞卿題詩云云霞卿乃邑宰韓嵩姬自京師挈之任所嵩遇寇而卒鄭子往謁霞卿辭疾不見令輕綃持詩贈之詩曰君是烟霄折桂身聖朝方切謫良臣正堪西上投知己何必留程見婦人鄭得詩慚而去侍兒小傳

長孫氏楊收母馮翊人七歲而孤母親授經十三通大義號神童唐書

鄭氏第五峰長安人婦鄭以孝著表闕於門唐書第五琦傳

常溫女歸薛蒙工屬文績曹大家女訓行於世唐書常溫傳

女傳

女傳

碧玉右司郎中馮翊喬知之妾曰碧玉武承嗣借以教諸姬遂留不  
還知之作綠珠怨詩以寄之碧玉赴井死侍兒小名錄

封綯殷保晦妻封教孫也名綯字景文能文章草隸保晦歷校書郎  
黃巢入長安共匿蘭陵里明日保晦逃賊悅封色欲取之固拒賊

誘說萬詞不答賊怒勃然曰從則生不然正膏我劔封罵曰我公  
卿子守正而死猶生也終不辱逆賊手遂遇害保晦歸左右曰夫

人死矣保晦號而絕唐書列女傳 賀若婦藍田人姑有疾剖股肉奉姑疾遂愈府縣以聞勅旌表閭名  
其鄉曰節婦鄉藍田志

**五代**

貞女夫其姓鳳縣人五代時為梁將所得義不受辱梁將亦不敢犯  
及卒葬於縣北名貞女墓後漢王仁裕為撰墓碑明一統志

**宋**

种放母放父詔長安主簿卒母與放隱終南山豹林谷之東明峰結  
草為廬僅庇風雨母樂道薄滋味淳化三年詔召放母恚曰嘗勸

汝勿聚徒講學身既隱矣何用文為果為人知而不得安處我將  
棄汝深入窮山矣放稱疾不起母令取其筆硯焚之與放轉居窮

僻人跡罕至太宗嘉其節詔賜緡錢使養母不奪其志宋史种放傳  
馬氏下邳李好義妻好義為興州正將吳曦反將攻之拜決於家廟

囑馬氏曰當自為計生死從此決矣馬氏叱之曰汝為朝廷誅賊  
何以家為我決不辱李氏門戶馬氏之母亦曰行矣勉之汝兄弟

生為壯夫死為英鬼好義喜曰婦人女子尚念朝廷我輩當如何  
續文獻通考 大梁軍入殺其故王趙匡胤

孟氏延安人父成永樂滅夏人攻城陷之父死孟呼號徒步亟入城

中獲父屍大慟而斃夏人憐之并其父葬焉

續文獻通考

張伯威妹大安軍人嫁崔均其姑王疾妹剔左臂肉作粥以進達旦

即愈知大安軍羅植即崔均所居立孝婦坊事聞詔賜東帛

宋史張伯

威傳

李氏清澗人顯忠族妹顯忠南歸家屬悉遇害李氏國色金人欲私

之不從乃縛手樹下命左右射其脰遂罵賊不已而死

明一統志

韓蘄王夫人本娼也嘗五更入府伺候賀朔忽於廟柱下見一虎蹲

卧鼻息麴麴驚駭亟走出已而人至者衆復往視之乃一卒也因

蹴之起問其姓名為韓世忠心異之密告其母謂卒定非凡人乃

邀至其家資以金帛約為夫婦蘄王後立殊功為中興名將封兩

國夫人蘄王嘗還兀朮於黃天蕩幾成擒一夕鑿河遁去夫人奏

疏言世忠失機縱敵乞加罪責舉朝為之動色其明智英偉類此

鶴林玉露

張姓處子平涼人宋末饑荒就食於汧父母許字於丁姓後還里復

許於富族處子號泣欲死其兄嫂憐之夜駕車奔汧適丁姓因事

他往處子勢不能追又不敢歸遂自刃焉血痕化為石魚汧人為

立廟忠孝錄

**命**

王氏涇陽人進士武師古妻師古早卒氏守節奉舅姑如初後旌其

門續文獻通考

史氏李文妻白水人夫亡服闋誓死弗嫁父強取之歸許邑人姚乙

為妻史氏不聽姚訴之官被逮遂自縊死詔有司致祭其墓

金史列女

傳

師氏適澄城雷氏至二十四歲未有子而夫亡誓不再嫁篤養舅姑

姑病革潛割股肉雜飲食以進姑病乃瘥後舅姑俱逝又二十餘年其兄師遠欲利其產私許楊珍婚訟於官氏度其難免投井而死明昌三年采訪使以事聞特旌貞潔

續文獻通考

劉氏許古妻定海軍節度使仲洙女也貞祐初古挈家僑居蒲城後

留劉氏母子於蒲仕於朝既而兵圍蒲劉謂二女曰汝父在朝而兵勢如此事不可保若城破被驅一為所污奈何不若俱死以自全已而攻城益急於是劉氏與二女相繼自盡有司以聞於朝四年五月追封劉氏為郡君謚曰貞潔其長女謚曰定姜次肅姜以其事付史館

金史列女傳

康住住邠州人夫早亡服闋父取之歸家許嚴沂為妻康氏誓死弗

聽欲還夫家不可得乃投崖而死詔有司致祭其墓

金史列女傳

馮妙真適進士張慥興定五年慥為洛川主簿元兵入邠延守臣以

西路輸芻粟不時至檄慥詣平涼督慥欲偕妙真以往妙真辭曰舅姑老矣子行妾留奉養洛川破妙真從舅姑匿窟室兵索得之妙真泣與舅姑訣曰婦生不辰不得終執箕帚義不從辱即携三子赴井中明年慥歸發井得屍殞於縣之東郭外死時年二十四

金史列女傳

蒲察氏字明秀邠州人訥申之女完顏長樂之妻也哀宗遷歸德以長樂為總領將兵扈從長樂一子在幼出妻柴氏所生也明秀撫育如己出崔立之變驅從官妻子於省中蒲察氏聞以幼子付婢僕且與之金幣親具衣棺祭物與家人訣曰崔立不道強人妻女兵在城下吾何所逃惟一死不負吾夫耳汝等惟善養幼子遂自縊而死時年二十七

金史列女傳

程鵬舉妻鵬舉在宋季被虜於興元張萬戶家為奴以虜到宦家女

某氏娶之既婚三日即竊謂其夫曰觀君才貌非久在人後者何

不為去計而甘心於此乎夫疑其試已也訴於張張命箠之越三

日復告夫愈疑又訴於張張命出之遂鬻於市人家妻臨行以所

穿綉鞋一易程一履泣而曰期執此相見矣程感悟奔歸宋以蔭

補官元統一海內程為陝西行省叅知政事自與妻別三十餘年

義其為人未嘗再娶至是遣人携向之鞋往興元訪求之城南某

菴中氏已為尼旋報程移文本省遣使檄興元路官為具禮委幙

屬李克復防護車輿至陝重為夫婦續文獻通考

楊氏安西人少寡守志割體肉療姑病元史列女傳

崔氏奉元李郁妻有志節至順元年旌其門元史文宗本紀

王氏西安道妻咸寧人年十九安道卒氏躬紡織事舅姑守節終身

至正元年旌表續文獻通考

楊氏鄠縣人閻禎妻禎卒楊甫二十二歲誓志守節五十年至正元

年詔旌表其門續文獻通考

劉氏張訥妻藍田人訥為監察御史早卒劉守志不二河東受兵劉

氏二子衡衍俱以事出外度不能自脫遂與二婦孫氏姚氏決死

盡發貲囊分給家人姑婦同縊焉元史列女傳

李氏涇陽人符文進妻年二十六文進卒誓不再嫁紡績撫子守節

終身至元中詔旌其門續文獻通考

焦氏涇陽袁天祐妻天祐祖父始皆從軍役祖母楊氏母崔氏並家

居守志至元中天祐從征死甘州焦氏年少宗族欲改嫁之焦氏

哭曰袁氏不幸三世早寡自祖姑以來皆守節義豈可至吾而遂

廢乎吾生為袁氏婦死則葬袁氏土爾終不能改容事他人也衆



不敢復言又周氏澤州人嫁爲安西張興祖妻年二十四興祖歿  
舅姑欲使再適周氏弗從曰妾家祖父皆早世妾祖母妾母並以  
貞操聞妾或中道易節是忘故夫而辱先人也夫忘故夫不義辱  
先人不孝不孝不義妾不爲也遂娶居三十年奉舅姑生事死葬  
無盜禮其父與外祖皆無後葬祭之禮亦周氏主之有司以聞並  
賜旌異元史列女傳

劉氏涇陽吳君錫妻夫亡貽語許更事以圖衣食劉氏誓死不從亂  
命夫亡後杜門不出甘貧守志以紡織爲生三歷饑饉人相食劉  
氏草蔬木皮以度殘年終不失節馬志

周氏涇陽人周氏適張李氏適吳王氏適朱賈氏適蔡俱元朝已旌  
表者見雲陽舊志其詳無可考馬志

王氏幼適涇陽馮氏生一子守義不渝或有人勸別圖者王氏怒之  
再莫敢言者經天歷至正間處之恬然年九十有六聰明康健高  
落更生馬志

楊氏適李又楊氏適李二李父子也二楊姑婦也其家義方教子姑  
婦繼踵而全節兄弟同心而致孝二楊俱夫亡守節事聞旌表名  
士書其門曰貞節邑官改里西城街曰重節街馬志

孫氏三原張德妻德亡孫年二十四誓死靡他子世享亦早卒妻王  
氏年二十九亦誓不再嫁世享子忠亦早卒妻劉氏年二十八亦  
能守義不渝事聞詔旌表其門續文獻通考

李氏孫福妻扶風人夫亡守節延祐二年旌表明初猶存賈志  
蒙氏雷沂妻同州人沂歿於軍氏孀居三十年事舅姑撫孤幼以節  
孝著聞至元中詔旌其門賈志

王氏馬宅妻朝邑人宅卒氏年十九守節延祐元年旌表賈志

陳氏韓城人適邑人孫謙生子景仁甫一歲而謙卒氏方十九誓不

易節至元十六年旌其門續文獻通考

李氏王懋德妻華陰人李克忠女年十八適懋德未踰年夫以

少艾爭娶之李剪髮自誓元季兵亂携嗣子入華山張超谷以避

難事定乃歸人奇其節洪武八年旌表馬志

張氏党通妻蒲城人通亡氏年二十五孝親撫孤終身不貳延祐五

年旌表馬志

井氏任輝妻蒲城人輝卒氏年二十一守節事姑育子孝慈兼盡年

九十餘卒延祐五年旌表馬志

劉氏耀州李子和妻夫年十九死氏誓不再嫁至大元年旌表其門

事姑極孝後名其里曰孝姑里續文獻通考

郝氏永壽人田大妻胥氏田二妻周氏田三妻兄弟三人俱死於兵

郝年二十胥年十九周年十八俱堅心守節終身不嫁延祐二年

旌表續文獻通考

任氏邠州人氏一家三婦俱少寡誓不他適戮力蠶桑以奉舅姑事

聞並命旌表續文獻通考

關氏鄜州人孫世昌妻年二十三世昌卒守志不渝六十年延祐中

旌表續文獻通考

王氏鄜州康德明妻年二十而德明卒半月生遺腹子撫孤守節至

正中旌表續文獻通考

党氏中部王仲秦妻元統間夫卒氏年十八守節五十五年續文獻通考

張氏洛川人賀敏妻年二十四敏病篤謂張曰我若不諱汝年少無

子可更適人張泣以死自誓敏尋卒張即自縊續文獻通考

明

王氏秦愍王妃洪武中以死殉諡愍烈

續文獻通考

盧氏咸寧毛士謙妻二十八而寡守節四十年洪武時旌表

馬志

石氏渭南譚五妻年十七適五踰年五卒遺腹生子舅姑憫其少貧

命他適氏不從晝夜緝績孝養舅姑洪武十六年旌表

渭南志

左氏渭南王卞妻卞亡氏年二十六舅姑老且病氏紡績奉養後舅

姑相繼亡以禮合葬鄉里稱其節孝洪武十七年旌表

馬志

曹氏甘泉許舒妻年十九而寡守節撫孤洪武十八年旌表

甘泉志

卜氏略陽人夫姓名失傳洪武初夫死守節建坊表墓

略陽志

周氏鳳翔焦文友妻夫亡撫遺腹子苦節自守洪武十七年旌表

賈志

師氏朝邑張三妻年十九夫亡守節織紡以奉舅姑洪武中旌表

賈志

王氏梁孝恭妻澄城人年二十生一子而夫亡奉姑育子更元季兵

亂節不少易卒年六十七洪武九年旌表

馬志

陳氏韓城楊庸妻年二十一而寡奉舅姑甚孝舅歿祭葬以禮姑嘗

侍奉益勤洪武二十七年旌表

馬志

馬氏孫直甫妻尚氏李琳妻俱蒲城人馬年二十七而寡尚年二十

四而寡俱守節撫孤終身不二馬於洪武中旌表尚於弘治時旌

表

蒲城志

李氏白水江四妻夫亡年二十五守節不二洪武二十五年旌表

賈志

康氏賀谷榮妻鄜州人夫亡年二十五苦節撫孤父逼令改適投崖

死洪武十八年旌表

鄜州志

趙氏張敏道妻洛川人名金定年二十夫卒自縊以殉同里李從義

妻張氏名金香年十七夫卒守節以奉舅姑洪武中俱旌表

馬志

張氏中部任弘異妻夫死一子甫十歲張撫之躬親耘耨守節三十

餘年有弋貞碑記其事

中部志

田氏宜君甯琮妻琮中鄉試入監卒於京氏年二十四扶柩歸葬撫

孤守志洪武中旌表

宜君志

張氏臨潼張錦女適高陵王九成年二十而寡又張氏高陵吳仁妻

亦年二十而寡孝親撫子守節終身永樂五年旌表

賈志

某氏翰林程濟妻朝邑人濟教諭岳池以熒惑守心將疏論之氏諫

某曰天道渺茫君非司天奈何越職言事濟卒言之逮繫廷訊妻亦隨

卒至京後金川門破濟從亡氏自縊死

朝邑志

王蘭兒蒲城人永樂間隨母育於井姓者井欲以妻已子蘭兒執禮

投泉泉為之涸

蒲城志

劉氏西安衛千戶劉鉞女副使馬應祥妾也應祥病亡氏自縊死

馬志

曹氏西安左衛進士周鉞妻鉞知輝縣舟次直沽溺水死氏欲投河以

殉家人密防之不得遂乃斷髮守節事舅姑以孝聞後膺旌典

魏氏咸寧王彥中妻年十七夫亡勵志撫孤宣德中旌表

賈志

王氏長武魚志敏妻志敏亡氏不食死邑令周良士扁其門

長武志

田氏宜君賀恩妻恩病篤氏毀容侍湯藥晝夜不懈及卒自縊以殉

又同邑王氏夫死於烈火自刎而死俱旌表

宜君志

樊氏藍田李壽妻夫亡年二十一守節撫子正統二年旌表

藍田志

張氏涇陽李秉妻年二十而寡守節撫孤孝事舅姑正統時旌表

賈志

陳氏膚施人指揮王敏之妻夫亡自縊時年二十正統中旌表又同

里陸立望妻張氏年二十而寡撫孤守志吳著妻董氏夫亡無子

守節終身張於正統時旌表董於弘治時旌表

延安府志

張氏鳳翔劉榮妻年二十夫故守節撫子正統中旌表

鳳翔志

曹氏岐山李賜妻年二十四守節教子俊官叅政正統時旌表

馬志

趙氏郃陽李十一妻夫亡守節又輸粟賑飢正統時旌表

郃陽志

梁氏洪洞主簿李官妻華州人夫卒氏年二十四守節八十三歲卒

同邑兵科給事中董思恭妻姜氏亦以守節稱正統中俱旌表馮志

時氏綏德王淑妻淑爲寧夏守備戰歿氏自縊死宣德九年旌表淑

從孫敏妻趙氏夫亡亦自縊正統六年旌表

綏德州志

陳氏郝郁妻綏德人年二十夫亡守志孝親撫子正統五年旌表賈志

栢氏延安衛指揮時清妻清陣亡氏年十八無子守節卒年八十三

後旌表清弟源妻張氏米脂序班某女母亡痛哭出血而死延綏志

董氏長安縣民妻夫亡事親鞠子誓不二事景泰中旌表馬志

董氏咸陽趙潤妻潤亡守節景泰五年旌表

咸陽志

陳氏臨潼尚書呂震妾年二十震卒守節五十餘年景泰時旌表馬志

田氏藍田兀雲妻雲亡氏年二十深處閨閣至親罕見其面常懸一

鈴於門楣遇人至即避之其守身嚴謹類此景泰中旌表藍田志

吳氏仇秉陵妻費氏張翼軫妻皆三原人吳年二十六而寡費年二

十五而寡俱奉姑育子誓不他適吳氏景泰時旌表費氏成化時

旌表又王仲禮妻任氏夫亡年二十四守節四十年三原志

許氏扶風李實妻夫亡事親至孝守節三十年景泰二年旌表實志

暢氏王瓚妻王氏安志和妻俱乾州人暢年二十六夫亡無子守節終

身王年二十七夫亡子幼守節至七十歲景泰時同旌乾州志

孫氏咸寧趙聚妻年二十六守節孝親育子天順時旌表咸寧志

趙氏南鄭李原妻年二十二而寡守節撫孤卒年八十有四漢中志

劉氏城固湯銘妻銘亡氏年十九撫一歲子成立守節六十三年馬志

任氏商州苟琬妻年十七夫亡守節四十年天順間旌表商州志

趙氏同州王琛妻琛早逝氏撫孤守節天順間旌表同州志

趙孟英長安人許字王敷典未婚敷典沒英同母往弔觸棺而死賈志

蔚氏長安王恭妻劉氏張進妻蔚年二十八而寡劉年二十六而寡

俱守節終身成化二年旌表

長安志

朱氏咸寧舉人趙端妻年二十二而寡養親撫孤成化時旌表

賈志

宋氏咸寧人適歸德趙琳琳赴京暴得狂疾夜乘馬去家人物色無

所得遂之自死矣氏為位發喪以其衣冠葬焉時年十九一子甫

晬餘氏誓與兒為存亡姑老病疽氏日一舐濯之竟愈姑死葬稱

子事成化丙戌有司上其節詔旌其門

李東陽集

杜氏咸陽劉五妻年二十守節成化間旌表

馬志。按賈志作長安人

劉氏富平燕敬妻年二十六而寡躬紡績事親撫子成化四年旌表

又張傑妻宋氏夫亡守志事親教子苦節歷四十年

賈志

史氏潼關吳錦妻年二十八而寡事舅姑執婦道成化五年旌表

賈志

楊氏藍田李俊妻年十九夫亡翁姑哀其年少竊議更嫁氏知之欲

自縊翁姑聞而止教子廷實任蒿縣訓導狀上詔旌表之

藍田志

李氏張福妻涇陽人福卒氏年二十三守節四十年以織紡嫁福三

妹撫孤成立又同邑劉釗妻甯氏馬駮妻趙氏夫亡守節不渝成

化中並旌其閭

馬志

王氏三原申瑾妻太宰端毅公恕女弟適瑾後敬事翁姑親操井臼

瑾凶丸熊課子矢志栢舟三十餘年如一日兄恕為表其墓

三原志

韓氏舉人靳希顏妻保安人年二十夫亡撫二遺孤苦節七十年

賈志

馮氏甘泉鄭曼妻夫亡子幼紡績養姑成化時旌表

賈志

劉氏李榮妻保安孝子劉俊之妹年十八適榮甫六月榮卒氏哀慟

欲殉其姑防之密氏婉言寬慰俟姑寢縊死柩前事聞旌表又同

邑王榮妻朱氏亦以守節旌

馮志

高氏生員楊光諭妻寶雞人氏年二十四夫亡撫孤養母艱辛脩嘗

壽七十五成化中旌表

賈志

黃坤貞南鄭林輝祥妻年二十二夫亡撫子惟聽官至推官次惟惠

亦成立年七十終始一節成化中旌

續文獻通考

紀氏榆林衛生員謝欽妻年十九生子甫三月欽赴鄉試卒於西安

氏聞即為同窆計以翁姑嚴備乃止後翁死事姑唐最孝鄉黨師

之又監生范宣妻戴氏年二十七夫亡無子孀居五十餘年與紀

氏同旌表

延綏志

周氏靖邊營千戶張鏞妻鏞亡氏年十九子潔方二歲氏撫之成立

七十餘歲卒潔歷官指揮

延綏志

梁氏舊安邊餘丁張紀妻年二十七紀死誓以身殉戚屬防之甚密

越三日竟自縊死事聞表其里宅

延安府志

姚氏王英妻商州人年十九英歿撫其子成立子亦妖氏與其婦姚

氏並寡居後皆旌表

馬志

強氏馮雷妻維南人雷亡強年二十九撫子仕政成立娶媳張氏政

亦尋卒張年二十遺子甫三歲張欲引決姑曰乃翁亡時爾夫如

爾子歲汝死弱子誰依耶姑婦同節成化中旌其門

賈志

張氏朝邑韓顯妻邦奇祖母也年二十七顯死守節五十年有司上

其事旌表又王享妻靳氏年二十七守節卒年九十亦旌表

馬志

劉烈女朝邑人也字里舍兒未行而里舍兒死女聞易服不食涕泣

請殉乃往就諸卜傭而質焉傭曰子志甚善然太過之行如衆笑

何女曰天下之理是而已矣苟心之安何恤於人言乃改女飾易

婦容縊而死焉

苑洛集

孔氏華州生員東允妻讀書秉禮允卒守節撫子子亦死偕媳宋氏

撫孫宋亦克盡婦道孝事厥姑督學扁其門為節孝雙全又東野

妻王氏守節五十餘年有司旌表

賈志

蔡氏石愷妻澄城人愷卒氏年十九生子甫六月時祖父母及孀姑

李氏俱年邁氏辛勤孝養孀居五十餘年成化十八年旌

賈志

張氏邠州劉晰妻劉氏曹剛妻夫亡守節成化時旌表

賈志

劉孝姑中部劉準女準以諸生死非辜女年十六取其書焚且泣曰

今若此讀書何為抱父屍而絕有司為營葬旌表

馮志

程氏党爵妻中部人年十九夫亡撫遺腹子漢漢又早卒與媳王氏

同心守節撫孤孫繼芳母道婦儀鄉里稱焉

賈志

李氏高俊妻綏德人年二十夫亡自縊成化六年旌表

馬志

李氏鄜州王讓妻夫亡守節成化十六年旌表

李氏姜耀妻米脂人耀蚤卒氏無所出舅姑欲嫁之氏曰家貧親老

婦往誰奉起居乎不然從夫久矣善事舅姑送終盡禮苦守終身

有司旌表

賈志

張氏神木張銳妻銳為宣府叅將正統時扈從死於紅門兒氏年二

十三守節撫孤子堅仕至大同總兵

廷綬志

趙氏內江知縣張應登妻咸陽人夫亡守節屢膺優詔同邑巴縣知

縣谷賑妻王氏孀居勵操至八十二卒生員張英妻杜氏年二十

六守志至八十五卒俱於弘治中旌表又里民魏崇儒妻許氏年

十九而寡守節終身

賈志

王氏藍田李高妻高死氏年十九誓死不嫁後舅姑及夫弟李田婦

劉氏相繼亡遺二弟二姪長者提挈少者乳抱氏哀毀幾絕盡易

釵釧衣物躬親舉葬事寄居母家以績緝自給悽楚萬狀孀居五

十餘年

賈志

史氏梁茂妻岐山人年二十五茂卒孀居數十年終無異志茂弟倫



妻謝氏年二十二倫卒誓不再適並立坊旌表馬志

陳氏吳四妻洋縣人夫死於戰氏哀痛自傷足不出戶者三十年弘

治中旌表賈志

王氏百戶王舉女也適歸德堡韋芳芳氏年二十生一子世江氏

日夜號泣將以身殉鄰婦勸以撫孤乃止世江稍長家益貧一日

屋舍焚蕩灰中得鎔金一塊鄰里以為烈火真金完節之祥也後

世江以軍功晉秩指揮又榆林衛軍郭瑄妻張氏夫陣亡守節四

十餘年延綏志

岳氏戶部主事王澄妻商州人少敏慧通孝經列女傳及唐宋諸詩

十七歸澄二十澄亡守節五十餘年病革時猶能遠聽知其所製

棺為樟木蓋靜極所致云弘治中旌表馬志

薛氏朝邑人夫亡守節弘治中旌表賈志

王氏澄城鄭伯玉妻年十七適玉生二子俱幼而玉亡姑魚氏孀居

氏承順唯謹成化二十一年大饑有勸之他適者氏以死自誓苦

節四十餘年邑令旌其門澄城志

李氏邠州任弘妻馬氏三水生員吳重賢妻俱早年喪夫零丁孤苦

守節終身弘治中旌表賈志

丁氏邠州張頽果妻年二十六夫故守節以死自誓年至八十又生

員劉璞妻任氏年二十三而寡守節三十餘年鄉人稱之邠州志

李氏綏德衛千戶王大瀛妻年二十九夫瀛死遺八子俱幼家徒壁

立氏守節堅苦督撫院道咸旌其閭後八子以武起家長曰威任

總兵又綏德衛千戶史琅妻高氏年二十九夫亡守節至七十餘

卒延綏志

高氏艾某妻米脂人夫亡氏年十六有遺腹以死自誓其父以存嗣

勸之氏泣而諾後生一子撫育成立苦節終身志

陶氏李應元妻米脂人應元官經歷卒陶即自縊死志

郝氏清澗生員張鳳妻年十八張氏舉人王綱妻年二十二並以夫

凶守節教子領鄉薦於弘治中旌表志

郝氏苗實妻清澗人太守郝安女實凶氏年二十子甫晬餘伯氏欲

強嫁之氏斷髮毀面以死自誓享壽八十一而終志

姬氏生員劉侍妻與平人侍凶有求婚者氏斷髮自誓後姑病割股

和粥以獻官府屢表其門志

張氏臨潼李萬庫妻居西門外暴雨自驪山下廬舍為圯其翁先登

樹垂手挽張張不肯從遂衝激死志

白氏鄭鼎妻高陵人鼎死氏年未三十守志教子子侃鄉舉官知縣

正德中旌表志

王氏朱威妻鄠縣人知縣琰之女十九歸威四年威凶生一子甫晬

姑已先卒翼有側室與其二子甚不惠共欲嫁焉誘之百方王誓

死不易抱哺其子竟至成立正德二年旌表志

魏氏生員王應元妻鄠縣人元死守志不二其子生員徵妻高氏以

微病故毀容輟餐日夜悲號成疾歿於守制之八月年十九官為

扁旌曰一門雙節志

張氏三原段顯妻年十九而寡事親孝撫子思明娶婦孫氏思明及

婦又早卒遺孫三人氏紡績撫育成立苦節四十年王恕溫純俱

為撰文勒石志

員氏裴昌妻渭南人氏年二十而寡姑老家貧親鄰勸令改事員以

死自誓躬緝績養姑正德十六年旌表志

馬氏張梅妻渭南人梅凶年二十舅姑父母並欲嫁之馬乃泣誓曰

我若有他天必死我若再逼我亦必死自是無復敢逼者馬孝

養舅姑訓女教子內外稱賢年八十終正德十六年旌表馬志

郭氏知縣劉廷瑚妻宜川人隨任盧氏值流寇破城同小姑丁香俱

赴井死里民郭景甫妻趙氏夫凶撫幼子維聘既長遂縊死夫塚

上院道旌表賈志

趙氏宜川張千妻千逝氏年二十無子兄逼之嫁則以死自矢壽八

十二卒院道旌表賈志○縣志千作遷

王氏毛雄妻鳳翔人年二十三雄病劇氏籲天祈以身代雄卒堅志

守節躬紡織事舅姑教子嚴而有方孀居三十一年子鶯領鄉薦

官知縣正德七年旌表馬志

馮氏生員何慮妻鳳翔人年二十五慮卒遺孤五歲舅姑在堂氏紡

績供養及歿喪葬如禮教子成立鳳翔志

劉氏李惇妻惠氏梁雲鵬妻俱岐山人劉氏孀居苦節教子憲登進

士正德中旌表惠氏年二十餘而寡事孀姑撫幼子慈孝備至年

六十餘終賈志

李氏陳情妻南鄭人正德辛未蜀寇至李從夫避兵至漢江未渡寇

忽至其夫與眾驚散氏疑夫死於水遂抱幼子赴水死賈志

徐氏榆林衛應襲何承爵妻年十七歸承爵三年而承爵死遺腹舉

一子氏備紉為事親撫孤資鄉人稱為何孝婦後數年翁姑相繼

凶氏荷土成墳足不出閨門者三十餘年子成立襲職千戶巡撫

李尚智旌之又榆林衛應襲崔鎮妻文氏年二十六鎮凶子長浩

長性俱幼文撫之成立官俱至參將又衛應襲梅禎妻黃氏年二

十禎卒勵志守節翁利豪右路欲奪其志氏力拒之不克號呼四

鄰控於巡撫張縉得以節終又衛諸生趙鉉妻錢氏鉉死子克紹

方四歲錢勵志撫孤克紹登正德鄉試錢以壽終延級志

高氏李承祖妻榆林人父汝榭官薊門副總承祖隨之官病死高遂

自縊薊鎮巡按題請旌表延級志○按神木志作高氏李承祖弟李繼祖婦繼祖卒於兄任氏聞而自縊

與鎮志微異未知孰是

王氏屠阜民妻興安人年二十五民故乏嗣氏誓死不食自縊者數

次隣婦以翁姑無依勸止紡績事親甘貧守節五十餘年卒正德

中旌表賈志

翟氏興安張价妾正德中价任孟縣令卒於官氏同嫡劉氏扶柩回

籍葬時自縊以殉時年十八興安志

王氏生員栢壽妻興安人壽凶氏年二十一家貧甚中外無依氏守

節事親有勸令改適者氏斷髮自誓孀居六十餘年疾篤不容醫

診視其守身嚴謹類如此賈志

劉氏梁廷臣妻興安人廷臣故氏年二十一遺二孤在襁褓家貧其

舅姑欲令改適即剪髮毀面以死自誓有豪豎強謀奪節氏執刀

刺頸血流滿地舅姑亦為感泣貞節五十餘年興安志

王氏戶部主事張鳳翔妻洵陽人鳳翔卒母老子幼氏仰事俯育慈

孝備至又同里御史許中妻周氏亦以守節著聞官俱給廩終身

洵陽志

常氏漢陰溫德潤妻正德末年有謝姓者鬻產得二十金被酒亡失

氏拾得之翌日謝酒醒索金不獲欲為自盡計氏知急取還謝封

識如故章邱太常卿李開先為作還金傳漢陰志

南氏山陽太學生郭邦屏妻屏卒氏年二十子未週氏抱子泣柩前

累年不哀忽有杜鵑拂其首哀啼紅血旋繞竟日乃去賈志

劉氏商州貢生王懋德妻夫卒於京氏撫孤守節正德中旌表賈志

周氏姚連妻廉氏李吉妻皆澄城人周年二十夫亡零丁孤苦晝耕夜織孀居五十餘年廉年二十四夫亡誓不再醮孀居六十年正德中咸加旌獎焉馬志

高氏宋堯妻華州人堯卒氏年二十服砒霜死堯弟宰妻東氏年二十五宰卒守節五十二年里人稱為雙節云賈志

嚴氏華州生員適遠妻遠卒氏矢志從葬親隣咸以子幼無托勸之氏曰吾死以明志安知其他遂自縊死馬志

趙氏姜溢妻蒲城人溢為山陽掾正德戊寅八月賊陷山陽擊傷溢將掠趙去趙抱溢痛哭罵不絕口遂遇害溢頃得蘇馬志

王氏戶部主事李世榮妻乾州人榮卒氏年二十五惟一女屢迫饑寒堅節不渝當道命本州月給廩餼又同邑周氏錦衣衛吳珩妻珩卒於官氏年二十六攜二孤負骸歸葬事姑以孝聞正德時旌

丁氏武功人喬銓妻夫卒無子守節四十年正德八年旌武功志

王氏長武郭惟通之母二十而寡守節育子終身如一日邑令馬如蛟旌其門長武志

郝氏生員劉矯妻清澗人通子史善楷書矯卒氏年二十七無子以死自誓壽七十三終賈志

徐氏右護衛百戶吳濬妻徐氏右護衛陳大策妻施氏生員陳大勅妻姚氏韓俱妻皆長安人徐年十七胡年二十四施年二十六並

以貞操著姚奉翁姑孝養特至子詢始四歲而孤課之登進士嘉靖時詔俱旌表賈志

王氏生員顏訓妻長安人訓卒氏絕食死世宗朝旌表賈志

關氏生員濮仕通妻長安人仕通故氏哀毀骨立見為仕通洽柳謂其姑曰大之容兩棺可也伺間自縊死後啓篋見所製衣衾皆兩

乃知其志素定云馬志

梁氏胡廣妻咸寧人廣卒氏年二十一孀居四十二年嘉靖中旌表

又馬自高妻周氏夫亡無子守節終身于廣福妻張氏年二十九

史炳訓妻李氏年三十皆以守節稱李壽至七十卒賈志

沈氏咸寧楊光斗妻年二十四甘貧守節撫孤繼成立娶閻氏繼又

早亡閻守志撫子入黌序沈壽八十九閻亦七十卒河東李楷有

世節詩序又陳經諒妻武氏年二十四韓澍妻王氏年二十九俱

以守節著聞咸寧志

常氏咸寧正誼女幼嫻女訓未及笄失怙哀毀幾喪明適翁氏事舅

姑如事父母祖姑高氏少寡守節壽八十五齒落不能啣蔬果常

每善調甘脆百方願養高語曰汝孝非尋常所及願汝生好子孫

報汝後果衣冠不絕咸寧志

萬氏興平生員閻伯仁妻夫喪三子皆諸生相繼殂逝萬率諸婦守

節終身邑令章評表曰一門四節興平志

陳氏閩臣妻臨潼人臣病死陳悉力營葬事葬時自縊死馮志

宋氏臨潼楊斯條總妻年十四歸斯條甫半載夫亡持節四十餘年

撫前妻子不異所生厥子亦敬事之終身無間焉臨潼志

邢氏高陵張得祿妻得祿死河州邢哭幾絕舅姑欲奪其志邢曰婦

事二夫禽獸行也使其無子尚不忍為况有孫可守耶後從叔妻

龐氏隣人王銳妻宋氏皆以新寡遇荒年不安其室謀諸邢以圖

存邢曉之切至龐宋感其言皆守節無二高陵志

高氏羅季士妻鄠縣人季士知永和縣氏適季土方八月而季士卒

氏苦節二十餘年又里民曹曰龍妻王氏年二十三守節撫孤有

求婚者氏持刀携子以死自誓當道給糧旌表賈志

張氏劉和妻韓氏趙玘妻涇陽節婦也張年二十五而寡事姑以孝

聞姑歿三日不食孀居五十八年韓氏年二十五守節紡績以事

舅姑取木葉野菜以自給孀居四十七年俱旌表

馬志

祈氏王朝妻涇陽人守節撫幼子值歲儉家人私語曰生之弗謀何

節之顧氏初聞痛哭以頭觸柱曰吾忍死稱未凶人為王氏一凶

肉耳令吾志不白者吾頭且與柱碎矣家驚起持止左面青痕終

身人謂烈氣所凝嘉靖二十年旌表

馬志

白氏涇陽舉人張朗妻朗因會試死於途遺子方七月氏年二十二

孝事孀姑撫子成立嘉靖間有司表其閭又里民何瑚妻宗氏夫

凶撫遺腹子成立至七十一終事聞旌表

涇陽志

何氏涇陽魏潔妻潔遊梁吳間何氏朝夕奉姑趙氏自上食歲時衣

服皆希意先為之後姑老病癱親嘗湯藥起居扶持夜即卧榻下

如是者二年姑視之猶潔在也氏善自治生晝夜操作不怠嘉靖

三十二年卒子學曾官至兵部尚書

邱隅集

閻氏涇陽周仁學妻年二十學凶親饋食於穿穴者語之曰穿必大

其壙穿穴者應且笑謂少婦將欲從夫地下乎葬之先一日自經

死

涇陽志

商州民盧清妻韓氏耀州生員成紹妻安氏俱夫亡製大

棺棺成二氏皆自縊死遂合窆焉

馬志

李氏涇陽呂柎妻事繼姑侯氏甚謹躬操薪水朝夕上食每恨不及

事嫡姑宋氏遇忌辰或悲思泣下翁姑卒時並哭至痛毀瘠撫叔

氏遺孤成立為之娶叔氏子媳皆母事之壽七十二嘉靖三十三

年卒

邱隅集

楊氏涇陽秦某妻閭中饑饉盜賊橫肆氏墜樓不死投井死雷禮吾

女年十二避兵於樓從樓見被掠者醜之墜樓死雷氏適韓某早

寡而貧兵至携孤避樓上樓陷棄孤亦墜樓死又有王三遠爲人備耕其妻兵欲污之給白閉門投井竟死井中

艾陵文鈔

呂氏三原張鸞妻鸞卒呂年二十撫孤尚永克底成立娶常氏尚永亦早卒姑婦同居邑稱雙節常卒子元琛廬墓三年有司以節孝

奏允旌表

馬志

王氏名蘭卿本娼家女蓋屋張附翽妾翽爲青州府推官病卒氏服

毒以殉

馬志

辛氏王君玉妻任氏何器妻俱蓋屋人辛年二十五甘貧守節六十餘年以子貴贈儒人任年二十三苦志撫孤至九十七終俱旌表

賈志

魏氏蓋屋吳鈞雷妻夫死氏年二十二家貧甚織履以自給遺孤增光擇師教之登嘉靖辛酉鄉試爲廉吏何司空表其里曰栢舟嫠

美又諸生吳養蒙妻何氏王允功妻趙氏成九叔妻王氏俱無子守節終身

蓋屋志

李氏張定妻渭南人年二十六定亡無嗣兄嫂納求者賄誘之百方不能奪氏素孝謹得舅姑心爲立嗣終志及舅姑歿嫂奪其繼嗣

脩極困辱李志益堅嘉靖二十二年旌表

馮志

安氏張猷妻渭南人猷亡即自縊以殉嘉靖三十二年旌表

馮志

杜氏馬連妻渭南人連早亡杜營葬畢即自縊

渭南志

竇氏韓能妻惠氏劉五妻仇氏強果妻俱富平人也竇年二十五而寡事翁姑以孝聞孀居三十八年惠年二十三守節終身仇夫死

無嗣守節至七十餘卒

賈志

楊氏李彥章妻富平人章亡紡績以鞠幼子姑憫其貧苦勸改節氏不可嘉靖乙卯饑巨室謀娶之氏皆痛罵慚去鄰婦哀而與食亦



不食遂與子並餓死馮志

常氏延安衛沙總勳妻勳早亡氏年二十餘刻木於室事之如生垂

四十年延綏志渭南王提衡妻張氏夫亡守節自塑夫像朝夕哭奠

鄉里稱焉渭南志

李氏楊子喬妻膺施人夫亡氏年十八欲以死殉家人密防之成服

畢暗入夫書室內自縊死嘉靖中旌表賈志

李氏焦子學妻延長人夫亡撫孤辛苦萬狀嘉靖中奏聞建坊又董

惟新妻王氏諸生李鏗妻趙氏並以年幼喪夫撫遺腹子成立而

王氏則蒙督學旌表焉賈志

田氏鳳翔人田璋女適庠生杜文文早逝氏年十六子孟春甫兩歲

教育成立翁姑相繼卒氏竭力以禮殯葬其兄勸其改適遂終身

不登兄門嘉靖中旌其廬鳳翔志

朱氏副千戶應襲郭文妻鳳翔人年十七夫卒撫子成立子亦早卒

媳周氏有遺腹子欲墮之他適朱百方調護郭氏之宗賴以不墜

嘉靖中撫按旌表又邑庠生王某妻周氏夫亡守志撫子應元方

二歲後以子貴贈孺人鳳翔志

劉氏鳳翔民李正芳妻年二十九守節奉姑姑病篤氏焚香默禱願

以身代姑尋愈人以爲孝感所致事聞旌表鳳翔志

李氏岐山楊桂總妻桂前娶生子三歲氏生子甫六月桂卒氏年二

十四家計貧苦紡績自給撫二孤成立人皆不知爲異出壽八十

卒岐山志

雙烈女者扶風張文玘之女文玘三女長名存兒次名桂華皆及笄

季名瓜女未笄里中惡少杜景花瞰文玘夫婦往田乃潛入求合

逼其長者脅以白刃長不從殺之繼侵仲仲又不從亦殺之並殺

季女以滅口殺而未死遂明其事萬曆時建坊旌表

扶風志

董氏胡宗顏妻扶風人夫凶年二十一甘貧撫孤五十年嘉靖中旌

表又通判胡宗儒妻高氏年二十四守志撫孤勤苦七十年撫按

俱旌之

賈志

劉氏郿縣生員王麟妻嫁踰期而麟物故劉年二十五義不他適孀

居教子六十餘年邑令旌表其門

郿志

王氏唐祿妻南鄭人祿故氏年二十七家貧鬻衣營葬誓死守節以

紡績撫教二子成名孀居四十年又生員強振妻田氏振卒氏年

二十遺孤一歲甘貧苦節四十餘年嘉靖中俱旌表

馬志

余氏褒城諸生馬安然妻年二十餘夫死遺孤甫八月撫摩成立為

諸生旋又死復與婦撫諸孫年六十一卒

褒城志

方氏城固生員杜臣妻年二十三臣亡氏慟哭背盡裂撫二子曰汝

父死我不當生汝等在我又不當死忍痛存孤年七十九終

城固志

夏氏王善總妻城固人年二十五夫凶撫遺孤與貧甥党傑一體教

育俱得成立輿論美之

賈志

張氏庠生段平妻洋縣人年二十而寡撫育遺孤自以詩書訓其子

守節三十餘年嘉靖間建坊旌表

洋縣志

王氏吳天爵妻洋縣人年二十夫卒無嗣孝養舅姑舅姑歿廬墓三

年築土成墳嘉靖中旌表節孝又楊仕妻王氏年十八夫凶家勢

剝落撫育遺腹子竭力以事舅姑督學楊守謙表為節孝

賈志

陳氏西鄉符鉞妻年二十而寡事舅姑曲盡孝養壽八十五卒又張

氏闔朝順妻年二十九而寡後三月生遺腹子家苦貧矢志不渝

事聞並令建坊旌表

西鄉志

蔡氏大學生駱文彥妻寧羌人文彥遊大學氏傾奩給之年二十六

彥逝一子甫數月家貧塵釜斷炊晏如也拮据撫子入泮子旋歿  
亡復撫二孫壽八十餘卒

漢中志

張氏鈕尚忠妻寧羌人聰明能文年十五夫故無子矢志守節善事

翁姑嘉靖中奏旌其門

賈志

劉氏陳寬妻榆林人年二十七寬病語曰吾死後幸無他適劉應曰

諾寬死遂自經柩前事聞詔旌其門曰貞烈

馬志

馬氏榆林衛千戶張秉元妻秉元卒氏仰藥殉巡撫楊守謙捐俸葬

焉旌其門曰貞烈榆林衛餘丁趙馨妻薛氏馨卒氏自縊死巡撫

張問行旌其門

延綏志

趙氏榆林衛百戶王勤妻勤禦賊於建安僅為賊所殺氏聞之痛哭

三日不食自縊而死時號為雙節詔旌異之

馬志

張氏榆林人總兵姜爽妻邊氏榆林衛應襲白牙妻俱撫孤守節四

十餘年榆林衛舍餘馮教妻麻氏年二十七教死奉姑甚孝自以

詩書課二子嘉靖中長子時吉領鄉薦

延綏志

李氏榆林衛指揮吳秉懿妻夫卒即飲藥死家人救之復甦自是茹

藥自苦每晨起焚香禮觀音祈作清淨身聞者嘉其苦節又本衛

武舉田奮妻史氏奮死撫幼女守節家貧無倚親屬周給多却而

不受嘉靖中遭歲凶數日絕糧母子閉門待斃巡撫張珩聞之月

給米贍焉又衛民李友梧妻陳氏年二十八夫凶家苦貧氏上奉

姑嫜下撫幼孤備嘗艱苦年七十二卒巡撫張珩表其門

延綏志

丁氏太常丞紀世梁妻榆林人世梁卒丁無出有三妾各舉一子丁

躬親撫鞠恩義備至三妾亦同以節稱諸子相繼登科第又榆林

指揮謝戴總妻唐氏戴先妻遺三子二女唐恩養備至戴卒長婦

紀次婦田俱少寡唐率二婦守節者數十年又鎮羌所應襲張傑

妻李氏年十九寡無子苦節五十年

延綏志

蕭氏王正蒙妻平利人蒙亡三日自縊死嘉靖四十二年也

馮志

黃氏張必奇妻漢陰人必奇病篤氏以無子許與俱死及卒營葬即為雙墓既殯召族人至盡推家貲散之以鐵斷門不食十二日死時嘉靖四十年也

馮志

白氏漢陰生員王一鳳妻年二十四鳳亡孝舅姑撫幼子苦節五十年又張世華妻陳氏年二十七甘貧苦節四十七年里民劉仕信妻王氏亦守節四十年

賈志

劉氏雒南生員李翠妻翠娶劉之夕夢門豎聯曰美玉輝光揚萬里真金鍛鍊歷千迴後翠卒劉年二十三誓不再適舅姑欲奪其志氏佯許之至夜自經死有司以聞建坊旌表時直指贈聯即前所夢之句云事在嘉靖三十六年

雒南志

冀氏雒南張見龍妻年二十七矢節撫孤三十年其伯嫂郭氏仲姊李氏並守志不貳里人稱之

賈志

翟氏雒南人夫凶典簪衣以供葬事遂自縊於墓側越三日面色如生香氣芬襲事闕建坊旌表

賈志

巧兒王璋女同州人受州人張黑流聘未行而黑流死璋與妻往吊女遂自經於室與黑流同葬焉嘉靖二十五年旌表

馮志

閻氏任世威妻朝邑人嘉靖中世威病死舅姑利人聘以計強載其家氏不勝憤以被蒙面自刎死又張騰霄妻王氏徐福妻岳氏韓迪妻楊氏王來召妻梁氏皆夫亡守節並膺旌典

朝邑志

党氏羅詢妻朝邑人嘉靖二十二年大饑窮民劉曹邦等為盜掠詢及富民數人於河濱盡殺之還劫其室詢子亦遇害氏匿積草中免後事寧諸被殺掠者皆畏不敢言氏獨憤訴當道初不為理氏

愈益憤恨至以豕穢塗口面肩夫脛骨號泣道旁冤聲動市人官為捕作亂者二十人置之法費

李氏朝邑錦衣衛總旗李德澄女也父卒獨與生母張氏處烈女覺其污也痛父無後哀母無依大哭三日服毒死時年十四苑洛集

雷氏大名府同知雷爵之妹適朝邑韓總宗年二十五總宗卒遭繼姑之虐怒輒以簪刺其股流血淋漓又遭惡叔凌害百端晝理生事夜則閉門痛哭徹夜有司上其事勅賜旌表苑洛集

許氏韓邦仁妻年二十四夫卒無子家用不足辛苦萬狀巡按下所屬辟節婦朝邑以十人應命巡按取年最少而無子者三人許氏

其一也苑洛集

屈氏朝邑韓邦靖汝慶之妻華陰都御史屈直之女也生十餘歲其父課諸兒讀經史安人刺繡其旁竊聽背誦通曉意義汝慶年

以神童名弱冠舉進士與安人稱雙璧詩文倡和如良友焉汝慶早歿安人後十四年而歿有女異痛其父母繼亡父集既梓而母

詩不傳以書貽許西康太史之女為母詩乞序其詞酸楚願借皮為楮削骨代頰以傳母集太史感而為之序謂有女如異五泉子

未為無子也列朝詩集

小桂韓城烈女小桂劉氏伶籍也誓願從良每伶氏問聘輒涕泣不食既長復有伶氏來問父母納其聘擇日將歸小桂知不能已大

哭服毒死苑洛集

秦氏李光被妻邵陽人光被病篤秦許以死殉被曰若第給我耳秦曰妾請先君死頃之秦果死後八月光被死時嘉靖丙辰歲五月

也馮志

馬氏澄城廉仲祥總室也年二十八廉亡氏撫育前妻子介過於所

生曰非此無以承宗祀也茹苦含辛年踰七十未嘗一日去介

亦忘其為繼母也又孫氏同邑白洪妻洪早卒氏孀居四十餘年

處妯娌以和睦育夫弟女如已出厚糴歸之邑令教左並旌其門

登城志

王氏韓城傅傑妻慶陽真寧清江提舉司道女聰慧貞靜甫八歲授

以內訓諸篇輒穎悟既歸傑姑李卧病十餘年侍奉周旋順適無

方教子學禮幼出就外傳入則自示之以禮夜則口授句讀又親

札影本以課倣書後學禮既登仕籍家稍裕氏尤以周貧濟急為

務年七十一卒贈宜人

苑格集

康氏武功康大史長女也通經史大義歸華州張之樂嘉靖丙戌槩

卒氏守節撫孤四十年有司旌其門

賈志

東氏華州諸生李子健妻歸健方九月而健卒遺腹生子守節撫孤

有司表之里民劉朝妻王氏年二十守節五十三年王錦繼妻陳

氏守節四十餘年又李道妾陳氏道卒撫子聘又早卒洎婦劉氏

撫教二孫以織紉自給苦節五十二年婦亦守節二十年

賈志

徐氏陳大宗妻張氏柴良妻黃氏楊信妻皆華陰節婦也徐年十九

守節至八十七終張年二十三守節總姑謀逼之氏引刀截髮逃

父母家守節四十六年黃氏夫死亦守節不二嘉靖撫按同旌

焉

賈志

馮氏周儀妻同官人儀卒馮慟甚不食欲死家人強灌之則嚙其杯

破曰我自安此奈何苦我至六日不死乃自縊柩旁

馮志

景氏和順知縣白水武定繼妻定前妻遺一子尚知方五歲定歿時

景氏守志撫孤視如已出延教勤劬俾至成立時稱繼母之賢

賈志

劉氏邠州進士席勤學妻王氏楊宗仁妻夫亡守志嘉靖時旌表

馮志

楊氏武功康栗總室年十七歸康明年康遘疾不起氏堅心以死殉晨起給言渴索醯湯飲砒三兩乃登廁歸又索醯湯令極熱連飲之姑入見其色大驚搜其袖遺砒在焉以藥與之不納逼之曰已矣吾所以爲以死爲樂生爲苦也奈何以苦事逼我啓篋出衣皆手製以送死者爲著之著畢而絕

王洪  
陵集

康氏武功郎中康浩女適靈寶生員楊宋宋疾康許殉舅姑百諭不能解乘間吞砒殞而死有司奏聞旌表

馬志

景氏馬萬衢妻柴氏康滿妻俱武功人景年二十三夫死守節三十年嘉靖十三年旌表柴年二十六夫死守節四十餘年嘉靖十七年旌表又張脆妻楊氏年二十五而寡守節三十年亦旌表

馮志

王氏武功郝讓妻讓少失怙母武氏年二十寡居辛苦萬狀至讓成立爲取婦有子子天讓亦卒其姑及王氏親黨皆勸之嫁氏曰姑

昔值舅亾盛年艾容誓死不適人者爲讓耳讓今不幸死無能終養妾忍更他適耶堅意自守力作養姑終身不衰又同邑李銳妻夫亾貧無依挈女居族兄家以織紉自給女既嫁壻復死乃更與女居節操凜然幾四十年有司以聞於上云

武功志

齊氏淳化監生郭縉妻夫亾無子縉有二妾各生子俱改適齊年二十七以死自誓撫育妾子俱至成立嘉靖中巡按給帛米知縣題表其門又邑庠羅九淵妻袁氏年二十八夫卒甘貧撫孤年七十卒貢生羅雲鳳妻鄧氏年未三十苦志撫孤邑令並旌其門又里民王彥學妻楊氏夫亾守節撫孤至年七十卒子永壽嘉靖癸卯舉於鄉生員羅天祐妻郭氏夫亡守節三十年嘉靖時旌表

淳化志

王氏鄜州柳輔妻生女名瓊女年方十六嘉靖癸丑寇至諸婦女相與謀曰如爲賊掠若之何瓊女曰惟死耳賊至女痛哭大罵伏地

不起賊知不可奪殺之王氏尚抱幼男賊以皮索欲引去亦落崖死之後輜數日還收子母屍葬之其色如生又吉孝妻王氏亦為

賊所掠氏罵不絕口賊怒殺之

鄭州志

忽氏中部舉人劉侃妻侃卒有子甫二歲忽自經柩前姑張氏泣諭

曰孺子絕乳是斬夫嗣也忽氏乃撫孤守節歷五十餘年撫子芝

成鄉進士嘉靖中芝自疏母苦節以聞詔旌其門

賈志

郭氏綏德衛指揮陶輔妻正德四年輔陣亡氏撫孤子世臣植節四

十餘年綏德衛百戶余林妻柳氏林戰死氏守節四十年巡撫楊

守謙旌其門

延綏志

張氏喬遷妻葭州人年十八夫亡事孀姑盡孝姑有疾籲天祈以身

代撫藐孤成立遊宦歷有政聲卒年八十六旌表

賈志

白氏廣威將軍鄭紀妻神木人夫死即自縊賴救不死跪泣柩前晝

夜不起飲食不進七日死又高氏神木趙元妻嘉靖五年元陣亡

氏即柩前自縊死通判莞顏旌其門

神木志

劉氏長安馮友總妻河南衛輝通判璽女也三歲喪母即知哀慕長

事繼母邢媪甚孝適友奉姑田氏色養備至比臨終執氏手連呼

曰我孝婦我孝婦云友官保定府同知致政歸前妻翟氏父母貧

甚氏為衣食之終其身以禮葬焉撫育諸從子女婚嫁悉厚遺之

恤貧睦族備致其誼隆慶己巳四十六卒

馮少墟集

賀氏咸寧舉人趙斌妻斌死京師氏聞訃痛絕誓以死殉一日給女

取水遂自縊女亦奮投井中鄰人救免隆慶初旌表又黃運煜妾

杜氏夫殂縊於柩前直指旌其門

賈志

許氏郭民德妻魏氏王施義妻張氏李宗儒妻員氏張崇祿妻劉氏

王猷妻皆咸陽節婦也許氏年十九魏氏年二十並守志不二張



氏員氏俱二十一而寡守節至五十年劉氏痛夫早逝茹藥餐冰以終其身賈志

宋氏張綸妻臨潼人綸死遺子女皆幼家貧甚氏甘貧守節叔翁逼令改適氏仰藥死里人傷之賈志

劉氏臨潼宋瑗妻年十六適瑗踰六載瑗故守節四十餘年又張廷舉妻趙氏舉亡孝事翁姑守節五十年邑令旌表臨潼志

王氏高陵蕭憲妻夫亡氏矢志不貳子生員韶亦早卒妻高氏同姑守節隆慶三年春旌為一門雙節婦續文獻通考

王氏張文囊妻鄠縣人年二十三文囊病卒遺二孤俱在襁褓氏堅持貞節撫育成立當道給月糧旌表壽八十二終鄠縣志

李氏舉人張初妻鄠縣人夫卒氏年十九子女無出日夜哭泣焚香告天誓不他從守節四十餘年事舅姑以孝聞賈志

馮氏生員史宗直妻鄠縣人年十四歸直五年夫亡氏不食數日卒遺女甫一歲後三年忽奔哭於父母墓上家人抱之歸而氣絕人以為史氏節孝焉鄠縣志

王氏涇陽縣民任盡孝妻夫亡守節隆慶元年旌續文獻通考

吉氏盩厔武崇義妻崇義病疴數月氏夜不解衣目不交睫及亡絕粒數日不死解腰絰自縊絰又絕乃飲鴆死又劉氏同邑舉人張學詩妾學詩病死氏哀毀不食每哭輒絕而復甦若是者累旬家人防之密不得死久之防者稍懈遂潛啓柩帷自縊死盩厔志

李氏延西衛生員張世勳妻世勳早故李誓不再適隆慶元年旌續文獻通考

湯氏李光達妻膚施人十九而寡碎首刺目欲以身殉父母止之氏晝夜泣於柩前一日若見夫以車來迎溘焉而逝即同葬焉賈志

吳氏劉啓業妻鳳翔人十六守節以織紡養姑姑歿喪葬盡禮卒年七十八申請建坊月給米布仍免其差役又同邑彭彥妻王氏夫亡撫子子復天遺腹生孫媳復改嫁氏孤身以織紉撫之至於成立

賈志

宋氏岐山諸生張邦祚妻年二十夫卒誓不再醮以織紡自給年七十卒又楊棟妻宋氏夫亡守義以死自誓甘貧撫孤邑令馬彥卿

並旌其門

岐山志

彭氏張附鳳妻寶雞人鳳任通判卒於官氏年二十四哀慟幾絕生遺腹子誓以死守艱辛萬狀壽八十卒

寶雞志

彭氏寶雞強時修妻年二十一喪夫守節五十六年選貢強時進妻李氏年二十九喪夫守節五十一年院道扁曰一門雙節

寶雞志

高氏寶雞諸生楊邁妻年十八夫亡翁姑俱老紡績供養三十年洎歿喪葬如禮又高氏同邑諸生強吉妻年二十夫亡守節四十八

年院道俱表其門

鳳翔府志

李氏生員尹來聘妻南鄭人夫亡氏年二十九孝養翁姑殯葬如禮教子作賓登鄉試官通判壽八十有五

賈志

任氏賈廷臣妻洋縣人臣亡氏年二十六無子勵節孀居紡績以自給五十年如一日隆慶中旌表

賈志

楊氏畧陽庠生劉恢妻讀書明大義勸恢力學恢卒氏年二十生子相舟自矢奉文旌表歲加給卹

縣志

李氏榆林衛千戶姬曉妻曉母病卧榻者三載氏事之甚謹鄉人稱為孝婦嘉靖初曉隨征大同死於敵氏年二十九遺孤爵方二歲氏撫之成立守節至七十八終又衛指揮傅潛妻張氏潛戰死氏守節三十餘年巡撫何東序表其門

延綏志

李氏高州人邵可立母翁老患癱姑歿六子俱貧營生於外氏晨昏供養數載不渝子可立登進士官至方伯南州志

楊氏王思謙妻朝邑人夫亡誓不他適舅姑屢欲奪之故食以糠粃氏守益堅隆慶己巳舅姑陰納任姓之貲立逼就車氏抱幼子痛哭曰吾舍汝去矣遂自縊死賈志

魏氏趙大彥妻郃陽人彥病歿氏自經死賈志

陳氏杜冕妻澄城人冕任眉州判卒於官氏年二十七扶柩歸家家計益索饑饉相繼堅貞茹苦四十餘年邑令陳力旌其門澄城志

趙氏韓城晉四妻四死氏年二十二子昭方在抱兄弟欲嫁之氏矢志不從食貧撫孤每汲水河上必負其兒至水所則置之平地上汲已並負而歸卒以為常後子生孫五人曾孫繁衍澄城志

王氏蒲城張良玉妻年二十六夫亡無子盡以家事付仲兄自鎮閉一室蓬首垢面不與人接止留一婢一婦為炊助後以疾終鄭傑妻党氏年二十夫卒剪髮自誓以織紡養親撫遺腹子有成賈志

雷氏同官馮宣妻宋氏王民妻王氏孫守忠妻俱早寡守志嘉靖時同旌又習啓蒙妻龐氏夫亡年二十一上事翁姑下撫遺孤艱辛萬狀至八十二卒有司旌其門同官志

楊氏白水生員許昌言妻言故氏年二十一子尚儒方在襁褓翁姑相繼亡仲兄利其產欲奪節氏坐卧佩刀以死自誓後尚儒及孫性皆補弟子員氏年八十卒白水志

景氏邠州民池鳳鳴妻鳳鳴疾卒景氏矢志不貳以壽終隆慶四年旌續文獻通考

張氏神木生員劉祚妻夫亡年二十四甘貧守節撫子克篤成選貢任蘭陽縣丞里民單汝科妻李氏年二十八夫故守節五十八年

旌續文獻通考

張氏神木生員劉祚妻夫亡年二十四甘貧守節撫子克篤成選貢任蘭陽縣丞里民單汝科妻李氏年二十八夫故守節五十八年

子單濤授秦府典儀兩院旌表給米帛焉

神木志

劉氏生員楊楠妻長安人楠卒氏視棺歛畢即入室自縊死萬曆中

題旌

賈志

朱氏晉以正妻長安人以正卒氏年十九子幼孤寡以緜紡自給守

節四十九年巡按金毓峒特疏請旌

賈志

呂氏長安張濟妻濟亡氏年二十一遺孤甫二歲舅姑欲奪其志氏

矢死守孤五十七年奉文建坊旌表孫鳳翼官潯甸太守人謂苦

節之報云

長安志

馮氏長安從吾女生而言動不凡六七歲聞從吾讀書聲即願聽時

或問其大義長適咸寧庠生王紹經相對如賓談必以道義從吾

奪官歸家人有私悔從吾多言者氏曰士君子立朝不如此安所

稱臣節從吾向紹經曰從此歸山惟有着實講學共肩斯道氏應

曰父平日不曾虛講如何至今才去着實從吾聞之懣然其事祖

姑及舅姑事無巨細無不殫力萬曆丁酉年二十二卒

馮少墟集

龐氏咸寧進士楊重熙之繼母也重熙生七歲而失其母蕭九歲而

失其父种氏適种僅浹歲子女無出而种卒氏撫棺且泣且誓曰

傷哉天乎未亡人不難從夫於地下第有此孤在耳所不撫摩此

孤而有異志者有如此棺于是茹荼孤闈幾三十年以壽終至今

鄉族稱慈繼母者必於龐母焉

馮少墟集

李氏咸寧王用相妻用相卒氏年十九生子方五月苦節自誓事翁

姑存歿盡禮隆慶間採入世廟實錄萬曆三十三年賜粟帛旌其

門壽九十卒又邑庠生曹言妻黃氏年二十一言亡哭踊不食誓

以死殉翁姑泣諭始進饘粥撫孤成立守節四十八年道府咸旌

其門又里民馬遵賢妻楊氏夫亡無子以守節著聞

咸寧志

韓氏咸寧人孝廉李昌齡祖母十五歸李孝養備至撫孤昌齡至通

籍更歷艱辛屢經禍亂不少改文翔鳳有傳賈志

許氏趙良漢妻咸陽人夫亡守節撫前室子與生子無異家貧矢死

靡怨言萬曆十六年建坊旌獎馮志

翟氏興平諸生楊休母年十八守節王某妻孔氏年二十守節又里

民王璽妻姬氏亦二十守節家貧織紵為生萬曆中並旌賈志

任氏臨潼趙仕東妻年二十三夫故無出誓不再嫁以紡績事舅姑

苦節四十餘年邑令表其門又王務賢妻張氏歸三年而夫故有

富室求娶氏舉刀自誓守節終身陸志

趙氏史鸞妻臨潼人年二十夫故守節六十餘年其子永壽亦早故

妻王氏年二十七守節三十餘年孫講又早逝妻潘氏亦守節三

世貞操閭里重之賈志

牟氏臨潼冉天敘妻年十八夫亡遺腹六月有巨室以多金賂婚氏

剪髮毀面以死自誓壽九十四卒冉一清者天敘堂弟也妻方氏

年十六無子而夫卒哀痛欲自縊里黨為慰曰若死易耳如舅姑

何乃擇族子士秋嗣之泣曰吾撫此奉舅姑生無愧於嫂牟死亦

有以見冉氏兄弟於地下一門雙節鄉里重之縣志

姜氏臨潼庠生王汝松妻夫故守節撫孤備極茶苦其父蓋渭南孝

廉早世無子母強氏伶仃孀居五十餘年而長女適蒲城張某亦

少寡守義人謂其一脉貞操所遺云陸志

周氏舉人王廷金妻臨潼人嘉靖中廷金就試禮部歿於旅舍氏携

幼子扶櫬歸守節終身賈志

張氏王漢妻鄠縣人漢病誓與俱死及卒氏哭之正寢抵暮入室飲

藥死事聞樹碑表其墓張太微為述烈婦傳鄠志

仝氏李勤妻鄠縣人夫故氏年十八家甚貧遺孤未三月氏勤績維奉孀姑姑稱其孝既歿謁蹶龙葬事成禮厥子亦成立鄠縣志

榮氏藍田諸生張廷妻年二十六夫故遺孤甫三月姑及夫弟相繼淪亾榮力舉四喪紡績撫孤壽七十終有司旌之里民榮肇端妻

韓氏孫澤妻李氏蘭承賜妻謝氏皆守節終身賈志

葛氏生員閻稅妻藍田人年二十一稅歿五日不食死萬曆二十六年旌表馮志

樊氏藍田生員李高枝妻蘇氏劉弟妻俱年二十五夫亾守節樊氏家苦貧以紡績撫孤壽七十卒蘇氏撫遺腹子成立壽八十餘當道賜粟帛給匾旌之藍田志

張四桂涇陽張倉女倉早故四桂與母李氏居年十八隣惡少王宰以言挑之四桂心畏惡密以語母已而母之田間從外倚其戶窺

知踰墻入強之四桂據炕欄欄毀身終不移享用錘斫其頭而去

萬曆間崇祀烈女祠賈志

張氏涇陽生員劉源潔妻年二十夫亾撫幼子丕基躬操蠶織娶媳

魏氏丕基又早逝魏氏年十九欲死殉自以有疾當醫密置砒藥器中將飲張氏覺即舉器碎之因泣曰癡兒何至是汝既有志偕

吾守節可矣姑婦共守張六十餘卒魏七十餘卒又楊氏里民王元登妻段氏張友顏妻夫亾年少至戚勸以改適楊正色拒之段

嚙指以誓楊年八十二卒段守節三十八年卒涇陽志

王氏涇陽諸生張紹祖妻年二十一夫故痛哭不食七日死魏龍光妻王氏年十九夫亾誓以必死舅姑極力勸慰歷一年值夫忌辰

潛入室投繯死萬曆間並建坊入祠涇陽志

李氏孔有孚妻三原人有孚諸生卒無子舅姑欲奪其志李以死自

普事舅姑益謹冰操五十餘年又秦岷妻王氏年十九夫亡繼母欲嫁之氏不從家貧績緝自給處之怡然萬曆中並旌志

崔氏郝緒妻三原人夫亡家貧聞議婚者泣曰吾寧餓死誓不他適逾年竟餓而死里人立碑以表其節三原志

王氏焦應選妻三原人事舅姑以孝聞夫亡守志聞父母將有別議乃齧指誓天欲自刎父母懼而止甘貧教子子源溥成進士時同

邑溫誥妻韓氏年二十五守節撫孤四十年三子亦成立萬曆中並旌其門賈志

劉氏三原秦根立妻年二十一夫亡取兄子為嗣尋亦早喪止遺一孫未離襁褓氏撫育成立孫復先亡氏偕孫婦共撫曾孫三世保

孤遭逢尤困憊云又秦鍾莪妻張氏夫亡守節事翁姑克盡婦道萬曆中縣旌其門岳文魁妻梁氏年二十八夫喪長安扶柩歸葬

守志終身年七十六卒孫暎斗官翰林學士順治中旌表三原志王氏何大錢妻蓋屋人年十七夫卒氏囑治墓者令容二棺發葬之

辰自經柩側遂合葬焉賈志王氏張寶妻蓋屋人年二十二實卒無子家人勸更志氏嚙中指誓不他適年九十三卒奏聞旌表賈志

張氏渭南兵部主事劉鳳池妻也年二十五夫卒無嗣翁姑又先逝家徒壁立日居一椽樓足不踰闕者三十年縣民田守廕妻南氏

年十六歸田六月而寡苦節四十餘年事翁姑以孝聞南軫妻武氏年二十四夫卒撫遺腹子企仲舉進士養舅姑以壽終萬曆時

三婦俱加旌獎焉賈志較氏雷同妻渭南人適同時年十七隨同客居鄖陽同病卒無子一

女在襦氏水漿不入口者三日扶柩還葬叔翁轟吞氏產業幾盡

復受張姓者賂為奪節計氏破面剪髮以禦乃止一日自備衾木謂女曰往吾不死者以翁姑與若耳今翁姑就窆若又嫁此吾報夫地下時也絕粒數日而死萬曆中詔旌其門又東氏邑庠南養仲妻養仲亡氏年十八絕粒死又王氏邑庠曹鴻宇妻夫病籲天祈以身代及卒取兄子為夫立嗣畢自縊死知縣楊所修碑其墓

賈志

楊氏富平王志才妻年二十才亡遺腹生子氏堅志撫孤終身不出

闡域賈志

惠氏富平孟學孔妻萬曆間學孔為寧夏撫吏病卒氏候喪至葬祭禮畢即更衣自縊時年二十四事聞旌表又李寧妻王氏萬曆中甫適寧即病垂年病益篤王料夫必不起遂自經後園中頃之寧甦婦已不救矣崇禎元年旌表

富平志

王氏張汝清妻醴泉人年二十六夫亡遺子二女一撫教以禮其後

五世同居不言分析皆氏之家法

賈志

南氏醴泉諸生任引妻年十七守節七十年第孝思妻劉氏亦早寡守節兩院並賜旌表舉人韓景妻袁氏年二十六夫故孝姑撫子孀居三十餘年有司表之又王橋妻陳氏生子方三日而夫故奉姑育子百苦備嘗表其門曰節孝曹登妻閻氏曹科妻張氏俱無子苦節終身表曰一門雙節又郭廷信妻高氏夫亡後四月生遺腹子撫育成立鄭克勤繼妻程氏痛夫早逝撫前妻子如已出子感其慈亦克盡孝張桂妻晁氏劉業妻陳氏王廷坤妻高氏俱芳年守志誓不二夫有司咸加旌獎焉

賈志

平樂至八十餘卒節

李氏醴泉雷景妻夫早故守節家貧忍饑至死縣令姚燭旌其門又王大吉妻張氏年二十夫故家貧氏晝耕夜織遇歲大侵食糠粃



蕪菁以育孤苦節四十餘年

感泉志

馬氏延安衛張世功妻綏德州侍郎汝驥女也年十九世功亡三日

不勺飲且治凶器欲同死以親族勸止畢志守窮至八十餘卒院

道旌其門又延安衛百戶王國正妻李氏年二十九夫亡哀泣幾

絕水穀不入口者數日將死殉親鄰以撫孤勸之乃止卒撫子建

德列馨序

延綏志

杜氏延安人贈特進漢之長女也年十六歸鎮撫丁一元相敬如賓

久而無子杜為置二妾服御一與已同妾生二子而一元卒杜年

二十八誓以死殉第桐及松以撫孤繼志為言杜日號泣不止未

幾二孤俱殤杜遂以哀毀卒翰林焦竑為立傳又延安衛指揮張

經妻許氏經卒氏無所出媵杜氏有姪將免身應繼者爭立以其

世職也氏佯許之後杜產得男氏抱示於族黨求長者名之曰淶

尋聞於衛自是與媵殷勤撫摩及長教以義方後襲經職歷官協

守宣府副總兵

延綏志

楊氏延安人孀拜反遣其將土文秀狗平虜叅將蕭如薰堅守不下

如薰妻楊氏總督尚書兆之女也謂如薰曰若為忠臣吾何難為

忠臣婦盡出簪珥勞軍士妻率之守城賊攻圍數日竟不能克

紀事

景氏生員李恭妻安定人孝子光裕母也年二十一夫亡遺腹生裕

甘心守節撫育教訓裕年十六入鄉校享年七十五邑令扁其門

又諸生郝效冉妻孫氏王恩妻李氏俱以守節稱按院給布粟焉

安定志

高氏南征吉妻安定人年二十三夫亡家貧翁早世母白氏寡叔河

圖負圖甚幼氏上事孀姑下撫幼叔殫竭心力後河圖萬曆間拔

貢任雲南蒙目令負圖官守脩撫按屢旌其門又生員白誥母李氏夫亡守志誥方七歲家甚窘以針紉供誥讀書入泮有司累旌之步定志

李氏郭永寧妻賀氏馬陽妻俱延長人李年十九夫亡家貧時翁姑年俱八十且失明氏以紡績奉養撫孤成立賀氏亦寡撫遺腹子苦節四十年萬曆中縣令並旌其門賈志

曹氏生員楊一元妻延川人元疾不起氏誓以死殉既卒即自縊救而甦復七日不食死馮志

袁氏鳳翔諸生楊一麟妻年二十三夫亡一女尚幼苦志撫孤年五十一卒杜文妻田氏年二十四夫亡子幼孤寡舅姑欲嫁之氏以死自誓勤女紅孝翁姑撫按交旌其門縣民李仲春妻張氏年二十六夫故眾議他適氏曰餓死事小耳况未至餓死耶撫三子俱成立萬曆八年各道俱旌表賈志

薛氏百戶翟亮寅妻鳳翔衛人寅亡氏年二十五遺孤連甫五歲氏養姑育子孝慈克盡璉亦早亡無嗣孤苦伶仃與婦張氏同志守節萬曆八年闕西道旌其門鳳翔府志

俞氏吳份妻鳳翔人份卒氏年二十八生子山甫四歲氏守節自誓奉養舅姑舅卒葬祭以禮事姑彌篤冰霜之操人以爲難萬曆八年闕西道督學道俱扁其門鳳翔府志

柳氏岐山生員范弘載妻夫亡年二十泣而就死者數次撫育前妻遺子至於成立守節六十餘年里民王得威妻羅氏夫卒年二十無子誓以死殉眾救得免毀容自守五十餘年萬曆中有司並旌其門賈志

侯氏岐山諸生張自省妻夫亡生遺腹子冰雪自持事繼姑存歿盡

禮有司累表之監生王恩妻李氏年二十九甘貧守節壽九十四卒縣民李彥明妻劉氏年二十七無子家甚貧惟織紡以糊口壽

七十二卒

岐志

李小圓岐山人若梓之女許字王邦寧未歸邦寧自縊死小圓親臨

赴吊一慟而絕久救得甦入厨作粥奉姑曰聊盡婦禮從此尋夫

地下端坐喪次是夜大雷震電屋瓦皆裂母姑驚視圓已逝矣殮

三日面色如生時萬曆乙巳三月十一日也狀聞勅建烈女祠樹

坊旌表

鳳翔府志

趙氏生員張綸妻寶雞人綸歿時氏年二十二水漿不入口者三日

自剔左目以示靡他守節五十九年建坊旌表

賈志

胡氏郟邑生員蘇宇妻貞靜淑慎事舅姑以孝聞宇死冰操自勵訓

家嚴肅教子必廷以明經顯享年八十王其妻孔氏年十六夫凶

毀容自廢矢死靡他勤績維以事舅姑曲盡其孝撫遺孤幾三十

年以壽終又諸生張景仲妻常氏張引妻周氏趙典祖母孫氏母

柳氏楊銘母劉氏段乃成妻史氏俱茂年守節辛勤訓子女而劉

氏則督學以苦節維風扁焉

郟縣志

劉氏麟遊諸生呂引年妻引年死於非命氏年二十止遺一女臨葬

啓穴將投之家人覺而持止送歸母家復自縊以救免由是毀容

守節孝養舅姑有欲奪志者氏噬指出血搥面大痛人聞而止守

節三十餘年以壽終又劉氏縣民侯禹臣妻禹臣卒氏年二十五

即自縊救之得免葬時復自投穴中折其左膊幾死輿歸以幼子

爲解乃止家道素貧以耕織自給萬曆八年關西道並旌其門

鳳翔府志

張氏麟遊諸生甄柟妻武功人也柟卒氏哀號欲絕其季父喻以立

孤死節難易氏遂勉力撫孤毀容柱門時年二十餘子生甫五月  
翁姑夫三喪在柩伶仃孤苦強自支持壽九十餘卒萬曆十三年  
詔旌其門又呂氏何謚妻從夫隨翁任夫歿氏年二十餘生子甫  
浹歲痛夫死異鄉嘔血幾死及歸扶柩步行每至逆旅抱子撫棺  
徹夜悲號聞者哀之抵家鳩形已不似人營葬畢一貧如洗苦節  
四十餘年萬曆二十年詔旌其門

賈志

董氏生員石可貞妻麟遊人夫卒遺子歲餘氏含辛鞠子後五年子

殤遂取夫主於臥室焚香自縊萬曆中旌表

馮志

十五歲一女

楊氏尹希頌妻俱氏姚度妻王氏姚守官妻張氏常臣妻皆隴州節  
婦也楊氏年十九遺孤浹歲矢志六十一年俱氏甘貧奉姑守志  
六十五年俱奉文旌表王氏年二十四守節二十六年張氏守節  
四十二年院並旌之

鳳翔府志

楊氏史文載妻隴州人夫亡自縊以殉萬曆中旌表又生員閻可讓

妻楊氏年二十二夫卒痛哭嘔血死

賈志

王氏南鄭諸生金簡妻嘉靖元年夫病氏割股以進夫故年二十四  
無子女可依孀居五十八年縣民馮朝江妻傅氏年二十七夫故  
生遺腹子善事翁姑年八十七卒任大經妻孟氏年二十八夫故  
欲自盡翁姑泣諭始勉為啜食苦節孝親撫子祿舉癸酉鄉試萬  
曆十二年詔旌其閭

賈志

朱氏監生王邦偉妻南鄭御史朱綬次女也邦偉故氏年二十三守

節撫孤四十餘年後子復亡氏七日不食而死

南鄭冊

李氏褒城許襄隆妻年二十夫亡子歛標甫一歲氏撫育入庠又早  
死復撫孫潘亦成諸生卒年八十五又康氏褒城開山驛魯志聰  
妻年二十餘夫死遺二子一女子幼不能支驛役以女養壻子與

婿俱死撫甥朝為諸生又死復撫外曾孫歷諸艱苦年九十三終

漢中志

王氏韓仲才妻城固人夫凶氏年二十六遺孤僅七月苦節教養及

長以孝稱孀居五十七年

賈志

王氏杜春輝妻洋縣人春輝與兄春芳皆諸生春輝卒臨葬年十九

王投壙內扶歸是夜自縊死後七年春芳病篤治棺妻康氏潛令

併治一棺夫問所以泣曰妾欲不愧王氏耳比春芳卒哀痛消骨

旬日不食飲藥死萬曆二十七年詔旌曰雙烈

馮志

王氏許天祥繼妻西鄉人年十六適祥是日祥父瓊病故祥守喪次

既葬廬墓服闋始歸行夫婦禮無何祥卒氏年十九遺腹纔三月

甘貧績紡以奉哀姑撫前子與己子俱成立苦節六十年御史題

旌又十年始克葬甫下穴縛絕棺墮地破頰色如生

崇禎

張氏西鄉監生朱騰霄妻年二十七而寡遺孤哀張撫育成立娶婦

吉氏未幾哀復歿吉欲以死殉賴張勸止同心守節人羨一門雙

貞云

西鄉志

劉曇妻鳳縣人失其姓夫病調治備極篤擊及歿氏縊死

漢中志

靳氏生員王以諫妻寧羌人年十九夫凶無子氏就縊以姑救不死

已念曰姑在我何敢死於是事姑益謹即憔悴哀毀而對姑未嘗

一縷眉睫後三年姑凶遂自刎於柩側萬曆十九年也二十一年

旌

馮志

賈氏陳第妻畧陽人年十五遇強暴欲污之氏罵不絕口自投漢江

而死

賈志

羅氏榆林叅將郭金妻金凶氏不食死又榆林衛指揮龔應龍妻姜

氏年三十夫死方葬嘔血死榆林衛千戶周冕妾失其姓夫卒自

縊死妻劉氏亦守節終身阿捧比吉指揮僉事朵兒計臺吉妻也從套中內屬居榆林年二十六夫故痛哭不飲食尋自縊死榆林衛軍張應龍妻楊氏年三十夫故勺水不入口者六日踰歲姑與子相縊亡氏不食九日死又榆林衛軍楊守禮妻于氏年三十夫卒勺水不下咽悲號累三日死巡撫旌其門

延綏志

劉氏宜君女適延綏鎮楊國權年二十二喪夫無子甘貧苦節六十四年卒

賈志

袁氏靖邊學生查瑾妻年十八瑾以救父陣亡氏聞不食死建坊旌表

延綏志

杜氏張鳴遠妻興安人年十九夫卒族豪盡奪其贖產氏甘貧奉親矢志愈堅萬曆四十一年巡按畢賜扁旌其門

賈志

曹氏興安唐際嘉妻年二十夫故家貧氏上奉孀姑下撫遺腹子拮

据紡績苦節四十餘年馬績光妻劉氏適光未踰年先卒遺腹纒數月氏杜門紡績奉姑課子卒以節終萬曆四十一年俱旌表

興安志

嚴氏任項之妻孫氏任豫之妻俱紫陽人嚴氏年幼喪夫號慟幾絕者數四矢志六十年課子以明經顯孫氏年二十三夫故哀慟欲自縊親族以衰姑弱子慰之乃忍死守節脫簪珥以奉姑孀居五十餘年縣令並旌其門

紫陽志

王氏石泉舉人安汝翼妻性莊嚴不事色笑夫歿斷親故往來嚴婢僕出入守志三十餘年事聞旌表

石泉志

王氏胡文煥妻漢陰人年二十煥卒氏枕尸泣血不食母嫂勸諭乃食至百日致奠盡哀次晨服始嫁衣縊於樞旁萬曆四十四年建

坊

賈志

吳氏漢陰生員藍正元妻年二十四夫亡子幼竭力奉姑而已糟糠不厭二十年如一日里民孟學顏妻駱氏年二十七夫故守節有司申請當事並旌其門

漢陰志

周氏商州南伯謙妻年十九夫歿子女無出與堂嫂王氏同勵米操有司累旌之邑庠雷始奮妻孔氏年十九夫故堅守撫孤五十餘年有司歲給米布歿後題請旌表南桓妻王氏年二十三夫故止一女撫猶子爲嗣苦節四十二年司道各扁旌之給米絹者數十年

商州志

南氏商州庠生閻公述妻述故氏年十八毀容守志四十餘年嘗伴惟一蠢婢一日婢死曰天絕我也遂絕食七日卒

商州志

南氏商州南文蔚之季女適維南生員薛厚倫未逾年厚倫病劇氏日夜侍湯藥不更二手厚倫歿氏七旬不入口勸絕而蘇即以刀自剉衆持之不得遂引首觸柱又不得諸姆及眷屬環向泣慰曰爾爲婦末期何倉遽乃爾氏正色曰夫妻寧計日耶吾義當死今惟勸我死者爲愛我比漏三下髮侍倦睡氏已就臥內縊死其時死炎歊中面色如生蠅虻斂迹有司上聞旌表

維南志

李氏趙進孝妻維南人年十九夫亡哀毀骨立親黨欲奪其志李對姑號泣數日不食謀遂寢守節三十餘年又監生張以治妻王氏同邑人也少寡矢志孝事翁姑撫諸孤成立饑饉屢經節操愈勵年九十卒直指旌其門

維南志

何氏維南人張守分妻守分死何年三十妻蔡氏年二十二各遺一子俱幼同志守貞孝養翁姑死葬盡道勤紡績治家人業子永錫

中萬曆癸巳鄉試守節四十餘年有司俱旌表

賈志

馮氏江蘭妻商南人蘭卒李號哭不已至葬前一日服毒死

馮志

吳氏同州王遷妻遷爲傭以糊口值歲凶無所售傭入養濟院僵

卧而死氏枕屍哭一晝夜殉之

同州志

趙氏同州諸生王維德妻夫死其父母皆七十餘時二子既幼而兄嫂復歿遺幼女子三人一門孤苦氏以弱齡任之老終孤養無不

曲盡萬曆四十四年奏聞旌表又諸生張汝愚妻胡氏年二十而

娶翁姑以家貧子幼勸令改適不聽乃潛謀奪節氏知即毀容歸

母家撫子至冠而後還又生員董芳總妻潘氏初適芳芳已病篤

未幾歿潘年十五號泣幾死撫芳前妻子女如已出有謀奪節者

即引刀自裁太守馬材作傳記其事

賈志

王氏潘思忠妻同州人思忠死氏甘貧苦節里豪爭欲謀娶而不得

萬曆戊子歲饑餓死室中人皆憐之

同州志

雷氏郃陽人適同州胡珪珪卒氏無所出乃勵節撫前室子艱辛四

十餘年

賈志

仇氏井繼妻朝邑人夫早亡遺子奈強甫三歲氏甘貧守志撫教有

方強復早逝同子婦丑氏撫育孤孫至於成立

李樂芳傳

馬氏同州文莊公自強之孫女也適朝邑李芳春年十八而寡撫從

子文郁爲嗣娶其兄女爲婦不數年文郁又死婦亦年十八姑婦

守節終身有司旌其門

朝邑志

孫氏翟可教妻朝邑人幼嫻女訓適翟未幾而翟死非命時年二十

欲以死殉家人勸曰有姑在汝死姑亦亡矣乃忍死事姑姑時怒

氏婉以承之姑九十終襄事畢泣曰姑亡吾何待欲自經夢其姑

教後卒以人救得不死守節七十餘年又邑庠生王之翰妻井氏

年二十而寡姑以繼弗慈或勸之嫁矢以死愈孝謹姑亦化之初

氏病夢見於神自禱親終養方敢死已而病愈其後親死葬畢未



及禫而止朝邑志

翟氏朝邑翟可遠女生員何大慶妻萬曆丁亥歲饑大慶出羅嬰疾

還氏屢祈身代知不能輒自紉襤衣誓以同死何垂盡入室更衣

自經時年十八遠近吊愍奏聞旌表附祀烈女祠朝邑志

李氏謝登輔妻朝邑人早寡守節上事翁姑下撫幼子女咸有儀則

四十年不復為容子自賢事母至孝李朴節壽全序

雷氏王學讓總妻朝邑人年十五歸讓五年讓死謂氏曰我死汝早

自為計勿徒苦氏飲泣不能語因指天自誓必奉舅姑撫孤子時

嘉靖丙寅歲也遂屏容飾勵操以堅其志撫王前妻子皞如如已

出皞如既貴迎養官舍每食異味則謂皞如曰遠不能致爾祖父

母奈何其慈孝出於天植如此卒建坊旌表王嗣美集

張烈女朝邑人世強女萬曆初字市民魏珠已而珠故女年十六衣

縞不食誓死殉以家人嚴防乃佯飲食又為履遺珠母尋乘間自

經越三日昇就魏合窆其面如生賈志

張氏楊專妻朝邑人萬曆丁亥歲大疫人相食專與一子先斃氏自

投於河傍人出之氏曰我義不為乞丐故就溺耳從容結衣履投

河而死朝邑志

張氏邵陽李白妻白卒氏不食而死曹粉容者邵陽民女也未歸而

壻死父母勸其改字粉容乃投繯而死縣聞為立石表其墓賈志

孫氏澄城生員鄭炳妻年十八夫逝氏即墜井姑急救之得免矢志

守節縣令表其門張邦俊傳

路氏舉人闕冕妻澄城人十五歸冕踰年生子方四月冕暴卒氏哀

痛幾絕矢志撫孤以績繼孝親屢遭兵荒堅守不易賈志

竇氏王伯占妻韓城人伯占亡氏年二十九家貧紡績事祖姑並姑

極孝年八十四卒

賈志

李氏生員賈梧妻韓城人年十七夫故號泣幾死三日不食翁以姪

孫繼烈承嗣事翁姑極孝苦節五十餘年壽七十四卒建坊旌表

又趙楊芳妻薛氏年十九夫卒無子以姪為嗣家貧守節年八十

二卒

賈志

薛氏李煥妻韓城人煥商死河南昇櫬歸里氏號呼幾絕粒米不入

口一日發奩付櫬瑯擊悅於姑自飾哀麻坐夫右死時萬曆三十

六年也

賈志

郭氏東羣芳妻華州人羣芳病亟謂郭曰我死汝擇人事之郭涕泣

誓以死其妾王氏曰我非婦人耶何永訣弗及我耶羣芳死郭氏

命將作二棺王亦乞一棺遂作三棺為羣芳立嗣行喪三日以代

三年俱縊死於柩帷左右又同里曹士魁妻王氏郭強祖妻刺

夫卒時皆自縊死

賈志

李氏楊自卑妻華陰人夫卒年二十翁老子幼家計蕭然甘貧守節

孝事繼姑督學按部屢表其門又生員楊訓妻張氏訓卒氏治大

槲示必殉戚黨苦勸乃止終身垢面足不及中庭

賈志

張氏賀約禮妻蒲城人約禮亡氏年三十撫男應科遊洋科娶亦張

姓女後客死於京張年二十一有娠聞訃輒自經救免生遺腹子

姑婦共凜冰霜育孤入學姑八十有一媳六十有六皆以壽終萬

曆十八年旌表雙節

賈志

孫氏單偉妻蒲城人夫亡事姑以孝聞萬曆二十五年旌表同邑王

啓勞妻夏氏夫亡守節事親鄉人稱為孝婦

賈志

郝氏葛寬妻蒲城人夫亡年二十一姑欲嫁之氏度不免遂自縊死

萬曆三十年旌表

賈志

人物十二

五

常氏米頤貞妻蒲城吏部澄之女給諫若桂之妹也夫見殺於寇歸其屍自煎香湯沐浴凶服跪奠一日吉服臨焉几上設七筋各二及晚自縊死王建績妻單氏蒲城單則遷之女年二十二夫故痛哭嘔血累自盡以人救得不死明年正月初四日乘間自縊死萬曆四十六年旌表

賈志

劉氏潼關衛揮使姚鎮妻夫卒氏年十七誓以死殉姑勸諭乃止以孝慈奏聞旌表又衛千戶朱英妻張氏陳端妻李氏余翰明妻何

氏賁炫妻張氏孫元妻韓氏俱夫死守節終身不渝

賈志

楊氏郭恒妻潼關人年十六許恒恒以不能納幣遂客遊湖南久不歸父議改盟女不可斷髮自守家有巖壁穴墻居之垂索以通飲食者二十六年恒歸氏年四十三矣乃成禮偕老焉副使張瀚爲

作貞女傳

馮志

左氏安裕妻耀州人年十五歸裕裕病卒左即剪髮大半破鏡大半

置裕柩前餓十數日而死年十九萬曆十三年建坊旌表

賈志

王氏彭邦貴妻同官人貴卒氏年二十四哀毀踰禮事祖姑趙氏極

誠敬待卑幼有恩禮趙憐其幼喻使改適氏剪髮自殘以示不二

遂守節終身性好義樂施常思濟人不責償萬曆十年大饑輸雜

糧一千石入官賑濟有司上其事詔旌曰節義

同官志

習氏李梅妻同官人夫亡無子家甚貧親黨勸之嫁氏曰有姑在可

事遂堅貞自守有司扁其門曰節孝又張邦彥妻党氏年二十守

節事姑甚孝有司旌表又李啓東妻梁氏年二十四夫亡孝姑撫

子艱辛脩嘗八十四卒

賈志

姜氏諸生王旂妻白水人萬曆末旂被毆辱赴井死氏聞亦投井中

以殉

白水志

郭氏武功王繼祖妻繼祖早死撫遺孤乾明成立娶張氏生子受元

甫襁褓乾明旋死郭與張雙節凜然受元長娶田氏不數年而受

元又死遺子良臣田氏年少亦守節終身奏表其門曰三世孤孀

後良臣歲貢田年七十八卒

武功志

李氏沈來聘妻武功人夫早逝氏年少有勸之嫁者氏曰姑在誰與

為奉績紡以供甘旨者四十餘年

賈志

侯氏生員馬璟妻武功人夫病篤侯知不起先夫自縊死

賈志

屈氏杜逢雲妻武功人歲大侵翁與夫皆就食漢南翁死夫歸亦死

氏泣曰寧以夫死故而使翁之遺骸棄於原野乎遂徒步往漢負

骸歸葬未幾餓而死

賈志

牛氏武功生員陳懋謙妻夫卒氏年十九撫遺腹子守節五十餘年

萬曆中建坊旌表舉人楊纘妻李氏年二十三纘卒止一女氏撫

姪為嗣守節四十餘年萬曆十三年旌表里民耿認妻恭氏年十

九夫卒二子尚在襁褓氏守節教子年七十八卒縣令旌之又耿

氏適岐山生員李淑世生子四日夫死氏守節二十年歸寧卒於

父家子亦尋卒邑人哀之

賈志

騫氏永壽生員張簡妻年十八夫卒妾趙氏一子方周歲騫撫育勤

劬不啻已出事婆姑以孝聞壽七十五卒官旌其門劉宗樂妻王

氏年十九夫凶撫遺腹子成立壽七旬卒王養忠妻師氏年二十

二忠凶撫一歲孤成立壽六十卒

賈志

許氏生員樊希思妻永壽人善事翁姑妯娌無間言夫卒嘔血死

賈志

騫氏永壽九思女幼字趙本初趙故富而騫家漸蕭索趙竟遺書罷

婚九思領之女曰不死奈辱先人何乃潔身整服強婢導至趙門

呼窺自刎而死尸不僵目不瞑溽暑色澤如生邑令庀木以殮時

天開日霽而雷雨驟至一邑震驚令為撰哀詞奠之復開霽如初

永壽志

王氏永壽姐登妻夫卒氏年二十五遺子三歲孤叔翁溺其子強氏他適幸有援者子得不死後子復早卒乃撫成諸孫脩嘗艱苦以壽終又李油然妻魯氏年二十五夫卒叔翁強奪其志氏截髮自誓以織紉糊口守節三十一年

賈志

師矯姐永壽人師第女第因訟避逃捕者詣家偶牽女衣女不勝憤

志自縊死事在萬曆三十四年

永壽志

紀氏邠州生員席太初妻萬曆中夫卒縊死柩側奉文建坊

賈志

焦玉兒三水人有惡少夜至持斧迫氏不從遂遇害萬曆十六年旌

表

馮志

葛節婦文氏三水人少白先生之女有君子亭詩賦三百餘首手鈔

書六十卷少寡自誓作九騷九篇以見志辭義典雅稱其風烈

列朝

詩集在中女適淳化生員葛大受稱未亾人者四十年

賈志

武氏文太青妻天啓初太青督晉學考最屬予誤太青所著事略稱

其妻武恭人之能詩也余謨制詞以秦風之女子為比太青書報

予恭人讀之而喜可知也崇禎初太青以太僕少卿家居恭人歿

總室鄧氏寧河武郡王之裔也太青鰥居謀續娶家園有並頭蓮

之瑞作嘉蓮詩四百餘首鄧之父才其女而告之曰此真可以壻

汝矣太青遂委禽焉既歸於文太青以謝蘊徐淑視鄧而鄧則以

孔孟伊周事太青交相得也太青好奇如子雲構太元經以鄧為

童烏覃思少間相與論李詩韓筆太青喜而忘寐不知更漏之深

淺春秋佳日奉太夫人版輿出遊訪未央之故邱吊城南之遺跡

太青有三出西郊記讀者豔之甲戌喪太夫人過哀遂得風疾已

而少差舌本間強鄧知其嗜邵詩吟邵句以引之太青喉吻喀喀  
久之豁然應聲壬子春病劇不起鄧為文以祭叙致婉悉闕中文  
士爭傳寫之踰年關陝躡鄧老矣迄不知其所終錢謙益撰傳

李氏鄜州王宗堯妻年二十八夫凶以死殉救甦家至貧誓不再嫁  
苦節四十年撫孤成立後以孫建屏貴贈淑人鄜州志

劉氏中部人適鄜州生員宋承矩凶氏年二十遺腹六月乃潛縊  
極側賴姑救得蘇勸以遺腹為念後生子呂值歲荒宗人強勸再  
適氏持刀自毀面目苦節六十年事聞旌表鄜州志

屈氏景戴輝妻高氏張應奎妻俱洛川人屈年二十三夫凶苦節撫  
子并撫二孤姪如已出壽七十五終高年二十八夫卒事親終喪  
撫孤成立苦節四十六年有司俱表其閭賈志

郝拾翠洛川人年十七許聘諸生張三近納采而三近卒女聞訃以  
所納幣製為衣裳服之自縊萬曆二十二年旌表馮志

任氏李元凱妻中部人歸數日而元凱卒父母令再嫁不從紡績以  
奉舅姑事聞旌表馮志

王氏同知張士奇妻宜君人士奇歿內外無依氏躬督耕桑教子親  
良師友入夕則課其業三子俱成立次子應辰令肅寧績最加封  
太宜人三薦誥命婦節四十五年又同邑田養民妻常氏年二十  
二夫故甘貧守節撫二孤成立賈志

楊氏郭鐘奇妻宜君人奇早卒氏自縊死賈志  
楊氏米脂光祿寺署丞艾應鍾妻少保楊尚書之女萬曆初夫故氏  
年二十四孀居四十年米脂志

劉氏白延慶妻清澗人延慶卒於旅劉年二十三聞訃奔京邸親負  
骸骨歸及葬投隧道以殉諸姑力出之遂矢志守節撫孤似科成

立似科又早卒其妻劉氏年二十五欲投崖死幸救免事兩姑撫幼子年五十餘卒賈志

孫氏張彥昂妻清澗人年十八夫亡越三月舉一子矢志守節家貧

忍饑以訓孤子年五十九終賈志

劉氏生員白似玉妻清澗人夫亡氏年十七遺孤賁甫七月矢志守

節躬績紡以自給賁年十九又卒其妻李氏年十八遺一歲孤尚

文與姑相依克盡婦道無何姑見背伯兄欲奪其志李氏抱孤號

泣者累月遂喪明知縣陳汝元表其門曰一門雙節賈志

白氏惠道昌妻清澗人夫亡氏年十八有娠方六月欲死以殉衆諭

之曰胡不少待舉子氏泣曰非不念良人無後但心痛不能須臾

緩耳遂七日不食而死有司申請旌表又惠及科妻李氏夫亡年

二十九即日縊於柩側有司旌其門配享烈女祠賈志

劉氏葭州高薦悅妻夫亡氏年二十七奉姑撫孤艱辛備嘗歷四十

年又高光鼎妻張氏馬喬遊妻張氏俱早年喪夫守節終身焉葭州志

志

王氏生員李淮妻葭州人淮卒氏年二十二遺孤五歲宗族謀奪其

志氏誓死守節卒年五十有七葭州志

某氏神木諸生辛維命妻年二十二夫亡即柩前自縊以救得免守

節終身又王瑜妻張氏年二十五守節四十餘年里民張樞妻劉

氏年二十六守節終身不渝神木志

李氏府谷舉人繼志女也適蘇萬春未久而蘇卒氏勵志守節壽九

十三歲無疾而終府谷志

馮氏楊六斤妻府谷人事舅姑竭誠盡孝後膺旌典府谷志







勅脩陝西通志

第六十七卷

人物十三

列女二

NATIONAL CENTRAL LIBRARY, TAIWAN, R.O.C.

陝西通志第六十七卷

人物十三

列女二

郭氏劉進忠妻楊氏劉進孝妻長安人姊姒也郭氏年二十夫故守節楊氏夫亡無子斷指自誓與郭氏同心苦守人稱一門雙節云

長安志

趙氏長安生員陳經濟妻濟病殂氏七日不食死提學熊師旦表其門又縣民安守性妻孫氏年二十八夫卒自縊死顧應善妻馮氏苦節撫孤寇亂自縊死

賈志

王氏席榮妻長安人年二十七夫亡誓以死殉母敦諭撫孤乃止苦節四十餘年母病篤氏割股以進病遂愈天啟中給扁旌之鄠縣王氏適邑民閻鴻業舅遺疾王割股以療邑人稱爲孝婦

賈志



王氏長安晉國柱妻事孀姑朱最孝姑病疫氏毀衣飾供藥餌且祈天請代姑病遂愈王沒國柱繼娶朱氏撫育前妻三子皆克成立

長安志

韓氏咸寧人李能妻能亡氏絕粒七日死

賈志

劉氏咸寧王持衡妻太原同知養性女也年十九子女無出而夫亡

堅志苦節長齋繡佛守節四十年督學熊師旦奏旌其閭

賈志

盧氏咸寧尚書紳之女也適庠生蘇幼芳年十七而夫亡矢志撫孤

歷五十餘年

咸寧志

王氏咸寧進士胡叔元妻叔元卒於京氏年二十哀毀骨立撫姪植

爲嗣愛如己出都御史張翰重其節義給月廩以養之仍扁其門

曰貞節年八十一卒

咸寧志

茹氏咸陽張九鳳妻年三十孀居教子執中以義方後爲安岳尹

賈志

朱氏咸陽民杜仲清妻鄭氏清弟仲義妻朱年二十而寡鄭年二十

五而寡俱守節終身

咸陽志

王氏咸陽杜希奎妻希奎卒遺孤雲祥甚幼氏守志撫養爲娶媳趙

氏後雲祥又卒趙與姑同心苦守人稱雙節有司表之

咸陽志

杜氏咸陽王科妻年十九而寡程氏科子來之妻劉氏來之子元知

妻年二十五而寡人稱三世冰霜焉

咸陽志

郭氏高陵生員李原植妻幼讀四書及列女傳夫卒守節教子口授

魯論及忠孝故事年三十二而卒

高陵志

吳氏高陵黑士昌妻少寡撫子守志年八十一而卒王洪妻周氏無

子撫諸女并日而食年七十而卒吳恂妻馬氏幼寡守節撫孤年

六十餘而卒崔漢妻楚氏守節不嫁被嫂逼迫具狀縣尹給帖執

守以卒

高陵志

馬氏高陵田遇霖妻夫亡守節四十年撫三子俱成立高陵志

何氏鄠縣舉人王堠妻年二十三而堠亡安貧苦節守志終身縣民

李庫妻張氏年二十一而寡養姑撫子備嘗荼蓼如是者垂五十

年魏邦開妻南氏亦年二十有一而寡守節三十餘年何津妻楊

氏年二十五而寡守節四十年又武輻妻高氏曹進節妻王氏俱

甘貧守志苦節終身鄠縣志

封氏藍田謝顯妻年十九而寡矢志撫孤守節歷八十年又魏縉妻

熊氏夫亡無子氏年二十一上事衰姑下撫孤女卒年八十有四

閻積妻楊氏年二十五而寡守節四十五年撫子成立藍田志

張氏藍田生員孫振譜妻振譜亡氏絕食死藍田志

李氏藍田生員王業建妻年二十四無子而業建卒夫弟業顯亦相

繼亡妻徐氏年二十二有子甫一歲李謂徐曰汝有子可守其勉

之吾則一死而已徐泣曰嫂死予復何依百方敦勸李因與徐同

心守節共撫一子李年六十卒徐年八十卒天啟三年詔旌其門

藍田志

晉氏涇陽進士劉宇曜妻年二十夫故絕粒求死姑勸止之遂守志

撫前氏子繼烈後官長蘆運副涇陽志

韓氏涇陽生員劉思向妻年二十四而寡守節三十餘年涇陽志

段氏三原舉人溫日知妻夫亡與妾李氏年俱二十同志守節教遺

腹子成立又王治寧妻李氏年二十七守節至六十三終子仲妻

秦氏年十九守節至七十二終孫士端妻秦氏年三十守節至六

十一終三世貞操人比之張婦三節云三原志

馬氏郝莪南妻三原人夫亡矢志靡他苦心教子且博通女史內則

及歷代史鑑諸書著有述體詩百餘首王氏司馬郎來望之妻十

九守節歷五十餘年人號曰女師又馬氏忠獻公理五世孫女也適舉人雒獻書二十而孀守節四十餘年賈志

秦氏三原李根元妻年二十二夫卒自縊數次家人救免乃自剔一目甘貧守節教子松年中天啟甲子鄉試壽八十四卒同里員維

寧妻孔氏年二十維寧亡痛不欲生數覓死所以家人密防獲免茹荼教子三十六年又員大學妻孔氏年二十夫亡屢縊救免撫

遺孤苦節三十五年王君賞妻張氏年二十夫亡絕粒數日家人敦勸乃苦志撫孤五十餘年縣令旌之賈志

呂氏張忠妻三原人少寡辛苦自持終身不易其志督學靳公錄其子楠為增廣生以嘉其節三原志

雒氏三原秦甲業妻業亡氏年少苦節教子四器領鄉薦天啟中奉文旌表又同邑生員李大芳妻某氏年二十五夫亡苦節五十年

又秦昂妻吳氏年未二十夫亡甘貧撫孤縣令旌其廬又郭光明妻周氏年二十二夫亡子方襁褓甘貧撫孤四十年三原志

劉氏蓋屋魏嚴妻嚴歿誓以死守天性尤純孝翁溥年九十餘卧病飲食轉側皆氏扶持之便液漬污澣濯不倦三年如一日孝聲噴

噴鄉里無間蓋屋志

任氏蓋屋生員孟芳鄰妻年二十夫死孝事孀姑士民稱之子復死撫孫紹祖成立苦節四十年同里孟學孔妻牟氏年十六歸孟四

歲而孀遺孕方七月苦節四十七年表某妻侯氏年二十夫卒矢志守節六十年有司表其門又同里趙雲妻楊氏趙瑯妻許氏張

克憲妻楊氏張附羽妾田氏俱幼年苦節以壽終賈志

白氏蓋屋生員馬翰如妻年十九適翰如家貧無以養父母氏以女工佐之二十九歲翰如病死氏盡剪其髮畫績柩前夜則抱幼女

傍柩宿每食必祭祭必盡哀或勸其更志輒斥之越數月聞其伯有成謀遂攜其女慟哭拜夫柩前是夜竟自經於柩右時天啟七年夏六月也其身自衣裙至襪履皆針線密縫無寸隙見者咸驚惋泣下稱為封骸節婦邑令張鯤化請於上即其居爲立祠夫婦合葬於祠後焉又同里任調元妾焦氏夫亡自縊死焦莊妾劉氏夫亡飲醜死

賈志

王氏渭南生員張而弛妻夫卒氏絕粒毀容吞毒投環家人救免覲防少疎卒自縊死其妾樊氏亦自縊死天啟元年奉文建坊又生員孫玻妾張氏年十九玻亡氏櫛沐縊於柩側

賈志

李氏尹孝策妻渭南人生一女夫亡氏年二十六叔翁日夜謀奪其節私許韓氏歲除夜突擁入門捆載疾馳叔母預匿車中知李帶及搜擲之李用束髮簪刺喉七孔血淋淋將斃及抵韓門見血不

可返遂還之史義伯率諸生白于當道旌扁其門已而女嫁李諱女曰汝當自立我可以死矣遂不食而死

賈志

劉氏渭南田守愛妻夫卒氏年十九遺腹生子食貧操作守節六十餘年天啟中旌表

賈志

王氏渭南縣民譚應誌妻年二十六夫亡斷髮嚙指誓不再適罄夫囊橐以與夫兄弟上事衰姑以紡績供甘旨壽八旬卒安顯然妻尹氏年二十七寡家徒壁立竟日一餐課兒讀書寒暑不懈壽六十六卒鄭時達妻李氏年二十八守節撫孤吳養浩妻劉氏夫早逝氏奉事祖舅姑孝感閭里撫孤子至成立甘汝濟妻袁氏適汝濟五年而寡或勸改適氏泣曰老親無男媳可代子孤兒失父怙可兼恃孀居五十八年子振世卒成立

賈志

李氏富平生員孫應魁妻歸孫二載而孫故氏無出家且貧舅姑勸

令改適氏不可遂爲立嗣守志終身

賈志

王氏董璜妻醴泉人夫亡氏年十九生子甫八月苦志守節當道旌之又郭氏董珠妻珠故誓死明志以紡績自給有司旌其門又張氏夫失其名亦以苦節著

賈志

趙氏指揮陶秉忠妻延安人年十九夫亡其父以無子故屢勸易節氏抗志不從以紡績自給壽七十卒

賈志

王氏楊虞徵妻膚施人夫亡三日自縊死

賈志

曹氏梁恭妻劉氏郭銳妻俱宜川人皆年二十四歲而寡曹撫二子

成立守節五十年劉子早妖撫孫成立卒年八十一歲

宜川志

狄氏生員甯化龍妻宜川人夫亡無子撫嗣孫振祖成立苦節至七

十歲

賈志

王氏生員劉永弘妻張氏生員李永第妻宜川人俱年十八而寡撫

幼子皆克成立後壽並至七十

宜川志

劉氏呼爽妻宜川人夫亡孀居四十年官旌其門又壽光縣丞楊秉俊繼妻党氏郭總妻劉氏俱夫亡守志苦節終身

賈志

袁氏生員李仁妻延川人夫歿氏年二十四二子皆在襁褓其兄強之嫁不從茹荼甘貧撫二子俱成立又里民王紀妻張氏年十九夫亡有遺腹氏誓不改嫁後產男鞠育成立事姑孝竭力奉養採樵汲水皆躬操之姑歿率子世賓哭泣哀毀稱貸營葬事代夫有終

延川志

劉氏鳳翔高應亨妻夫故氏年二十子女無出勺水不入口者數日家素貧含辛茹蓼四十餘年

鳳翔志

李氏岐山生員楊大烈妻年二十五夫亡有勸其再適者氏嚙指血以謝曰嘗聞烈女不更二夫今墳土未乾忍他適耶遂守志不渝

卒撫孤成立又里民侯省度妻樊氏夫亡守節歷五十年岐山志

高氏生員張乾妻寶雞人夫亡氏守節四十九年奉文旌表賈志

王氏寶雞諸生高竑妻夫亡年十六矢志栢舟壽五十卒旌表同里

張造士妻王氏年未三十夫亡孝奉翁姑克盡婦道有司旌其門

鳳翔府志

楊氏寶雞劉復引妻夫故楊年二十六遺孤八歲楊勤紡績教子成

立有司旌其廬寶雞志

某氏庠生王在鎬妻扶風人年二十夫亡孝事舅姑以紡績自給守

志四十年足跡未嘗出閭門里人稱為女君子又馬道遠妻王氏

扶風通判衡女也幼年苦節艱難備嘗以壽終扶風志

孫氏生員趙一琴妻扶風人年二十餘夫亡伯氏欲奪志令婢妾迫

之氏自經賴鄰嫗救免伯又奪其產業且謀墮其孤氏避之他所

辛苦保育授經訓誨克底成立後伯夫婦俱歿氏自營葬祭撫遺

女如已出人以為難五十餘終賈志

彭氏舉人李華先妻郿縣人華為聞喜令有聲卒於任氏輿觀歸年

未三十操持家政苦節終身鳳翔府志

劉氏生員尹祭湯妻隴州人夫故氏年二十八堅守苦節以紡績自

給有勸其再適者氏正色拒之生平言動不苟節操凜然為鄉里

所服隴州志

朱氏南鄭人端靜少言笑年十六字宋氏子未成禮而宋亡飲食不

進孀母葉氏知其意動靜與俱因慰之曰我無子汝死我將何依

然女終懼有再婚之命也至七日母不及視遂縊死郡邑申上建

坊曰貞烈漢中府志

潘氏南鄭馮袞妻年二十二袞亡甘貧守節卒年六十六漢中府志



張氏褒城庠生張雲鵬繼妻年二十而寡張前妻生子方五歲氏視如已出教育成立壽六十九卒

漢中志

張氏生員張兆祿妻洋縣人歸未幾而兆祿病氏侍奉湯藥晝夜不懈後兆祿卒氏誓以死殉家人嚴守之不得死氏乃潛藏利刃於衣帶間俟殮畢家人慟哭氏乘間自刎於柩側遂合葬焉事在天

啟時

漢中府志

王氏西鄉諸生符廷瑀妻瑀亡氏以死殉巡按劉廷宣以聞勅建貞

烈坊

西鄉志

王氏指揮楊國禎繼妻寧羌人年十七適楊愛前妻幼女如已出越三年生子甫百日而楊歿氏堅志立節育子長襲父職孀居六十

餘年

漢中志

張氏寧羌生員蔡廷聘妻年二十四蔡故蔡繼母過嚴而家甚貧氏

委曲奉養卒得其懽事聞建坊旌表張四聰妻蔡氏年二十二夫

故子幼孝事翁姑苦節至八十三卒里民趙洛妻孫氏年十九洛

逝子甫數月氏撫子事親孝慈兼至有司旌之

賈志

張氏總兵謝朝恩妾榆林人恩死自縊又王氏紀總兵世楹僕紀儒妾也儒亡其夕即儒柩縊以死

延綏志

習氏威武堡彭泚霄妻年二十而寡撫孤守節至六十七卒子士弘

以孝稱

延綏志

景氏鎮靖堡杜有秀妻年二十六而寡撫四歲孤子歷凶荒守節至

八十四卒

延綏志

喻氏興安生員張應乾妻年二十九夫故誓欲自盡或曰氏死子將誰依意稍解勤勞家政早夜課子不窺門見齒者三十餘年院道表其門里民鄭朝綱妻曹氏夫亡年二十三而寡矢志堅貞撫子

成立興安志

王氏紫陽生員余養龍妻夫早逝氏年幼矢志無他孝事翁姑嚴訓

二子凜節四十餘年天啟七年旌表紫陽志

王氏漢陰生員閔進孝妻年二十五而夫亡矢志撫孤甘貧勵節堅

守四十年漢陰志

白氏漢陰温以恭妻以恭卒氏年二十三歲守志不二奉姑育子苦

節三十餘年又魏奉儀妻温氏年二十六而寡生子未週甘貧守

節三十餘年任孀妻楊氏亦年二十六而寡遺孤三月撫育成

立守節四十餘年漢陰志

駱氏漢陰生員解鶴妻陳氏藍敏妻李氏里民劉大論妻皆守志節

婦也駱年二十三而寡子幼孤襄竭力以事衰姑一十六年陳年

二十四而寡守節三十六年李年二十七而寡守節四十餘年賈志

趙氏漢陰藍煊妻陳氏藍習妻夫亡守節教子有方院道旌表賈志

任氏商州監生葉御邦妻夫亡年十九守節終身賈志

王氏萬縣主簿葛坤妻商州人坤以勦賊死於難氏苦守終身賈志

王氏鎮安沙仲妻解氏同縣張鏗妻也夫亡守志苦節終身鎮安志

朱氏貢生紹孔女也許字謝姓子未嫁隨父任夫病故遂投江而死

鎮安志

崔氏夏民表妻雒南人年二十八孀居時翁司教吳堡卒於官崔傾

資歸觀致孝于繼姑守節教子四十年又恩選劉漢英妻王氏年

二十四而寡守節終身里民王柱妻劉氏年二十七而寡守節四

十三年孝姑撫子邑令俱加旌表焉賈志

王氏雒南楊守莊妻楊故氏年二十八子作棟方在襁褓值族豪欺

孤逼氏再醮氏永操稜稜辛苦治家義方訓子有烈丈夫風守節

五十五年邑令李燦旌其門雜南志

石氏生員趙國寶妻雜南人夫病篤氏誓以身殉夫故氏哭絕復甦水漿不入口父母翁姑勉慰之石佯許焉及殮畢即入室縊死賈志

張氏同州王珪繼妻生一子一女歲饑家貧珪欲鬻前妻子張曰死者遺此一塊肉忍鬻以糊口耶寧鬻我子於是鬻其子女而留前

子人稱女中伯道云又王蕙繼妻張氏翁姑以其少寡無子勸令改適氏指前室子女曰此非吾子耶後值歲大荒掘草根而食翁

姑數逼嫁卒不能奪事聞當道旌表又監生王昂繼妻李氏昂已衰年而李未及笄不再稔而昂卒氏足不踰戶撫育前室子寡居

二十年又孫仲時繼妻鄭氏亦善視前室子過於己子凡衣食資用皆先之鄭終仲時以追傷不再娶賈志

氏按察使張思靜妾同州人夫病氏誓以死從及卒遂投繯死賈志

張氏石捷妻朝邑人捷死氏拜辭舅姑及弟妹閉戶而自縊家人欲毀壁救之氏從內止之曰毋壞吾大事遂縊死經日面如生事在天啟六年賈志

閻氏韓日孜妻楊氏申養情妻丑氏霍養孝妻俱朝邑人閻年十七而夫亡祖母井氏姑李氏并孀居氏堅節侍奉矢志撫孤有司交

旌之楊年十九守節丑年二十六守節皆教子有成又同里馬文芬妻趙氏雷子忠妻王氏皆以完節稱賈志

王氏魏屏翰妻嚴氏雷一滋妻皆邵陽人夫卒號泣不食而死賈志

梁氏喬進孝妻孫氏甯仲賢妻俱邵陽人少寡守節終身不易賈志

趙氏生員雷起蛟妻邵陽人起蛟病篤氏即以死自誓及卒氏痛哭投繯而殉邵陽志

寔氏澄城路世榮妻邵陽舉人寔炤女也通經書大義適榮八年男

女無出而榮故矢志苦守孀居四十餘年有司旌其門又同里田某妻和氏王之楫妻張氏馬律妻惠氏馬御妻任氏扈九高妻袁氏路仕季妻韓氏石韓妻張氏郭現妻柳氏皆夫亡苦節名重里

閭賈

志

路氏馬鶚妻澄城人夫病故氏痛幾絕姑慰之曰死節易撫孤難勉之氏乃守節教子永操歷六十年壽八十終

賈志

薛氏韓城高文運妻運亡薛年十七守節立嗣年九十六終子名自養媳李氏亦以柔靜稱於鄉里

韓城志

同氏韓城張惟偉妻偉死氏年十九誓不他適撫遺腹子文獻為諸生以善書名人以為畫荻遺風焉又張星耀妻強氏年二十三夫亡無子毀容斷髮以死自誓撫嗣子省度為諸生年六十二終薛自強妻李氏年十六夫亡舉遺腹子堅志苦節父母欲嫁之遂絕

歸寧媳孫氏即與二女墜若城死者也

韓城志

王貞女華州人王承勛女許字黃宗憲憲為寇掠去數載不歸父母欲改聘女絕食求死家人百方勸諭女曰必欲活我須歸黃門其父母從之乃荆釵縞布身操井臼孝事翁姑當道表其閭

賈志

王良姐華陰屠戶女肌體肥胖合盞後夫家疑其腹大恐有娠出歸母家訟之官良姐云妾屠家女穀食少而肉食多是以腹大官吏游移不決良姐忿然曰此事易白遂引刀剖腹肝腸墮地猶對衆自明言畢而死天啟二年旌表

華陰志

馬氏廩生王之祿繼室華陰人性柔靜善事舅姑祿歿哀悲不自勝踰月而卒其侍姬楊氏痛哭不食自縊以殉時之祿父母已老別無子息媵妾張氏年方少艾矢志守節以孝養舅姑為己任已日屢糟糠堂上甘旨必極豐潔後翁姑繼歿氏竭力襄事守節歷四

十餘年

華陰志

楊氏廩生姜濂妻濂亡氏年二十一凜凜冰操不出戶庭孀居六十

年後旌表

蒲城志

曹氏蒲城郭清妻自萬曆六年守節至崇禎元年旌表

蒲城志

王氏蒲城生員常清妻夫死時氏年二十五兩兒尚在繼襟哀毀不食死而復甦後其父勸之曰立孤難死節易汝既有志宜勉爲難者氏遂誓志守節起卧夫木主前哭則嘔血家貧甚老姑無依氏紡織以供菽水教子嚴而有方後一子中殤一子入庠白於當事旌表母節

蒲城志

鄭氏蒲城馬廷襄妻年十九而寡無子立嗣以存夫祀事姑盡孝八

十四卒

蒲城志

王氏蒲城董秋妻適夫四年生子赫甫一歲秋死氏年二十五紡績

事姑備嘗艱苦後玃成名三任教氏年九十有三

蒲城志

二張氏蒲城人胞姊妹也長適魏滌次適滌弟汪滌亡時姊年二十

未幾汪又歿姊年二十五妯娌同心守節事舅姑竭誠盡孝內外

稱賢後姊年七十三而卒妹年六十六而卒人稱一門雙節焉

蒲城志

原氏蒲城李自強妻夫死無子氏立嗣以存夫祀撫育不啻已出守

節茹苦歷五十年日夜哀號左目喪明

蒲城志

井氏蒲城原永吉妻年二十八而夫故遺二孤長拱翼甫三歲次拱軫未彌月氏欲以死殉家人密防之得不死後乃勵志守節孝養翁姑鞠育幼子後二子俱爲諸生有聲庠序氏得壽七十人以爲苦

節之報焉

蒲城志

原氏李應書妻蒲城人書病故氏以頭觸棺刺血書旌水漿不入口

者數日姑以遺娘寬慰亡何舉一女且數月死自經者三俱救免  
一夕夢夫次早往祭痛哭以頭觸墓前石血流不止扶歸六日卒  
天啟四年旌表同里馬蘭香鏜之孫女也許聘李氏子春燁春燁  
罹官刑訃至悲咽欲死沐浴整髻著新衣用白練自縊死時七月  
十六日餘溥未除停屍三日蠅不侵肌異香滿室面如生事聞旌

表蒲城志

王氏蒲城楊惟琦妻年二十二夫卒矢志欲殉舅姑力勸乃止遂養  
親撫子子亦早亡復課孫仕顯成進士年八十一卒天啟五年旌  
表又閻頤行母王氏夫亡悲慟淚血誓以死殉姑勸乃止家徒壁  
立日事紡績教子成進士天啟六年旌表賈志

段氏潼關張維任繼妻任亡氏年二十八苦節三十年如一日妾文  
氏初任卒氏誓以死殉不食者七日姻戚多方勸諭乃與段同志  
守節食息相依段沒後夜半仰鳩死及詰鳩所從來婢云昔七日  
不食時佩囊已藏至今矣潼關志

烏氏序班鑽守貴妻長安人天性至孝姑張氏孀居性嚴易怒烏見  
怒時即長跪含笑曲意敬順疾革囑貴曰母老宜敬順若妾在時  
又呼二子曰汝輩慎毋忤婆婆意言畢而逝里中稱爲孝婦又安  
塞教諭楊實儒妻劉氏藍屋人儒宦遊孀姑湛氏病風不能轉側  
氏扶持侍奉至忘寢食四載如一日姑歿氏亦以勞瘁致疾卒後  
當道俱加旌獎焉時又有邵陽車氏者生員李樹畿之婦也善事  
舅姑每解簪珥供甘旨視親飲食多寡以爲喜憂崇禎初歲大饑  
氏或並日以食而堂上奉養不致闕遺姑病數年極盡誠孝勞苦  
成疾而死至今鄉里稱爲女師又武功有郭愉妻王氏事孀姑先  
意承志姑病侍湯藥目不交睫者數日姑死王以積勞成疾卒賈志

王氏寇來宣妻乾州人年未三十而夫亡苦志守節至老無玷奏聞

旌表乾州志

車氏徐自清妻乾州人夫亡氏年未二十撫養一子朝夕紡織子亦早亡獨守四十餘年同郡上官緒妻張氏夫亡氏年二十六終身茹素不忍葷食教二子中和俱入泮年七十卒又韓川妻許氏年二十八川亡家貧甚以紡績爲生撫子守節邑令金汝和給粟贖之年九十五卒乾州志

董氏三水人年未笄適趙姓不三歲夫以疾故氏哽咽悲泣誓不獨生舅姑諸親百方勸慰弗從竟投崖下死邑人嘆其貞烈建坊道左勒石三水志

羅氏淳化人適三水文淵鳳克勤婦道躬操井臼夫病篤暗具纒求死家人守之死而甦者三娶居四十年教子倬天成名儒三水志

羅氏淳化舉人文毓鳳妻好讀書喜吟咏孝事舅姑克盡婦道所著有拾翠閣草淳化志

王氏淳化羅廷官妻廷官歿遺孤二皆在提抱茹齋食淡不改其節歲屢獲勤操作艱苦撫子歷五十餘年邑令楊燦爲作苦節記賈志

高氏李栢妻長武人栢故氏年二十九守節撫子天放年題旌長武志

高氏魚三耀妻長武人夫亡守節有司旌表長武志

劉氏鄜州長史宋綸妻年二十四而寡守節三十餘年鄜州志

張氏鄜州李從義妻年十七而夫亡守節終身崇禎時旌表又李讓妻段氏年二十六而寡孝事翁姑甘貧守節有司扁其門給粟帛焉鄜州志

任氏鄜州王文祐妻年二十六而夫亡誓不再嫁撫子成立卒年八十歲鄜州志

李氏綏德左所千戶孫榮妻榮卒家甚貧氏艱苦撫子成立後子贖

五歷薊鎮總兵官

綏德志

二十六而夫守志不再嫁于夫立卒年八

劉氏綏德馬義妻夫亡守志建貞節坊又紀文煥妻王氏馬文熙妻

胡氏王雲標妻鐘氏皆早寡守志申請旌表

綏德志

其門餘

蘇氏綏德白麒妻年三十而夫故守節五十年又馬光祿妻文氏亦

早年喪夫苦守終身

綏德志

李氏米脂生員鄭宗禹妻常氏生員杜能任妻夫亡守志孀居並五

十餘年

米脂志

潘氏長安陳之英妻年二十七而夫亡氏甘貧守志孀居並五十餘

年

長安志

張氏長安吳伯齡妻年二十四而夫亡斷髮守節事舅姑撫遺子教

養備至五十年如一日

長安志

吳氏西安前衛百戶費之完妻夫亡時氏年始十七矢志守節飲水

茹藥守節五十餘年崇禎時屢表其閭命有司歲給粟帛以獎勵

焉

長安志

段氏長安諸生田佳符妻早歲喪夫勵志守節孀居四十餘年官府

旌表

長安志

王氏咸寧給事中張國祥妾京師人夫卒於官氏年二十四生子尚

未彌月扶欄西歸食貧守志教子有成苦節歷三十餘年家有婢

嫁人亦早年失耦家人勸之他適婢曰我習聞主母言謂婦人從

一以終雖迫飢寒有死無二豈可再嫁以辱此訓耶其感化如此

長安志

張氏長安李雲妻夫早亡氏守節七十年天啟中旌表

長安志

胡氏生員孫光引妻蒲州人寄籍咸寧光引卒氏年二十四紡績自



給義方教子苦節四十八年

咸寧志

張氏郡丞許從坤妻咸寧人都諫張齊女也幼貞靜通內訓大義坤

卒慟哭不食數日疴羸瀆死毀簪珥治書延師教子入庠凡二十

五年臨終囑子肇業曰撫孤守節乃婦人分內事甚勿身後舉表

其見大體類如此

李思成傳

夏氏生員李梁妻咸寧人性端淑歸梁時梁已病篤氏日夜侍湯藥

不假寐不櫛沐者二年及梁故氏年十八聞父母翁姑欲別議絕

粒七日不死後以頭觸柱而死崇禎中旌表

賈志

董氏咸寧人中翰韓在之母生而聰慧端莊父母深器異之適勅贈

君崑旭崑旭卒在方十二齡以撫孤自誓延師課讀立毀簪珥佐

中饋視陶母薙髮效寘無異戊辰正月廿日櫛沐危坐而逝壽七

十有六在知制誥侍經筵奉使冊封鄒太守扁其門曰節壽凝褒

茂陵憲副王秉鑑爲立傳

咸寧志

白氏咸寧宋實妻夫亡守志苦節歷四十年院司爲表其閭

西安府志

任氏咸寧梁濟妻濟卒氏無子撫姪爲嗣愛如己出苦守終身院司

旌表

咸寧志

何氏咸寧貢生李磐妻馮氏指揮曹煥妻何年二十二而寡守節五

十八年馮年十九而寡守節五十年又縣民郭鳳妻張氏年十八

夫故守節六十年

賈志

趙氏咸陽縣民鄭問妻歸二十一日而夫故守節終身卒年八十

舊志

范氏咸陽生員劉承恩妻年二十五而寡守節孝親壽九十七歲

舊志

蔣氏咸陽蕭體元妻夫死守義父母欲奪之誓以死乃止事親盡孝

後以壽終

咸陽志

趙氏王萬鎰妻康氏監生王道平妻俱咸陽人年俱二十五而寡堅

志守節百折不易邑人頌之

咸陽志

謝氏咸陽人宗義妻宗義亡謝年方少艾矢志守節飲冰茹蘗卒年八十又同里許氏貢生杜希顏妻王氏里民程浪妻俱年二十而寡劉氏楊孟朝妻程氏王崇修妻甯氏王載妻俱年十九而寡又王氏史秉直妻買氏王邦金妻俱年二十八而寡皆堅心守節終身不二

賈志

車氏馮志學妻馮氏朱朝選妻咸陽人車年二十九而寡馮年二十

七而寡皆守節不二以壽終

咸陽志

竇氏咸陽劉應奎妻年二十一而夫亡氏孝事舅姑鞠育幼子屢膺表問頒給帛粟

賈志

胡氏咸陽員積善妻夫亡守節有司申請旌表

咸陽志

李氏咸陽張港妻港亡遺孤甫六月氏刲腹療姑苦節訓子後以子

貴封宜人

咸陽志

呂氏興平竇某妻年二十夫賈湘淮死姑憐其幼勸之他適氏泣曰夫亡固不可嫁况姑且無依乎孝養終身氏年亦近古稀云

咸陽志

康氏興平生員姬顯妻馮氏張縉妻劉氏張龍妻王氏孔文林妻竇氏杜鉉妻高氏張景賢妻劉氏康景妻皆早年喪夫終身苦節

興平志

孔氏興平廩生王某妻夫亡守節撫子有成官府屢加旌表

賈志

于氏給事中張汝孝繼妻臨潼人年十四歸張二十二而寡撫育二孤備極辛苦值寇亂投井求死子國機救免後氏病劇不肯進藥泣曰未亡人所以不死者以二子未成立故耳今既成人我可見爾父於地下矣言訖而逝

賈志

張氏趙祐妻臨潼人年十八歸趙二十四而祐亡家人逼令他適氏

斷髮毀容堅不從命其後屢經兵荒貧窮孤苦不能自給氏卒無

二志堅持水蘖至七十二歲而終

臨潼志

趙氏臨潼何光炳妻光炳為真定守歿於王事氏年二十有二矢志

苦守後家益蕭索辛苦備嘗壽至八十三歲

臨潼志

段氏臨潼民王道極妻道極死於賊氏年甚幼父母欲嫁之氏曰婦

人從一而終背夫不義棄子不仁以死自誓父母乃從其志後撫

子珽為諸生氏年八十餘

臨潼志

茹氏臨潼張淮妻年十五適淮甫六月淮故孝事舅姑孀居幾七十

年周氏臨潼生員陳在職妻年十九夫亡翁性過嚴氏奉養盡禮

苦節六十七年又縣民姚養志妻范氏年十九夫亡家貧壁立苦

節撫孤三十年有司屢旌其門

臨潼志

任氏臨潼孫繼曾妻年十九孀居夫弟欲奪其志辛苦萬端誓不改志

壽八十一子光陞以孝稱邑庠高起鳳妻張氏夫亡孀居值流寇

亂家無生計夫黨屢欲逼嫁氏百折不易遭奇荒孝事翁姑歿

以禮年五十餘卒里民韓先春妻李氏張某妻呂氏俱年十九家

貧守志俱七十餘卒任爾佐妻文氏年十八白雲霞妻姚氏年一

十程思芳妻趙氏王琳妻張氏俱年二十四甘貧守志又王養俊

妻趙氏丁養輔妻馮氏高于昆妻李氏皆年幼撫孤至于成立

臨潼志

惠氏臨潼劉承業妻歸二載而夫亡男女無出翁老且癱家貧欲令

改醮氏痛哭跪誓願奉舅終身以姪為嗣劉氏兩世孤伶屢經兵

燹氏以苦節全之邑令建碑表其墓又石養身妻劉氏年二十四

夫亡以死自誓俄夫弟夫婦俱死遺二姪俱幼氏撫如已子歷流

寇凶荒數十年如一日壽九十終岳秉明妻劉氏年二十七男女

無出而夫亡苦節甘貧撫孤姪至八十餘卒貢士申會繼室高氏年二十六夫亡家益窘事嚴姑撫兄弟子女及前妻子皆如已出茹素衣結五十年高得金妻武氏年二十一夫亡家業中落撫前子如已出苦節四十餘年後壽七十二卒

臨潼志

房氏臨潼主道賢妻賢少亡氏無子送葬時即欲投壙其母伴以防得不死旬日後卒投繯死邑庠張宗孔妻卞氏夫亡自刎死

臨潼志

文氏高陵裴訓妻訓卒氏年二十二誓以死殉舅姑勸止撫孤汝清成立汝清早卒妻藥氏年十九生子憲度甫四十七日而清亡家人勸令改適藥剪髮自誓孝事孀姑撫子憲度成進士有司旌表張君宦妻裴氏憲度祖姑也中年寡居家計蕭然伯叔逼之終不能強守節四十餘年又齊天民妻朱氏年二十守節事瞽目姑最孝御史施維翰旌之胡炳妻馬氏夫卒髡髮矢志歷四十餘年

賈志

某氏惠檀妻高陵人姿容甚麗值寇亂欲虜之氏不從賊強扶上馬

氏數數墜地賊怒殺之

高陵志

程氏高陵董某妻年二十而寡撫孤守志家甚貧鄰人有以米餽者氏謝曰予若不安貧則不守寡矣餽者歎服後其子二十而夭媳某氏年甫十八程勸之嫁氏泣曰媳去姑誰依紡績度日姑婦壽各八十餘

高陵志

王氏鄠縣九叙曾孫女蓋屋龐源妻源以孝廉累官至知府氏幼聰

慧與舅趙嶠同學詩文其詩溫厚和平雖嶠亦自爲不及也著有

文集

鄠縣志

李氏高徵妻鄠縣人徵亡氏年二十五事姑育子苦節五十年事聞

旌表

賈志

張氏臧企足妻藍田人企足亡氏年十八家甚貧矢志守節織紵以

養親年五十餘卒

賈志

楊氏涇陽諸生秦甲禮妻割股療母督學旌之諸生韓鍾秀妻呂氏

姑劉氏病篤氏烹股肉以救縣令表之

涇陽志

高氏涇陽劉居仁妻字居仁未婚而居仁入蜀迎父久不歸母娶氏

於家以待其子後蜀中兵變父子俱死訃聞姑令改嫁氏誓死不

從孝姑守節年七十而卒

涇陽志

雷氏涇陽監生郭鳳翔妻年十九而寡矢志苦守者六十年流賊至

涇標幟於門曰勿犯節婦家後賊又至居人相率入氏家避難全

活甚衆

涇陽志

岳氏涇陽生員魏引藩妻夫亡無子氏年甚少兄嫂逼令改嫁氏剪

髮明志者三甘貧守志以孝終入祠祀之

涇陽志

王氏涇陽生員張用光妻年二十二而寡子女俱無苦節四十年

賈志

馮氏涇陽貢生趙廷宋妻年二十三而夫亡欲以死殉以有遺腹乃

止生子紹芳教之成立後紹芳又歿後撫孫師抃苦節五十二年

又張大紳妻白氏年二十五而夫亡遺孤嘉敬方五歲氏以紡績

撫子子復早亡又撫孫永思苦節四十餘年

涇陽志

張氏涇陽儒士郭維藩妻年十九而夫故遺孤京方一週氏守節撫

孤克底成立壽至八十邑令旌其門又王尚禮妻吳氏穆大照妻

周氏俱年二十五而寡守志不移吳撫幼子入庠壽至七十餘歲

周無子育二女出嫁壽至六十餘歲杜易芳妻魏氏趙翼明妻袁

氏俱年二十七而寡魏教子成諸生守節三十年袁教子登鄉薦

守節四十六年

涇陽志

韓氏涇陽李惟蔚妻尚氏楊恒運妻俱年十六而寡韓苦節五十餘

年尚苦節四十餘年又王可久妻竹氏于歸時王已嬰疾氏敬侍

湯藥十年不懈可以卒氏絕飲食嘔血升餘而死

涇陽志

馮氏生員趙有節妻涇陽人通經書大義工右軍書法節亡氏哀痛枯一目苦節四十年教子炳然入庠又同里舉人何洪傑妻姚氏夫亡號泣欲死以遺孤孱幼始勉為視息甘貧苦守子稍長口授孝經以教之後子鵬翥登賢書

涇陽志

李氏涇陽陳國憲妻年二十六而夫故氏事姑撫子苦節歷四十年又同縣王瑚妻管氏趙祀妻韓氏張允妻王氏駱希顏妻王氏李雍妻趙氏生員張崇妻秦氏坤世開妻劉氏王洋妻趙氏師魁妻李氏韓汝復妻王氏陳官妻馮氏任進孝妻王氏熊尚義妻張氏俱早年守節名重鄉里

涇陽志

楊氏涇陽王彥學妻彥學病篤戒氏曰我知若必為我死母老子幼將誰依乎及夫故氏哭欲死姑以夫語諭之乃止以紡績佐菽水

教二子成立能不負夫遺囑焉

涇陽志

張氏涇陽徐威妻淡氏威兒婦鄭氏威孫婦三世守節里人欽仰

涇陽志

王氏涇陽劉從龍妻從龍入蜀氏年二十有九以紡績葬翁姑及祖父母撫二子成立苦節二十六年張體仁妻表氏年十四于歸甫三月而體仁貿易於滇尋卒氏誓死不嫁守節六十餘年鄉先達

立碑以旌之

涇陽志

睢氏三原張懷琰妻夫亡翁姑俱失明氏扶病嘗藥曲盡婦道歿而

禮葬里人稱曰孝婦

三原志

張氏三原李仲玉妻仲玉卒於京口氏聞痛悼誓不欲生次日扃戶

自縊而死

三原志

王氏三原趙肖先妾也肖先病劇氏即以死自誓家人嚴守之得不死後肖先歿氏乘間自縊以殉

三原志

謝氏三原溫無知妾無知亡氏年三十懿德恪謹守節終身三原志

袁氏三原諸生趙道成妻年十七而夫亡氏守節安貧織紡度日卒年七十有三又尚應昌妻梁氏亦年十七而寡守節教子克底有

成三原志

張氏三原孫世萬妻王氏楊世芳妻俱年二十而寡守節歷五十年生員袁賁鶴妻趙氏田富民妻李氏俱早年喪夫守節三十年賈志

申氏三原侯先達妻孀居守節孝事姑嫜歿葬以禮諸姑無家者養之子姪失怙者撫之教子于唐成進士官御史又劉氏秦僑妻年十九而寡守節不移孫一鵬官藩司中丞焦源清妻邵氏年二十一值闖變夫歿難氏潛室自縊以救免後其子之序得釋氏與乳媪張氏紡績撫育一十八年之序入泮氏曰汝善繼汝父志我將復命地下矣果于源清忌辰前三日而卒里民秦一陞妻牛氏年

少夫亡家負遺三孤俱幼嘗冬夜著鶉衣紡績達旦母子對泣宗黨有憐而助者卒不受撫子有成師策妻周氏年十九而寡遺嗣子尚德從溫無知學令交知名士崇禎中歲大祲以粟活族黨其衆年八十七卒劉某妻崔氏年二十七守節至九十無疾而終三原志

張氏蓋屋諸生盧思誠妻年十七夫歿一子未晬氏恐無後乃剪髮以殉於柩曰猶身殉也教子有成苦節四十年趙烈妻侯氏年二十八夫亡族人利其產逼嫁百端溺其子於河氏即赴水求死賴救得免子亦無害苦節五十年焦培元妻徐氏趙囑妻王氏年俱十七而寡守節終身不渝又有陳氏夫失名亦以苦節稱蓋屋志

田氏渭南冢宰南弦蒲妾年二十被出歸母家紡績自給五十餘載後弦蒲歿難歿氏為位朝夕哭奠制服三年壽八十二卒南居恒

妾薛氏年二十三守節教子成名至五十三而卒

賈志

張氏孟化胥妻渭南人年十七而化胥亡生遺腹子未幾子復亡氏絕而復蘇者再嗣後歸於母家閉戶獨居雖至親罕見其面以壽

終渭南志

陳氏渭南庠生郭鞏妻夫故家貧紡績自給訓子有成王氏廩生田騰芳妻夫亡守志教子及孫入泮南氏諸生谷敏辨妻夫亡求殉不得守節撫孤不數載哀感而死王自勉妻雷氏年十九而寡諸生張經國妻較氏里民田有井妻李氏俱年二十六而寡守志不渝又尹復初妻韓氏王新詩妻劉氏張俊妻田氏辛謂妻劉氏單自文妻楊氏朱公棟妻劉氏張為煥妻辛氏田峻妻霍氏孟來妻張氏耿自克妻孟氏姜蓋妻張氏生員勒布夔妻孫氏郭誠妻譚氏經歷史譔事妻張氏南元象妾許氏李懋功妻閔氏郭從政妻

常氏張繼宗妻高氏師天盈妻王氏王世崇妻蘇氏李紹妻常氏樊堯聘妻胡氏薛登岳妻李氏劉應祿妻秦氏單自有妻李氏王玠妻韓氏單邦彥妻譚氏張于今妻王氏劉應春妻王氏張從志妻薛氏王世科妻安氏李逢秋妻姚氏較照妻石氏進士郭俊妻張氏知縣方國光妻盧氏知府朱擢妾安氏貢士王用師妻曹氏儒士王紳妻焦氏任堯典妻刻氏周仲賢妻杜氏田孕璜妻劉氏諸生張而能妻辛氏田孕玉母雷氏王一元妻樊氏高志復妻任氏左維嗣妻王氏谷重榮妻譚氏張騰蛟妻惠氏任自濟妻姜氏張宗程妻王氏田源妻朱氏李應祥妻郭氏張守已妻王氏暨子應科妻孫氏張霞妻柳氏盧科妻譚氏王養性妻楊氏白居善繼妻姜氏郭鬱妻裴氏薛鐘岳妻陳氏州判盧崇雅繼室張氏禮部儒士盧湛繼室王氏諸生朱正典妻谷氏劉統蜀妻師氏劉照斗



妻郭氏杜春蔚妻田氏孫振世妻田氏李大榮妻李氏李爲棟妻南氏孟永蒲妻蔣氏李可棟妻郭氏盧光孝妻陳氏白永祿妻馮氏曹維延妻李氏史若瑜妻韓氏焦琇妻田氏李時芳妻秦氏高檀妻員氏郭討妻閔氏張琬妻樊氏程子尹妻樊氏任光代妻辛氏田紹芳妻王氏靳自強妻薛氏較毓秀妻高氏王自講妻張氏樊宗孔妻王氏劉嘉言妻孟氏左繼遇妻張氏較敬宗妻趙氏馮自立妻李氏孫倓妻譚氏史若衡妻盧氏郭蘇妻蘭氏劉樹妻史氏薛世昌妻劉氏焦崇教妻郭氏辛淳妻谷氏辛汶妻楊氏鄧與要妻白氏王猷妻張氏單堯擢妻孟氏李若粹妻楊氏張騰高妻程氏史諫妻張氏郭延妻李氏師光祥妻朱氏王自祿妻蘭氏師道弘妻杜氏李樹風妻田氏譚氏張所聞妻郭氏郭應鵬妻皆早年喪夫終身守志渭南志

徐氏富平生員田爾腴妻爾腴代父死於平陽櫬歸成禮畢氏即日

自縊賈志

趙氏富平竇汝璽妻夫卒時氏年甚少苦節撫孤卒年六十有司旌

其門又陳世貴妻張氏惠本仁妻馬氏李可父妻田氏俱青年喪

夫甘貧守節以壽終賈志

常氏富平李應科妻科亡氏撫子大亨成立取妻張氏大亨復早卒

張亦守志不移人稱雙節云富平志

陳氏富平張問德妻問德因父故哀毀而死氏年二十二生子甫四

十日氏托子於夫兄成禮畢潛室自縊富平志

權氏富平石潛珠妻年十八夫亡撫遺孤璽璽卒撫孫九鼎九鼎又

天撫曾孫璋及粹白璋又殤粹白得成立三世保孤遭逢尤困憊

田云賈志

田氏富平生員李允昌妻年二十九而寡初允昌病革謂氏曰爾多才若能教子成立吾死無恨及卒氏涕泣欲殉其舅以夫遺囑諭之氏乃止事親克孝茹苦完節教四歲孤至於成名又同里党敏妻陳氏張鏡妻支氏張謐妻王氏胡進朝妻孫氏郭承倉妻田氏田貢妻楊氏王文奎妻劉氏李祥妻張氏郭朝用妻劉氏劉某妻趙氏劉述堯妻樊氏宋尚節妻惠氏張廷贊妻王氏李羔妻張氏紀某妻郭氏李汝儀妻張氏王山妻胡氏張仲木妻王氏王盡忠妻楊氏邵積妻紀氏劉元義妻來氏楊維藩妻張氏皆蚤年喪夫終身

守志

富平志

楊氏富平石巍妻痛父爵死而歿人稱孝女

富平志

曹氏醴泉諸生陳虞妻于歸一載而虞故氏年十九遺子月餘家貧

甚姑逼改嫁多方挫折矢志愈堅歷三十年如一日

醴泉志

楊氏醴泉苟柎妻年二十二而寡無子以侄嗣之愛如已出事姑盡

孝苦節五十年

醴泉志

苟氏表大有妻醴泉人幼聰慧解詩書大義適表後家計蕭然氏以績紡佐夫讀書未幾夫病亡氏時年三十矢志守節姑性嚴氏委曲承順能得其歡伯氏家亦窘菽水之奉氏獨任之待諸姪尤有恩惠表氏內外皆稱其賢

醴泉志

康氏醴泉高登瀛妻年二十八歲而夫亡生子二十六日矢志守節

教子有成巡按旌表

賈志

閻氏醴泉王佐妻楊氏楊萃妻閻年二十五而寡楊年二十八而寡

孝事翁姑鞠育孤子閻守節五十年楊守節四十年

賈志

曹氏醴泉人既嫁後母何氏病劇氏割股以進里人稱孝

賈志

張氏醴泉劉廷聘妻幼年守節曾經表門

賈志

馬氏醴泉庠生楊符妻苟氏儒童王景峻妻俱年二十一而寡馬氏撫前妻子如已出守節歷五十年苟氏撫一歲孤艱苦備嘗翁姑在堂竭力孝養督學俱加旌獎

醴泉志

張氏醴泉民王某妻年未三旬夫早逝氏堅貞苦志教子成名建坊旌表

賈志

曹氏醴泉鄭時雍母夫亡守志歷五十餘年教子及孫相繼入泮知縣表其門

醴泉志

紀氏膚施人生員楊如楠之妻如楠亡氏無子時孀姑在堂氏零丁孤苦誓不二志竭誠盡力以供甘旨延安守張子忠表其閭曰節孝

膚施志

楊氏膚施人太保兆之孫女也適中部貢生劉爾甲柔順安貞無世族氣時值寇變氏避亂夜遇羣盜逼之不從以衣蒙面投崖而死

賈志

李氏膚施舉人姚衍中妻夫早喪遺孤廷璉甫六歲氏大慟曰吾不難從夫地下嗟此一塊肉誰依乃矢志撫孤廷璉自外塾氏必親課其業後廷璉舉明經筮仕山東東平州氏守節三十餘年年七十一而卒

膚施志

郝氏白光翰妻安塞人夫早亡遺子白崑未週歲歷試百艱撫育成

立

延安志

孫氏安定諸生郝顥母年十九夫亡撫孤成立顥復早亡又撫孫亦成立卒年七十餘里民劉漢興母石氏年十九寡遺腹生漢興夫兄欲嫁之逃歸母家終其節壽八十二孫永慶妻折氏夫早亡守志家甚貧終身不易貢士景廷柱祖母南氏同知白龍圖妻蕭氏舉人張開祥妻白氏諸生南士昇母甄氏俱芳年守志養親教子

有名里黨安定志

郝氏延川高稱光妻年二十一夫亡善撫孤子事姑以孝揚廷春妻

高氏年二十六夫亡誓不他適袁奉江妻温氏夫亡苦節撫孤院

道並旌之又張瑾妻馬氏年十八夫亡有遺腹每焚香祝天曰願

生男以立宗祀果產男成立事孀姑賀氏尤謹人以孝稱延川志

張氏鳳翔梁來鳳妻樊氏閩大綸妻張年二十二而寡養孀姑育孤

子慈孝兩盡樊年三十而寡守節五十年鳳翔志

康氏岐山祝學仲妻年二十四夫亡守節三十年黃養浩妻張氏周

玉妻秦氏俱早寡誓無他志以紡績孝親楊保宋妻陳氏夫故子

未浹歲孀姑老且失明氏茹苦歷辛存歿盡禮厥子亦成立諸生

王萬祝妻牛氏夫亡孝孀姑育弱子克終其節鳳翔府志

王氏寶雞諸生高龍妻年十六矢志守節至五十終里民徐如春妻

胡氏年二十七守節子成章妻高氏年二十二守節賈志

林氏李承芳妻寶雞人早歲喪夫哀毀欲絕者再既念有娠泣謂所

親曰吾死則宗祀絕翁姑無所恃矣遂辛勤紡織事親以孝聞未

幾生子元春恩勤撫育延師督學元春舉子修及倫俱成立賈志

張氏寶雞李右妻年二十一而夫亡姑憐其幼令改適氏以死自誓

姑乃止完節終身寶雞志

譚氏寶雞陳大策妻沈氏貢生高第妻大策亡時譚年十九撫孤昌

言入泮守節六十年第亡時沈年二十三教子射斗登科守節三

十年寶雞志

張氏寶雞高選妻年二十而寡甘貧守節卒年八十七又劉文詔妻

楊氏年二十五而寡守節四十餘年生員楊賓與妻彭氏年二十

七而寡無子撫姪為嗣守節五十餘年寶雞志

何氏趙文吾妻郿邑人幼端嚴凝重歸趙時氏年已笄而趙未冠進

飲食案齊眉也數年舉一子自勵一子在姪而趙逝氏躬自操作

以紡緝燈火佐自勵誦讀弗懈也自勵既成立為諸生有遠志門

多長者車氏年八十七殂

樹業集

陳氏麟遊生員何呈圖妻年二十餘夫亡剪髮納棺以矢厥志撫遺

子汰稍長三為擇師教之崇禎丙子汰登賢書氏孀居五十餘年

無疾而終邑令吳公稱其貞操比之共姜義方媿於孟母云又魏

俊妻劉氏何伯鑑妻樊氏甄一鵬妻李氏王洛妻趙氏甄璠妻馬

氏田孔殷妻侯氏侯練妻劉氏劉麟妻呂氏寧極享妻劉氏呂璉

妻楊氏何真偉妻呂氏皆以守節著

劉氏麟遊諸生呂珽妻芳年守節撫育二子相繼而殞伶仃無依以

績繼自給終其天年里民趙應乾妻郝氏年二十二而寡歷試兵

荒不渝其志二子俱成立卒年八十

賈志

魏氏汧陽趙邦彥妻年二十五而夫亡遺孤於庭甚幼氏矢志守節

撫孤有成後於庭以明經任教授氏年九十有五而卒朱氏於庭

子徵之妻也徵為名諸生卒時氏年十八子一鶴尚在襁褓氏欲

以死殉三日不食翁姑委曲諭之乃勵志苦守後一鶴亦舉明經

人稱一門雙節

汧陽志

燕氏汧陽李簋妻張氏生員任璽妻明末寇亂俱投崖死

汧陽志

再小姐汧陽人幼孤育於伯後賊亂伯遇害氏號天痛哭墜崖而死

汧陽志

呂氏汧陽庠生蘇育妻蘇氏呂廷諫妻呂年二十一而寡守節五十

年蘇年二十一而寡守節四十二年皆教子入泮鄉里稱其賢節

汧陽志

陳氏隴州舉人閻傳妻同傳入京傳道病卒扶櫬歸守節訓子四十

二年隴州志

沈氏隴州苟一新妻年二十七而寡守節四十八年闕西道表其貞

節又梁氏監生米養博妻亦年二十七而寡守節四十二年院司

旌表隴州志

李氏隴州庠生閻鉅妻年二十八而夫亡遺孤甚幼氏飲水茹藥屢

經挫折守志不渝後其子入庠氏年五十六而卒守節二十八年

隴州志

劉妃漢中府瑞王夫人也王在潛邸當婚神宗以妃良家子聘為王

妃王性好佛不近女色妃亦賦性貞潔居王宮數十年處子也及

王就藩國朝夕禮佛不親藩政妃剛斷明決親閱書奏大小政務

總攬處分咸中規則一點闕欲求某宮人為配上書白妃妃大怒

即召母弟劉某與諸官吏促草書上之闕懼逃亡沔邑妃設計斬

之其交通宮人以不首賜死癸甲之變有總兵趙鵬子脅王入蜀

妃亦隨之王遇害妃投江水死柳榮集

冉氏褒城副榜馬上乘妻年二十餘夫死孝事翁姑撫育幼子又儒

士路州傑妻王氏年二十一夫故苦節二十四年氏有養女郭氏

幼字鄰兒宋宋客蜀不歸倩人諷郭他適女聞之投黑龍江而死

里民胡獻珍妻沈氏善事翁姑年二十五而寡時值歲饑或諷之

再適氏嚙指自誓終身不渝年八十卒漢中志

趙氏城固生員夏文炳妻年二十七而寡矢志守節卒年五十四又

庠生張嘉猷妻周氏年二十二而夫亡守節撫孤足不出戶者四

十年教子鳳翽成進士官中丞崇禎中旌表庠生李為範妻張氏

亦年二十二而寡親黨憫其少勸之他適氏不應入室仰藥死城固

志

魏氏洋縣李汝登妻夫亡時氏年二十七守節撫子艱苦備嘗撫按

題請旌表

洋縣志

賈氏洋縣黃錫極妻年二十一而夫亡立志守節或欲奪其志氏懷

刃誓死撫孤成立卒年八十二薛增輝妻劉氏年二十五而夫亡

父母欲嫁之氏引刃自刎以救得不死守節奉姑卒八十七

洋縣志

石氏洋縣貢生李喬木妻夫亡甘貧守節終始不渝天啟時旌表

賈志

何氏洋縣曹宗武妻于歸月餘而夫亡時氏年十九甘貧守志卒年

六十餘李國郁妻趙氏年二十二而夫故守志不移卒年八十歲

任康侯妻薛氏年二十五而寡事親課子卒年七十五

洋縣志

亢氏洋縣樊維楨妻夫故時氏年十七孝事舅姑勵志守節建坊旌

表

洋縣志

楊氏洋縣任康玉妻年二十而夫故孝事舅姑鞠育孤子苦節終身

洋縣志

袁氏洋縣諸生劉立典妻楊氏劉士典妻夫亡時二氏年皆二十餘

勵志苦守人稱雙節

洋縣志

白氏洋縣諸生李作樞妻年十八夫亡育遺腹子苦志守節至八十

一終薛琦妻強氏年十九夫亡遺子五月守節至九十一終任梁

妻紀氏年二十六甘貧守志歷五十年里民周昌嗣妻張氏年二

十而寡事姑育孤值兵寇頻擾備盡孝慈邑人公表之楊士茂妻

閻氏年二十六夫亡哀毀絕食誓以死殉舅姑勸諭勉強存活仰

事俯育極盡孝慈崇禎間旌表

洋縣志

段氏洋縣楊燭妻夫故氏年二十一遺孤甫半載孝事翁姑竭力以

葬夫之祖父母教其子成立守節五十年

崇禎集

王氏劉維楨妻西鄉人年二十五夫亡痛哭而死邑令聶宗祐爲文以祭之

漢中志

符氏焦馨遠母西鄉人年二十二而夫亡苦志守節教子入泮又同縣郭彪妻祈氏年二十三而夫亡矢志撫孤克底成立卒年七十

歲

西鄉志

劉氏鳳縣梁雲高妻雲高任廣平訓導卒於官氏年二十二子校甫七月氏矢志守節堅心不移教子慈嚴兩盡後校成諸生有聲庠

序

鳳縣志

金氏沔縣錢一貫妻年十八而一貫亡子在襁褓紡織自給苦節撫孤卒年七十又同里趙子節妻李氏年二十三夫故無子甘心守節卒年六十直指俱加旌表焉

沔縣志

劉氏貢生王世業繼妻略陽人夫亡氏年十九撫遺腹子矢志守節

後子死家益貧守節益堅邑令拜其門奉文特旌歲有給恤年九十餘卒又同邑劉起敬妻芮氏起敬任湖廣通判病卒氏孀居苦

節終身

略陽志

許氏寧先生員張講妻夫亡氏年三十遺腹生子撫之成立院道旌

表

寧先生志

王氏榆林衛指揮使王國禎妻年二十八夫遠出客死江南訃至即投繯鄰媪偕其母抑譬再三後迎母與姑同居侍奉不怠鄉里共推節孝千戶樂森妻何氏年二十六守節里民崔重祿妻趙氏年二十守節白有庫妻劉氏年二十四守節張五倫妻連氏年二十餘撫遺腹子守節崇禎十四年斗粟千錢每遇賑濟雖數日絕粒不踰閭又衛指揮朱玠妻周氏年二十四守節舍餘許聰妻劉氏年二十六守節千戶楊汝楫妻張氏衛軍李春芳妻梁氏衛民姜



正妻紀氏李時妻岳氏餘丁楊明妻高氏俱年二十七守節百戶  
 李義妻韓氏諸生王經妻劉氏舍餘周潤妻張氏崔天秩妻瞿氏  
 監生劉大學妻曹氏里民楊穆妻孔氏總兵紀世楹妻薛氏里民  
 傳鏜妻王氏俱夫亡守節年登上壽延綏志

劉天祥妻王氏榆林人夫亡即縊死于柩前賈志

曹氏知縣李盛英妻榆林人英以貢任太湖令崇禎癸未殉賊難後  
 逆闖陷城氏身被數鎗不肯屈辱賊將憐而釋之甘貧教子斷髮

守節有司旌其門賈志

殷氏懷遠清平堡人榆林學生張威妻年二十九喪夫遺子三歲時  
 遭荒旱恒紡績以供餽粥苦節五十餘年教子鵬翼為黌士以  
 壽終巡撫旌之波羅堡應襲汪直妻沈氏年二十五撫孤守志至  
 七十餘卒賈志

張氏柴芝蘭妻靖邊人歲大饑芝蘭偕長子播負販遇盜死氏年三  
 十指季子國梁謂仲子國棟曰此塊肉足以祀柴氏矣吾與若往  
 求屍即不得則死哀號旬旬果得夫及子屍負之歸矢志自守備  
 縫紉自給年七十八卒延安志

劉氏與安生員屠瑀妻年十八歸瑀夫故遺孤秉忠甫八月誓甘同  
 死賴鄰婦救之崑勉持家教子入泮苦節四十八年柴菴集

水中二女興安人州遭水變死者甚眾倖生者皆找筏浮樹杪間忽  
 波中有呼救人聲漸近筏上人遙見二女子伏朽木上出沒蕩漾  
 即引筏救之俱上筏年約十六七姿態婉變問其姓不應見筏上  
 人皆裸體森立又無女伴二女相顧語曰吾姊妹倚木不死冀有  
 善地可苟存今景象若此何用生為即携手復躍入水中筏上人  
 挽救不得皆遙望隕涕時崇禎癸未夏六月也興安志

張氏興安諸生陳大策妻貢士希載女也崇禎癸未水變大策溺死

氏躄痛靈側幾絕者數四勺水不入口七日口眼湧血而死又同

里生員馬兆祥妻張氏兆祥病故氏自縊以殉時年二十有四

志

某氏興安監生張最妻夫死撫遺腹子茹荼紡績教子入泮有司累

旌之諸生王國英妻徐氏夫故家貧苦節五十餘年王學先妻俞

氏夫故有妾生一女氏撫女苦守道守旌其門

興安志

謝氏洵陽進士李聯芳妻年二十二守節至七十餘歲清苦自持當

道給以公餼王論妻馬氏年二十六寡居事舅姑盡禮撫幼孤成

立督學王世懋特加旌禮又邑御史許忠妻某氏勵志守節當道

月給廩餼

洵陽志

侯氏紫陽生員魏訪之妻年二十夫故數日不食幾死叔暨兄欲奪

其節氏剪髮自誓遂絕歸寧力貧以事舅姑喪葬盡禮守節五十

四年崇禎十年旌表

紫陽志

周氏石泉舉人魏人仰妻人仰十九舉于鄉氏每以讀書勉勗相敬

如賓及人仰沒守身課子足不踰閭人罕見其影聞其聲者院道

旌其門

石泉志

高氏漢陰生員任宗伊妻夫亡守節和熊勵子院道俱旌之里民陳

光耀妻蔡氏幼年孀居教子國典成名有司表之

賈志

南氏商州生員南文表女年十六父歿孀母疾篤告天求代忽母思

肉羹時禁屠氏割股烹進人驚孝烈

商州志

屈氏邵尊賢妻商州人夫死遺子三月餘廢出屈多方撫育誓不再

嫁翁文科壽九十三姑鄧氏壽八十九翁病癱癩屈進湯粥接糞

穢卧起必扶朝夕罔倦鄉里稱之又李氏生員周謨妻謨故遺子

承文甫四歲氏誓死守志家計蕭索氏上事孀姑下育弱子甘貧守志五十餘年又李某妻閻氏年二十七而寡守節五十餘年有司旌其門

商州志

劉氏商州民邦教女年十五聘張綿壽綿壽年十四疾篤氏聞之即輟食比卒氏白父母詣弔臨柩慟哭幾絕謂嫂曰乞分若子過繼我欲守節衆駭異父母促歸氏不可強之不食而死翁姑慟悼備棺槨與其子合葬

商州志

南氏商州生員任引妻歸任半載引即卒氏年十四孀守七十年末路貧困苦節愈堅八十四卒有司賜粟帛旌表同郡呂應春妻劉氏亦早年失耦教子有成

黃志

南氏商州生員南應旌之女幼聰慧通經書許字山陽劉光方受聘而光亡年十五父赴弔女堅請隨入劉門撫棺哭索衰麻變服請

終喪不歸曰此吾家也父母翁姑勸不從因留老媪作伴而去女朝夕上香哭所居室令築牆隔之自爲一院院中有井井旁有蠟梅一株梅開不令人折井水不令人汲自題一聯於門扉云梅開遇雪冰心苦井底無波月影寒舅姑外雖至親婦女亦不見面舅姑憐之與氏父母私議擇配氏聞遂割耳炙面幾死議乃寢崇禎二年三月年五十二無疾而卒邑令萬愛民高其行申請旌表奉勅建烈女坊

山陽志

張氏維南生員夜夢麟妻年二十六而寡苦節撫子年八十卒又王氏同里任景聰妻年二十七而夫亡氏甘貧守志躬親蠶織課子讀書苦節四十年

維南志

強氏維南史鏡妻夫歿年未三十持節撫孤家貧甚歷兵荒艱苦萬狀操持無斁

維南志

某氏雒南諸生劉呈旦妻年二十而夫亡氏誓死守節食貧撫子苦

操三十餘年雒南志

楊氏雷世興妻同州人夫亡姑老子穉家徒壁立氏竭力績紡以給  
俯仰值歲凶族人逼奪其志氏以頭觸石血流地乃得完節有司

旌表同州志

惠氏同州趙守曾妻夫故親老絕嗣叔翁利其產唆翁姑嫁氏氏聞  
毀容自殺賴鄰婦救之復蘇已雪涕曰叔翁利吾田耳願歸田叔

翁未亡人甘以手力養翁姑也叔慚沮後翁姑亡葬祭如禮有司  
表曰節孝李宗權妻馬氏夫早卒無後氏立從子為嗣守志終身

同州志

張氏同州馬芳繼妻年十六于歸五年芳卒家計蕭然氏拮据井臼  
撫前室子果與遺腹子果餼畝勞耕篝燈勸讀孀苦至老其甘如

飴後果克家果游泮氏稱壽母貧不能聞於朝其喪夫守志終始  
不渝者有王相妻楊氏張璠妻楊氏睦爵妻雷氏呼景原妻武氏

生員尚矩妻劉氏董邦靜妻馬氏張嘉猷繼妻路氏董三成妻王  
氏王養心妻張氏李嘉客妻王氏生員王選士妻張氏馬涵妻李

氏尚澄妻暢氏王無邪妻馬氏李緯妻王氏生員王養正妻雷氏  
邢守節妻趙氏雷世恩妻楊氏韓舜清妻陳氏王友妻董氏董三

才妻王氏張登蛟妻王氏生員閻守讓繼妻張氏生員李傳教繼  
妻王氏成孟禮妻馬氏李汝棖妻王氏張汝朝繼妻范氏李來攀

繼妻黃氏皆旌於有司而未上聞他遠僻枯守繩甕間者猶不克  
盡書同州志

張氏朝邑諸生党元第母趙氏樊成芳妻俱年十七而寡撫子克成  
又張氏李尚平妻年十六而寡升氏生員張淑載妻年二十八而

寡二氏皆無子撫姪爲後苦守終身又樊氏監生韓仲調妻張氏  
王弘緒妻夫亡時年皆二十有二矢志苦守撫孤成立節操凜然  
又孫氏邑人徐發母年二十而寡家甚貧以紡績自給苦節四十  
餘年朝邑志

雷氏朝邑李天壽妻年二十一而寡無子守志鄉里賢之又王氏李  
騰琨妻夫亡守節按察使給扁旌表王氏御史雷士禎妻年二十  
四而寡撫幼孤肅家政者四十年節慈並著朝邑志

喬氏李廷璽妻寇氏李瑤妻趙氏雷謙妻皆邵陽人早歲孀居清操  
不二邵陽志

賀氏李昆妻邵陽人夫亡誓不欲生翁姑以年老無依慰留氏袖刀  
至靈前割左耳以殉乃守志事親終身完節監生甯洵妻范氏大  
慈燧孫女也范通書史性貞烈適甯未及成禮而甯卒范誓死以

殉姑止之以諸孫嗣始勉就食剪髮明信姑婦相依苦節終身竟  
相妻李氏邵邑村民也年十四夫卒以紡績事親後壽至八十二  
又康邦成妻褚氏魏恩奇妻趙氏趙昌符妻雷氏甯濬妻李氏趙  
鎮妻甯氏趙潤妻雷氏俱早年孀居守身不二賈志

秦氏田光謙妻邵陽人謙疾篤氏許以死殉及卒殮畢著新衣拜姑  
曰兒將從夫地下不獲終養矣姑泣挽留乘間自縊賈志

李氏安尚起妻邵陽人尚起貿易河南病故氏聞訃痛哭幾絕盡易  
產完夫債家置二棺待夫觀歸跪托族黨曰煩舉二棺入地遂潛  
室自縊而死侯三仕妻趙氏同邑孟春女也三仕病故氏不食死  
時年一十九邵陽志

張氏通判白麒繼妻澄城人夫亡葬祭畢飲毒死邑諸生李朱蓋妻  
呼氏事舅姑盡孝盡疾歿氏痛幾絕因念已與妾俱有娠忍死自

護後竟兩無一成乃于崇禎八年冬自經死事聞建坊旌表賈志

解氏韓城生員衛景輔妻廉憲解經雅之女也年十九輔亡氏引刃

斷脰者數四以翁姑密防父母勸諭乃抱其親姪雲龍嗣夫後日

事織紉以奉翁姑其教嗣子嚴而有方間取夫遺書手自督課無

何嗣子染疫死氏即投繯柩側崇禎集

薛氏王三聘妻韓城人三聘赴京應選授太守未任而故氏對母曰

夫嘗云吾不敢望世生富貴人惟願世有節義人今不敢違是訓

母曰貞節婦德也汝自主之及夫櫬歸里服毒死諸生薛維緒妻

解氏夫病篤剪髮誓以死殉及歿遂投繯姑屢勸阻氏跪泣曰無

徒苦我竟絕食死時年一十九歲又孫一龍妻劉氏夫卒自縊死

顏問仁妻王氏夫死氏不食三日其兄至從容問死生孰愈兄曰

死固善如母老何氏曰然但歸告母我且強食無憂兄去即自經

又同邑諸生張文軌妻師氏夫死縊于柩側其子哭而解之復誅

語家人曰我志決矣痛哭絕粒而死里民楊先樓妻陳氏樓沒于

水氏越七日自縊死韓城志

薛氏強不息妻王氏史節妻俱韓城人薛年十九夫故絕粒嘔血以

翁姑勸止守節六十餘年王年二十守志以織紡奉繼姑育嗣子

縣令並旌其門又邑諸生吉黃裳妻史氏年二十三孀居守節五

十年賈志

薛氏韓城吉來敬妻生子星粲方五歲來敬死氏絕粒嘔血誓以死

殉翁姑以子幼勸之遂事親撫孤績紉以給朝夕屢值歲荒糟糠

自啖教子中崇禎戊辰進士王養粹妻劉氏年二十餘夫死守節

孝事孀姑子者都登康熙甲辰進士韓城志。按賈志薛氏華陰吉來敬妻與韓城志異

陳氏華州生員王拭妻夫故氏年二十五守節四十餘年崇禎集

孫氏王氏李鉉妾華州人夫亡七日俱縊柩旁孫年二十三王年二

十一

賈志

王氏華州諸生郭甸妻年二十一旬故氏孝事翁姑甘貧撫孤三十三年里民王夢熊妻東氏年十九子丕顯甫三月而夫故孝事姑嫜撫子入庠壽六十餘卒郭永實妻杜氏年二十而寡姑年七十七子甫一歲氏甘貧守志孝親撫子九十四卒何溢妻薛氏年二十三孀居守志子婦王氏亦克孝厥姑又邑民李茂妻宋氏郭循規妻喬氏趙齡妻郭氏劉奉祀妻王氏武朝臣妻柳氏武稷妻李氏安天器妻楊氏宜民妻管氏皆苦志守節終身不二

賈志

關氏華陰陳虞恭繼妻年二十一而寡撫前子過于已出甘貧守志四十四年霍霞妻楊氏年二十餘而寡善事舅姑苦節四十餘年王之寵妻鮑氏事舅姑克孝少寡守義四十餘年員偉鉉妻孟氏

亦守節撫孤四十餘年陳星斗妻趙氏幼通烈女孝經諸傳適

斗三十而孀矢志撫孤未幾子與婦俱亡更歷兵荒撫二孫成立

年八十卒

賈志

陳氏郭允休妻華陰人幼習女訓歸于郭孝事翁姑郭亡撫棺號泣誓以身殉家人防護甚嚴乘間飲藥死

賈志

王氏蒲城諸生趙念劬妻幼聰慧婉恬年十六歸念劬未五年念劬病卒時當酷暑擗踊號泣勺飲不入口者四日其母痛哭曰子死如我未亡人何氏強進湯粥曰母在兒何忍死防稍踈解腰經經死時崇禎十六年七月初六日也

編壺集

樊九女蒲城人中丞東謨女字李耀如未娶而耀如死欲往弔以殉

母不可朝夕哽咽有委禽者恚恨而卒時年甫十四歲

蒲城志

王氏蒲城諸生郭國瑾妻夫死是夜即投繯廁中救免親以遺腹勸

始強延既生女即哭請為夫立嗣嗣立即自縊于內室其衣服密縫無寸隙王馨徵妻張氏年十八而寡伯氏謀再醮氏聞引刀刻頸家人奪之復自縊家人又救免竟鬱鬱成疾而卒張蟬雲者尚紀女也許字李俞檜檜被誣繫獄女聞可賄脫謀諸母欲貨莊奩助之母不可曰人盡夫也時女方食即以碗擲地志不復語臨晚自縊死蒲城志

楊氏蒲城生員王光毓妻年二十而夫故撫遺腹子守節四十年蒲城志

田氏蒲城生員楊體乾妻年二十三而夫亡誓以死殉數日內自縊者三俱賴家人救免乃勵志守節撫孤成立苦節四十餘年又同縣趙逢祥妻王氏年二十四而孀居守節教子飲水茹荼閩邑稱重諸生輩從則妻楊氏夫亡守志教子入庠苦節五十餘年生員

權取宦妻原氏取宦歿遺二子俱幼時原年二十七勵志苦守屢遭巨族凌逼百折不回守節五十餘年賈志

李氏蒲城王沂妻沂病故氏年二十三事親保孤遠近稱之守節五十二年柴庵集

王氏潼關楊愈懋妻懋總兵四川殉難訃至王絕粒而死少司馬孫必顯卒于官妾郭氏七日不食而死諸生劉鴻發妻孫氏夫暴病亡氏哀痛嘔血而死李可棟妻孟氏年二十五夫以京操卒于京櫬歸治喪畢自縊死又劉氏陳宸畫妻宸為水溺死氏九日不食自縊以殉潼關志

張氏潼關張振德妻年十八夫歿號泣欲從死家人勸之氏慨然曰吾夫上無兄弟下無子女若我死夫家一脉絕矣乃取親甥繼嗣以奉宗祀守志終身焉又盧滋妻鄭氏孫元祖妻韓氏俱夫故守



志以完節稱 潼關志

宋氏魏信妻耀州人夫亡守節院司旌表 耀州志

趙氏李遇妻同官人夫卒氏年二十勤苦守節教子入庠年八十有

司旌表 賈志

李氏溪洪斗妻白水人崇禎間斗病故方殮李躡踊哭已入室投縶

遂與斗同殯 賈志

李氏白水田開稷妻年十九夫亡裂指守節孝親教子四十年又同

邑于仁妻郭氏李向春妻武氏呂經妻王氏高思溫妻龐氏李恩

崇妻高氏吳孟賢妻李氏俱守節終身見稱鄉里 賈志

王氏乾州宋子大妻年十六歸子大二十四歲而夫歿撫教二子相

繼成名崇禎十一年題請建坊壽八十六諸生吳楫妻印氏年十

九楫亡勵志守節教子燻成貢士壽六十三舉人王啟芳妻夏氏

夫亡孀嫁而夏氏勵志堅節教子入泮孫應路妻馬氏年二十甘

貧持節至八十二卒有司旌表張應芳妻上官氏年二十二矢志

守節王冬受妻吳氏年二十三守節馬奉獻妻吳氏年二十八守

節劉宗周妻李氏許天民妻馬氏徐自新妻开氏俱年三十守節

終身無玷 賈志

張氏馬爾蕃妻乾州人年二十痛夫早逝日夜號泣未數月而亡巡

按旌之又李氏女者聘陳姓年十六未歸陳懼官刑女聞之曰如

此不肖何以托終身遂自經于閨中知州周應泰扁其門

馬氏陳汝真妻秋氏師賓妻韓氏黎九成妻俱乾州節婦也馬年二

十二孝養舅姑撫遺腹子成立年八十二卒秋年二十七斷髮毀

面守節終身韓年未三十守節教子玉田登崇禎戊戌進士壽八

十餘俱疏請建坊旌表 乾州志

陝西通志 卷六十七 人物十三

張氏生員馬珮妻武功人年十五適珮性孤介寡言笑崇禎癸未珮歿氏有娠哀毀骨立自矢必死有勸以生子存嗣乃止既產男遂不食而死武功志

白氏李行保妻巨氏師誥妻俱永壽節婦也白氏與嫂同爨撫姪猶子鄉里稱之巨氏割臂以啖夫齒指以示志賈志

員氏永壽趙應聘妻年二十三而寡無子止二女勵志撫養出閨氏年七十遇奇荒塞戶絕鄰不食而死又諸生史在書妻楊氏年二

十四而寡李棟妻胡氏年二十五而寡任廷舉妻楊氏年二十一而寡王在程妻傅氏年二十六而寡趙學妻李氏年二十六而寡

宋宇妻祁氏年二十一而寡皆矢志守節以終其身永壽志  
史氏邠州劉米妻年二十二寡居撫一歲孤守節三十四年苦志貞

操終身不渝邠州志

席氏邠州生員紀復妻劉氏安所遇妻王氏監生闡誥妻並節婦也

席氏夫亡守節事翁姑至孝崇禎中旌表劉氏年三十守節至八十二卒王氏少寡子幼守節二十餘年賈志

文氏劉復祖妻三水人幼貞慧夫早卒守節五十年能詩文著思古齋草三十五篇賈志

文氏景重華妻三水人夫沉疴歲餘病革謂氏曰若年少不可孀居善事後人氏嚙指誓以死從及亡遂縊于柩側三水志

吳氏三水文運徵妻運徵赴公車卒京邸氏年二十四子女無出訃聞數覓死所不食者七日以姑姊朝夕勸諭遂矢死靡他孀居五

十餘年壽八十卒三水志  
許氏李宗白妻三水人夫亡氏年二十三撫孤矢死靡他守節三十

年又許氏李泰妻年三十而孀家貧無子苦節終身賈志

王氏三水蘇思望妻李氏思望弟志望妻王年二十五而寡李年二十一  
十八而寡俱矢志守節人稱一門雙貞云三水志

賢節淳化志

柳氏鄜州羅璜妻年十九而夫亡誓死不嫁撫孤守志四十餘年賈志

梁氏陳虞治妻鄜州人年二十夫亡子幼苦節終身又王氏貢生宋

呂妾呂無嫡室羣妾中有一遺腹呂亡四月而生子後其生母他

適王與其姑苦節四十年舉四孫壽八十餘卒賈志

任氏趙世寧妻鄜州人年二十五夫亡家貧守節拾齋養子至七十

卒鄜州志

申氏孟自務妻洛川人孟佃于趙順宰家趙悅氏色百方圖之夜乘

孟出強入室氏執刀刃之反被殺死監司表其烈賈志

宋氏中部楊景輝妻景輝歿氏年二十四二子尚幼躬親紡績辛苦

萬狀年九十一而終人稱苦節又張廷輔妻賈氏年二十七而寡

守節至七十三歲李應奎妻張氏年二十五而寡守節至七十歲

高敏妻范氏亦早年喪夫撫孤成立守節五十年中部志

楊氏中部劉煜華妻夫亡無子誓死守節內外無依備嘗艱苦守節

二十六年中部志

李氏諸生劉爾容妻中部人年二十四夫亡氏夜經樞前家人驚救

遂苦節撫孤子衺衺亦蚤亡偕媳李氏教撫諸孫人稱一門雙節

賈志

郭氏宜君人父維城久病氏割股肉以進父隨愈賈志

張氏宜君貢生趙彬妻無子守節有司屢旌其門壽七十里民田英

妻楊氏年二十二夫亡撫子子早卒復撫孫壽七十七終賈志

于氏綏德衛應襲高墨妻李氏百戶管邦妻俱年二十五而寡撫孤  
守志卒年七十餘又指揮王堦妻申氏年二十七而寡守節終身

綏德志

李氏米脂人適榆林庠生馮奇莪夫卒守節不二又米脂諸生姬翊

周妻艾氏舉人朝棟女也年二十五夫故守節終身

賈志

惠氏生員鮑璽妻清澗人年二十而夫卒翁姑欲嫁之氏誓不改適

苦節六十年

賈志

白氏生員王永祿妻清澗人年二十夫亡事孀姑竭誠盡孝姑多病

氏親嘗湯藥及姑死脫簪珥以送終卒年七十五歲

賈志

王氏葭州建安堡宋璋妻夫早亡無子守節至七十餘歲

延綏志

閻氏葭州高家堡鄭維緒妻夫亡矢志守節終始不渝卒年七十餘

歲

葭州志

牛氏葭州人馬三樂妻年二十而夫卒甘貧守志孝事翁姑苦節五

十年撫孤道遠娶媳李氏後道遠歿李守節不移教子維健為諸

生維健尋亦早夭妻劉氏恪遵姑訓堅心苦守撫子有成有司表

其門曰一門三節

葭州志

王氏吳堡張如愚妻年十八夫故其母憐其少欲令改適氏抱遺孤

晨夜號泣指天誓日氏欲以死殉母乃止氏勵志苦守躬親井臼

孝養舅姑卒年八十有七又同里宋名儒妻劉氏亦少寡撫子守

節終身

葭州志

樊氏吳堡張志賢妻無所出每勸夫娶妻夫不從氏候夫外出為娶

妾生五子未幾張故妻改適氏撫妾子如己出後皆成立氏年至

八旬鄉里稱賢

吳堡志

丁氏吳堡諸生寇善妻年二十一而寡生子宗夏甫三歲氏撫孤堅

守後宗夏舉明經任訓導氏年八十有五而卒守節六十四年

吳卷志

劉氏劉宗舜妻神木人夫死時氏年二十三有子甫五歲撫之入泮

有聲庠序

神木志

王氏神木人楊名遠母夫早亡氏矢志撫孤守節不二後膺旌典

志

李氏府谷王道大妻幼年孀居苦節堅守卒年八十有二官司旌表

府谷志

李氏府谷人李瑾之女適保德朱正中年十九而寡歸於母家苦節

歷五十年後旌表

府谷志

朱氏長安生員馬健空妻姑病氏割股以進獲愈閭里咸稱其孝逆

閩據長安縱兵大掠擄獲婦女無算氏聞之投井而死時朱誼凝

妻晉氏沈伯騰妻韓氏沈伯起妻任氏王弘祖妻袁氏王弘宗妻

晉氏暨女寅姐蕭起鳳妻王氏蕭仕昌妻葛氏葉增光妻趙氏張

素含妻張氏與弟媳素謨妻宗氏李氏國楨女俱投井死張允儀

妻王氏自經死又鄭夢麟妻趙氏通經史能文章夫亡守節聞闔

亂不食死

賈志

曹氏咸寧庠生郭晉妻給諫代之女也性貞靜善事翁姑荆布隨分

闔至以頭觸壁而死

陳大經撰傳

劉烈女者給諫懋孫女也幼聰慧知

書逆闖陷城與母俱投井中母先下而斃女未死園嫗援以縋弗

應抱母屍經宿死又趙生民妻王氏王召俊妻熊氏程安妻周氏

朱守吾妻徐氏樊培已妻朱氏舉人李芳妻樊氏生員李光信妻

雷氏周培和妻陶氏周培武妻王氏周培明妻朱氏周維垣妻王

氏俱投井死又有節婦盧應豸妻康氏夫亡苦守二十年經寇亂

亦投井死陳我綸妻雷氏偕妯娌俱投井死朱伯明母某氏挾子

孫七人投井死李道妻某氏偕姊妹已字未嫁者十餘人並指揮  
蔣愈妻楊氏悉投井死高翔妻唐氏賊欲劫去氏給賊出自鋸其  
首而死咸寧志

宋氏咸陽薛來徵繼妻能文章工詩歌城陷罵賊死馮志

翟烈女興平中軍自信女也賊陷城投井死又王烈女諸生謂靖女  
李烈女廷祀女皆罵賊死馮志

吳氏臨潼武啟哲妻高陵進士鐘英女也哲亡氏栢舟自矢流寇之  
亂氏被執大罵賊碎斫其身而死張計允妻喬氏賊掠馬上氏捨  
地數次厲聲大罵賊怒加刃而死胡默妻趙氏遇賊度不免自投  
崖下賊追斫其頭以為已死數日後默覓屍猶聞喘息聲昇至家  
詢之則以啖雪得餘生也是歲翁與夫俱亡氏髮而撫孤者四十  
年又孝廉周祿妻王氏妾屈氏諸生胡士奇妻黃氏劉濬源妻袁  
氏偕妹高姐次女儒姐俱投井死郝聲揚妻王氏李輔德女劉源  
源妻孔氏俱罵賊死又二烈女者臨潼官莊里民女也失其氏賊  
挾之馬上大罵不絕賊怒甚連斫而死賈志

仝氏鄠邑諸生趙日昇妻與昇同被賊掠給賊曰吾兄也釋之吾從  
汝賊信之日昇得脫免氏度其去遠據樹大罵賊以刀劈之至死  
猶抱樹不解何氏同里楊遇妻遇亡守節賊至強挾不從乃縛於  
樹氏忿罵賊以刀割乳塞其口氏仍罵不絕賊剖其腹而死又姚  
大錫妻閻氏山思廉妻閻氏閻祚昌妻沈氏俱遇賊不辱大罵而  
死舉人陳治衡妻某氏投井死賈志

羅氏涇陽郭來輔妻崇禎己巳延寇入涇陽氏同衆匿高樓上賊縱  
火焚樓諸人爭出羅獨赴火死時王進祿妻潘氏曹登祿妻姚氏  
皆墜崖死甯一鵬妻楊氏王福盛妻馬氏俱投井死己亥秋流寇

復入涇陽執王三有妻楊氏劫之去氏不從賊斷臂剖腹而死有  
犬守之逾二日葬訖始去牛象煜妻白氏遇賊不屈賊焚死柴良  
卿妻賈氏避賊與夫相失賊去於枯井見夫屍氏一慟躍入井中  
而死監生王運昌妻何氏流寇至今氏入厨作食氏以厨刀自刎  
死諸生韓龜妻茹氏遇賊大罵賊斃其姿猶豫未忍殺旁一賊斫  
其首而死樊魯妻魏氏賊殺魯氏投井以殉家人救出復自縊而  
死韓爾訥妻張氏牛應麟妻齊氏俱避賊居高樓賊攻不下焚之  
張有子在懷抱跪托乳母自墜樓死齊子稍長推之下墮樓逸去  
齊自蹈火而死李魁吾妻楊氏遇賊迫其行不從以甘言令縫衽  
又不從賊怒連及而死又劉澤溥妻李氏楊方妻于氏周仕璉妻  
屈氏王之臣妻呂氏康嗣昌妻王氏王三秀妻陳氏師燮元妻韓  
氏劉溼妻李氏又李氏夫失其姓俱義不從賊大罵而死何承怡

女甫及笄同母避寇窰中賊焚窰子母不出而死王三統妻陳氏

張佐妻李氏任盡禮女王養女俱投井死焦希商妻李氏梁爾翰

妻趙氏俱自經死

賈志

楊氏三原貢生秦儒奇妻素賢孝避寇高樓賊縱火氏抱幼女投窰  
下死而復甦復匍匐投井死柴玉堂妻李氏孀居數年遇寇不屈  
寸磔死陳五妻某氏逸其姓北山寇亂搶南關強挾氏馬上氏墜  
而搶地者三賊怒連斫死武舉張汝翼妻王氏居孤村汝翼與賊  
戰被害賊擄氏馬上氏哭墜者數次賊怒刺七刃而死段爲章妻  
劉氏闖寇入城氏恐被辱抱幼女投井死梁應堯妻俱氏梁銷妻  
白氏俱遭亂投井死温樹璿妻楊氏投崖死舉人梁士駿妻王氏  
年十六抱子投井死來氏三女者明經來鑑女也長來貞年十九  
員所祐妻次來芳年十六趙耀妻季來媛年十五未字時貞芳歸

寧兵入城俱投一井死巢氏夫失名遭亂泣謂夫曰汝第攜子爲宗祀計我偕女必死矣遂沉女井中紬衣自縊死賊至見其懸梁有欲取衣者其魁叱曰烈婦其可令裸乎去之馬夏姐朝江女也喪母聞寇至恐受污解裙覆面投井死

三原志

何氏蓋屋生員任糖妻聰慧夙成旁涉書史年十七適糖崇禎八年歸寧遇流賊逼之上馬氏佯從馬上遙語乳媪抱兒去度媪行已遠遂倒投下馬竄入河中水淺不能沒膝賊將涉水取之氏曰吾今亦自畏死願從汝矣投我刀我籍刀柄挂淤泥中即可自力登岸賊擲刀與之氏得刀連自刎腕弱不能絕但流血被體宛轉波濤間賊憤極趣前提髮出之插楚備至氏坐地上握刀瞋目大罵賊奪刀支解之事聞建坊旌表立祠祀之同里生員何興瑞妻陳氏事孀姑最孝流寇突至適興瑞他出姑被重傷氏痛憤罵賊賊揮刀斷其臂而死舉人李瑁妻楊氏諸生翟道妻穆氏俱守身不從被殺死燕氏女者武進士鯤化女也年十四嫻習書史遇賊罵不絕聲賊舉刀恐之女奪刀自刎賊怒連斫而死霍小初者給諫文華公之裔孫也年十九未字崇禎七年罵賊死貢生李拱辰僕李信妻任氏爲主守別墅崇禎七年賊至不欲逃曰無以報主也相匿舍旁叢竹中賊至搜獲之令從行氏抱女仆他不肯起賊舉鎗刺之創甚推女與信目之使急去乃厲聲大罵而死丁香者王瓚婢也同瓚逃難賊將近瓚以銀付之使逃去瓚被賊燒死丁香負屍匍匐歸以前銀買棺葬埋人皆義之

蓋屋志

周氏渭南生員李化春妻崇禎八年寇掠其家逼氏上馬周厲聲罵賊賊怒刃之肚破腸出而死時年二十九歲里民方寸潔妻同氏王家賓妻袁氏俱匿下邽廢城閣上賊初逼同不從遂裂其尸



以示表表掩面撲地曰任爾斫賊並殺之同年二十六表年二

十五田璩母李氏妻李氏姑婦同避賊賊強奪其婦姑婦牽挽不

捨寇斷姑一手其一手仍挽婦手賊並殺之胡養正妻史氏成王

輔妻薛氏遇賊樓挾上馬投地數四賊以鐵鑊擣之而死史年十

八薛年十九李自升女年十八流寇逼掠守義被殺死渭南志

王氏富平石若星妻賦性端敏幽貞自好崇禎八年流寇入縣氏引

三女於樓上賊稔知氏母子色美欲生得之戈徒環繞二匝氏度

無可免與三女俱自經死温九疇妻翟氏賊破寨投河死富平志

王氏醴泉人陳繼才妻也崇禎七年賊劫氏逼勒上馬氏大罵遂遇

害苟烈女者彌懷女也崇禎八年氏年十五賊欲掠去女堅執不

從持刀脅之遂投井死醴泉志

高氏宋薊妻安塞人值草寇橫發自鄉入城以避道值寇劫氏大罵

賊截其耳以繩束之馬上臨崖氏復大罵墜而死安塞志

白氏諸生薛文炳妻薛氏張志道妻俱安定人遇賊義不受污白投

井死薛自縊死薛一柳妻高氏年二十三夫亡守妻子數年賊陷

城自縊死貢生郝建中妾陳氏年十七投井死里民薛三樂兒婦

失其姓初聞盜有掠人子女者即買砒礪一握佩於身一目盜至

即吞之扶之馬上行未數步墜而死王彥俊女其夫某被盜殺氏

聞出郊奔屍先見夫血在路守哭被賊執氏投冰孔死安定志

鄭氏保安進士韓炳衡妻賊破城索宦資氏挺然曰吾夫清官那有

餘物賊以白刃加其項氏曰吾爲命婦義不可辱遂厲聲罵賊引

頸受刃而死時貢生劉善慶妻張氏聞城陷投縲而死諸生王符

妻李氏聞賊至城下晨起命婢取櫛沐具曰吾將沐浴見先人於

地下城隨陷氏被執罵不絕口賊以刃披其頰傷左耳氏掩耳急

奔投井而死里民許志尚妻靳氏年十八夫禦賊城上被傷將死賊至欲掠氏去氏給之曰吾夫命在旦夕吾掩屍從汝是夕志尚卒氏葬墻下遂投井死

保安志

高氏馬萬選妻延川人避兵居山寨崇禎九年賊破寨劫氏行強扶上馬氏奮身墜馬者數次賊以繩縛之馬上至隘徑卒投崖死

延川志

譚氏崇禎甲戌闖寇之犯鳳翔也諸生劉文正妻譚氏爲賊執大罵不從賊怒手刃之罵愈厲至氣絕而止諸生李其妻張氏罵賊求死賊怒將刀燒紅插入腹中氏猶厲罵而死里民高守業妻劉氏遇賊屢挫不辱給賊投井賊怒下之石後三日出屍其色如生時又揚騰鳳妻吳氏崇禎七年騰鳳被執罵賊遇害賊退氏殞夫已畢一哭嘔血而死

鳳翔志

陳氏庠生袁逢辰繼室寶鷄人遭寇亂舉家被擄陳攜六歲兒遇賊大罵不屈舌血染裳賊怒曰汝倔強如此寧不惜幼子乎從則母子俱活陳罵益力並遇害又胡氏其夫失名流寇破縣逼之上馬氏大罵賊怒碎其屍

寶鷄志

薛氏扶風諸生邱凌雲妻孀居二十年流寇破城投城下死之貢生陳璉妻李氏被賊殺於其家有白犬守之七日不少離俟家人至收葬之時武舉張英鍾妻韓氏庠生王立極妻樊氏韓一龍妻李氏馬行健妻姜氏韓養德妻趙氏里民宋吉祥妻劉氏魏宗效妻楊氏王在宗妻魏氏俱投河死庠生劉文燦妻王氏羅儒童妻王氏劉芳舉之女八姐俱投井死庠生張彥珍妻唐氏張鶴妻張氏里民劉伯義妻張氏俱自經死庠生高士慎妻張氏與幼女小姐同秉節而死又楊菊姐亦死大叅張繼孟妻賈氏夫死張獻忠之

難氏以死殉玉莪者繼孟女也賊破城逼之不從見殺主事王繩祖妻陳氏大叅王秉鑑母也城陷投井死馬潤姐者汝龍女也賊逼汚女以挺擊賊被磔死諸生馮可時妻周氏賊逼不從被殺死里民田幾妻張氏罵賊而死羅鴻妻史氏馮文可妻王氏王鑑妻孫氏聞賊陷城俱投井死鳳翔府志

楊氏郿邑張文奇妻夙嫻閨訓善事舅姑崇禎七年從姑避寇中途見執氏給賊釋姑度姑去遠伺間投崖賊往救之據地大罵亂刃殺死諸生師以風母楊氏妻王氏俱被賊劫楊罵賊砍傷王挺身撲救立斃及下郿志

苟烈女麟遊人崇禎七年爲賊所掠自毀其面罵不絕口遂遇害趙氏生員趙玉堂妻家貧以紡績佐夫讀書崇禎末年遭流寇劫掠義不受辱墜崖而死麟遊志

關氏隴州戶部員外馬如翰妻年十六于歸崇禎七年寇陷州城氏投水塘中寇曳出氏大罵自抉目毀面復投塘中死後三日得其屍衣裳鞵履細結如織縣丞關廣宗妻胡氏攜幼女投井死庠生馬相如妻李氏率女赴河死貢生俞徽吉妻關氏王廷詔妻王氏王標妻喬氏張慎行妻馬氏庠生關光升妻何氏關光景妻劉氏關光宗妻李氏李永茂妻關氏楊世浩妻李氏李振妻關氏關舜卿妾武氏醫生葛思洪妻李氏俱不從賊赴水死隴州志

岳烈女城固人十六歲許字生員王棊子遇賊罵不絕口賊怒三斷其身貢生岳中衡女年十八未字賊攻城急中衡語家人曰城破我不偷生若等宜自爲計女曰父不惜死兒何敢偷生遂以刀自刎賊至中衡立而罵之被殺里民張拱壽妻李氏年十八避高傑之亂於谷口與賊遇罵不從賊賊怒碎其身焉城固志

王氏洋縣叅議吉允迪妻允迪隨父孔嘉任順德府城破氏刎諸生  
陳守潔妻周氏賊兵犯洋夫婦被掠即夜自經於賊營諸生段際  
昌妻李氏闖賊殺其夫罵不絕口亦被殺死王延緒妻薛氏俱罵  
賊死烈女王氏父貴許字程姓未適值闖賊暴掠女忿罵不從賊  
強掖上馬女捨地毀容賊怒截其軀數段而去里人義之爲解衣  
裹尸以葬號烈女塚

洋縣志

來氏鳳縣貢生盧效先妻崇禎間賊過天星獲之氏觸樹而死馬烈  
女者父名義張獻忠破城以女有殊色欲挾去女閉目不從鞭之  
徻死終不應賊碎其身而死

鳳縣志

沈氏寧羌諸生曹良輔妻崇禎八年寇陷城自縊而死又張氏谷自  
登妻亦自縊死諸生沈文斗妻蔡氏夫婦俱被賊執賊欲害沈蔡  
請以身代賊不從氏怒罵之遂遇害

寧羌志

趙氏沔吏梁賓妻崇禎間寇至氏因夫病不忍遠避夫再四促之及  
聞呼噪聲始避於門外麥壠中賊索得脅入營氏厲聲罵曰我清  
白婦肯從汝賊耶賊怒斷其兩手罵不絕口再斷其兩足而死夫  
聞之觸牆而斃里民蔡一仕妻胡氏同次女欲渡河避寇女曰即  
得渡河賊若從馬上追之死亦不免何若葬此江之爲愈女先投  
江母隨之時稱子母雙烈

賈志

王氏徐士選妻略陽人崇禎甲戌賊掠略陽氏被執誘之不從脅以  
白刃又不從賊怒剖其腹而死王康寧妻王氏遇賊不屈寸磔而  
死

略陽志

高氏榆林衛山海總兵王世欽妻賊陷城投井死賊退獲屍顏如生  
中軍劉永昌妻高氏夫爲賊執高欲就死永昌止之高曰吾得畢  
命於君前幸矣遂先永昌死教授徐可徵妻潘氏可徵避賊入井

潘料夫先死乃自縊可徵匿井中七日賊去救之出竟不死里民  
吳伯裕妻王氏聞賊至以石自碎其首未絕復投環死趙之珍妻  
馬氏家於焦家川賊營於莊前馬自知不免潛匿古窰內竟饑餓  
而死百戶王伸妻高氏孀居卅三年聞賊破城整衣笄手攜長婦  
曰吾寡居不面姻親中一男子者有年矣今面賊乎同長婦入井  
死後三閏月合殯夫壙開棺視之香聞數里百戶楊坤妻柳氏聞  
賊警泣告姑曰賊入余必死但不能終養而以幼子累親柰何城  
破投井死吳守忠妻楊氏巡捕喬國雲妻劉氏生員劉伯新妻張  
氏並二女俱死崔國安妻米氏率婢同羣婦避寇於僻巷賊至見  
氏色麗欲劫之氏正色危坐賊逼之氏起大罵亂髮爪面碎首出  
血賊怒加刃而死懷遠威武堡管登魁妻傅氏城陷攜幼男投井  
死

廷綬志

烈婦者與安人失其姓劉二虎破城一婦被擄入營欲污之大罵  
不從賊以亂石擊破其腦死一婦逃出城外賊追迫之投漢水死

興安志

烈婦石泉人無名氏崇禎丙子五月初二日賊陷城南門外積草中  
藏一少婦未二十賊數人取草見婦曳之出見其艷欲驅之入城  
烈婦踴罵不止賊怒脅以刃仍詈罵如故賊首悅其色慰諭而撫  
之罵愈厲賊首恨其不屈令斷臂抉舌迫之江干一躍而入觀者  
無不墮淚

石泉志

尹氏漢陰貢士茹上珍妻夫亡守志撫子鉞成名院道並旌之崇禎  
丁丑城陷賊拉媳去氏挽之不得自刎死時經歷陳光啟妾王氏  
自以少艾恐被辱亦自刎死里民王道直妻鄭氏抱女投井死

陰志

劉氏商州諸生孔維樸繼妻歸未期而寡年十七事舅姑撫前子孀居四十餘年鄉里欽其苦節城破恐被辱投井死盧宜巍妻南氏夫故甘貧事孀姑二十五年城破仰藥死邵公正妻王氏守節十年城破自刎未殊賊執之至泮池以頭觸石檻而死儒士周之瑾妻南氏守志二十餘年城破執氏給曰井邊有金比至遂投井死石中玉妻閻氏苦節二十七年城破罵賊被焚死醫官姜騰鳳妻段氏守節十年城破登城頭以衿覆面倒身而下折骨裂首而死里民雷維元妻孔氏守節十二年城破自焚張希元妻姚氏守節五十年院道旌表被擄不屈死南國禎妻王氏王英妻姚氏俱守節二十年投井死呂元聲母東氏賊攻城急東與媳薛氏誓死促聲戍城頭城陷聲大呼曰城破矣姑婦各執厨刀自刎而死聲見之亦自刎於側孔剛妻呂氏城破投井被賊繫出誘之不從縛柱

刺去雙目而投之火儒生南士程妻程氏夫婦俱年十九城破與母王氏同夫被執賊欲殺其姑與夫而納氏氏哭罵不絕口奪刀自殞賊磔其尸而死楊育桂妻杜氏剖腹死貢生閻調壘妻吳氏斷臂死郡署商洛道中軍守備朱從鎮妻李氏貢生牛紹玉妻盧氏牛振武妻王氏諸生牛奇妻周氏周之珽妻牛氏程彤錫妻王氏俱守義不屈而死諸生楊育楨妻武氏陳宗器妻牛氏牛紹開妻王氏里民李從文妻王氏俱自刎死白玉潔妻呂氏以剪自刺其喉不死抱兒匍匐投井死諸生雷維垣妻邢氏張詣妻武氏侯維垣妻呂氏周天璇妻王氏牛維明妻南氏牛芳妻劉氏周志伊妻魚氏冀觀妻楊氏俱投井死諸生張耀明妻楊氏里民田應貢妻孟氏俱自縊死

商州志

景氏鎮安姚西峰妻崇禎間被賊擄逼氏罵不從賊殺之

鎮安志

邵氏維南薛匡倫妻商州方伯可立女也年十六歸倫貞順淑慎克脩  
婦道崇禎十六年因避寇居商闖賊破商城執氏欲辱之氏大罵  
則其足磔之時年二十八歲

本朝雍正六年旌表給銀建坊貢士史錄妻王氏巨賊入邑王痛罵  
賊怒以佩刀刺其頸比死猶罵不絕庠生何克俊妻周氏寇至使  
爲炊周正坐罵曰我望族之女肯爲爾賊奴作飯耶賊怒殺之里  
民陶崇妻樊氏避賊居山岩崇禎乙亥賊攻之樊恐岩破被辱從  
岩上投潭中死之孫應鈔妻盧氏闖賊入邑氏自縊死女亦死之  
邑吏王鳴鳳女年十五兒婦張氏年十七避寇同匿山中度不免  
同趨峻崖各以衣裳面攜手墜崖而死

維南志

翟氏張春妻同州人崇禎間春陷於陣氏投繯死事聞于朝贈卹有

加同州志

吳烈女朝邑人崇禎七年流寇劫掠欲去女堅不從強牽至坡底囓  
以刃女大罵不絕口遂被害

朝邑志

雷氏諸生侯在庠妻党氏雷運泰妻楊氏吳學文妻侯氏雷梗妻俱  
命陽人崇禎中寇至雷氏楊氏俱投井死侯氏偕女彩奠亦投井  
死党氏自縊死知縣范志懋爲立節烈祠並祀焉楊丕仲妻袁氏  
賊掠不從殺身全節王烈女者進士又旦之妹許聘韓原張氏賊  
至家人逃散女投井而死

仰陽志

楊氏通判杜<sub>一</sub>崖妻党氏主簿路從度妻俱澄城人崇禎八年城陷  
罵賊而死

澄城志

師氏韓城儒士解居乾妻崇禎八年流寇號八隊者蹂韓環刃相向  
氏知不免徐弗爲動賊以氏容止端麗逼之氏遂大罵賊手刃隨  
刃隨罵聲與氣絕而死死七日顏色如生又諸生王名世妻李氏

寇陷薛峰村氏被擄賊欲犯之數以智免擁至堡城下招贖氏即大呼曰我陷於賊以心迹不白為恨母用贖也我欲死人見處耳遂以手批賊面大罵而死趙翔鳳妻孫氏避賊居崖窰賊攻破之抱幼子夫婦並投崖死薛匡王妻趙氏翔鳳女也避寇花石村崖窰將陷氏投崖死薛允中妻孫氏若陷度不免與二女堅縫衣裳使不離體同墜城死王國純妻程氏投河死衛思德妻吉氏流寇八大王劫燒氏被執度不免抱幼子赴火死烈士梁養民母衛氏流寇攻砦將破自經死諸生張爾達妻孫氏事三繼姑孝無間言流賊破陳邨寨氏投井死韓城志王小桂王黑女俱十四歲崇禎二年賊入韓二女與吉氏韓氏高氏同時而死邑令左懋第謂一門五烈云賈志王欣王真心父子為賊殺薛氏跳崖死程應第妻燕氏衛姑於鋒刃之下全身於強暴之徒賊感其孝舍之而去左羅石韓城集

張氏華州諸生郭仲熙妻崇禎癸未賊掠村居氏投井死劉烈女者父應栢女年十四賊至匿屋壁間賊劫之弗從賊怒曰速死耶女展頸伏於地刃下而死賈志

張烈女華陰人祿昌女年及笄逆虜入闕劫女挾之馬上躍下者數四賊怒欲殺之女即引頸受刃分屍為數段賈志

張氏蒲城生員單惟欽繼妻崇禎癸未夫婦避亂至朱牛山欽墜崖死氏慟傷賊定搬屍葬畢自縊死蒲城志

蔣氏潼關舉人孔傑妻崇禎癸未賊破潼關欲劫之氏大罵不從賊逼以刃氏毫無懼意益急賊怒腰斬之時同死不屈者則有

儒官徐學禮妻張氏赴火死百戶尹君極妻任氏總旗楊一貴妻楊氏俱自縊死諸生周鼎引妻徐氏里民孫升基妻翟氏俱投黃河死又有登重光妻范氏賊破龍門氏被執罵賊支解盛光之妻



關氏賊渡禁峪氏投峪死許教授女北直人父嗣復任潼學教授崇禎癸未城陷殉難死賊衆至犯其女女大罵不屈而死時猶堅持其衣帶見者傷之時潼關生員宋果妻王氏張文運孫女俱罵賊死歐蘇妻李氏義不受辱死袁茂官妻周氏兵入城自縊死党氏千總田勇妻流寇至勇陣亡氏着孝服自經死潼關志温祥姐同官人守備温所知女年十三許配劉氏子賊破城逼之上馬女厲聲曰我名門女肯從賊求活耶以頭觸石血流被面罵不絕口賊殺之事聞建坊旌表賈志

陳氏武功人劉弼主妻崇禎甲戌賊破城氏罵不絕口賊斷其兩臂而死賈志

陳氏俎衍濠妻永壽人與姑同幼女被劫賊欲刃姑挾氏以行氏奪賊刀殺女自刎賊驚異釋姑賈志

高荆嫗淳化高一奎女也崇禎五年二月賊至劫脇擄去陳金帛於案曰此物惟汝用之嫗義不受辱竟不語擁之騎馬即倒於馬下賊大怒割髮裂衣仍不動遂砍三刀斷喉而死時年十六柴庵集同縣葛氏女小字經姐崇禎十六年闖賊據長安分掠州邑淳化陷女走匿車箱坡敗窖中賊獲之握女兩手出女撒手得脫即舉身投坡下賊去父母踉蹌至欄坡底見女出之泣負歸女殊不欲生勸之食不食曰兒一處子耳兩手已被賊汚何以生爲五日氣遂絕年纔十三賈志

白氏長武尚黑妻國健之母父子與賊巷戰黑見賊勢衆令國健出城請兵殺賊氏扶黑至家知大勢已去夫婦投繯死王世從妻魏氏爲賊擄罵不絕口賊笑而慰之罵益厲旁賊怒羣刀碎死尚時務妻魏氏有女及笄崇禎庚辰賊入城女謂母曰賊既入城不死

何待母曰爾能死我復何憂視女入井亦入井死魚璞妻尚氏被擄不辱投井死李福春妻王氏自以首擊石死王登泰妻黃氏自縊死

長武志

劉氏鄜州諸生王延祿妻年二十夫亡誓不他適育幼子成名守節三十年崇禎間兵叛憤罵被殺任紹伊妻姜氏見夫被執與其姑同縊一木而死里民時養清妻侯氏遇賊執其夫氏力請代死爭之甚急遂殺氏而養清得脫衆賊亦嘆悔又羅宗臣妻王氏遇賊大罵不止賊怒以刀砍之仆地賊以為死去之後數日復生陳善妻王氏遇賊與夫相失賊以皮索繫之臨崖大呼曰此吾謝夫報祖母處也即投下未死次日人聞哭聲昇至家夫亦無恙邢其蘊妻何氏賊殺其夫欲污氏氏以石擊賊大罵賊怒殺之張國時妻田氏幼讀經傳賊至大罵賊刃之丁鴻圖妻李氏流寇陷崖窰欲

逼氏以從氏給取衣物從牖中投崖死李必灼妻雷氏義不受辱投崖死諸生宋國玠妻陳氏年二十一遭寇亂至自縊死

鄜州志

李氏中部鎮撫劉光燦妻夫亡守節茹荼撫孤賊陷城氏年七十九矣其家掖之走不許曰未亡人何往語未已賊驟至露刃入氏即取刀自刺血流淋漓賊壯其烈與飲食以碗擊賊罵曰吾忍死四十九年今啜賊食耶罵不止遂怒殺之時有諸生呼恒昌母劉氏夫亡守節至老里民劉福妻賀氏年二十五夫亡無子孀居三十年城陷俱死之又貢生劉爾駟妻宋氏罵賊死諸生蘇育世妻劉氏與其女投井死里民曹可昇妻王氏投崖死時崇禎四年也又鄜州任氏適中部諸生劉煥崇禎十六年賊陷城獲氏氏大罵賊以刀逼之氏曰死即死必不從汝賊恚亂加刃焉

賈志

田氏張國時妻宜君人崇禎十四年盜至氏義不受污罵賊被害

賈志

陝西通志 卷之二十七  
賀氏緩德衛正千戶沈澆妻賊破城賀託男大中於妾高氏從容就  
義投繯自經

延綏志

王氏米脂馮觀祥妻崇禎初大荒盜起夫死無依義不受辱投河死  
高建鼎妻賈氏崇禎三年遇賊欲污之氏紿曰汝稍待我遂入內

舍刎頸死

賈志

劉貴姐清澗劉興女也年十七歲崇禎三年賊攻神崖寨擄婦女五  
十餘獨貴姐抗節不從乃自言曰與賊為妻吾父吾兄何以為人  
徑投崖身碎而死賊嘆息去

崇慶集

戴氏府谷貢生李日滋妻崇禎三年賊圍城急氏恐城陷被辱抱子  
投崖下三日而死其子無恙同縣蕭偲官錦衣衛妻吳氏逆闖陷  
京師偲年方二十三死之吳氏亦自經死

府谷志

勅脩陝西通志

第六十八卷

人物十四

列女三

NATIONAL CENTRAL LIBRARY, TAIWAN, R.O.C.

陝西通志第六十八卷

人物十四

列女三

本朝

黃氏長安庠生張訥妻訥卒時氏年二十七矢志守節撫幼子大齡備嘗艱苦歷五十餘載以壽終康熙四十三年旌表

汪氏長安民王林妻二十二歲而寡時翁姑年邁色養無缺鞠育幼子克底有成守節五十一年雍正七年旌表

張氏長安民徐守仁妻夫故時氏年甫二十一截髮自誓篤志不移翁姑繼亡盡哀盡禮卒年六十三雍正八年旌表

王氏長安民郭進節妻年二十八夫亡欲自縊舅姑力勸乃止孝養無虧每焚香祝天願損己年以延親算後二親俱上壽訓子



甚嚴悉列成均年六十四卒雍正八年旌表

王氏長安民楊佩霖妻年二十四而寡高堂衰邁幼子伶仃氏仰事俯育艱辛守節雍正八年旌表

韓氏長安人郡庠生王維垣繼室年二十二垣卒氏無子鞠前妻二子如已子勤瘁持家冰心不二雍正八年旌表

李氏長安民蕭守成妻年二十九夫亡欲自刎以殉族黨力勸乃止堅守清貧晝夜紡績奉事衰翁養葬咸成禮雍正八年旌表

時年古稀矣

高氏長安國學生雷溥妻溥卒氏年二十二矢死靡他養親鞠子孝慈兩盡守節三十一年卒雍正九年旌表

劉氏長安民謝天寵妻郝氏天寵弟天隆妻劉年二十一夫亡痛不欲生念姑老無依勉承順無忝婦職郝年十九而寡無子

姑已歿二寡相依式好無間言郝年四十三先劉卒將逝劉撫衾慟哭郝張目謂曰未亡人二十五年常懼鮮終而今知免奴

何慟耶遂含笑而瞑劉苦節四十六年病革其子欲肖形以示子孫劉謂婦人不應令晝工見不許其守正不亂如此並雍正九年旌表

高氏長安生員張洪泗妻年二十三泗亡氏曲意養親存歿悉中禮度教二子皆成立苦節三十一年而終又高氏張積雲妻年

二十一孀居其艱苦亦相埒歷今三十九年三子皆成家能養母矣並雍正九年旌表

韓氏長安生員張嘉士繼妻年二十七夫歿撫前妻子惟謹姑疾篤躬侍湯藥衣不解帶者七旬性習勞操作至老不懈嘗語諸

婦曰人生不可坐食吾欲汝曹學吾勤不欲汝曹服吾勞也雍正九年旌表

正九年旌表

盧氏長安民張學盛妻年二十五夫亡子幼家貧親族有諷改適者氏以死自誓紡績鞠育艱辛萬狀雍正九年旌表年六十有

四

朱氏長安民間復朝妻年二十七而寡毀容截髮誓以身殉姑與母諭止之不從乃痛哭向氏曰天乎彼少婦且死我兩老婦乃不死何哉氏聞言矍然起訴曰兒自今乃不敢復言死晝夜操作教子有成今年已六十餘孫景福方數歲有至性日繞側不去氏含飴弄孫晚景足樂雍正九年旌表

湯氏長安郭孝篤妻年二十三而寡誓不二志姑年老以哭子致脾疾氏寢處與俱每食必市甘脆以進姑喜輒致飽苦節三十五年雍正九年旌表

李氏長安民朱存樸妻年十八夫亡無子姪輔焯方幼伯氏夫婦久嬰痼疾氏事之盡禮焯稍長課使讀書竭力以供修脯得成髦士雍正九年旌表時年五十有六

魏氏長安胡元功妻年十八歸元功事舅姑克盡婦道夫歿氏年二十六厲志守節連遭二喪葬祭以禮雍正九年旌表年五十有六

蔣氏長安王子免妻夫病歿死父母欲奪其志氏擯媒氏不與接苦節歷三十七年雍正九年旌表

姜氏長安楊三台妻年二十二歲三台歿室如懸磬家無次丁氏隻身措柱以供薪水姑與母諷使改節氏泣拒不從守節歷三十八年雍正九年旌表

唐氏長安民俞學文妻年二十六而夫歿遺孤甫週氏養姑守節

叔翁欲奪其志因刺面哀號乃止卒年六十七歲雍正十年旌表

趙氏長安人陝西督標前營千總劉登龍繼妻登龍以從征吳逆功委署千總迨歿氏年二十有七前子二已子一俱幼氏宵旦撫視相依為命一夕有羣盜入室欲斃諸孤氏挺身告哀乞存弱息卒保無恙自此躬親績紡延師訓子今蘭玉森森連掇科第皆氏教也雍正十年旌表年六十有七

毛氏長安人督標右營兵丁劉漢勳妻康熙十四年漢勳戰歿平涼氏年二十有七聞訃欲不食死以姑老強存視息拮据奉養姑得壽終今二子成立五世同堂氏年已八十有四矣雍正十年旌表

朱氏長安黃用福妻年二十六夫遇賊死于西鄉氏奉孀姑歸寓母家卒能扶襯理冤鄉人重之姑病亡晝夜泣不止適為幼女縫衣淚血模糊誤刺右目見者皆隕涕撫族子為嗣未幾子婦繼天苦節四十二年卒

王氏長安生員韓仲家繼妻年二十七歲寡亡謹嚴守節之死靡他課子璋母而兼師璋年少游庠偕婦李氏克盡孝養氏始困終亨獲臻上壽歿時年九十二

劉氏長安庠生蔡時盛妻年二十七而寡上事七旬翁姑下撫四齡幼子拮据苦守子馨由貢任鄜州訓導性至孝事母盡誠竭力氏年七十一歲卒馨居喪三年不茹葷不入內室人羨其節孝萃于一門

張氏長安侯選知州梁鼐繼妻婚三載鼐亡氏時年二十三歲無子女奉孀姑鞠前妻子孝慈兼篤有勸之嫁者嚴詞拒絕守節



四十五年子孫皆列鬻序歿年六十八

徐氏長安民李爵妻年二十八夫亡事孀姑貧能盡禮姑歿無依每並日而食誓死不移遺孤又歿撫孫成立年七十七歲而卒孫氏長安生員崔汝嵐繼妻年十七適崔崔得痰疾經數載氏滌穢嘗藥不少倦崔歿前妻子方十歲氏子生未替氏慟絕剪髮勢面以自勵卒之日短髮蓬飛頰上刀瘢歷歷可指年六十七歲苦節四十一年而歿

杜氏長安民戴琮繼妻年十九歸戴事病姑克盡婦道越五載夫亡矢志撫孤服縞茹素姻戚不敢以非禮語進子王祐宦安陽潘輿迎養跪進酒肉氏堅却弗御年七十六卒王祐事祖母及母俱以孝聞作吏亦多善政

宋氏長安民李金秀妻年二十四秀亡遺孤甫四歲翁早逝姑老多病氏奉侍湯藥五載如一日教子慈嚴並至諸孫耕讀成家年八十五卒

張氏長安人署千總趙連城妻年二十九而寡侍姑以養志聞歲荒就食興安艱苦萬狀歸里後姑歿貧不能殮氏拮据成禮教子義方守節四十一年卒

白氏長安人王運旦妻夫卒氏年二十七歲守節歷五十三年楊氏咸寧庠生荔松妻年二十六松亡氏勵志守節康熙二十六年旌表年九十一歲卒

劉氏咸寧生員王之翼妻年二十五夫亡奉老姑撫幼子足不踰閭者四十餘年康熙二十六年旌表

胡氏咸寧民傅家妻年二十七夫亡子幼守節不渝事舅姑曲盡其禮姑疾侍湯藥無間寒暑歲荒二親繼逝典釵營葬鄉黨為

之流涕守節四十餘年卒雍正七年旌表

王氏咸寧人武進縣主簿何器妻器卒於官氏時年二十四歲攜子扶柩而歸哭不絕聲行道傷之教子慈不廢義二子俱成立

堅操歷四十餘載雍正七年旌表

鄭氏咸寧民王明學妻年二十七而寡家甚寒氏竭力女紅撫誨三子備嘗艱苦卒年六十六雍正八年旌表

王氏咸寧民劉顯妻年二十七而寡遺孤甫週堅心苦守姑欲嫁之氏剪髮毀容以誓雍正八年旌表

翁氏咸寧民王臣妻年二十六歲夫亡事舅姑以禮姑病禱北辰求代矢志完節訓子有成雍正八年旌表

韓氏咸寧諸生任徵妻年二十九歲徵歿氏夙嫻禮訓撫孤守節閨範肅然教子讀書有成年六十七卒雍正九年旌表

師氏咸寧民張宗孔繼妻婚甫期而寡撫前妻子洙泗艱難備歷守節五十七年雍正九年旌表

張氏咸寧民李環妻年二十七而寡誓死守節姑年踰九旬臥疾三載氏奉養不衰康熙二十九年陝大饑夫兄某暨夫叔祖母

郭氏叔母吉氏俱年邁無子氏迎養於家及歿殮葬皆如禮雍正九年旌表年七十四歲

程氏咸寧國學生徐伯齡妻齡歿氏年甫十九矢志不二事姑以孝處妯娌以和教養子姪以慈雍正九年旌表時年六十有五

姚氏咸寧民唐雯妻年二十七歲夫亡氏紡績糊口堅志不移因生計艱難子稍長知書即令逐什一以謀衣食家業漸裕訓飭

子婦門庭肅然雍正九年旌表年六十矣  
蘇氏咸寧民鄭君芳妻夫亡年二十六子文斗文昇俱幼舅失明

氏扶持保抱朝夕罔倦康熙三十年大疫以木實草根自給卒無異志年七十七終次子文昇亦早歿婦朱氏守節撫子仁克底成立姑夙患痰喘親侍湯藥二十餘年不少怠姑歿設木主朝夕哭奠歷四十四年終子仁亦以孝顯並雍正十年旌表牛氏咸寧民紀之冕妻冕亡氏年二十二矢志守節代夫養親頻遭歉歲不致失所喪葬尤盡禮雍正十年旌表年八十歲

蓋氏富平人咸寧民高繼藩妻年二十一而寡幾死者數矣以舅姑在乃強起奉事鄉黨稱其節孝撫一女既長適諸生劉琨又乞族子成勳為嗣亦成立雍正十年旌表時年五十三歲

齊氏咸寧民魏禮妻年二十三而寡遺孤在襁褓守節四十餘年值逆李破城投身井中三日其子被掠逃回覓母至井旁聞有聲息拯之出得不死後數年以壽終

侯氏咸寧民崔光惠妻夫亡氏年二十二遺腹生子安貧力作撫孤成人守節三十九年而歿

王氏咸寧民侯一龍妻年二十七而寡壽歷八旬卒

孫氏咸寧民曹振聲妻年二十八夫亡堅心守節繼姑性嚴厲婉容敬事始終無間值歲不登茹荼集蓼撫誨幼子成人歿年六十七歲

宋氏咸寧民牛志善妻婚三載夫亡氏年甫十八矢志不二侍養翁姑始終盡禮鞠遺腹子艱辛備至壽六十五卒

盧氏咸寧人福建歐寧巡檢徐崇勳妻徐亡時氏年二十六翁姑早逝家計維艱堅志撫孤子琮登雍正丙午賢書卒年六十有

四

辜氏咸寧生員王有章妻早寡祇一子未幾殤氏哀痛不欲生會

山寇亂慨然曰此吾從夫地下時也至山中投崖而死

席氏咸寧民楊酉妻夫亡氏慟哭三日不食以剪刀自刺死御史

梁熙碑表其墓

夏氏咸寧民家女許字未嫁年十七有狂暴艷氏色強投以聘家

人不能却里黨畏勢咸莫敢撻氏度不免從容訣父母姻戚自

縊死鄉人哀之為立碑於城東葬所

馮氏咸陽民王興京妻年二十三而寡姑失明晨昏奉事無違值

歲稔苦守不二年卒年七十二歲雍正三年旌表

苟氏咸陽歲貢劉曰鐸妻鐸亡時氏甫二十一歲翁病湯藥親嘗

以婦兼子後撫兩姪為嗣昂之學皆獲遊庠雍正六年旌表

許氏咸陽民楊梓妻年二十七舅與夫俱客死時祖姑在堂氏親

操井臼養老撫孤同居五世人無間言歷三十四年卒雍正十

年旌表

李氏咸陽人戶部員外郎劉元勳母羅氏其庶母也元勳父疾革

時二氏環泣許從死李時年二十八羅年纔十九既歿爭願以

身殉已而羅挽元勳前謂李曰誰與為育此呱呱者人言死易

立孤難妾請獨為其易李默念殊未決頃之羅自經死矣李撫

哭盡哀於是上奉舅姑下撫孩稚百憂俱萃劉氏不絕如綫越

十年而翁復逝婦姑惻惻一燈對績督課元勳無少懈歲己亥

元勳成進士入詞林二母之節大著士大夫爭為詩歌以遺之

今所傳雙節編是也

王氏咸陽人永新令薛人龍妻年二十五夫亡悲不欲生有妾子

南方二週生母歿氏撫育遺孤決志堅守苦節至六十七歲卒

王氏咸陽民劉建貴妻年二十六而寡服闋翁姑以家貧議嫁之

媒妁至氏毀唇傷目矢死不從膳親育子年六十六歲卒

南氏咸陽民郭文華妻年二十一歲夫歿氏敬奉高堂遺孤甫二

齡誨育備至食貧苦守歿時年五十八歲

谷氏咸陽民侯昭妻年二十八歲夫亡氏御窮操作事二老親撫

二幼子矢志不奪卒時年七十有八

趙氏諸生魏國彙妻陳氏諸生張翼軫妻康氏諸生張所知妻皆

咸陽人夫亡時趙與陳年二十七康年二十八趙守節三十九

年陳守節三十七年康守節三十一年學政覺羅逢泰並給匾

以旌其門

趙氏涇陽人咸陽程君濂妻夫亡氏年二十七苦節自守教子有

成尤好施與遇歉歲周恤不倦年九十餘而終

董氏咸陽生員王彙妻年二十五歲彙亡家貧姑老滯澁無虧課

子讀書以績紡自給守節五十八年卒

魏氏興平民岳登顯妻年二十九而寡繼姑欲奪其志屢加箠楚

氏終始不變食貧力作略無怨辭歷五十四年而終雍正九年

旌表

趙氏興平民呂宗端妻夫故時氏年二十三翁痛子成疾數載亦

逝祖姑暨姑俱年邁氏奉養惟謹教子力學為名諸生守節凡

三十五年卒雍正九年旌表

康氏興平民吉正迪妻年二十夫與舅姑相繼逝氏無子欲繼姪

為嗣夫有三兄皆不欲輾轉二十年氏憤鬱成疾幾不起戚屬

來唁氏嗚咽良久曰未亡人不死者莫為夫立後耳今且死然

竟無後她晚矣言訖慟絕室中人皆哭失聲頃之甦夫兄允迪

立命次子瑞嗣之自此疾愈今瑞已成諸生氏年亦六十七矣

雍正九年旌表

陳氏與平民符玉妻年二十三歲夫亡同姓皆利其再適氏矢死靡他朝夕紡績以事高堂育幼子現年六十五歲雍正九年旌表

何氏與平民孟伯芝繼妻年甫十八婚四月而夫亡鞠前妻子學孔成人娶婦范氏學孔又亡范氏年二十五事孀姑撫幼子一門雙節壽皆踰八旬而卒

張氏與平民于天良妻天良業農與再從叔存娃者比屋而居存娃豔氏色欲圖之未有間也雍正九年夏存娃父囑其子蚤起于田存娃乘天未曙呼天良同出堡復潛入天良室氏驚起遽取爨下刀欲斫之存娃度不能脫奪刀斫氏氏立殞十年存娃正法氏建坊入祠

張氏與平民吳某妻年十六夫亡誓必死父母曉譬百端矢志不二至百日防之愈密氏忽飲食如平時朝夕與家人處無忤色父母以爲歷時既久無意於死稍防疎氏中夜自縊死  
李氏臨潼民朱康國妻年二十二歲夫死子甫一週家貧其或諷之嫁氏以死誓舅亡事姑益謹晝夜勤紡織子八歲就傅於外祖李顯春學乃有獲姑年八十五卒臨終執氏手不忍釋其孝慈相倚爲命如此有司以旌表

聞建坊旌表

鄭氏臨潼民王運正妻年二十四生女乏乳寄哺于鄰人李如城妻如城賙妻外出給以哺乳招鄭氏氏入室不見乳婦急奔避如城爲戶調之氏忿罵不從如城奪女摔死舉車木毆氏殞命有司以旌表

聞寘城大辟氏奉

詔旌表

宋氏臨潼民馮璧喜妻璧喜家貧早逝兄嫂令他適氏時方二十歲乃抱子泣辭而止守節四十年終

劉氏臨潼李師白妻師白苦學成疾年未二十而天氏痛夫無子

早喪撫姪為嗣苦節堅守壽八十三終

屈氏高陵民劉文魁妻年二十八歲夫亡姑老子幼氏紡績事姑

年荒奉姑就食南陽姑死氏鬻髮扶櫬歸葬撫子成立守節四

李十餘年雍正五年旌表

蠟梅姓趙氏高陵人父明道早卒雍正九年八月母仝氏適他往

鄰人阮廷義者知蠟梅獨與幼妹小娃在室欲誘之懷棗至其

家入厨中蠟梅方持刀理蔬廷義好語之投以棗隨挑之蠟梅

覺怒叱之廷義遽前擁求合蠟梅峻拒恐不免即以手中刀斫

廷義指廷義奪刀還斫遂殞小娃聞姊聲趨至大驚呼姊死廷

義斫之亦仆地廷義隨趨屋後將遁去為鄰人所獲頃之仝氏

歸小娃猶張目視指廷義殺人賊語畢亦殞命事

聞廷義伏法蠟梅入節義祠建坊旌表

李氏鄠縣民王忻妻莊敬孝友鄉里重之年三十夫歿矢志撫孤

勤苦備嘗鞠養二幼姪無異已出聞整屋李顯學術醇正命子

心敬從學務使裨益身心時人比之陶孟苦節五十餘載壽八

十二卒雍正三年旌表

王氏鄠縣生員陳調元妻幼失恃事繼母盡孝年十六歸陳夫亡

子生纔六月誓以死守值歲荒傾貲賑濟其子為仇人誣搆氏

鬻產營救得免後子列成均孫捷南宮皆氏六十年苦節所致

雍正六年旌表

戴氏鄠縣民王收妻年二十八夫亡撫孤守節姑性嚴事之惟謹節衣縮食稍能自給憐姪奇窘與已子均析家賞卒年七十有

九雍正八年旌表

戴氏鄠縣民王模妻年二十三而寡翁姑憐其少欲嫁之氏聞即自縊賴救獲甦孝親育子荼苦備嘗卒年七十六歲雍正八年

旌表

王氏鄠縣民劉創業妻結褵甫數月而寡生遺腹子匏聲舅姑懼氏有異志具酒醴至氏家懇氏父母乞令弗再醮俟一二年後子能飲食始議之氏聞言慟絕復甦誓死不二舅姑喜慰過望愛之如已女氏亦曲意承歡孝養備至舅姑俱年八十五而卒氏卒年七十四歲雍正九年旌表

高氏鄠縣民牛義心妻年二十二夫亡氏長齋繡佛矢志撫孤孤

既長娶媳生孫子婦又相繼歿孫騰雲生未替氏辛苦鞠育迄於成立雍正九年旌表時年六十有七

張氏鄠縣民李哲妻性孝謹事舅姑能得歡心夫亡後薄產盡鬻賴紡績以供朝夕雍正十年旌表時年六十有六

李氏鄠縣民楊孟弼妻秉性端嚴夫有堂弟楊孟重逞暴強姦氏堅拒不從以致殞身雍正八年旌表

陳氏鄠縣民張岸妻婚六載岸故子生甫三月翁姑俱老值歲饑氏脫簪珥勤紡績以為養子惰學輒涕泣不食自二十七孀居

苦節三十餘年卒

王氏鄠縣民魏聲一繼妻年二十五而寡無子父母欲奪其志氏不從撫姪為嗣苦節歷四十年聲一弟儀一妻亦王氏年二十



一孀居生子甫三月教育成人備嘗艱苦年五十七歲卒一門  
雙節有司咸表其閭

劉氏鄠縣民饒炯斗妻年二十三歲夫亡越翼日遺腹生子氏零  
丁孤苦奉孀姑鞠孤子艱辛備嘗垂歿時五孫繞膝壽七十有

六

溫氏鄠縣民何騰蛟妻年二十四歲而寡家故赤貧向恃騰蛟樵  
採以給朝夕騰蛟歿益熒熒無倚踰年舅姑繼殂氏艱辛營葬  
撫孤成立志操彌堅年七十餘卒

王氏鄠縣民杜宗韓妻年甫十九而寡翁姑高年又生長邑城飲  
食皆有常性夫亡後資生計窮氏力勤織紉或製履履帶囊之  
屬鬻市以供甘脆苦守至六十二歲卒

張氏鄠縣生員魏榮妻年二十四歲榮亡子甫三齡氏撫孤操作  
不輟苦節三十三年而歿

崔氏鄠縣民劉孔蔚妻年二十六歲夫歿無子女慟不欲生私念  
有姑當養乃止及姑終絕粒數日不死又自縊叔孔芬夫婦救  
甦迎養於家年七十五卒

陳氏鄠縣民王永年妻性聰穎精女紅善書畫年十九夫亡杜門  
守禮苦節彌堅卒年六十五歲

魏氏生員陳治徵妻朱氏民劉于陞妻皆鄠人順治二年賀賊至  
鄠二氏皆被掠逼之不從遂見殺又王鄠妻趙氏王鄠妻史氏  
居平妯娌相愛聞賊警共誓必死既被掠趙投火死史投井死

邢氏鄠縣王教成妾賀賊自漢中寇西安所經郡邑靡不殘破鄠  
城陷教成遇害氏見夫死大慟與十四歲女同投井死

彭氏鄠縣民王驚妻賀珍之亂聞賊至避兵城樓賊登城氏知不

免陸城死

王氏鄠縣生員全調鼎妻順治初流孽未靖劫掠時聞調鼎率鄉人與賊格鬪以衆寡不敵被殺氏哭泣嘔血死

李氏鄠縣民韓光隆妻爲山賊所掠逼之氏罵不絕口因殺死

劉氏鄠縣屈崇山妻夫死無子女矢志養姑康熙三十年歲荒姑勸之嫁不從未幾饑益甚鄉人多鬻身以乞活姑泣謂氏曰我死在旦夕盍自鬻尚可活我氏泣不應良久姑大慟曰死耳夫何言氏復哽咽久之忽起曰如姑命遂鬻于豪家得銀審實付姑乃號泣登車而去入豪家親隣競釀酒稱賀家人懽呼氏乘間入廁自縊比覺則死已久賀者相顧驚歎去豪家大恨以敗黨畏尸棄野外積骸中鄉人聞者多泣下

王氏鄠縣民王可吉妻年二十六歲夫歿一子甫生含哀鞠育備歷艱辛子四歲而殤氏零丁無倚浹旬後值夫喪三週悲哀致祭翼日沐浴自縊死

王氏藍田生員張慈妻慈歿二孤俱幼氏痛絕親族憐而慰之少甦泣曰吾不及從夫地下者姑老與子幼耳遂一意事姑每語及夫平日事輒哽咽不敢對恐滋姑痛也姑歿殯送如儀撫二子俱成立氏年九十六卒順治十一年旌表

靳氏藍田廩生臧魁遷妻事繼祖姑及舅姑皆能色養夫故氏年二十八翁姑又相繼逝惟繼祖姑在堂孝養愈篤長子教以力田仲叔俱業儒入泮雍正二年旌表

李氏藍田民李加封妻年十六歸李越三載夫故子方週家業蕭條氏苦守織紡事姑孝養撫子成立雍正四年旌表

康氏藍田民張光宗妻年二十四而寡上有邁姑下有三子扶哀

字幼篤志靡他雍正八年旌表

李氏藍田民韋錫疇妻年二十四而寡踰年子女皆殤老姑復失明旁無依倚氏食貧力作勁節彌堅年六十二病革時姑年八十有三氏悲不獲終養丁寧堂叔託以尸養其孝思可憫如此雍正八年旌表

王氏藍田民韓雲燦妻生一子雲燦病革語氏曰吾親死囑我以幼弟我死將誰囑乎氏泣而領之暨歿撫其叔與己子無二視苦節四十九年年六十八歲雍正九年旌表

陳氏藍田民尚隅妻年二十八而寡所遺薄田十數畝姑老子幼屢經歉歲氏朝耕夕紡艱苦百出卒無他虞今二子四孫森森玉立氏年亦屆古稀矣雍正九年旌表

張氏藍田舉人榮鳴珂繼妻韓氏鳴珂子廩生衮妻康熙三十一年鳴珂歿明年衮又歿二氏各撫一孤相依爲命家素貧敝廬數椽不蔽風日值冬夜各置子懷中背倚坐敗草上寒聲敲敲恒達曙康熙四十六年大疫母子俱病卧二氏仰天號曰我姑婦可死我子不可死也翼日果瘞鄉人以爲誠感張氏現年六十二歲苦節三十九年韓氏現年六十四歲苦節三十八年並雍正九年旌表

李氏藍田民張守爵妻年二十五歲夫亡撫孤堅操不二守節三十有八載

劉氏藍田民蕭紳妻年二十四而寡子女俱無氏專心孝養二親冰操終始如一卒時年六十有八

李氏涇陽儒士張士傑妻婚二年夫死無子氏甫十九苦心守節每夜藏利刃於枕側以厲清白嗣子早殤復求夫伯兄子爲嗣

伯兄欲堅其搯曰俟十年後當以吾孫繼之氏益厲冰霜不渝  
初志卒嗣之守節三十餘年康熙四十四年旌表

李氏涇陽儒士牛光璿妻歸未三載璿歿氏矢志守節事孀姑撫  
嗣子霜操彌勁年六十一歲卒

岳氏涇陽生員高鼎新妻年十八而寡氏奉老字幼孝慈無愧子  
遊庠孫曾環膝氏終時七十有一歲

丁氏涇陽民康運晟妻年二十三歲夫亡子兆吉甫週氏御窮鞠  
育身心俱瘁兆吉念母苦節奮志勲名隨征西陲以軍功議叙  
孫亦採芹人皆謂氏四十年冰操之報

袁氏涇陽民張體仁妻婚時年甫十四踰三月體仁遠出服買卒  
於滇黔間氏日夕哀號矢志不二所親憐其年少且乏嗣勸改  
適氏毅然曰夫死當守節未聞以有後無後異也乃鬻衣飾爲  
紡織資終身茹素備歷艱辛年七十七卒里人重其節立碑紀  
之

朱氏涇陽庠生溫如玉妻夫歿時氏年甫二十事姑盡禮教子慈  
嚴兼至紡聲書聲寒暑無間子獲有文名氏年七十一卒

王氏涇陽民程雲路妻二十八歲而寡偕侍妾共守事二親撫二  
子十年後妾去氏冰操益勵年五十九而終

劉氏涇陽民李一鵬妻年二十五而寡家貧甚晝夜勤作以膳翁  
姑身歷饑寒冰操不改子嗣白少備耕養母弱冠就學四旬得  
入泮氏年六十八卒嗣白以孝行舉鄉飲賓

劉氏涇陽舉人趙九成妻崇禎十年九成以計偕歸卒氏年二十  
五誓以身殉以翁姑痛子方深慮重傷二人意遂輟死十六年  
翁歿於京嗣值闕變閱數年始克歸葬氏流離顛沛奉姑課子

室中有孤燕巢梁歷年不易人以爲苦節所感又族人趙凱繼者方歿時繼妻梁氏年二十六撫前室子女如己出奉姑尤盡禮所居室亦有燕巢之異云

王氏涇陽人戶部郎中韓望妾家本順天幼嫻詩禮望權闕浙省歿於署氏即絕粒誓以身殉六日後尙戶自經時康熙壬子十一月也侍女紫燕亦悲慟不食縊于別室嫡子韓端呈明浙中當事各有褒揚紳士歌咏成帙

李氏三原人趙思敬妻年二十二敬亡痛絕復蘇遭明末兵荒親屬共強之嫁乃尙戶引決排闥救免家甚貧翁姑老子幼氏躬勤績紡蔬食或不繼兩親甘旨常充孤稍長就外傳訓誨惟謹  
雍正三年旌表

楊氏三原人魏麟祖妻年十八夫亡撫孤守志孤稍長延師誨之事舅姑以孝聞養葬咸中禮雍正三年旌表

徐氏三原人盧星燦妻年二十三燦亡遺腹生子灃氏撫孤堅守父母欲奪其志矢死靡他家範甚嚴灃亦奉教惟謹迄能成立  
雍正三年旌表

楊氏三原民劉卓然妻年二十五夫故家貧歲歉氏質衣殮葬撫孤守節雖資生艱苦終無懈志雍正三年旌表

王氏三原民趙鼎臣繼妻夫亡氏年二十六前妻子已成童氏二子俱襁褓教養辛勤柱門守約幼子獲遊庠雍正八年旌表

田氏三原民張玳妻年二十一而玳亡子生甫三月舅姑俱高年氏堅志守節茶苦備嘗雍正八年旌表時年五十六歲

來氏三原民王大任妻年二十四而寡事後姑鞠幼子甘貧守約堅志不移卒年七十有六雍正九年旌表

程氏三原民李慎妻年十八適李時翁姑已歿祖翁姑方高年多  
來恚氏奉養無缺年二十八而寡事二老益勤二老以為吾孫不  
死也教子極嚴迄能成立現年七十二歲雍正九年旌表

王氏三原民顧世公妻世公亡氏年十八矢志一節養老存孤夫  
弟某夫婦蚤逝所遺子女氏撫如己出性習勤康熙六十年陝  
王大饑氏晝夜織紡生計裕如現年五十七歲雍正九年旌表

張氏三原儒童申效明妻年二十一歲夫亡守節歷明季凶荒迄  
無二志事孀姑養葬盡禮撫孤世傑以副榜列明經氏年五十  
七卒

李氏三原生員梁應運妻子鑑婦劉氏姑媳皆年三十而寡壽皆  
至七十五而卒兩世孀居畢生艱苦後鑑子澍之饒於庠  
魏氏三原民王仇妻年二十四歲夫歿事姑曲體承歡孤大業既

長復娶兄女為婦婦年二十六夫業亡焚焚姑媳共鞠孫雛身  
心兼瘁姑七十壽終媳卒時六十有五

孔氏三原民晁周鼎妻年二十七而寡敬奉翁姑辛勤教子子瑜  
既入泮旋亡又撫孤孫亦游黌序苦節高齡終時八十有三

何氏三原張斗輝妻年二十六輝亡遺子女各一家貧甚值歲歉  
半菽恆不飽教子極嚴子出外見群兒嬉偶隨觀隣翁俱姓者  
呼而詰之謂汝節婦子當念母氏艱苦何戲為氏知之令子泣  
謝過後其子卒成立氏年六十有二而卒

劉氏三原監生來淑沂妻沂歿時氏年二十一事姑鞠子冰節無  
虧年五十四歲卒

王氏三原生員房大任繼妻年二十三歲夫歿二子暨前妻子世  
勲俱幼氏撫誨兼至越二十餘載世勲入泮未幾歿婦楊氏年

二十四同守霜幃冰操不貳撫四子俱成立氏年五十八歲終

楊氏卒時五十三歲

侯氏三原貢生樊遂妻父觀察暉翁廷尉咸修名門令質善事舅

姑年甫十九而夫夭舉遺腹子弱歲又殤霜聞荼苦堅志不移

撫姪芬爲諸生氏年五十一卒

楊氏三原穆登醴妻醴任揭陽尉卒於官子甫三齡氏時年二十

四安貧守節事衰翁撫孤子年八十五歲卒

王氏三原民張成德繼妻年二十三歲而夫亡矢志堅守撫前妻

子恩勤提命克底有成隣邑巨室慕其母賢子孝因以女締姻

焉年六十三而歿

維氏三原儒童李懋妻夫亡時年甫二十一事舅姑養葬皆中禮

撫姪爲嗣年五十九而終

李氏三原民王繼厚妻繼厚貿易粵東卒時氏年二十一哀慟絕

粒既以舅姑垂老兒女方孩而止扶衰鞠幼備極辛勤子既長

赴粵扶襯歸葬氏悲哀致疾尋歿年五十歲

趙氏三原民李瑾妻年二十六歲而孀諸孤在抱就食母家訓子

耕讀勤業年七十九卒

焦氏三原民張諫陸妻諫陸歿於蜀焦氏年十七甘貧守志以事

舅姑撫遺腹子弘鰲成立娶媳生孫鰲尋父襯又亡於蜀焦與

媳胡氏鞠二孤苦節終身焦年九十五胡年七十七而終

張氏三原民劉作棟妻夫亡氏年十九家赤貧鞠三歲遺孤兼撫

前妻子以維續春白爲生計後前妻子亡已子復夭偕子婦任

氏復撫孤孫荼苦閱六十年而卒

王娶婦方慶得孫子又亡氏哀痛成疾而卒年五十九歲

馬氏三原民秦大用妻年十九夫亡客邸痛欲捐軀爲翁姑勸止

食貧操作鞠孤成立壽八十有三而終

蕭氏三原民王惟垓妻年二十四而寡撫姪爲嗣艱辛食力完節

無渝終時七十一歲

仇氏三原庠生員可群繼妻可群資志早亡氏年甫二十事兩世

高堂養葬均中禮鞠養孤子克繼書香守節二十六年而歿

高氏三原監生李思義繼妻夫歿時氏年二十二歲撫前妻子璋

鞠遺腹子瓌教養辛勤咸就成立年五十二歲卒

楊氏三原監生申效祖繼妻年二十三歲夫歿奉孀姑字幼子屢

經艱苦壽七十六而終

康氏三原民馮瑾妻夫歿他鄉氏時甫十九歲事高堂撫遺孤謹

循禮法守節至六十八歲

申氏三原民張古雅妻年二十六而寡值歲祲養親鞠子苦守御

窮子獲遊庠氏卒時六十有六

焦氏三原人性幽靜父夏常教以古賢媛遺事年十七歸臨潼鄉

舉王天寵寵卒絕食累日而病父強之歸氏泣語父曰兒幼奉

父教得從王卽地下足矣一夕夢王來迎已遂起櫛沐含笑而

逝計爲婦僅一年也

秦氏三原人適張姓康熙三十一年歲大祲邑民多流亡氏內外

皆無倚至龍橋河北見岸土有坼可隱身遂入焉里老吳姓者

憫其饑遺以食不食次日復遺之則所遺固在也勸之食且問

以故至再乃言曰多翁厚意然不可爲常先後等死耳但坐此

土坼中令身後不至暴露足矣遂饑死年纔二十餘里老哀之



封以土同時李烈女者從親逐食於楚至漢鎮二親俱疫死女年十六貌甚麗其地有市僧薄聘之曰買妾實將鬻女平康以謀重利女至得其情因唾罵求死不獲比鄰傳其事三原之行賈於漢者公忿致詰市僧陰殺之以滅口聞者哀之

李氏三原民咎一輪妻一輪買易蜀中氏年二十三聞夫訃哭三日夜不絕聲卒自縊死

雷氏三原民呂承謨繼妻年二十歲夫亡撫前妻子厲志不移父母憐其少勸之嫁不許因歸寧時潛匿議娶者窺之氏弗覺也返於家其子以告氏閉戶痛哭自經死

江氏藍屋生員高捷妻年十九夫亡誓欲身殉姑以撫孤勉之乃忍死養親鞠子慈孝無虧子嗣昌食饑後復夭氏又撫誨二孫向登順治丙戌鄉榜合廩於庠曾孫列弟子員氏始解頤曰此未亡人所以報吾姑也卒年八十五建坊旌表

翟氏藍屋民趙瑞徵妻年二十而夫歿二孤襁褓氏絕粒不欲生既而念高堂垂白雛幼無依因斷髮以示無他養親鞠子備歷勤勞卒年六十九雍正四年旌表

孫氏藍屋民薛培生妻培生病亟顧其子泣曰窮貧蚤逝此子可保耶氏兩泣以撫孤自誓子稍長廷師訓之每躬親績紡午夜課讀或時且課且泣兒止之曰我五內慘裂恒不自知汝第誦書勿以我爲念後其子亦登鄉薦氏年六十餘雍正十年旌表  
趙氏藍屋民邵秉業妻年二十九而孀家酷貧又當歉歲母家數迎之不肯歸間遣以粟必以奉舅姑姑常患腹疾醫云用烏蛇治之恐難致耳氏求之應手輒獲姑疾愈人以爲孝感雍正十年旌表氏年適屆古稀矣諸孫俱學業有成以孝聞

彭氏蓋屋李可從妻明末可從隨總制汪喬年勦闖軍敗歿於襄城氏聞難絕粒五日因子顛幼穉乃忍死撫孤家素貧蔬薪不繼終不告貸於人顛稍長殫心理學不事帖括人或謂無補負妻氏怡然安之及顛學成名著論者多歸功母教焉

同氏蓋屋民范疇妻明季流賊入境疇被殺掠氏以行氏據井大罵賊逼之氏投入井賊下巨石擊之氏伏坎旁石不能中賊謂其已死遂舍去遇救得出時年二十七乃飲冰茹蘖以育遺孤未幾疇兄若弟夫婦俱連喪所有幼子弱女氏悉撫育之及長婚嫁咸如禮卒年七十四歲

郭氏蓋屋民溫成章妻年二十一而寡一子旋殤姑勸其自爲計氏泣涕自矢以伯氏子廷掄爲嗣後廷掄入泮復天遺一女氏又撫之暨長甫嫁旋亡氏含哀茹素年六十有四卒

卓氏蓋屋民史尚質妻夫亡時氏甫二十一歲姑勸之嫁氏斷髮爲誓鞠二子安貧守節二十八年而歿又生員盧思誠妻張氏袁珽妻楊氏田玉起妻李氏皆夫亡守志教子克成

孟氏蓋屋民趙之璵繼妻年二十三而寡守節撫孤值歲祲夫兄逃荒於外氏獨奉翁嫜俾得安飽翁嫜歿家婦李欲奪其志氏堅拒不從至於赴井賴鄰媪救免教子耕讀克底有成守節四十四年又同里何器妻任氏袁某妻侯氏皆以守節著聞

趙氏蓋屋民張靈妻年甫二十翁適南畝命僕張有福歸促鋸以餉耕者值靈他適福見氏獨居輒調氏氏大怒疾呼曰鼠子敢爾我何面目生天地間遂舉厨刀自刎隣婦聞呼聲疾往視之則氏已仆地死矣有福見氏死亦自刎未殊知縣駱鍾麟鞠其實爲文祭氏真福於法

金氏蓋屋生員任景舜妻孫氏民趙進善妻順治初山賊入堡被掠皆罵賊不屈遇害

劉氏蓋屋生員吳宗聖妻陳氏儒童張爾立妻賊至俱被掠義不受辱劉投河中陳躍池內賊怒皆以戈殺之

費氏蓋屋生員孫文光妻彭氏生員劉振風妻順治初年遇寇被掠逼之不從皆投井死

劉氏蓋屋民郭潤妻年二十歲夫歿舅姑俱衰一子幼氏苦節自守舅卒奉姑愈謹姑亦尋逝親族勸其改適氏毅然曰我不早從夫地下者以有舅姑在也今舅姑歿而勸以失節其以我爲貪生耶遂自刎死

侯氏蓋屋傭人辛九榮妻美姿容年十八于歸九榮榮貌陋而癡家貧甚氏織紵供養以孝聞於閭里值歲大疫閭戶待斃舅姑憐氏孝託隣姬勸他適以求生氏堅拒不從後舅姑與夫相繼歿氏營葬畢以幼子皂娃屬劉姓遂閉戶絕食死徵士李顯爲之傳

李氏渭南民裴子輝妻十五于歸夫妻相敬如賓年二十六裴故撫孤孀居三十餘年如一日事舅姑甚孝養生送死必誠必敬雍正三年旌表

石氏渭南民郭栖鳳妻夫歿氏年二十二舅姑念其少欲嫁之氏日跪舅姑前哽咽泣下若不能生舅姑亦潸然而罷舅姑歿喪祭以禮子二人咸授室生子無何次子天佑亡婦宜氏年二十五氏泣謂曰汝子我撫勿效汝姑稱未亡人也婦退而就縊氏抉戶救之乃甦自是二寡同心慈孝益篤暨氏歿婦哀痛欲絕每食必祭迄今不改石氏年六十九卒宜氏現年五十八歲雍

正九年旌表

薛氏渭南民譚嘉謨妻嘉謨歿翁姑以氏無子令改適氏堅志不從乞伯氏子九如為嗣稍長即延師課讀迄於有成苦節六十四年年八十七雍正九年旌表

王氏渭南舉人李元祚繼妻性孝謹撫前室女如已出待婢妾尤有恩夫亡無子撫從孫景彪為嗣守節四十六年卒年七十有四雍正十年旌表

楊氏渭南民劉懋賞妻夫亡翁亦繼逝氏以寡弱無依攜孤寄居李父家父無子欲以氏子承基為後氏難之念非此無以慰父乃勉從之父歿即別立楊氏子葬父畢引遺孤復歸劉氏以遺孤成立告於家廟時承基已為諸生人謂兩家宗緒賴以不墜者皆氏力也年五十三而終雍正十年旌表

楊氏渭南儒童吳荃妻荃亡氏年甫二十二遺一女甚穉先是荃兄夫婦相繼逝遺子女各一氏并撫之事舅姑尤盡孝雍正十年旌表時年五十有八

劉氏渭南孫錫光妻年二十錫光歿三子皆襁褓氏泣曰以是貌諸孤致不得從夫地下痛哉家赤貧父母勸別議氏正色止之晝夜績紡自給糠粒猶不飽晚年兩目朦朦衣裙不完冬寒指掌皆龜坼見者傷之苦節歷三十餘年卒

時氏渭南民段補聖妻郭氏民陳聖典妻順治初寇陷堡被擄不從時投崖而死郭為亂刃所斃

李氏渭南民張惺妻烈女甯氏甯邦舉女順治初賀寇肆掠李投井甯自縊死

南氏渭南孝廉劉懿宗繼室馬氏其側室也各生一女一名靜年

十三一名正年十四時杆賊千餘攻堡懿宗糾衆禦之堡陷被擄二氏懼汚投井死二女隨之有乳母梁氏守井旁賊勢逼亦赴井死數日後懿宗脫歸出其尸面色皆如生稱一門五烈云張氏渭南王仁寰次子某妻年十九夫亡無子欲以身殉兄囑其嫂密防之氏故爲釋然狀欲歸寧實訣其父母也既乃復與嫂歸其家抵暮抱兄子入室以寢子熟寐氏即自殺子驚啼其嫂立至氏急以手絕脰死

古氏富平生員寶久陞妻夫亡守節康熙十九年旌表其坊見存本邑寶村

唐氏富平溫九鵬妻鵬隨外父之任江南值危疾氏截指和藥以進疾始獲痊閱三載鵬亡氏年二十二歲攜持孩幼扶櫬西歸茹荼堅守壽五十六而終康熙二十五年旌表

王氏富平民常名顯妻婚七載夫亡安貧堅守四十餘年孝養翁姑歿後薦饗務極誠敬翁有妾無出年及七旬氏亦推心奉侍撫子成立今已一門四世康熙四十三年旌表

紀氏富平民武承堯妻承堯逝後氏嚴正自律勤瘁逾初嘗語親族婦女曰女德只在一謹字守節則更須茹荼如齋歷五十三載冰操如一康熙四十三年旌表

實氏富平民王昂妻昂客死蜀中氏年甫二十二矢志守節孝養翁姑鞠育幼子荼苦終身康熙四十五年旌表

趙氏富平民寶公誦妻夫亡氏二十二歲子甫二齡家徒四壁事翁姑克殫誠敬撫孤成立康熙五十四年旌表

劉氏富平民韓養京妻年二十二而寡矢志苦守孝養衰姑撫育孤子康熙五十四年旌表

陳氏富平民鍾鳴振妻年二十七而寡家貧甚矢志不移侍病姑衣不解帶者三月勗二子以耕讀雍正二年旌表

党氏富平民程文琅妻年二十七夫歿事親鞠子備經荼苦卒時六十八歲雍正三年旌表

陳氏富平民孟弘道妻年二十二而寡撫姪爲嗣服縞茹素守節歷四十餘載雍正三年旌表

樊氏富平民孫自慎妻歸孫時慎客滇未還滇中娶婦生子寄書歸令其改適氏勵志不從事舅姑養葬俱盡禮後慎卒雍正三年子文達隨生母李扶襯旋家氏時已五十八歲哀慟不已待

李如同懷視文達如已出雍正四年旌表

王氏富平民張鳳舉妻順治元年鳳舉歿氏甫十九齡家業蕭然氏辛勤力作不致凍餒壽踰耄耄得見曾孫入泮雍正五年旌

表

李氏富平民張瓚妻年二十一夫亡痛不欲生念夫遺命因殫力奉姑撫子和妯娌睦親族生平無疾言遽色歿年五十三歲雍正五年旌表

秦氏富平民汝任妻年二十五歲翁與夫在粵相繼而殂氏無子痛絕不食戚族感之助金扶襯守節十五年始獲立姪爲嗣鞠

字辛勤克底成立雍正五年旌表

劉氏富平民孫三哲妻哲亡時遺孤甫兩月繡佛長齋冰霜自矢祭先必敬訓子有方雍正五年旌表

楊氏富平民郝世川妻夫歿氏年二十五誓天截髮以示靡他姑臨終囑其改適涕泣不從誨子慈嚴兼至雍正五年旌表

潘氏富平民表之崔妻夫亡堅心守節又艱苦備嘗奉二親悉中

禮雍正五年旌表

樊氏富平民王祥妻夫歿他鄉獨攜藐孤歸里勤劬自守備歷艱

辛子弱冠遊庠雍正五年旌表

党氏富平民孫越妻婚三載而夫亡踰四月生遺腹子氏恪奉舅

姑不辭艱瘁鞠子成人雍正七年旌表

王氏富平民曹棻妻年二十四而寡事祖姑及姑敬謹無違撫孤

盡力二子一孫皆列庠序雍正七年旌表

田氏富平民張秉乾妻夫歿時氏年二十七痛不欲生投繯者再

俱以救免育子慈嚴交盡克底成立雍正七年旌表

劉氏富平民唐宗義妻宗義亡氏鞠遺孤幾克成立旋天撫姪爲

嗣安窮茹苦堅守清貧雍正七年旌表

楊氏富平民劉世彙妻二十三歲而夫歿時逢大侵藜藿不充營

喪葬咸如禮鞠幼子撫孤姪守節三十餘載雍正七年旌表

惠氏富平民李源妻夫負疴經年奉侍不懈及歿氏甫二十歲事

孀姑鞠猶子堅志完操雍正八年旌表

王氏富平民魏之玉妻年二十二而寡侍奉高堂撫育藐孤拮据

井臼霜節彌堅雍正八年

題旌時年六十三歲

惠氏富平生員胡之藩妻年二十四之藩卒喪葬成禮訓子以治

生爲急植品爲要子涓經商江南道拾遺金訪還於主皆氏教

也年七十卒雍正九年旌表

李氏富平民惠化舉妻年二十一夫歿欲以死殉姑泣諭乃止家

甚貧朝夕以女紅自給舅姑復繼逝典衣鬻釵始克成禮孀居

歷三十六年雍正九年旌表

牛氏富平民程世武妻秉性堅正克盡婦道強暴程尚榮逼姦之氏不從被殺獄成尚榮寘重典康熙五十八年旌表

李氏富平楊喚世妻年二十三而寡育子師遐成立師遐妻蚤故撫遺孫一殿入泮食餼不墜先緒年八十七而卒

孟氏富平民韓閻妻年三十而寡事舅姑鞠遺腹子艱辛餬口值明季流離迄無二志卒時年七十八

趙氏富平民張我積妻年二十五歲夫亡奉事舅姑存歿皆盡禮率子力田艱辛餬口守節四十六年而歿又田氏同里民孫煊

妻夫歿時氏年二十歲守節四十三年

鄧氏富平民孟建業妻年二十三歲夫爲逸獸所傷卒兒又歿於水幼子生甫週笄苦守五十餘年如一日

楊氏富平生員趙有御妻年十九夫亡氏厲志撫孤翁病革諭氏年少當改適氏截髮以明不二姑老患痰疾氏櫛沐俱廢暨疾

愈理髮髮盡脫子稍長課讀父書有九熊畫荻之風守節三十二年而歿

何氏醴泉生員高憲妻子女俱無出堅守五十餘載順治初旌表劉氏醴泉生員袁大壯妻年二十四而寡數欲投繯以殉賴救得

免苦節五十年卒一女適生員甯贊衛年二十五歲衛亡安貧堅守撫子成立今已七十矣

呂氏醴泉廩生駱善爲妻年十七于歸相夫勤學克盡婦道夫病革諄諄以存孤爲托時子錦方五齡及歿氏勵絕親族以遺命

止之氏斷指截髮誓無二志子既長遊庠食餼克繼父志氏年七十一卒

馬氏醴泉民甯增福妻年二十三而寡家貧無依二子方幼或勸



以改適氏斥之以死自誓卒時年已七十及見其兩孤成立云  
趙氏醴泉民魏姬印妻年二十四夫亡生遺腹子世興氏撫孤事  
姑克盡孝養後子長授室成家不墜宗祀年七十一終

郭氏醴泉民張人傑妻夫歿氏年二十四誓以身殉翁姑諭以節  
哀氏強起養親代夫盡孝翁姑歿泣血三年以婦兼子年五十  
九終

劉氏醴泉生員王孫璋妻璋病醫藥罔效氏願以身代及歿  
氏痛不欲生親族環勸之乃撫姪爲子紡績以供衣食歷三十  
五年五十三而終

王氏醴泉民張脩詞妻年二十夫亡矢志同穴長子義覺之日抱  
母而泣氏痛其子之無依也黽勉撫孤甘貧自守年六十一而  
終

雒氏醴泉生員于文德妻夫亡氏年二十二翁老子幼家貧無依  
父母憐其少欲奪其節氏毀容流血以死自誓聞者傷之年七  
十一卒

張氏醴泉民闞繩祖妻年十八夫亡子士恂生未彌月氏忍痛茹  
荼子漸長且娶婦僉謂張氏有後矣未幾士恂亡無子婦南氏  
立從子爲嗣薄田數畝婦姑終歲耕作佐以女紅得免凍餒鄰  
婦有家貧告貸者更節縮以周之無德色張氏年六十三而終  
南氏年七十而終南氏守節歷五十一年

馮氏醴泉民孫纘妻年二十孀居子如瑜方在抱辛勤撫育克底  
成立未幾娶婦生孫如瑜復病歿婦唐氏年二十一誓與姑同  
守馮語之曰守節難貧家守節更難盍熟思之唐泣曰姑勿言  
姑爲孫氏婦婦獨非孫氏婦乎乃忍死撫孤艱辛備歷馮年八

十五而終唐現年六十有三守節歷四十餘年矣

任氏膚施民趙富有妻年二十二夫亡家貧歲歎氏茹荼飲水孝

事翁姑教子成立雍正四年旌表

左氏膚施民吳大年妻年十七夫亡痛不欲生父母慰之曰獨

不念白頭翁與藐諸孤乎乃忍淚強進一餐家甚貧老親甘旨

孤子膏火以十指給之弗缺也孤卒成立子孫繁盛雍正四年

旌表

趙氏膚施民解文鸞妻年二十二文鸞故甘貧守節孝養翁姑勤

儉持家撫孤子迄成立雍正四年旌表

趙氏膚施生員楊捷春妻捷春夙嬰痼疾氏敬戒無違年十九捷

春故氏甘貧守節翁哭子喪明氏事之益恭謹及歿喪葬如禮

嗣子既長而殞復爲亡兒立嗣撫之益篤年四十九歲卒雍正

四年旌表

党氏膚施民韓武統妻劉氏武統弟武緒妻党年二十七歲武統

故家貧無子党拮据經營爲武緒完娶暨劉舉一子未周武緒

亦故劉年二十三歲兩婦皆守志不嫁奉姑惟謹姑歿盡哀盡

禮劉事党如事姑所生子生二孫以長嗣長以次嗣次俱成立

劉年五十七卒党現年八十俱雍正四年旌表

郭氏膚施民張爾志妻年二十爾志亡氏甘貧苦節孝事翁姑教

子成立守節至八十五歲卒雍正四年旌表

杜氏膚施廩生武定邦妻年二十一定邦亡氏茹荼飲水教子成

立年六十八歲卒雍正四年旌表

王氏膚施民夏朝伯妻生長儒素淡泊自甘夫亡矢志守節事親

克孝教子惟嚴待姻婭有禮接里黨以和孀居四十年年六十

卒雍正九年旌表

劉氏膚施民尉諫元妻年二十四而孀子成良方幼氏飲米茹藥

備極艱辛屢值兵荒卒能自保壽八十六卒雍正九年旌表

尉氏膚施儒童朱文鳳妻年十八而寡子鉉生甫四月艱辛撫字

稍長督課不懈弱冠遊庠蚤見成立雍正九年旌表年五十八

歲

溫氏膚施王日昇妻日昇亡矢志守貞備嘗荼苦子令由選貢歷

官廣東按察使贈日昇如其官累封氏太恭人暮景恩榮人爭

羨之卒年八十有一

崔氏膚施生員田呈藩妻夫亡氏年二十一歲親黨以年少勸改

適氏正色拒却之歷五十四年年七十五歲卒

王氏膚施生員夏嗣茂妻年二十五歲嗣茂亡氏誓不再適守節

五十八年卒年八十三歲

史氏膚施民田徹妻年二十五歲夫亡家貧甚氏止事翁姑孝養

備至堅正之操始終不渝

張氏膚施民何長清妻夫亡時氏年二十二歲撫孤成寸守節六

十二年卒

董氏膚施民楊文秀妻年二十五歲夫亡姑老三子年俱幼氏仰

事俯育守節四十八年卒

魏氏膚施民張名世妻年二十三名世亡氏守節養姑能得歡心

姑病篤呼天號泣願以身代及歿盡哀盡禮年七十六歲卒

何氏膚施民李之正妻年十七之正亡欲以身殉翁姑泣諭之乃

已家甚貧資績紡以自給終身無間言

田氏膚施縣生員薛之光妻事舅姑以孝聞康熙十六年朱龍叛

田擄氏縛馬上氏罵不絕聲遂遇害時年二十歲

高氏安塞生員馬應龍妻年二十應龍亡氏典衣營葬明末兵侵

頻仍或勸之嫁氏截髮自誓教育二子復早逝氏守志不變年

八十卒順治十二年旌表

宋氏安塞貢生馬正吉妻正吉少力學氏篝燈佐讀徹夜不寐年

二十七正吉亡氏撫孤守志孝養翁姑後二子諸孫俱有聲庠

序七十七卒雍正五年旌表

宋氏安塞生員馬異吉妻年二十九異吉亡撫孤守節勤力操作

為二子從師費值數歲絕糧數日終無怨言雍正五年旌表時

年七十歲

李氏安塞縣民張大美妻幼識大義動止皆有禮法于歸後敬戒

無違年十九大美客死四川氏聞之痛絕復蘇及觀歸欲以身

殉人以親老子幼勸止歲歉絕糧或諷其他適氏矢死不二衆

感其義共周之雍正五年旌表時年六十餘

劉氏安塞民馮友廉妻馮貧甚舅姑甘旨氏以女紅給之翁歿脫

簪珥殯葬年二十八友廉亡姑老子幼氏仰事撫育艱苦萬狀

終無怨悔年七十五卒雍正六年旌表

宋氏安塞儒童李大正妻大正亡氏年二十四家貧無依矢志不

移姑卧疾二載氏持侍牀榻始終勿懈子三人伯仲業農季子

王有聲庠序嫁娶皆名族門庭肅然雍正九年旌表守節歷四十

七年

王氏安塞人延安營兵李天保妻康熙十八年調延安兵駐平涼

天保挈家以往二十三年從勦四川牛頭山賊卒於軍時氏方

二十八歲舅姑復相繼歿拮据經營殯葬以禮既終喪復歸鄉

井卒年六十二歲諸子皆成立雍正六年旌表

宋氏安塞生員何繼秀妻未笄以孝名父得起疾思肉食氏割股啖之病遂愈咸謂孝德所感既適何善事翁姑未幾夫故氏年二十三歲遺腹生子龍騰拮据經營教之成立年七十卒

王氏保安生員牛重輪妻重輪卒年二十二守志不移時翁姑俱年登上壽氏養生送死情文無缺先是氏有子印金方二歲繼夫兄爲後至是氏乞子同養夫兄感其誠亦許之未幾授室生子兩家宗祀賴以不墜卒時年六十一雍正九年旌表

王氏保安生員牛紹孔妻年十七而寡無子乞從子世祿爲嗣辛勤鞠育卒能成家舅姑繼亡喪葬咸中禮年五十八卒雍正九年旌表

南氏安定太學生強勸妻年十九夫亡勺水不入口者數日未幾翁歿夫弟某及妻又歿諸孤咸幼生計維艱事姑仍孝養不衰年五十而終雍正三年旌表

張氏安定學生王運起妻年二十六歲運起卒家貧以針紉爲生諸嗣子不慧氏盡心撫育爲之娶婦生孫嚴課家衆長幼不敢嬉遊比隣莫不高其節義雍正五年旌表

吳氏安定民強貴妻年二十六夫故時翁姑年近六旬氏孝養彌篤翁姑俱以壽終方姑病篤時氏侍奉湯藥備極辛苦戚族見者莫不稱頌教育三子以務本耕讀爲業年六十九卒雍正五年旌表

石氏安定廩生南苞妻苞卒氏年二十四時翁歿姑老叔氏皆幼氏紡績以資誦讀俱能有成嘗語家人曰生子不足繼書香猶無子也長子光烈食餼次承烈舉孝廉孫曾繩繩門戶不墜年

七十有七卒雍正九年旌表

南氏安定廩生任覺民妻年二十七而寡初覺民得狂疾每發輒  
挺刃奔呼家人辟易氏奮身護之勿恤也暨歿痛夫惡死欲以  
身殉為絕粒者三投繯者再觸柱者一繼以二老無依苦志守  
節課子懋德童年入泮年五十六而終雍正九年旌表

石氏安定生員張文藻妻年二十二夫亡事老姑撫弱子數十年  
如一日無何姑卒孤亦亡氏艱辛萬狀復撫遺孫成立壽八十  
卒雍正十年旌表

薛氏安定廩生史穎妻年二十六穎故氏撫孤守志事姑尤純孝  
每哭其夫泣無聲或怪之曰恐高堂慟耳年五十一歲卒  
蘇氏安定民史操妻年三十夫亡遺孤道行甫七歲家極貧苦節  
三十六年卒

白氏安定民李人藩妻年二十三夫亡家甚貧事親撫孤矢志不  
懈親亡遺幼叔甫三歲氏撫之成立年八十卒

白氏安定生員張旬妻年二十三夫亡遺孤二家貧不支氏備歷  
艱辛撫育成立年六十一歲卒

強氏安定廩生李憲邦妻年二十六夫亡家赤貧人數勸之嫁堅  
不從拮据撫孤雖食粗衣惡不怨邑令聞而重之復其子煥終  
身年七十七歲卒

雷氏安定民郭帝輔妻白氏郭祚遠妻楊氏郭世蘭妻俱夫亡守  
志撫孤成立雷得年五十五白得年六十一楊得年幾八十

強氏安定生員楊撫民妻三十而寡遺孤承基甫十歲撫之成立  
承基慷慨好施家聲克振氏年六十二歲卒

張氏宜川生員劉秉信妾年二十夫亡苦節六十年撫子慶蛟成

立子孫繁衍

楊氏宜川監生劉郡妻年二十八守節撫孤歷四十六年卒

馬氏宜川民白玉璜妻年二十五而寡玉璜歿氏罄貲營葬盡哀盡禮翁年老邁疾氏晝耕夜紡以供湯藥旁觀嘖嘖稱孝教育孤子克繼家風守節三十九年卒

呼氏宜川生員劉玉璽妻夫亡氏年二十五矢志不二每歲時奠享恒手挈遺孤伏地長號不起聞者咸爲酸鼻時孀姑在堂晨昏奉事必誠必敬暨歿尤盡禮教子極嚴卒底成立歷三十年而終

黑氏宜川武生張宗妻年二十夫故姑以其少欲遣去氏嚙指自誓姑悔之氏承歡朝夕白首無間氏系木農家孀居後以禮法自持雖應門之童不命入不敢入也子既長娶婦生孫子復歿伶仃困苦視昔有加年六十七卒

趙氏宜川民王懋郁妻夫歿時年二十五家貧親老氏義命自安誓不改節卒能教子成立不墜家聲歿年五十五歲

袁氏宜川生員張台範妻幼嫻女則年十五于歸事翁姑能色養夫歿氏年二十七痛夫早喪欲以身殉未幾姑繼亡兩喪並舉備物盡禮里人稱之夫有叔暨從弟皆別葬氏念其無嗣改空祖塋命其子祭掃無缺族黨咸以爲難年五十八卒子黃甲善承母訓弱冠遊庠有聲

白氏延長民郭運隆妻于歸後翁老姑病曲意承歡年二十二運隆歿家貧無依氏晝耕夜織苦節撫孤每汲水採薪負兒於背見者傷之守節四十五年雍正八年旌表

羅氏朱秉寅妻鄭氏李曰福妻並延長人夫死守節甘貧終老羅

撫遺腹子李撫彌月子皆成立迄今孫曾蕃衍羅苦節六十二年八十二卒李苦節三十一年年六十一卒俱雍正九年旌表

董氏延長生員馮仕萃妻年二十三夫歿親老子幼家貧無資賴織紡以給朝夕子世臣稍長延師課讀從子世昌來就學嗣因家窘令世臣務農世昌仍肄業不輟卒成諸生皆氏教也性淡泊敝衣蔬食終身不厭現年七十餘雍正九年旌表

沙氏延長捐貢王大臣妻夫婦從翁宦永年事翁及後姑咸盡孝夫染疾方篤翁忽故氏扶柩抵家傾貲具葬未幾姑又歿夫繼之營葬皆如禮夫弟世臣方幼撫育恩勤過於己子家門雍穆庭無間言雍正九年旌表年六十六歲

馮氏延長民董閑妻夫亡氏年二十七歲家徒四壁餬口不周親族有勸再醮者氏引刀誓無他志卒教子成立以承宗祀

高氏延長民劉進義妻年二十三歲夫亡氏歷四十餘年備極艱苦誓不易節

董氏延長民蘇棲鴻妻年二十七歲夫亡家計蕭然值歲飢攜子採薇得不死翁姑歿貧無以殮氏傭工隣家得畢葬事

康氏延長民賀九成妻夫亡氏年三十五歲姑老子幼矢志靡他里黨咸以節孝稱之

白氏延長民郭運隆妻年二十二歲夫亡子未彌月焚焚無依誓死自守歷四十五年卒

高氏延川儒童高恒嶽妻年二十一恒嶽亡舅姑哀其年少無子將嫁之氏誓死不二苦節養親撫從子爲嗣教之入泮復早世氏哀痛不已卒時年四十一歲里黨欽其節而悲其遇焉



毛氏董其才妻年二十四而寡高氏甄奇玉妻年二十五而寡俱延川人養親撫孤苦節終身毛年七十八卒高年六十九卒

郝氏延川民高爾光妻年二十一爾光亡矢志砥節有貴族議聘氏正色叱之事孀姑撫弱子歷二十年如一日

劉氏生員關漢鼎妻楊氏李文魁妻袁氏甄復興妻俱延川人夫亡遺子幼並守志撫孤成立劉年六十九卒楊年七十四卒袁年八十卒

梁氏延川民高萬舉妻年二十六萬舉亡養親教子矢志不渝年七十五卒又萬全妻梁氏年二十八歲萬國妻樊氏年二十九歲夫亡俱撫孤成立梁年七十六卒樊年六十七卒

梁氏延川民劉姚舜妻年二十姚舜病故遺一子目盲氏日夜焚香祝天祈愈子疾未幾子目重明教養成立氏年八十三卒

程氏鳳翔民張必迥妻迥歿氏年二十二奉養翁姑不愧子職二老歿喪葬咸如禮撫叔教子克底有成年五十七而卒雍正四年旌表

甄氏鳳翔民楊徽猷妻歸三載而楊歿奉姑教子心力俱瘁後家業漸起子孫稱溫飽皆氏拮据所致也雍正四年

題旌時年七十三

李氏鳳翔監生盧傳第妻氏年十四適盧甫七載夫病脾氏躬親浣濯藥餌飲食皆手進夫卒氏絕食數日翁姑強之淚泫泫下曰本欲從夫地下奈親老子幼何遂勵志堅守撫子女恩勤備至雍正四年旌表時年六十六歲

杜氏鳳翔民劉鳳妻年十四歸劉少而知禮舅姑早歿哭奠必誠劉卒家計蕭條氏晝夜紡織課子讀書嚴如師傅子孫多遊庠

序守節三十五年雍正四年旌表

白氏鳳翔民張鈞妻年十七歸張越六載張病臨終囑氏曰吾親未殯吾子在抱死不瞑矣氏飲泣不能言及鈞亡備嘗艱苦為舅姑營葬課子撫姪守節三十七年雍正四年旌表

嚴氏鳳翔民白孕樸妻年十七歸白越八載夫死氏雖農家婦事姑盡孝教子有方年七十三卒雍正四年旌表

李氏鳳翔杜少亭繼妻少亭卒氏年三十叔翁欲奪其志氏恚甚欲自刎叔翁駭止撫前妻子關賢如已出後果以文名且克盡孝道焉

劉氏鳳翔生員劉養吾妻養吾臨終絕而復甦謂氏曰適見吾門有三異人家四字匾額言畢而逝時子梁棟方二歲有豪強謀攘其家貲備肆侵蝕氏甘心苦守紡織教子及生孫即以三異名之後三異果成康熙丁丑進士氏孀居三十餘年而卒

王氏鳳翔太學生汪弘量妻弘量遊閩中數年不歸氏事姑不少怠姑病醫云年老血衰得人血合藥方可治氏即引刀割臂流血升許不覺痛楚數日創可平如初姑亦尋愈人以為至孝所感李氏鳳翔朱緩之妻夫故氏年二十五子女俱幼翁姑老憊家素貧氏勤組織事尊育幼咸取給於十指或勸改適氏以死自誓撫子女皆成立

郝氏鳳翔太學生趙承先妻承先逝氏痛哭幾絕事親以孝撫子以慈有貴族遣媒求聘氏嚙其面麾之去至年七旬卒子之桂妻劉氏亦早寡痛姑苦節同大栢舟撫養遺孤兩世冰操鄉黨嘆服

薛氏鳳翔庠生孫鵬妻夫亡氏年二十一遺孤僅二歲氏痛哭絕

而復甦者再四既而撫膺嘆曰與其偕夫同逝豈若撫孤成立以承宗祀乎乃勵志苦守教子心毓英列於庠

胡氏鳳翔庠生強恕妻恕故氏年十九有妊歷五月生男翁以氏年少欲令改嫁氏聞之籲天自誓乃弗復言氏爲冢婦凡中饋勞苦之事卒以身先事繼姑惟謹姑獨鍾愛氏而妯娌亦無間言

李氏鳳翔生員袁有熊妻年十八而寡無出側室生子毓氏曰妾子即吾子也教之入成均守節三十餘年卒

徐氏鳳翔彭雲衢妻李氏彭雲冲妻徐相夫治家以孝友著聞夫卒守節訓子歷四十年李年未三旬夫故有逼氏再適者氏刺面斷髮誓完節操年八十三卒

李氏鳳翔生員彭嘉世繼妻前妻子幼以翼方數月撫如已出年二十八夫亡矢水藥者三十餘年

張氏鳳翔人千總李懿妻年十九夫亡舅姑老且病二子方在襁褓家赤貧辛勤織紡俯仰無憾舅姑歿喪葬咸如禮刻像朝夕奉之教二子俱成名守節三十餘年而卒

王氏鳳翔朱良乾妻乾卒氏年二十九遺孤二歲家貧守節備嘗艱苦子文傑以軍功歷守備氏年八十餘歲

崔氏鳳翔生員劉繼南妻夫故氏年甫十八家貧紡績自給撫遺腹子餘惠教之成立爲郡廩生苦節歷三十年

趙氏鳳翔劉暹妻年二十而寡遺孤宏績方數歲氏教之讀書貢於成均氏守節凡四十八年

薛氏鳳翔翰林檢討盧熙妾盧典試滇南歸卒旅邸妻子復相繼歿薛年甫二十生一女爲立嗣以主喪葬守節二十五年先是

有張氏楊氏者運司程雲翼側室也程卒張子鍾瑞楊子毓瑞皆幼二氏矢志撫孤楊卒張撫其子如已出聞者高之

蒲氏鳳翔生員劉印坤妻年二十七而寡撫子善世既長入成均

復早亡遺女孫一氏撫養備至卒時年六十七歲

王氏鳳翔生員吳南謹妻事姑盡孝夫亡氏年二十八家貧守志

兩手拮据撫四子皆成立長烜次忻入泮季焮選拔守節三十

八年又舉人王鼎安妻程氏年二十守節歷三十年

俞氏鳳翔人吳份妻份卒氏年二十有八子山甫四齡守節自誓

竭力奉親有司旌其閭

常氏鳳翔生員苟自新妻夫歿哀毀骨立事翁姑以孝聞撫育遺

孤慈不掩義及長補弟子員守節三十八年

程氏鳳翔張文星妻年十六歸張克嫺婦道張亡氏年二十六痛

夫幾絕以遺孤方幼堅志誓守年五十餘卒

張氏鳳翔張福妻福臨終囑氏改適氏引刀截髮曰妾頗知義豈

肯從一不終以爲君辱况姑老子幼乎夫歿紡績事姑不少怠

卒撫其子文甲爲邑弟子員

何氏鳳翔王鏡繼妻鏡卒呼天誓守撫前妻子女恩義兼至理家

有法門庭肅然長子廷極入庠克繼家聲

孟氏興濟令王者賓繼妻鳳翔人性勤儉恪循婦職值賀寇變被

擄罵賊不屈路經石河灘氏從馬上撲跌數十次日鼻口齒俱

毀賊怒殺之其夫亦罵賊被害學使旌其門至今鄉人稱夫婦

雙節云

耿氏武功人岐山生員李淑世妻淑世死守節二十年卒

強氏寶鷄監生高協緒妻高宦族也氏儉樸自持紡績不輟姑舉

一子而病劇氏湯藥之餘兼乳幼叔夫抱病寢食俱廢及歿哀毀異常時年二十七舅姑憐其早寡無子將嫁之氏誓死不貳以姪爲嗣教養備至雍正五年旌表時年五十六歲

王氏寶鷄民李茂華妻氏有總服弟王一位惡少也欲加無禮於氏乘間入氏室逼之氏堅拒不從竟被殺讞定真一位於法康熙五十四年旌表

楊氏扶風生員王秉銓妻年二十九孀居值流寇陷城氏保孤誓守備歷險難子孫俱入庠年七十三卒

唐氏扶風民張英侶妻英侶亡氏年二十二矢志完操教子成立年八十四歲而歿

喬氏扶風高其行妻孀居四十餘載邑令杜俊章表之  
張氏扶風王憲孔妻憲孔歿遺孤甫週歲家赤貧孝事孀姑克盡

婦道辛勤育孤以至成立四十年無變志

陳氏扶風吳鳳妻年二十五而寡家貧無倚氏拮据葬夫事老姑孝養尤謹辛勤撫孤克至成立年七十餘卒邑令毛士儲旌其門

申氏扶風于中貴妻夫亡守志訓子有成苦節歷四十餘年

鄭氏扶風民楊樸繼妻年二十六而寡無所出撫前室子錦成立娶婦賈生孫涇賈即亡氏撫涇亦成立涇妻康生曾孫鼎彝甫數月而康又亡氏衰年撫鼎彝愈篤米藥一心劬勞三世年七十二歲而歿

豔雪姓田氏山西馬邑人年十二爲翰林侍讀扶風王豫嘉侍兒從官京邸歷數載無忤色豫嘉悅之生子一殤豫嘉亦以病家居九載豔雪侍醫藥不少間及歿慟不欲生家人覺之豔雪知

家人覺之也慮不得死慨然曰吾固不死乃日縫滌滌澆如平時顧時時示笑容又屢以已身後事語人約計棺衾斂葬之具甚悉人詰之且顧而嘻曰若不知吾戲乎人亦戲應之既月餘晨興持女紅至主婦所會主婦泣豔雪慰止者久之日已盱忽持盂水入室給言櫛沐頃之則自經絕矣時年三十有二先是月中每入室恒闔戶踰時人窺之多料簡衣笥針帖中物不虞其竟死也既畢命粧梳儼然容色恬如含禭所須一一畧置几上若素習者人以其蓋異之

魏氏麟遊生員呂擢妻年二十七而寡翁姑衰老稚子孱弱氏仰事俯育孝慈兼盡後翁姑俱以壽終二子並入學校氏年六十五卒

趙氏麟遊民李儀鳳妻年二十四歲鳳亡家徒四壁氏晝夜績紡易粟而食拾薪而炊歷五十載撫子女皆婚嫁更貽厥孫謀焉李氏麟遊生員劉寧繼妻年十七歸劉二十一而夫歿母家憐其少微言改嫁事氏剪髮誓守幽居一室親族罕觀其面撫前室遺子紡績以資讀書獲入泮

沈氏麟遊民劉元命妻年二十二歲寡居家甚貧誓不改適姑亡舅存竭力奉事克盡婦道本生父年老無子氏迎養於家十數年晨昏不怠歿葬以禮與生男無異

田氏麟遊生員魏大經妻年二十餘歲夫亡守志翁姑生養死葬俱能盡禮并善事繼母撫一女一子俱成人苦節二十九年而卒鄉里憐之

李氏麟遊民母與妻與死時氏年二十七歲子女無出家貧守志晝夜紡績自給遇荒歲嘗數日不舉火有勸他適者即怒絕之

後抱養棄兒得成立為嗣歷三十六年卒

王氏麟遊歲貢張鼎甲妻事姑盡婦道年二十七歲稱未亡人撫

二孤理家務艱苦備嘗年七十四歲卒

趙氏麟遊御史趙玉堂妻初玉堂為諸生家貧甚氏五夜紡績佐  
讀遭流寇劫掠義不受污墮崖死後玉堂官御史贈孺人玉堂  
性純篤父病嘗糞視藥人稱其孝登順治乙酉鄉薦擢御史巡  
鹽兩淮商人勒石頌之

蒲氏汧陽民李輔仁妻年二十三夫亡無嗣矢志守節事舅姑以  
孝稱撫養幼叔心力俱殫未幾姑亡叔天承翁命撫甥為嗣教  
訓有方雍正三年旌表時年六十餘矣

鄭氏隴州生員徐良翰妻年二十五夫亡哀毀踰禮哭泣頓絕者  
數次良翰有孝行其歿也父母痛甚氏體夫志以事舅姑甘旨  
竭誠祭葬盡慎家有薄產氏以紡織所蓄早完正課教子超羣  
不掩義為名諸生雍正四年旌表

鄭氏隴州生員李春芳妻年三十夫亡守節教子慈嚴並至家貧  
屢丁兵燹終始不渝卒年七十餘歲

李氏隴州民李崇榮妻年二十六崇榮故氏斷髮誓守孝奉翁姑  
教遺孤琚克兼父道孀居三十八載苦節彌堅

蒲氏隴州庠生馬千乘妻年十九夫亡遺孤在襁褓立誓守節孝  
事舅姑教子錫庶成明經年踰七十

郝氏南鄭民李盤銘妻夫故氏年二十三子甫三歲親老家貧氏  
操作度日值翁姑踵逝克盡喪禮訓子勤儉成家雍正三年旌  
表時年六十餘

唐氏南鄭儒士王經世妻年十八適王越三載夫亡子幼家計蕭

然氏力勤機杼事繼姑得其歡心撫子克底成立守節四十餘年雍正四年旌表

李氏南鄭民楚之奇妻年二十五之奇亡氏上奉二親下撫幼子今子克成立翁年九旬猶康強無恙也雍正十年旌表時年六十餘

武氏褒城民李彥碩妻年二十夫死守節撫孤遭兵燹逆寇賀珍欲污之氏引刀自刎不得死尋剪髮毀容以免年七十餘卒

謝氏褒城民何邦海妻夫故時氏年二十三家貧子幼苦節撫孤年七十五卒

張氏褒城諸生歐材妻年二十四夫亡遺子世過甫三歲紡績撫孤稍長教之力學十歲為弟子員兩孫亦入泮守節終身

徐氏褒城民何謙妻年二十二康熙十八年冬大兵下漢興逆寇潰走道經谷口氏避寇為遊騎所掠縛馬上罵不絕口脅之以刃曰頭可斷身不可辱罵益厲賊怒磔殺之

党氏城固諸生王鉉妻年十九鉉故時有勸其再嫁者誓死不從兄玃憐其志為築室居之以終其節卒年七十五

鄒氏城固庠生段陞妻夫亡氏年二十子袞方三歲安貧守志教子成立卒年七十

趙氏城固杜完妻年二十餘夫死子毓鳳方三歲舅意欲再嫁之氏嚼指以拒曰我不死者為杜氏孤耳後毓鳳列諸生又與婦相繼歿復育遺孫棠成立為諸生年九十卒

胡氏城固庠生杜運緯妻夫亡年十七無子撫伯氏彌月子長書為嗣迨書遊泮忽語家人曰我事已了當從夫地下矣無疾而逝時年三十七



党氏城固許無愆妻夫亡氏年二十九欲死者再念子幼無依厲志撫孤內外無間子瑄成順治己亥科進士年八十一卒

李氏城固人前萊陽令梁衡妻年十七隨夫之任值寇至氏相衛為守禦計萊邑得全後歸里夫亡氏年二十二兵荒迭起氏拮据撫育子復震為弟子員卒年七十

廉氏城固生員党瑢妻年二十夫死孤兒以諗甫五月氏自經者再有僕婦勸之曰主死是呱呱者將誰托氏感動乃不死勤儉自持教子成立守節五十餘年

張氏城固諸生譚明議妻年二十二夫亡姑老遺孕生子體質體實氏孝慈兼盡二子相繼為孝廉氏年登耄耋人以為苦節之報

陳氏城固李應麟妻年二十夫死仰事俯育一身肩之後翁姑繼歿子亦尋亡又撫其孫文輝為弟子員壽九十餘

呂氏城固諸生韓之荆妻荆壯歲遊學不歸生死無的耗氏歷經兵火事姑孝律身嚴教其子詩莪成名氏年七十有餘

王氏城固王懋功女許字同里蔡起麟將嫁喪母服闋起麟又死氏欲奔喪父不許且諷以改適氏乘父他出易服往起麟家執喪盡禮孝養舅姑終其身

陳氏城固黎廷鐸妻性至孝姑遭奇疾醫藥罔效氏割股作食以進姑疾忽愈署令王穆旌其門

秦氏城固庠生鄭以德妻年二十二夫亡翁老氏孝養以終其年教二子俱成名守節四十餘載

張氏城固鄭啓泰妻夫亡欲以身殉家人防甚密至虞祭遂自刎死又張氏黃鐘妻夫歿哀痛不已亦自殺

党氏城固王爾麟妻年十九而寡逆藩有賊將欲娶之不從將劫之氏沐浴紵裳再拜夫柩前從容自縊

閻氏城固貢士張士英妾士英自鄜州訓導歸猝遇寇家人俱被擄氏義不受污投崖死

戴氏城固李沐潤妻隨夫入蜀夫死氏哀痛欲絕扶櫬歸泣拜自縊死

饒氏城固劉振祚妻年二十二吳逆犯境人驚避氏與夫相失抱兒投水死

王氏洋縣生員李迥知妻迥知亡氏年二十事姑盡孝撫養孤姪苦節五十年順治間旌表

李氏洋縣儒士楊暄妻年十六未婚而暄歿氏聞訃欲奔喪父母不許輒自刎不得已令適楊氏姑難之氏誓死不二翁歿於蜀

氏多方稱貸扶櫬歸葬康熙二十八年旌表

趙氏洋縣諸生楊宜經妻年二十夫亡翁痛子復歿氏殯葬咸如禮值歲荒姑令改適氏秉節弗衰建坊旌表

汪氏洋縣王國紀妻年二十歸王時翁年七旬有四子皆前歿無嗣氏夫其季子也越二載夫又亡遺孤方五月氏誓於夫靈以

養老存孤為志翁年至八十六卒喪葬以禮復以先世葬地不吉恐不利於姑晝夜拮据襄事得改殯戚屬以貲助者咸謝去

現年六十三歲雍正七年旌表

王氏洋縣庠生周公輔妻賊擄氏欲挾以行不從被創十餘置而去氏斃而復甦壽登八十傷痕宛然

張氏洋縣吉聯婁妻夫亡氏年二十二遺孤方在襁褓氏志凜冰霜心勞撫育守節三十餘年

張氏洋縣庠生強百福妾強歿嫡令改嫁氏堅守撫孤娶婦生孫越數年子歿孫亦夭強氏無後氏復養他姓嗣之撫之成立苦節數十年如一日

周氏洋縣儒士馬汧勛妻年二十五而寡遺孤未週家貧織紡以佐菽水舅姑繼逝喪葬備禮子復遊庠守節五十餘年

楊氏洋縣閩龍翼妻夫亡氏年二十無子堅志守節歷五十餘年李氏洋邑紳王奇瑾妾薛氏奇瑾孫啓睿妻瑾疾革以李年幼無出命再適氏曰妾分固賤然從一而終婦道也泣不承命瑾憐之遂以孫啓睿立為嗣孫瑾故氏為啓睿娶薛氏生子未幾啓睿故子亦夭李勸薛嫁薛泣云祖姑撫我夫成人今夫亡子歿忍舍而他適耶紡績奉養三十餘年邑令謝景安以節慈貞孝旌其門

杜氏洋縣庠生李國宣妻張氏庠生國宣妻俱年十八而寡無子女值寇亂間闖竄徙翁姑慮不免諷之嫁二氏矢志固守屢遭兵火困苦備嘗並歷四十餘年卒

王氏洋縣楊仁聲妻年十八寡居甘貧守節育子成人壽七十餘王氏洋縣庠生李國士妻夫亡賊將譚弘欲奪之氏斷髮毀容以拒乃止

李氏洋縣張兆驄妻避賊入山被掠投崖死  
段氏洋縣翟冲雯妻雯死氏年二十二矢志栢舟其翁欲奪而嫁之氏聞自縊死

張氏洋縣庠生李躍龍妻賊至夫婦被執欲污之氏罵賊被害  
王氏西鄉庠生許天祥妻年十八夫歿苦節六十年旌表氏亡後十年始克葬入壙時縋斷棺墮地其屍顏色如生觀者驚為完

節所致

李氏西鄉民張宗之妻年二十二而寡子永福甫四歲氏茹荼飲  
藥撫孤成立守節五十餘年子亦備極孝養克順親心

李氏西鄉王紹堯妻年二十五歲夫歿氏守節撫三子皆入泮壽  
六十八而卒

馬氏西鄉穆魁妻年二十二孀居家赤貧事姑盡孝撫五歲孤映  
芝成立卒時年八十八

劉氏西鄉諸生劉繼錫女王氏諸生王武周女諸生譙之琦先聘  
於劉繼錫以之琦有疾欲遲婚之琦父譙懼恐乏嗣復聘於王

繼錫誓府斷令同歸未一載琦故二氏年俱未二十婉身各舉  
一子守志撫孤劉子芳蘭王子芳蕙俱遊庠一門雙節閩邑稱  
之

唐氏西鄉儒士龐文章妻年十八而寡撫孤入庠氏病子割股瀉  
母有司表其門曰母節子孝

金氏西鄉庠生米萬鍾妻年二十而寡善事舅姑貞操不二年六  
十二卒

曲氏鳳縣諸生張鳳儀妻張亡氏年二十哀痛如不欲生翁姑諭  
之曰汝死如二歲遺孤何遂勵志誓守事親教子苦節三十餘  
年建坊旌表

謝氏沔縣民姚璋妻年十八歸姚二十五而姚歿哀痛欲殉親族  
以翁姑老子幼勸之遂誓守家貧織紡以供堂上甘旨翁姑相  
繼歿殯葬有禮撫孤松齡慈嚴並篤得列黌序守節四十四年  
卒有司以請旌表

章氏沔縣民張試之妻年十九適張孝事翁姑夫亡氏年二十七

盡鬻衣飾以葬負土成坎血流指掌見者無不墮淚撫子源赤拮据萬狀有諷之改適者氏厲色拒之苦節三十年旌表

趙氏沔縣儒士李聖極妻年十九適李紡績佐讀事翁姑以孝稱聖極忽患癱疾憤入井氏隨之俱救免後聖極卒自經死氏義不獨生遂更衣亦繼夫旁時年二十二歲旌表

玉姐沔縣民吳顯章女生有令姿有虞傑倫者素無賴竊入室調之玉姐與婢沙氏厲罵不從被殺死此康熙五十五年事也旌表

高氏畧陽貢生陳伊訓妻陳故氏年三十甘貧守節晝夜績紡每遇祭祀必盡誠致敬教子慈不掩義曰汝曹當勤讀以承先志後三子皆入泮有司以請旌表

劉氏畧陽王世業妻年十九夫亡守志撫遺腹子早殤氏年九十

餘卒又生員劉起敬妻芮氏亦以守節撫孤著聞鄉里

李氏畧陽高映碧妻孀居有豪右欲強娶氏氏剪髮毀面誓死以拒守節至六十餘知府騰天綬表其門

張氏畧陽梁天培妻年二十三夫死甘貧守節吳逆變起賊將欲逼之氏引刀毀容賊駭而走撫育二孤俱成立苦節至五十餘知府騰天綬表其門

潘氏畧陽李應登妻王氏王丹所妻各避寇居岩中賊攻岩將破二氏束衣蒙面投崖死知府騰天綬俱表其門

羅氏畧陽梁貢妻年二十一夫亡有遺腹子氏日夜泣撫翼其成立值姑病祝天願以身代翁姑相繼逝殮葬如禮俄而子又夭泣曰梁氏絕矣何生為遂不食死

金氏延綏營兵張問禮妻康熙七年問禮隨伍出征物故氏時年

二十一歲聞訃痛絕以翁姑年老強飯侍養不數月翁姑俱逝  
殯葬如禮遺腹生子基生教養備至艱辛萬狀卒無怨悔年六  
十九卒雍正五年旌表

黃氏榆林民任則榮妻年二十四夫亡甘貧守節孝養翁姑撫孤  
成立年六十三卒雍正五年旌表

王氏定邊民陶魁妻年十八夫亡叔俊以氏年少令改適氏剪髮  
刺指誓不再醮撫孤成立雍正四年旌表

郭氏定邊營人賀麟妻麟故武宦子康熙十八年寇擾定邊麟被  
掠至秦州亡氏年二十三歲上事衰姑下撫孤子歷五十餘年  
雍正初年旌表

謝氏定邊民賈世虎妻年二十夫亡子生甫三月家計甚艱從堂  
兄賈世民陽托矜恤移氏同居氏年少世民欲以爲利因逼令  
改適氏仍歸舊居以避之柁舟之操終始不渝雍正四年旌表  
許氏定邊民亢孝妻夫亡氏年甫二十一茹荼飲藥志不稍易雍  
正四年旌表





勅脩陝西通志

第六十九卷

人物十五

列女四

NATIONAL CENTRAL LIBRARY, TAIWAN, R.O.C.



陝西通志第六十九卷

人物十五

列女四

本朝

劉氏興安民楊裔昌妻年十六而寡遺孕生子氏孝事舅姑舅姑  
殁力營喪葬艱苦備至子長教之入泮守節三十七年康熙五  
十二年旌表

王氏興安民趙應泰妻年二十四生二子而寡時姑老孀居氏善  
體姑志撫二子並克成立年七十一而卒康熙五十三年旌表

馬氏興安民賈廷鼎妻年二十夫亡孝事舅姑劬勞訓子苦節四  
十八年雍正三年旌表

康氏興安生員楊秉彝妻年二十五夫亡生子方六日親老家貧



ES. NATIONAL LIBRARY, TAIWAN, R.O.C.



氏紡績充養遺孤鞠育有成苦守二十四年卒雍正三年旌表  
馬氏興安生員魯鏞妻年二十二夫亡遺孤弘漢相倚爲命及弘  
漢入泮完娶與婦先後死復撫孫承楷成立再世劬勞一心冰  
蘖守節三十七年雍正三年旌表

孫氏興安民梁陳妻年二十四而寡姑老孀居生養死葬無失禮  
子生三月撫育成人有聲庠序守節二十五年雍正三年旌表  
馬氏興安生員劉鼎基妻夫亡氏年二十七後兵荒屢至艱苦備  
嘗年八十三而卒

唐氏興安生員陳于闈妻于闈隨父大計司理維揚病卒氏年二  
十六歲二子俱幼又妾子三人氏教育無異視後大計亦歿于  
官氏自數千里外扶兩柩歸葬守節終身

劉氏興安人百戶崔榮妻年二十榮歿不再醮撫三歲兒昌引昌  
引長娶謝氏而天謝引刀自刎劉救得免與姑守節終身

馮氏興安馬在良妻年十九夫死家貧氏茹荼飲藥撫兒守節以  
終

胡氏興安馬志學妻夫歿年二十三遺子中駿訓誨成名孫道弘  
幼失母胡亦辛勤撫育守節四十二年卒

俞氏興安王學先妻夫亡妾生一女氏撫女守節終身

徐氏興安生員王國英妻陳氏監生劉其言妻夫死守節徐五十  
餘年陳六十四年

李氏興安生員陳五典妻年十七夫亡自縊死

胡氏劉氏胡興安生員謝賢謨母劉其妻也流寇至劉負胡走避

閻王寨寨破俱投巖死

喻氏興安生員梁信成妻順治三年城破賊逼氏所氏大罵賊兵

刃俱下氏死之

席氏興安陳于堂妻順治三年流寇破城氏被迫引刀自殺死

蔣氏興安貢生王建極妻順治三年劉二虎破城氏語建極曰吾

死君急逃乃引簪刺喉而卒年二十八

侯氏興安范文奎妻順治三年劉二虎破城投井死

劉氏興安生員陳五美妻賊至城陷投水死

單氏興安生員崔尚志妻康熙十四年吳逆竊踞州城餘黨縱掠

氏知不免以其子托隣婦投巖死

李氏平利民楊啟勇妻年二十七夫亡氏痛不欲生親族諭以養

老存孤大義始強起就食治家勤儉嚴肅事翁姑如子及歿喪

葬盡禮人稱節孝教二子皆入泮卒年六十有一雍正四年旌

表

朱氏洵陽生員鍾仙麓妻仙麓死氏年二十七不嫁教子簣貢於

成均簣死婦吳氏年十八亦不嫁教子衍慶饒於庠朱守節四

十三年吳守節三十四年

吉氏洵陽生員吳鳳喈妻夫亡終事舅姑撫子伯禮入泮而卒婦

華氏善承姑志撫子淳科饒于庠兩氏俱年二十六而寡吉守

節四十四年華守節四十二年

吉氏洵陽舉人宋英妻年二十四夫歿教子成名守節五十六年

吉氏洵陽生員鍾仙質妻年二十二夫死以姑老無依誓不再嫁

守節五十八年

王氏紫陽民任兆麟妻年二十四而寡親老子弱矢志靡他守節

二十七年雍正三年旌表

李氏紫陽民武君化妻夫亡事姑育子苦節終身雍正六年旌表

鄭氏漢陰生員藍施妾施夫婦死于賊氏負嫡子立避難險阻備嘗亂定家業蕩盡每緝麻餬口兼勤訓課俾立成名苦守四十餘年邑令旌其門

胡氏廩生陳國典妻汪氏夏之相妻張氏曾述志妻俱漢陰人胡年二十九汪年二十五張年二十八並夫亡守節撫孤終身温氏郭祚遠妻亦夫亡守節終身

孔氏商州人王正妻幼讀孝經小學能通其義未嫁姑歿即不事膏沐不與宴會年十七歸王十九夫死無子女有諷以他適者即不食以明志家貧備歷艱苦或勸就食母家不可其兄誓養以終身遣婢僕相迎氏曰此大歸也必兄至敦請始往教嗣子讀書成立苦節歷三十七年雍正七年旌表

唐氏商州生員牛廷秀妻年二十三夫遠出不歸後姑逼之輒以死自誓苦節歷六十年卒

趙氏商州楊用祈妻年十九夫亡誓以身殉父母密防之得不死矢志守節翁與父憐其年少無子勸改適即入室髡髮以示不二翁感泣爲立姪嗣之歷五十七年卒

周氏商州進士羅立賢妻夙嫻內則歸立賢家徒四壁紡績佐讀兼工蠶天姿穎異氏自喜得所歸登第後一載立賢卒氏日夜涕泣勺水不入口數日淚盡眼枯嗚咽而逝

楊氏鎮安劉瑞徵妻田氏齊垓上妻並年三十而寡矢志撫孤楊歷三十四年齊歷四十五年

何氏雒南生員張足發妻夫死年二十二遺孤甫週翁老姑病氏當矢志不二代夫終養歷寇變田廬蕩然拮据養育年八十二卒強氏雒南生員許鏡妻年二十五夫死矢志撫孤歷兵荒艱苦萬

狀守節三十一年

崔氏維南夏民表妻夫死氏年二十八矢志撫孤翁時仲以明經

司訓吳堡卒于官氏罄貲庀喪事扶襯歸葬事繼姑盡孝備歷

艱苦守節五十年

王氏維南增生劉呈旦妻冀氏張見龍妻夫死撫孤食貧守節並

歷三十餘年卒

焦氏維南張珽妻珽亡氏年二十二事姑育子內外無間言壽七

十二卒初珽父庠生如堪亦早亡母張氏時年三十守節撫孤

歷五十年而終兩世冰操守令咸表其門

董氏維南蘭士興妻年二十一而寡家貧子幼氏苦節撫孤操作

終身年七十餘卒其子孫皆務農敦本克守家風

呂氏維南生員白貽哲妻年十六適貽哲二十九而孀親老子幼

氏仰事俯育孝慈備至歷五十年以壽終

劉氏維南劉燦妻二十三歲而寡矢志殉夫時遺孤方三歲族黨

力止之得不死子既長課子躬耕家稍起及生孫乃課孫讀書

童以紹先業年六十四卒今孫龍有聲諸生間

維南二李氏一生育趙弘正妻一雷起聲妻弘正亡氏年二十二

守節年七十三而終起聲亡氏年二十七守節年六十而終

李氏維南張度妻相夫事姑克盡婦道度卒氏年二十九奉孀姑

撫弱子歷四十四年終

張氏維南何承烈妻承烈亡氏年甫二十七奉姑育子歷十餘年

子長爲娶婦生孫子復歿氏慮婦姚氏有他志泣謂曰我命蹇

故爾汝勿效我所爲姚泣曰姑能守婦獨不能守耶婦姑相依

者復三十七年張氏年七十六而歿

冀氏維南張銘妻趙氏周知妻銘亡冀年二十四知亡趙年二十  
六家貧子幼誓不再適冀年五十八卒趙年五十九卒

石氏維南張靖荆妻年十六歸張事舅姑以孝聞夫病亟氏誓以  
死殉夫囑以養老存幼氏勉從之後三子皆成立季子璽得入  
泮守節三十六年而歿康熙三十年歲荒氏捐粟賑飢里中全  
活者數十家其歿也鄉人多赴哭

邵氏山陽生員羅星燦妻燦少負雋才不售早卒氏年二十餘堅  
志撫孤年七十二卒又州判武震方妾魏氏亦以守節著聞

董氏山陽生員田生芝妻氏年二十夫死於虎子在抱氏覓屍歸  
殮矢志撫孤操作勤苦教子成立守節五十年

單氏同州生員李昌世妻年二十二夫死氏痛哭不食投繯者再  
戚屬諭以存孤大義遂守節終身雍正三年旌表

王氏同州民陳汝極妻汝極死氏年十八無子矢志堅守孝養姑  
璋汝極從兄忠極立極感氏節各嗣以一子共給贍田十畝苦  
節四十年雍正三年旌表

張氏同州民李與塔妻年二十九歲夫死遺二子一女翁姑衰老  
氏身代子職孝養無間會大荒朝夕不給氏鬻次子及女以供  
贍翁姑俱以壽終卒撫長子成立守節三十八年雍正三年旌  
表

姚氏同州民南永福妻歲荒永福闔家就食河南中途永福病故  
抵鄧州永福父亦歿時氏年二十八矢志守節血指織緝以撫  
王遺孤比歲豐率子扶襯旋塋故里里人重之雍正五年旌表

杜氏同州民強有禮妻歲大饑全家避襄陽翁與夫俱客死姑哀  
老子女俱幼氏績維度日暨歲稔先奉姑攜子女以歸復拮据

累年遣子附估客至襄陽扶兩櫬歸墓守節三十七年雍正六年旌表

王氏同州民郝造賢妻年二十四夫歿斷一指以明不二事翁姑視夫在時尤謹子既長家事一切令子與族衆議行嘗語其子曰我婦人何知但無墜先人足矣其識大體多此類雍正九年旌表時年六十九歲

張氏同州儒童王助芳妻生而端重寡言笑父以女孝經授之能識大義既適王生子三月而助芳歿氏甘貧撫孤未幾翁又亡典釵衣以葬姑頸有惡瘡十餘年不愈時口呪之以出其毒鄰里見者皆感動姑歿爲醮錢庀喪葬氏卒年八十七守節六十六年雍正十年旌表

汪氏同州儒童王國正妻國正亡遺腹生一子子幼不能食氏慮不育慟幾絕投繯者三以救免母憐其少寡諷以改適氏截指示之始不復言姑兩目皆失明氏出入維持不少怠守節五十五年雍正十年旌表

孫氏同州民李子燐繼妻年二十七而寡事繼姑至孝撫前室子與塋與圻如已出與圻有過使跪木主前氏涕泣數之不與杖二子皆哭失聲而罷未幾與塋入泮事母尤盡孝又早卒婦張氏年甫二十二慟絕姑諭以存孤大義哀稍止值歲祲以榆麩蕎花自給子芾亦好學既長孝謹有父風娶媳生孫媳復歿芾再娶王氏生二子芾又亡王氏亦矢節不移每三寡三孤悲啼相向里人聞者皆掩泣孫張並雍正十年旌表孫時年八十有四張時年七十有二

李氏同州民王奪標妻年二十六夫亡奉翁姑孝敬彌篤翁姑慮

有他志氏抱三歲子呼天指日以明不二子長遊庠又早歿復撫遺孫成立雍正十年旌表時年七十有一

楊氏同州民王玉秀妻事翁姑以孝聞年二十四夫亡親族欲分育其子女氏矢志不二子幼常啼飢氏多方止之不使翁姑知也持身尤謹親屬宴會皆不與雍正十年旌表時年五十九歲雷氏同州楊奉魁妻生一子一女奉魁遠出惡少李延梅窺氏色突入氏室逼污之氏厲聲叫罵脅以刃罵益力延梅恐事泄遽刃之并殺其子女逸去事發真延梅極典氏旌表

李氏朝邑韓快妻年二十二而寡事病姑敬謹不衰家素貧拮据荼苦持家有則長子宗琰以行義著於鄉次宗玠蜚聲黌序皆母教成之也年七十八而終雍正九年旌表

張氏朝邑王文祥妻氏素賢淑里中狂徒窺氏夫他往潛入氏室

逼污之氏忿激詈罵脅以利刃罵不已斷臂乃絕家人奔救少蘇頃之夫至窮其故斬而不言母至乃泣指強暴狀而卒強暴伏法氏膺旌典

侯氏朝邑永年令王報春繼妻報春居官清白家無餘貲其亡也祀永年名宦氏撫子鵬翼鵬程紡績佐讀備歷艱苦鵬翼登康熙辛酉賢書已卯鵬程復以第一人舉於鄉人謂廉吏宜有後亦孀母苦節之報也

關氏馬毓宗妻蘇氏張頌音妻俱朝邑人夫早亡並寄食於母家甘貧終老闕有子守節五十五年蘇無子守節七十一年

朝邑二張氏一貢生郭藩母一諸生王琛母也二氏並夫死守節事親有禮訓子有成藩母年七十六卒琛母年八十一卒

張氏李含萌妻上官氏楊經妻上官氏趙攀詔妻上官氏樊玉珊



妻俱朝邑人夫亡皆親老子幼仰事俯育辛苦備嘗含萌妻年六十八攀詔妻年九十玉瑚妻年五十八鮪妻年三十八遠終聞者傷之以爲未食其報云

朱氏雷福有妻黃氏孫維乾妻謝氏周士熊妻雷氏賀昌祚妻俱朝邑人夫早亡上事孀姑下撫孤子備歷艱苦孝慈兩盡後朱年七十六謝年七十九雷年八十黃氏獨年登九十邑令陳昌言表其門曰節壽兼隆

侶氏朝邑張辰斗妻趙氏李應春妻夫死無子並撫從子爲後侶守節六十二年趙守節四十餘年

馬氏朝邑樊王佐妻徐氏張經濟妻夫死俱無子誓不再醮馬苦節六十六年徐苦節四十二年

于氏王所進妻劉氏樊中鵬妻都氏仇允忠妻王氏張羅俊妻王氏樊良弼妻王氏吏目黃三省妻俱朝邑人夫死各守遺孤教養備至迄能成立于氏年六十八劉氏年七十都氏年八十七張王氏年六十七樊王氏年七十六黃王氏年八十三人謂天祐全節故咸登上壽也

王氏朝邑生員嚴呈瑞妻員氏生員安濟繼妻任氏楊東昱妻謝氏楊三尚妻夫死俱誓不再適茹荼教子歷久不懈王氏年六十員氏年五十五任氏年六十餘其子皆諸生謝氏年八十六其孫有遊庠者

張氏朝邑生員何之英妻年二十七夫死截髮納棺矢志撫孤寇至掣其耳取環以去氏即截耳以示不污子亡又育孫成立年七十七卒

田氏朝邑吳興讓妻年十九夫死子加祉甫週氏奉姑撫子黽勉

田勞苦未幾加祉天氏子然孤嫠朝夕不給從子加福迎養之苦節歷四十餘年

田氏朝邑王大猷妻夫死氏年二十有二家貧無子翁姑欲令改適氏以死自誓卒撫嗣子成立姑病拮据奉養孝敬不衰守節歷三十餘年

雷氏朝邑王慎獵妻年二十二慎獵死無子矢志守節夫弟慎餘年八歲氏善視之以妹妻慎餘生子門臻未幾慎餘又死妹年五二十八二寡同撫一孤暨成立娶婦郭氏門臻復天郭年二十四依二姑爲生節孝並著雷氏年各八十餘卒郭壽亦至八十王氏朝邑生員麻出群妻夫亡時子淳然甫六歲氏守節撫孤歷三十餘年淳然娶婦井氏生子直甫四歲淳然早卒井事姑教子更歷兵荒年七十三卒時稱一門雙節直妻王氏亦守節苦志終身

樊氏朝邑生員張璠妻年十七夫亡無子父母憐其少欲令改適氏微聞此議痛哭不食嘔血而死

薛氏朝邑孫崇朴妻夫病革語氏曰我死汝嫁乎氏泣對曰存以代君養不得已以死繼之夫死家利富人重幣使強載去時夜已半氏守燈厲罵不絕達旦得脫歸飲藥死

秦氏邵陽黨克儉妻年十七克儉死子未及週氏撫棺慟絕誓以身殉翁姑力勸意稍解甘貧茹苦撫子成立守節四十年雍正六年旌表

党氏邵陽雷爾預妻年二十三爾預歿或言再醮氏截左耳以誓事類親撫弱息孝慈兼盡守節六十餘年

張氏邵陽雷延壽妻年二十而寡延壽祖母劉以節著氏孝親鞠

子志操冰霜人謂克嗣徽音守節三十六年

甯氏邵陽雷曉妻年二十一夫死家貧舅姑尚在殯夫兄嫂復相繼去世氏拮据經營善撫猶子祀事不墜守節四十年

烈女姓王氏字玉父圖南邵陽世族字韓城張氏會盜起梁山北家人聞盜至咸出走玉告其母曰兒處子也何之必死之言未既盜牽之去玉給盜曰汝已破吾家吾焉往盍少寬乎守者稍懈乃乘間走道旁溺井死賊退家人求之有同繫女婦指示井中始出尸歸殯時順治五年冬也

王氏邵陽李覺世妻覺世母老家貧遠館洛川氏紡績養姑甘旨無缺雍正元年夏覺世適館涉溪暴漲竟溺死婦聞之慟絕姑力救始甦及櫬歸氏爲營壙葬畢入室自縊家人啟視顏色如生氏無子卒年二十有五

王氏史節妻師氏趙于壻妻薛氏強不息妻俱韓城人年各不滿二十夫死守節終身康熙初旌表

薛氏韓城儒童陳其誠妻其誠病革泣曰我死誰與我育子女者氏剪髮一股示之以明不二夫歿氏年二十八事姑盡孝姑病疫幾危或勸氏少遠之氏不聽朝夕扶持目盡腫且流血姑忽見之大驚一汗而病痊家素貧日事縫紉以資朝夕撫遺孤學業有成蜚聲庠序守節歷四十二年雍正九年旌表

范氏韓城儒童劉翕順妻翕順家貧父母皆年登耄耄氏飭治中饋條理井井舅姑喜曰吾自今可無虞凍餒矣未幾舅姑亡夫亦繼逝氏拮据經營喪葬成禮教子慈嚴兼盡雍正十年旌表  
時年六十有三

薛氏韓城諸生王秉乾妻解氏劉廷仕妻夫死即遭寇變顛沛備

經薛時年二十有二解年未二十皆無子薛立嗣子爲後歷三十七年解依母家以居歷四十年卒

姚氏韓城劉學龍妻年二十二夫死三子俱幼翁衰老繼姑性難事氏矢志守節備歷艱苦常竟日枵腹飲泣不言教子務農經商家漸康遇戚屬貧者恒周之曰我從貧中來深知其難也歷六十六年諸孫繞膝有遊庠者人皆謂氏苦節之報

祁氏韓城陳振興妻振興死氏年二十有六戚屬慮不能守將分育其子女氏矢志不二姑在堂孝養無缺姑歿喪葬盡禮嚴課二子俱得成立苦節歷三十八年

張氏韓城生員薛隆世妻隆世病七載日侍湯藥不一假他人手病劇語氏曰汝無出吾死可他適氏以死自誓及卒有微勸之者厲聲拒絕幾自刎撫前妻子如已出比長而歿氏痛不欲生慮無後立嗣孫撫之苦節四十二年

楊氏韓城陳朝瑛妻夫病篤囑氏曰我病不起若能終撫吾兒乎氏泣以立孤自誓既歿氏時年十九家赤貧事翁姑甘旨無缺自咽糠粃弗使知也子既長入泮有聲未幾歿苦節四十二年孫氏韓城師正學妻年二十九夫死子十齡或勸氏改適代養其子氏叱之曰稍待六七年子漸長可自謀生理矣奈何背夫舍子去乎未幾子亦死一慟輒絕聞者淚下所居屋兩間歲久圯壞風雨無障氏鍵戶獨處早夜紡績自給或病不能織寧枵腹不乞憐於人苦節歷五十三年

雷氏解登位妻薛氏劉述古妻趙氏李夢春妻吳氏秦文煒妻俱韓城人夫死咸立志撫孤薛吳尤家貧備歷諸艱雷卒時年八十二薛年七十李年九十三吳年亦八十二

薛氏韓城生員衛士竑繼妻年十八夫死撫前室子及嗣孫備極艱苦守節歷六十五年卒

強氏張文輓妻薛氏輓弟文輅妻韓城人並二十四而寡相依守志俱壽至八十二而卒人稱一門雙節

孫氏生員薛丕妻劉氏生員吳無隱妻梁氏生員程謙光妻皆韓城人孫年三十而寡守節五十三年劉年二十八而寡守節二十二年梁年十六而寡守節五十五年

史氏韓城諸生衛廣生妻廣生死氏年十六翁姑憐其少勸令改適氏涕泣不食曰身可死節不可易翁爲立嗣氏撫之成立年五十四卒

丁氏韓城史序官繼妻賈氏史可誌妻二史亡丁年甫十七賈年二十親老子幼一室凄然二氏養親育子備歷辛勤丁守節歷四十餘年賈守節歷五十餘年

解氏韓城儒士薛印淑妻幼有令質能讀孝經論語年十六夫死子生甫三月矢志守節事親撫子歷七十五年卒

郭氏韓城生員衛執瑞妻李氏生員衛執奎妻郭年十七而寡李年十八而寡皆無子李撫從子爲嗣矢志守節郭歷五十四年終李歷五十八年終

高氏解自性妻程氏晉星妻並韓城人高年十七而寡年七十八卒程年十八而寡年八十卒

張氏韓城吳之音妾年十九之音夫婦俱卒撫嫡子及孫曾劬勞三世年八十卒

孫氏韓城諸生劉昌引妻夫死氏年十九矢志撫孤翁性嚴諸叔橫逆時至氏隱忍守節年九十卒

衛氏韓城儒士薛生德妻年十九夫死子英甫二歲叔生周亦幼釋家赤貧值大飢氏辛苦支持事姑盡孝課叔與子讀書比長皆入泮里人賢之氏竟以勞瘁得疾年未四十而卒

薛氏韓城程殷輅妻夫垂死以親老子幼爲託氏年二十四矢志守節事姑撫子歷五十三年卒

晉氏韓城生員薛自通妻夫死氏年二十守節撫孤順治六年寇至子從之未得死所至柳枝村給子他去投崖死

薛氏韓城閻邦計繼妻夫死氏無出撫前妻子長既娶子婦俱夭復撫孫成立順治七年寇至被掠罵不絕口遇害

王氏韓城衛士望妻夫亡氏年二十餘有一子一女氏不顧哭泣數十晝夜絕粒而死

吳氏韓城儒士張雲樞妻史氏王國彥妻夫死誓以身殉營墓畢遂不食死

解氏韓城中書舍人廉楨女許字同里閻衍緒未嫁而衍緒卒女聞之日夕掩泣一日就閻中沐浴更新衣將死母疑之詭曰兒

無他遂密防之得間登樓俯檻望閻氏廬默祝曰魂兮來忽痛哭委頓于地家人扶就榻遂不食以死死之日欲言旋止唯淚

涔涔下父母哀其志合葬閻氏焉

程氏韓城人字孫紹曾未嫁紹曾卒女欲臨其喪父母不許時掩泣有議婚者女聞之痛哭乘間自經死

馬氏生員楊中涵妻雷氏生員楊中漢妻華陰人中涵歿馬氏年二十四家貧無子矢志守節父迎之歸曰我楊氏婦也有姑在

我去孰與妣並事吾姑中漢歿雷氏年十七亦無子或勸之嫁泣曰姆爲伯守我獨何往值逆聞之變姑憂怖幾死二婦奉姑

避山中孝養備至姑歿竭力庀喪營葬雷更事馬如姑並守節終身康熙二十六年旌表

郭氏蒲城生員王凝圖妻夫卒氏年二十長子元芳甫四歲又遺腹生次子聯芳氏以養老撫孤爲己任元芳後讀書成立值闖逆入關元芳負母避山中遂偕隱焉苦節四十餘年卒康熙三十九年旌表

曹氏蒲城劉士瑜妻年二十一夫死父母憐其少寡微言守節之難氏大慟而返不歸寧者數載戚族有言再醮者即絕之事姑至孝姑病十餘年日侍床簀頃刻不離初抱姪爲嗣九歲而殤氏一慟輒仆夫兄仍以次子彤嗣之教育備至苦節三十四年康熙五十四年旌表

劉氏蒲城仵允藩妻允藩死氏年二十有二翁姑老病氏克盡孝養及卒喪葬盡禮撫遺孤恩義兼至克底成立康熙五十四年旌表

李氏蒲城生員王楠齡妻年二十一夫死投繯者再舅姑密防之得不死終身不事膏沐足不踰閫事父母翁姑咸盡孝初撫族姪爲子而殤痛哭不欲生又撫嫡姪承嗣盡醫醫理供乳哺嘗午夜紡績伴子讀書卒至成立雍正四年旌表

米氏蒲城劉漢興妻年二十而寡誓以死殉戚屬勸以養親存孤大義即矢志守節事舅姑倍篤日夜爲舅姑祈壽後並享大年人以爲誠孝所感舅姑歿甯衣以葬盡哀盡禮里黨重其節孝欲白于有司却不受曰是爲名也非吾本志苦節歷二十六年卒

梁氏蒲城權丕昌妻年十五歸于權事翁姑以孝聞年二十二夫

死投縊者再姑密防之得不死遺腹生子即以立孤自任仰事俯育悉取給於十指卒撫子女成立苦節二十六年卒

雷氏蒲城原潛長妻年二十夫亡自經數次賴妯娌密防得不死事翁至孝甘旨無缺課二子讀書不少怠二子俱入庠苦節歷四十三年卒

張氏蒲城屈宁妻年十八喪夫無子欲絕粒死以舅姑哀邁苦守侍養既歿殯塋備禮撫姪爲後教育成名守節二十四年卒

原氏蒲城校演武妻年二十二演武死所遺田舍伯盡奪而有之或勸與較氏曰伯夫手足也傷夫手足何以見夫地下乎子弱家貧終身不易守節五十二年

張氏蒲城王來賓妻年十七來賓經商卒于滇訃至氏誓不欲生翁姑勸止苦節六十七年卒

常氏蒲城原于素妻年十九于素卒家人憐其少令改適氏忿然曰吾之不速死者圖爲夫撫嗣子也於是撫于素兄子維爲嗣中康熙戊子副榜守節四十一年卒

徐氏蒲城庠生劉克忠妻年十九克忠死氏奉翁姑撫二子守節三十二年卒

吳氏蒲城陳采之妻年十四夫死撫姪韓學爲嗣守節三十四年卒

趙氏蒲城車國祥妻年二十二夫亡矢志守節父母憐其少寡值歸寧以微言動之即大慟而返清操益勵時翁年八旬病羸者十餘年三子皆襁褓氏早夜縫紉以資養育卒年七十九歲

劉氏中部人蒲城生員王秉乾妻年十八秉乾亡遺腹生一子三歲殤有女亦相繼歿氏孝事孀姑甘貧守節年五十八卒



張氏蒲城楊圻妻圻卒氏年二十七欲以死殉念子女無依乃勉為存孤計初氏有奩資雖經喪葬猶可自存值祭日氏携子女赴墓所偷兒乘間行竊比歸則囊篋蕭然矣氏執紼無告乃依母家僦舍而居勤儉課子卒底成立年七十卒

劉氏蒲城生員張所懷繼妻年二十二夫亡無子氏慟絕翁姑諭之曰吾子不幸汝能從死固善其如吾二老何氏感悟曲意承顏每獨處雪涕不令二老知也未幾翁歿事姑又三十餘年喪葬無缺歲辛未大飢氏以甘脆奉老姑次飽嗣子恒枵腹終日卒時年六十二

武氏蒲城周文興妻東妹即文興妹也文興居邑東南之安豐村順治初流孽未靖氏與東妹同在田刈獲賊突至覩氏少艾挾之去氏大罵不從賊殺之復逼東妹亦不從復殺之未及葬會

文興亦死于兵有鄰人武姓者以土掩之亂定其事亦不彰康熙五十三年居人築墻掘土得二屍顏如生衣履儼然眾異之武姓者時年已八十餘憶其事備言本末二氏之烈乃著村人王孝廉廷瑗為其棺改瘞并勒石誌之

常氏蒲城米正頤妻吏部郎中澄之女順治六年賊黨據蒲正頤被殺氏覓屍歸殯忽一日几上設七第各二吉服臨奠家人疑之至晚自縊死

屈氏蒲城進士穎藻女適儒生賀慎慎死年二十有二服闋自縊死

郭氏蒲城孫述妻康熙壬申關中大飢貧家婦子多相鬻以食述語妻曰吾義不賣汝汝可改適以圖活未幾述竟死氏亦自縊

周氏潼關民畢懋篤妻年二十九夫亡遺三子俱幼氏守節撫孤家貧以縫紉餬口戚族欲奪其志氏剪髮自誓值明季兵燹攜孤匿山谷間備嘗艱苦三子俱得成立康熙十六年旌表

劉氏潼關民郭宗儒繼妻事姑盡孝姑常語人曰此吾家孝婦也無何姑歿夫繼歿前室柩尚未殯氏拮据襄事三喪畢舉撫前室子鞠育備至當歲歎以餅餌飼其子而已及所生二女常咽糠粃曰此郭氏家祧所係脫不虞無以見吾夫地下也二女亦明大義俱少寡不再適有母風雍正十年旌表時年五十有七守節歷三十四年

成氏耀州民劉月桂妻年二十七而寡遺腹生子敷榮氏教子讀書以母兼父敷榮以康熙甲午舉於鄉氏守節四十餘年雍正四年旌表

閻氏周氏耀州右都御史王國妾國卒時兩氏俱年二十無子或勸更嫁並叱之曰主人立節朝端吾二人不可留名彤管乎相與苦守終身俱八十餘歲卒

王氏耀州生員宋金臺妻性至孝少時侍父疾祈以身代歸金臺值家門鼎盛氏以勤儉自持常竟夕紡績以伴金臺夜讀及金臺死於賊氏勵志守節歷三十四年卒卒之日猶諭其子若孫曰勿忘先志

岳氏耀州監生左士元妻嫁甫四月士元死寇難氏初志誓必死因身有遺孕既而幡然曰舅姑無他子夫死左氏再世止此一線矣吾姑待之後果生子驂氏恩勤教育驂得列名膠庠享年七十有七卒

文氏耀州民胡平六妻年十八夫故事姑養孤誓不他適族人

幼女失母者姑見之指謂氏曰吾孫無父此女無母其痛一也  
氏欣然乞養之如已出姑大慰姑既歿携子居父家事父一如  
事姑時幼弟婚娶皆倚辦歷三十年而卒

秦氏耀州民左于聖妻年十七歸左事姑盡孝于聖卒於蜀姑哭  
泣不止氏日引二幼子戲於前姑每破涕爲笑自是寢食動息  
倚姑爲命姑歿氏年已三十八以積哀成疾既革呼二子謂曰  
汝父死而我不死以汝祖母在也今死矣汝父尚寄骨他鄉汝  
兄弟能歸之吾目瞑矣言終而逝

王氏同官生員習完初妻年二十五夫亡遺三女皆幼氏矢志守  
節明季寇禍鄉人皆出走氏泣曰吾未亡人將何之遂自經恍  
惚間有神救之因縲絕而蘇復不食閱十一日不死會寇退乃  
復食衆異之順治十三年旌表年八十而歿

党氏同官習世科妻夫病禱於神割股以進夜夢神語曰汝夫命  
當死憐汝志增筭三旬夢醒夫果愈一月復病遂不起氏自毀  
其面以矢志後遭寇變兼值歲荒日課兩子讀書啖糲糶無二  
志歷四十餘年卒

宋氏同官廩生馮賓明妻年二十七賓明死二孤俱成立有名譽  
舍守節三十八年卒

侯氏同官廩生習佩珂妻年二十一夫亡無子屢欲自盡長姒許  
氏哀之以次子湛爲氏子及長入泮有文名甫娶婦又歿婦劉  
氏年二十三亦無子時佩珂伯仲皆再世單丁乃撫外孫溫姓  
者爲孫以繼湛後兩寡相依一門完節侯歷五十二年卒年七  
十三劉歷三十二年現年五十五

劉氏白水農家女適張順順亦業農氏刈豆田間兩小姑春兒八

兒偕往有惡少高姓者突至語挑之氏正色以拒高以刃脅之氏大罵遂被殺春兒八兒號救並遇害事

聞捕高寘法旌其門

吳氏生員張庚妻王氏生員宋陶激妻韓氏胡尚盈妻董氏劉禹統妻並乾州人夫死奉姑育子不以艱辛易慮吳得年七十七王得年七十餘韓得年五十六董得年五十餘

樊氏乾州生員何麟瑞妻年二十六夫死兩值年荒氏機杼資生事翁教子鄉黨賢之守節四十餘年

殷氏乾州周成德妻適周甫年餘而寡年二十二家貧甚氏勤杼軸以奉舅姑育孤子守節五十餘年

楊氏乾州廩生趙煇妻竇氏袁大經妻俱夫亡不嫁事舅姑克盡婦道楊守節三十二年卒竇守節五十餘年卒

張氏乾州生員董煥妻年二十四夫死誓同穴痛夫無子恩勤撫姪以苦節終身

董氏乾州生員邢瑄妻周氏李友伯妻並年二十三而寡初誓死以殉因翁老子幼勵志守節辛苦終身董歷三十七年周歷五十五年

龍氏乾州劉繼法妻年二十九夫亡事舅姑盡孝家貧乏食氏辟糲易粟養老育孤鄉黨賢之守節五十餘年

王氏乾州王紹周妻夫亡年二十二撫孤成立孤又歿氏又撫孫以延夫祀苦節四十餘年

師氏乾州韓天錫妻年二十三夫死敬事舅姑家貧旦暮紡績易芻薪米供膳守節三十餘年

張氏乾州馬賢妻夫病禱於天願以身代夫亡慟幾絕憐子幼無

依乃忍死苦節撫孤歷四十五年

號氏乾州唐振聲妻年十八振聲歿翁姑病祝天請禱寢食俱廢家貧課子以女紅資其膏火守節四十年

黎氏乾州監生王賓賢妻張氏侯勳妻並年十八而寡事舅姑以孝撫孤子以慈黎守節五十三年張守節三十年

彭氏乾州宋志禮妻年十七甫孕而寡暨生子鞠育成立苦節四十餘年

陳氏趙照妻唐氏史大儒妻祝氏劉增妻王氏王錦妻俱乾州人夫死親老子幼家計維艱諸婦一身擔荷孝慈克盡陳唐苦節並三十餘年祝苦節三十八年王苦節五十餘年

韓氏乾州王鉉妻年二十一夫歿依夫伯父母以居事之如舅姑人稱其孝立孤守節四十餘年

趙氏乾州貢生宋樸繼妻年二十三樸亡待前子焜如已出焜死婦張氏年十九遺孫志琪姑媳辛勤教育早歲入泮趙守節四十七年卒張守節四十五年卒

馬氏乾州上官銘妻銘兄弟同居銘死氏分爨攜孤子獨處雖寒飢無怨言苦節四十八年

號氏乾州田純儒妻甯氏王壽妻純儒壽皆諸生蚤亡遺子俱幼二氏誓死守節姑病各割股煮藥以進田子業儒王子業農咸得成立人謂慈孝兼盡甯五十九卒號四十餘年卒

袁氏乾州貢生殷銓繼妻夫亡截髮明志誓死不二子天撫嗣孫成立艱辛備歷守節五十餘年

嚴氏乾州雲浩然妻年二十四夫染疫氏禱於神願以身代夫歿孝事孀姑教子入泮守節三十三年

師氏乾州生員殷必掄妻年二十八夫亡兩子俱幼氏撫育成立  
事姑篤孝姑死且暮哭兩目失明年至七十餘卒

李氏乾州生員陳而經妻年二十二甫孕而寡暨生男氏攜持事  
姑孝慈兼盡守節四十八年

殷氏乾州崔易妻年二十一夫病篤囑其事親撫孤氏泣而頷之  
夫死茹荼飲藥卒成夫志苦守四十餘年

殷氏乾州生員黎衛妻夫病篤先投繯死  
李氏乾州廖揚光妻年二十七夫歿不食死

吳氏乾州殷之才妻歸三載之才客死氏設位舉哀親朋奠弔畢  
乃整衣自經從容以殉

劉氏武功生員馬頴姿妻頴姿隨叔璵宦永嘉兵變死節氏聞訃  
慟絕撫姪爲嗣以延其祀守節歷四十三年卒雍正六年旌表

李氏武功甯從直妻二十四歲而寡撫子仿成立仿妻薛氏二十  
七歲而寡侍姑苦守子銓後得入泮李七十四歲卒薛五十九

歲卒

楊氏武功李尚林妻年二十三尚林死立孤守節六十八年劉氏  
尚林子灝妻年二十六灝死立孤守節三十五年

魏氏武功民馬瑜妻吳逆之變瑜運餉不歸時氏年十九貧而無  
倚一子甫三歲或勸改嫁氏抱子泣曰吾去將焉置此况吾夫

或猶在乎朝夕紡績數十年無他志後子以病廢婦又死撫孫  
完節而歿年七十五

郭氏武功張錫履妻年二十三夫亡翁老子幼小叔小姑皆未長  
氏一身擔荷矢死靡他翁歿竭力營葬叔入泮姑遣嫁皆氏力

也未幾子病死益勵志守節歷四十七年卒

耿氏武功生員康呂師妻閔氏康呂夢妻耿年二十四而寡撫從子爲嗣苦節三十九年閔年十八而寡撫遺腹子得成立苦節五十四年

李氏武功童生吳耆妻年十九生一子而寡族惡逼其改嫁氏斷五指以明不二復以舅姑俱歿無可自存抱遺孤寄母家守節五十一年

張氏武功党可法妻年二十四而寡八十二而卒五十餘年中事衰姑撫弱息堅心苦操爲巾幗完人至今孫曾玉立蠻舍有名康氏武功李某妻康熙壬申歲飢且大疫夫病故遺子女各一家赤貧姑殯亦在堂氏晨昏兩泣日營葬事閱數載始就緒葬日值雨氏衰服扶輿行泥中至塋匍匐家間所需悉手具女長甫嫁而歿一子婚生孫矣其媳又歿氏備歷諸艱卒無易志素精

女紅善指授德言尤擅美族姪某聘婦年甚稚失怙恃氏携歸育之迨長遂成佳婦甥趙某婦不令延於家從氏起居者久之卒改而去洵近世女師也氏年二十六而寡卒時年六十一楊氏武功楊志秀女年十四順治八年土賊破其堡女被掠至渭水湄欲污之女大罵賊怒以刀斫其面兩目俱墮遂死

侯氏武功生員馬璟妻璟病將不起氏誓以身殉遂先璟自縊死馬氏武功民張居仁妻年二十五生一子一女而寡前妻子節稍長性至孝氏與力耕餬口貧無廬舍栖止土室中苦守者十三年一日突有惡少勸改嫁氏叱之去越數日竟糾夥夜至欲擄爲婦氏閉戶厲罵賊劫門入節揮刃峻拒賊怒舉火焚室地無援者遂闔家死死後出屍節猶手持弟若妹而全身護氏氏則髮雖焦面目如生此康熙十八年事也

王氏武功民馬鐸妻年十八于歸生二女而夫夭誓不再適以從子爲嗣舅姑憐其少欲嫁之氏婉辭以謝一日歸寧及返室盡失其囊中裝氏默知此舅姑計也即夕自縊死既覺姑視之衣裾斬然淚痕欲濕因撫尸而哭之極哀時年二十有四

姚氏淳化陳其元妻生三女夫亡年二十餘資產悉讓夫異母弟茹荼飲水甘貧守志女長皆遣嫁遭寇掠乘間即拔賊刀自刎血湧仆地賊驚逸越宿得甦全節終身年七十餘卒

郭氏淳化王平妻順治甲申冬土寇王老虎破縣平隨衆守陴氏聞賊至即抱幼子投井中平歸營救俱得不死未幾平被賊傷病創卒氏撫諸孤守節三十餘年恒苦貧不自給夫從弟興夫婦時爲解推鄉黨義之

葛氏淳化高某妻年二十一某歿子兆祥甫歲餘氏誓無二志奉

孀姑居高家山賊至氏逃匿谷中賊搜獲之遂墮崖賊疑已死置之去越三日家人得其屍有微息因救稍甦問姑無恙乃歸竭力奉養長齋持佛五十餘年一夕虎窺牖氏悞爲耕犢以手驅之虎伏而遁里有龍王廟歲旱里民禱弗應沈氏往禱輒大雨其節孝感格如此年八十七卒兆祥亦以孝聞

張氏王氏羅氏王氏淳化所稱三世五節也張氏生員賈思達妻年三十夫亡守節長子獻庭康熙十三年由舉人授蒼溪知縣因吳逆之變路梗病卒妻五年二十九次子佑庭歿妻王年二十五三子佐庭歿妻羅年三十二獻庭子又誼歿妻王年二十三先後守節出自一門鄉里稱重

王氏淳化羅養正母夫亡撫二子守志不移後養正與其弟相繼歿又撫二孫歷盡劬勞邑令張綸立坊以表曰節久彌貞月給



倉米二斗卒年九十一  
薛氏淳化生員羅維垣妻年二十四維垣卒家貧苦守教子銘鑑  
讀書髫年入泮復早夭婦王氏奉姑育孤雯瀚雯浩亦列黌序  
久謂世節之報

羅氏名寶芳淳化生員羅襄袞女嫁三原房大猷順治二年淳邑  
兵燹爲亂氏聞兵至墮樓死氏有從姊雁珠明末死於賊氏母  
揚方娠夢奉天寶烈女偕雁珠來而生氏因爲命名奉天寶氏  
二烈女係唐永泰中人氏與雁珠相距十七年俱以正月十五  
日死死時年俱十八後先爭烈事出一轍且兆于生初事爲尤  
異云

杜氏田氏淑明淑儀優姐淳化五烈也杜適生員羅章袞章袞歿  
杜矢志靡他順治三年土寇破淳化杜指牆間井語養女淑明  
淑儀曰此井吾死所也投井死二女相對哭哭畢亦次第投井  
死田氏章袞姪群聘妻群聘天田守節與杜連牆居聞變顧其  
女優姐曰我與若爲賊辱母寧死遂與優姐投杜所死井俱死  
之寇去五屍出井上見者皆泣下邑令朱廷鉉題其門曰一門  
五烈又前令趙賓爲傳合雁珠寶芳曰七烈淑明淑儀失其姓  
優姐死時年纔十四

尚氏長武焦之勸妻年十七而寡矢志守節事親教子始終無間  
年四十三卒雍正九年旌表

魚氏長武生員王培元妻年二十夫亡事親至孝婦職無虧子懿  
入泮成名家聲復振年六十四卒雍正九年旌表

郭氏長武生員尚班妻夫歿無子夫弟璉方二歲氏撫之恩義兼  
盡延師授室迄能有成雍正九年旌表守節四十年

李氏長武尚簡臣母少寡守節育子有成年八十餘卒

高氏鄜州武生齊七政妻年十九七政故哀毀骨立傷舅姑老年喪子曲意承順遺孤方週歲家貧拮据教養子得入泮雍正六年旌表

霍氏鄜州生員羅海瀚妻年二十海瀚歿家甚貧兩孤幼弱人勸之嫁氏誓死不二姑老病不能行氏負之出入二十餘年如一日撫前妻子標與已子棟無岐視拮据延師皆得成就雍正六年旌表

左氏鄜州營兵許晉妻康熙十四年晉南征陣歿三子方幼翁姑皆年邁氏養育無遺憾年六十一而終雍正九年旌表

張氏鄜州史彩妻年十八孀居家貧姑病氏紡績易粟養姑鄰里稱之子二人長載義娶婦旋歿無何婦亦歿氏慟絕復甦念次子載法尚幼力加防護以延宗祀雍正九年旌表年五十八歲王氏鄜州民曹汝爲妻夫亡後翁姑年邁氏誓死守節翁終年八十九姑終年七十七氏竭力營葬咸稱有禮二子皆業農諸孫讀書雍正九年旌表年六十有三

李氏洛川生員屈攀鳳妻善事舅姑年十九孀居子翼廷方三歲矢志守節五十年如一日姪翊廷幼孤鞠育無異已出後翼廷登丙子鄉薦翊廷亦早歲入泮康熙五十五年旌表

郝氏洛川貢生劉夢筆妻夢筆亡守節撫孤子銓成進士孫生韻舉孝廉孀居二十餘年卒

李氏中部生員劉蔚泰妻年十六蔚泰故屢欲自盡既而悟曰我死誰與養吾親撫吾子是吾夫罪人也乃強起父母憐其少寡欲奪而嫁之氏不歸寧者數載姑衰老日扶持不去側子能言

即口授孝經語孟祁寒盛暑紡績課讀不輟苦節三十八年卒  
雍正六年旌表子愷亦以孝聞

張氏中部贈僉事劉禔妻楊氏貢生劉禔妻寇氏生員劉禔妻皆  
妯娒也禔任河南登封令李自成之亂殉難後禔與禔相繼亦  
歿張時年二十八楊二十一寇十九各撫幼子成立守志終身  
人稱一門三節先是祖姑王氏年老飲食罕御三氏爭乳以頤  
養之禔子克訃亦娶寇氏訃早亡氏事孀姑始終不懈撫育四  
子後皆入泮氏年五十卒

楊氏中部民張崇德妻幼識大義閨範嚴肅年二十崇德亡氏撫  
孤守節至四十八歲卒

張氏中部生員葛天裔妻年十八天裔故氏甘貧守節或諷之改  
適氏曰葛氏中部名族我何忍汚先人名節耶教子綺入庠守

節二十一年而終天培天裔從兄弟也天培歿妻曹氏年二十  
九甘貧守節姑目盲事之極誠敬壽八十有四

馮氏中部生員艾若菴母若菴生甫期父病革呼姪某以若菴囑  
之氏泣問夫哽咽不語氏慟曰豈謂吾不能撫孤耶金可鑠志  
不可奪夫歿氏方二十五歲苦節撫孤教之成立年五十卒

郭氏中部民劉範妻年二十五範故氏親傷成疾半年不能起  
日忽奮然曰家貧子弱而未亡人日夜泣哭是棄孺子不育吾  
夫目不瞑也乃躬自織紡晝夜操作不休年四十七卒

王氏中部生員劉燦妻年二十三燦亡家無立錫惟一孀姑一弱  
息以紡績自資值歲歉艱辛萬狀苦節五十年卒

任氏鄜州人中部生員劉篤妻年十九篤亡勺水不入口者數日  
幾斃矣祖姑勸之曰遺孤方穠祿奈何不爲嗣續計乃稍稍飲

食撫子成立年八十二卒

葛氏中部民梁文遠妻李氏侯世昌妻俱夫亡守節矢志撫孤葛年五十九卒李年五十八卒

劉氏中部生員蘭清妻年二十清亡無子氏誓以死守父母欲奪其志氏曰吾撫孤女成立當從夫地下矣清兄蘭渤因以冢子嗣之守節三十年卒

張氏中部民張大鵬母年十九夫亡守節六十七年又李育母逸其姓年十八守節卒年八十

雷氏中部生員張永濟妻年二十二永濟亡家道蕭條氏勤紡績課子讀書守節四十餘年口不見齒足不踰閭子鳳雛以孝聞蘭氏中部民雷沛田妻年二十四沛田亡氏紡績課子寒暑不輟

蘭氏中部民馬雋妻年二十二雋亡遺子中驛甫二歲延師課讀少年食餼氏守節五十五年卒

張氏中部民梁本素妻年二十四本素亡氏甘貧守志撫育幼子成立性勤儉壽登古稀猶率子媳織紡不輟年七十二卒

劉氏中部生員牛秉乾妻夫亡氏年未及三十諸子俱幼遶膝而哭比舍爲之流涕初秉乾事父甚孝又嘗以粟賑飢氏曰有陰德者後必昌當在吾子守節三十年諸子皆入學有聲

蔡氏中部生員劉治妻年十九治故氏撫孤守志五十年卒初氏年十五于歸執婦道能先意承志夫歿戒諸子事祖父母出入扶持無頃刻離待姊妹及僕婢有禮有恩既歿十餘年家人言及輒涕泗不能置

黃氏中部生員王者遵妻年十五歸于遵孝事舅姑夫亡氏方二

十四歲父母欲奪其志氏曰家世詩禮夙聞從一之訓有死無二撫子熹成乙亥貢士年五十六卒

柳氏中部貢生劉種妻賢而無子勸夫置妾延祀妾生子愛若己出年三十八種亡撫孤守節年七十七卒

李氏中部民王言綸妻年二十三言綸亡甘貧守節撫育二子成立歲大飢藜藿不充冰操愈厲家媳早死遺孫方數月氏常抱之乞乳見者墮淚年七十九卒

韓氏中部民張瑗妻王氏牛漢彬妻瑗亡韓年十八漢彬亡王年二十一各遺腹生一男一氏撫孤守節並年五十一而終

宋氏安塞人中部拔貢劉爾甲繼妻年二十五爾甲亡撫前妻子成立壽過古稀

劉氏中部生員蘭馥暢妻馥暢病氏不解衣者二年及疾董囑氏曰孳孳弱孤善爲我撫之氏泣曰諾既歿督耕課讀終身不懈

二子俱成立初夫歿氏方二十三歲苦節二十年卒

陳氏中部民劉崑妻年十八崑故守節至八十歲卒崑曾祖母忽氏故明已旌節婦也氏可謂嗣徽矣

徐氏中部前鄒縣縣丞蘭如簡繼妻孝事老姑問寢視膳不懈姑疾湯藥必親嘗年二十四如簡故躬紡績撫孤視前子如己出家教謹嚴婦劉氏亦以孝謹稱徐年八十而歿劉以毀卒

溫氏中部生員張可畏妻年二十六可畏亡子幼家貧矢志不渝年七十六歲卒

郭氏中部民牛大年妻年二十夫亡子方週氏殷勤撫育娶媳生孫無何子復早世媳他適氏零丁孤苦撫其幼孫成立年七十

五卒

李氏中部民蘭之香妻年二十三香故子幼家貧姻姪來弔者言曰將何恃以自立氏曰我子母相依爲命忍絕其乳又別事人乎若餓而死不失爲蘭氏鬼晝夜紡績不輟守節四十一年卒

楊氏中部民張毓妻年二十九毓亡甘貧守志之死靡他守節至七十一歲

柳氏中部民劉芳聲妻年十九芳聲亡其母欲令他適氏慟哭曰女不二夫素聞此義况舅姑老子幼將安託耶守節三十五年

馬氏中部民張名舉妻年二十名舉亡二子皆幼或以媒妁來輒詬詈之義形於色守節二十年卒

楊氏中部民張經治妻年二十一夫亡家赤貧爨火或不繼氏負子拾薪見者墮淚紡績織絰無分宵晝老姑甘旨必潔必精苦節五十六年卒

中部二劉氏一冠曇妻一冠暹妻並庠生克訖女也曇亡氏年十九暹亡氏年二十五曇妻守節三十七年暹妻守節四十二年

李氏中部民楊維世妻年十八夫亡氏養親撫孤備嘗艱苦姑亡乞貸以殯年五十七卒

屈氏中部廩生孫開先妻年二十一夫亡數日不食人以親老子幼勸乃復食仍毀容見志舅姑病侍奉罔懈孤稍長篝燈課讀二子俱成立守節至七十三歲卒

張氏中部生員梁國傑妻國傑以小忿爲人所害氏仰天慟哭誓報夫仇罄所藏付伯兄爲資斧以訟夫寃獄成將葬氏慟哭而死時年二十歲

薛氏中部民雷物正妻雷客死於外氏聞訃大慟絕粒而死時年二十歲

屈氏中部生員王者謀妻王病篤氏誓以死殉及卒家人嚴防之  
氏乘間投井死時年十六歲

任氏中部縣民劉誕妻節婦任氏之曾孫婦也年十八夫亡欲  
以身殉念有遺腹未即死默祝曰所生男則曾祖姑之操可繼  
不幸而女當從夫地下耳及生女竟自縊

樊氏宜君生員蔡蕃妻李氏生員樊甸妻並夫亡守節撫孤有成  
樊年七十六卒李年六十五卒

蘇氏宜君民董其事妻年二十三夫亡遺孤遵儒方四齡氏甘貧  
守節撫之成立及壯娶妻無子納妾安氏又無子遵儒尋歿時  
安年甚幼痛哭自經而死蘇氏至八十九歲乃卒人稱一門節  
烈

曹氏宜君民楊維克妻年十七夫亡氏養親撫孤守節至五十二  
歲卒

張氏宜君民徐明哲妻年十九夫亡家貧守節凍餒不怨孝翁姑  
勤紡織撫孤成立至八十歲卒

焦氏宜君民馮琦妻年二十夫亡守節五十年事姑至孝教子成  
立

田氏宜君民馮聚瑞妻年二十二夫亡守節三十餘年備歷艱辛  
始終不變

劉氏宜君廩生楊國權妻年二十二夫亡教子凌漢成立凌漢復  
早世妻王氏年二十六守節教子一如其姑三子苾苾荃並遊  
庠苾亡家貧甚妻寇氏年二十九甘貧守節至拾遺種滯穗以  
自給見者傷之劉五十六歲卒王七十三歲卒寇六十一歲卒  
董氏宜君生員賀年有妻年二十一夫亡一慟幾絕念舅姑老子

幼強飯自愛勤紡織以供甘旨撫遺孤掄升成立年六十七歲卒

白氏宜君廩生王振基妻年二十六歲夫亡甘貧守志孝養孀姑撫姪爲子教養成立苦節五十餘年卒

張氏宜君楊緒妻緒病革念氏年少無子囑其改適氏大慟即自縊死時年祇十八

柳氏綏德儒童馬驤龍妻年十六適驤龍親操井臼事舅姑曲盡孝道二十一而寡撫幼子既長有文名兩遇歲祲族黨不能自存者悉推所有共之雍正八年旌表時年八十一歲

李氏綏德馬繼俊妻年二十繼俊亡仰事俯育備歷艱辛翁姑俱年至八旬卒課子誦讀以母兼師長精一康熙辛卯舉人次純一生員雍正八年旌表時年七十有五

劉氏綏德生員馬彭齡妻夙嫻內則子歸後逮事舅姑承歡無間未幾夫亡矢志苦守以織紉自給時翁姑已逝所遺幼子弱女爲經營婚嫁悉底成立遇歲侵推食以惠宗黨從子某爲本宗冢子家貧衣食之不使失所某病劇囑其子當厚報氏聞之泣曰吾爲祖宗嗣續計耳何報爲仍呼其子歸撫之雍正八年旌表時年七十二守節經四十六年

張氏綏德馬徵易妻夫歿氏年二十九遺孤甚幼忍死茹荼教子成立歷三十八年雍正八年旌表

田氏綏德生員李如膺妻如膺得疾氏醫禱備至以舅姑年高恐貽憂晨夕必多方慰解暨歿事舅姑彌篤家貧子幼艱苦備嘗年五十七歲卒雍正八年旌表

楊氏綏德民王善福妻年三十夫故矢志撫孤既長念家世單寒



命四子各就一業時值耕獲率諸婦身自操作家業漸裕里黨有婚喪者咸周之無吝色年七十四歲卒雍正八年旌表

慕氏綏德生員馬士俊妻士俊亡氏年甫二十一一家貧子幼慷慨矢節翁姑衰年久病氏盡心調護俱登上壽守節歷六十年而歿雍正九年旌表

高氏綏德民延自璽妻年二十二夫亡茹荼守志事舅姑生事盡祭無缺性習勞操作至老不衰年七十二歲卒猶及見諸孫成立云雍正九年旌表

任氏綏德生員馬啟周妻年二十二夫歿誓死守節朱龍變起閭里劫掠一空獨相戒不入馬氏室欽其節也奉孀姑撫幼子艱辛備歷年六十八卒雍正九年旌表

王氏綏德民汪生瑾妻年二十一夫亡翁繼歿氏以婦代子治喪盡禮事繼姑尤稱孝謹一子涵溶耕讀傳家里中推善士氏年十四歲卒雍正九年旌表

葉氏綏德儒童馬彪妻年十八而寡姑老子幼其母諷以再醮氏卒無二志歲大疫氏晨夕侍姑笑言甚適俱無恙教子成家備歷艱苦年六十二歲卒雍正九年旌表

李氏綏德民陸法愷妻愷亡氏慟絕終喪猶哭泣不止家貧甚以紡績自給養老存孤不致凍餒年二十一而寡歷三十九年雍正九年旌表

李氏諸生張克善妻賀氏張隆軒妻俱綏德人夫亡無子誓不再適奉翁姑睦妯娌庭無間言李守節三十二年賀守節四十四年雍正十年旌表

馬氏綏德民張國璽妻夫亡撫孤闡範無玷雍正十年旌表時年

七七有二字節歷四十四年  
金氏明叅將艾穆妻米脂人性敏慧嫡馬氏尤愛之年二十五穆  
亡會寇亂隨馬氏避兵玉華山中逾七年  
國朝定鼎穆仲子懷英以叅將歸誠官鑲藍旗牛錄章京居於京  
師未幾物故季子懷元往省暨歸有仇家指爲逃旗白於官捕  
繫之檄行原籍追取家屬甚急時寫逃禁方嚴檄下郡縣承風  
趣迫馬氏年邁慮不測欲自盡金氏慷慨請代與懷元妻姜氏  
全就道比至事得雪謀西歸無資懷元方南遊時順治八年也  
九年姜氏舉一子懷元閱歲不返值秦中僕至乃歸時秋雨連  
旬積潦千里金氏負幼子携姜氏日行于泥淖中兩月餘始抵  
家明年馬氏卒金氏以憂勞積歲又過慟成疾而逝時年六十  
三姜氏哭盡哀死喪葬逾常禮久之懷元遣信與家人訣曰母  
死不奔喪不可爲子吾誓畢此生不歸矣姜氏驚懼不欲生家  
貧子幼茹苦四十餘年至六十九歲卒懷元後竟不知所終雍  
正六年有司以雙節

聞旌表

高氏米脂生員馮震妻年二十一夫亡守節雍正六年旌表

王氏米脂指揮同知艾懷光妻幼讀詩書識女誡夫亡苦節三十  
餘年事姑盡孝姑亡痛哭失明年六十餘卒

白氏清澗民王承祚妻年二十五夫亡家甚貧粗糲不給或有勸  
嫁者氏嚙指自誓遺孤印傑甫七歲延師教之遊庠食餼氏七  
十二歲卒

田氏清澗廩生白乃建繼妻年二十五夫亡撫前妻子女如已出  
吳逆之亂邊郡裨將多叛氏顛沛流離志不少變兩孤俱早世

復撫遺孫成立年七十卒凡厥新舊難志不也變所爲其早好  
郭氏葭州民劉建謨妻夫亡自縊爲隣人救甦而止有子三人族  
人劉建功欲繼其幼子先以錢米輸之氏不納曰吾豈賣子餬  
口耶族衆聞之率建功卑禮致辭以請乃許之守節四十四年  
年七十三歲雍正九年旌表  
康氏葭州生員劉再昇妻夫故氏投崖幾死念舅姑以痛子致疾  
氏每夕焚香籲天晝則婉辭曲諭舅姑意漸解後舅亡嚙氏曰  
我在尚不能爲汝謀生矧死乎姑已老不足恃也氣絕而目不  
瞑氏痛哭跪榻下誓奉姑不二適始瞑嗣喪姑喪葬以禮鄉人  
稱其節孝三子皆遺存有文名字節三十五年雍正九年旌表  
張氏葭州民劉含珠妻年二十四而夫卒蓬首垢面苦志完操守  
節三十六年雍正九年旌表

劉氏葭州民劉和梅妻年二十五夫歿姑繼之撫幼叔及已子俱  
成立歷三十四年終雍正十年旌表

馬氏葭州諸生白而潔妻夫亡氏奉姑撫孤誓無二志家素貧見  
孤寡無依者必分餐與之守節五十三年雍正十年旌表

屈氏葭州生員牛瑾妻曹氏瑾弟牛璋妻屈年二十夫亡守節至  
六十五歲卒曹年十八璋亦亡與屈氏共矢節孀居事翁姑能

其執婦道年六十八而歿  
張氏葭州生員任士修妻順治六年王永強之變避賊至河干以

孀子付其親曰不死恐爲賊污遂投河死  
李氏葭州生員劉嗣京妻結褵後劉隨親遠宦十餘年父母使之

他適氏以死自誓後劉歸甫完聚旋遇寇至投崖死  
丁氏吳堡生員馬勗妻年二十一夫亡勵志守節孝事舅姑存歿

盡禮處妯娌無間言守節三十七年雍正八年旌表

馬氏吳堡監生樊恭妻年二十夫亡二子俱幼若志守節撫育成

人壽七十八卒

李氏吳堡生員丁泰妻史氏吳堡生員李應賢妻群賊來劫二氏

登樓避之賊焚樓逼之下二氏堅拒不從甘為煨燼

某氏府谷杜景春妻逸其姓年十八夫亡遺子甫數月家貧無資

勵志苦節後子死撫孤孫成立年逾八十卒

八旗節婦

巴牙拉氏廂黃旗滿洲披甲頭目杜什巴之妻年二十九守節至

六十一歲康熙四十二年旌表

女枯魯氏廂黃旗滿洲披甲敦泰之妻年二十八守節至五十歲

康熙五十三年旌表

馬嘉氏廂黃旗滿洲披甲烏利巴之妻年二十九守節至五十九

歲康熙六十一年旌表

何舍利氏廂黃旗滿洲披甲拉虎他之妻年二十五守節至五十

五歲康熙六十一年旌表

馬吉氏廂黃旗滿洲披甲諾謨齊之妻年二十六守節至五十六

歲康熙六十一年旌表

席拉努特氏廂黃旗蒙古領催阿玉世之妻年二十五守節至五

十四歲康熙五十年旌表

哈爾泰氏廂黃旗蒙古外委前鋒校巴達克之妻年一十九守節

至六十一歲康熙六十一年旌表

博何諾特氏廂黃旗蒙古披甲三達之妻年一十八守節至五十

一歲康熙六十一年旌表

爾圖特氏廂黃旗蒙古披甲巴第之妻年二十守節至五十一歲

康熙六十一年旌表古與甲三妻年一十八守節至五十

葉氏廂黃旗漢軍披甲陳聖言之妻年二十六守節至五十八歲

康熙六十一年旌表不妻年一十八守節至五十

張氏廂黃旗漢軍披甲李文英之妻年二十三守節至五十三歲

康熙六十一年旌表

陳氏廂黃旗漢軍披甲蘭登科之妻年二十九守節至六十五歲

康熙六十一年旌表

括爾嘉氏正黃旗滿洲披甲永愛之妻年二十五守節至五十五

歲康熙四十三年旌表

完顏氏正黃旗滿洲披甲韓杜之妻年二十七守節至五十五歲

康熙四十三年旌表

阿卓特氏正黃旗滿洲披甲努勒之妻年二十七守節至五十歲

康熙四十三年旌表

何舍利氏正黃旗滿洲披甲穆成額之妻年二十六守節至六十

九歲康熙四十三年旌表

孟固索氏正黃旗滿洲披甲古爾泰之妻年二十七守節至五十

歲康熙四十三年旌表

富查氏正黃旗滿洲披甲西賴之妻年二十六守節至五十歲康

熙四十三年旌表

格吉勒氏正黃旗滿洲披甲石圖之妻年二十六守節至五十歲

康熙四十三年旌表

張顏氏正黃旗滿洲披甲阿佛和之妻年二十九守節至五十歲

康熙四十三年旌表

瓜爾嘉氏正黃旗滿洲披甲褚爾庫之妻年二十二守節至五十歲康熙四十八年旌表

哈爾哈覺羅氏正黃旗滿洲披甲常什保之妻年二十一守節至五十歲康熙五十三年旌表

瓜爾嘉氏正黃旗滿洲披甲趙玉之妻年二十九守節至五十歲康熙五十三年旌表

伊拉力氏正黃旗滿洲披甲俄和之妻年二十九守節至五十歲康熙五十三年旌表

瓜爾嘉氏正黃旗滿洲披甲薩爾帕之妻年二十九守節至五十歲康熙五十五年旌表

圖色利氏正黃旗滿洲披甲亨特之妻年二十七守節至五十八歲康熙六十一年旌表

伊拉力氏正黃旗滿洲披甲齊努呼之妻年二十五守節至五十五歲康熙六十一年旌表

何舍利氏正黃旗滿洲沙宴之妻年二十九守節至五十九歲康熙六十一年旌表

輝漢氏正黃旗滿洲披甲瓜子之妻年二十八守節至五十歲康熙六十一年旌表

杜爾枯爾柱忒氏正黃旗蒙古披甲格世之妻年二十七守節至五十五歲康熙四十三年旌表

揆特氏正黃旗蒙古披甲渾齊之妻年二十九守節至六十二歲康熙四十三年旌表

郭特氏正黃旗蒙古披甲何商之妻年二十九守節至五十歲康熙四十三年旌表

杜爾枯爾柱特氏正黃旗蒙古披甲爾吉圖之妻年二十七守節至六十歲康熙四十三年旌表

關特氏正黃旗蒙古領催格樂爾圖之妻年三十守節至五十八歲康熙四十三年旌表

哆囉特氏正黃旗蒙古領催常壽之妻年二十六守節至五十五歲康熙四十三年旌表

哈爾固卜黑特氏正黃旗蒙古披甲海代之妻年二十三守節至五十歲康熙五十三年旌表

沙爾圖特氏正黃旗蒙古披甲二墜之妻年二十九守節至六十歲康熙六十一年旌表

朱氏正黃旗漢軍四甲喇披甲王嘉臣之妻年十七守節至五十五歲康熙六十一年旌表

劉氏正黃旗漢軍五甲喇披甲朱孔賢之妻年二十一守節至五十一歲康熙六十一年旌表

塔他拉氏正白旗滿洲披甲塞克之妻年二十八守節至五十八歲康熙四十三年旌表

特楞枯思氏正白旗滿洲披甲古穆之妻年二十三守節至五十八歲康熙五十年旌表

瓜爾嘉氏正白旗滿洲披甲噶不拉之妻年二十守節至五十一歲康熙六十一年旌表

王氏正白旗漢軍二甲喇披甲張興隆之妻年二十七守節至五十六歲康熙六十一年旌表

劉氏正白旗漢軍二甲喇披甲戴克學之妻年二十八守節至五十七歲康熙六十一年旌表

高氏正白旗漢軍三甲喇披甲張文僅之妻年二十七守節至五十八歲康熙六十一年旌表

何氏正白旗漢軍五甲喇披甲祁國世之妻年二十五守節至五十五歲康熙六十一年旌表

寧古塔氏正紅旗滿洲披甲莫爾柱之妻年二十九守節至五十七歲康熙四十三年旌表

瓜爾嘉氏正紅旗滿洲披甲烏利之妻年二十五守節至五十四歲康熙四十三年旌表

蒙古爾吉氏正紅旗滿洲披甲恩可特之妻年二十七守節至五十歲康熙四十三年旌表

費葉捫氏正紅旗滿洲披甲賢代之妻年二十二守節至五十歲康熙四十三年旌表

薩七拉氏正紅旗滿洲披甲哇子之妻年二十四守節至五十三歲康熙四十三年旌表

劉氏正紅旗滿洲披甲胡什布之妻年二十七守節至五十歲康熙四十三年旌表

努爾哈氏正紅旗滿洲披甲巴西爾岱之妻年二十八守節至五十七歲康熙四十三年旌表

蘇夏氏正紅旗滿洲披甲巴彥柰之妻年二十二守節至五十歲康熙四十三年旌表

寧古塔氏正紅旗滿洲披甲塔記之妻年二十五守節至五十九歲康熙四十三年旌表

伍扎拉氏正紅旗滿洲披甲滿皮之妻年二十二守節至五十歲康熙四十三年旌表



何舍利氏正紅旗滿洲披甲胡什塔之妻年二十一守節至五十歲康熙四十三年旌表

瓜爾嘉氏正紅旗滿洲披甲瓦爾達之妻年二十二守節至五十歲康熙四十三年旌表

格吉勒氏正紅旗滿洲披甲孫多利之妻年二十一守節至五十歲康熙四十三年旌表

塔他拉氏正紅旗滿洲披甲吉世泰之妻年二十一守節至五十歲康熙四十三年旌表

額爾和穆氏正紅旗滿洲披甲阿布之妻年二十五守節至五十歲康熙四十七年旌表

納木杜拉氏正紅旗滿洲披甲歪頭之妻年二十五守節至五十歲康熙五十一年旌表

胡丁氏正紅旗滿洲披甲噶爾達之妻年二十八守節至五十五歲康熙五十一年旌表

蘇嘉氏正紅旗滿洲披甲馬爾泰之妻年二十七守節至五十歲康熙五十三年旌表

伊拉利氏正紅旗滿洲披甲邢安之妻年二十九守節至五十歲康熙五十三年旌表

蘇嘉氏正紅旗滿洲披甲賈哈布之妻年二十四守節至五十歲康熙五十三年旌表

格吉勒氏正紅旗滿洲披甲碩色之妻年二十八守節至五十歲康熙五十三年旌表

伊拉力氏正紅旗滿洲披甲撤木得利之妻年二十八守節至五十歲康熙五十三年旌表

巴路德氏正紅旗滿洲披甲班達利之妻年二十九守節至五十

歲康熙五十三年旌表

淑淑覺羅氏正紅旗滿洲披甲色爾古特之妻年二十守節至五

十歲康熙六十一年旌表

索德力氏正紅旗滿洲披甲格楞泰之妻年二十六守節至五十

一歲康熙六十一年旌表

富查氏正紅旗滿洲披甲傅生寶之妻年二十二守節至五十一

歲康熙六十一年旌表

阿勒氏正紅旗滿洲披甲盤龍保之妻年二十一守節至五十歲

康熙六十一年旌表

拖和利氏正紅旗蒙古披甲古利格之妻年二十三守節至五十

歲康熙四十三年旌表

步爾哈處德氏正紅旗蒙古披甲二吉頭之妻年二十一守節至

五十歲康熙四十三年旌表

巴路德氏正紅旗蒙古披甲白不利之妻年二十一守節至五十

歲康熙四十三年旌表

哈拉努德氏正紅旗蒙古披甲蘇爾特之妻年二十二守節至五

十歲康熙四十三年旌表

舍爾得德氏正紅旗蒙古披甲卜落之妻年二十二守節至五十

歲康熙四十三年旌表

黃郭樂德氏正紅旗蒙古披甲和尚之妻年二十七守節至五十

五歲康熙四十三年旌表

把于德氏正紅旗蒙古披甲諾莫何之妻年二十八守節至五十

歲康熙四十三年旌表

趙布庫德氏正紅旗蒙古披甲回子之妻年二十九守節至五十一歲康熙五十年旌表

卓嘉氏正紅旗蒙古披甲長壽之妻年二十四守節至五十五歲康熙五十一年旌表

阿力特氏正紅旗蒙古披甲巴吉柰之妻年二十八守節至五十一歲康熙五十三年旌表

貢氏正紅旗蒙古披甲權頭之妻年二十五守節至五十歲康熙六十一年旌表

達拉哈德氏正紅旗蒙古披甲白家保之妻年二十五守節至五十一歲康熙六十一年旌表

樊氏正紅旗漢軍五甲喇披甲劉雲智之妻年二十一守節至五十一歲康熙六十一年旌表

吳氏正紅旗漢軍五甲喇領催步音鳳之妻年二十八守節至六十一歲康熙六十一年旌表

何舍利氏廂白旗滿洲披甲黑子之妻年二十八守節至五十歲康熙六十一年旌表

金因氏廂白旗滿洲披甲阿塔利之妻年二十七守節至五十一歲康熙六十一年旌表

阿布哈氏廂白旗滿洲領催多爾計之妻年二十八守節至五十一歲康熙六十一年旌表

瓜爾嘉氏廂白旗滿洲披甲蘇克泰之妻年二十九守節至五十一歲康熙六十一年旌表

瓜爾嘉氏廂白旗滿洲披甲閆柱之妻年二十六守節至六十四歲康熙六十一年旌表

納拉氏廂白旗滿洲披甲常壽之妻年二十九守節至五十一歲  
康熙六十一年旌表

何氏廂白旗滿洲披甲三哥之妻年二十九守節至五十九歲康  
熙六十一年旌表

白氏廂白旗滿洲披甲步達利之妻年二十七守節至五十四歲  
康熙六十一年旌表

劉氏廂白旗漢軍三甲喇披甲金世英之妻年三十守節至五十  
歲康熙五十三年旌表

程氏廂白旗漢軍頭甲喇披甲陳智之妻年二十守節至五十歲  
康熙六十一年旌表

孟氏廂白旗漢軍頭甲喇披甲鄒揚成之妻年二十九守節至五  
十三歲康熙六十一年旌表

張氏廂白旗漢軍頭甲喇披甲任有成之妻年二十六守節至五  
十歲康熙六十一年旌表

李氏廂白旗漢軍頭甲喇披甲宋國朝之妻年二十二守節至五  
十二歲康熙六十一年旌表

張氏廂白旗漢軍三甲喇披甲趙逢玉之妻年二十四守節至五  
十四歲康熙六十一年旌表

李氏廂白旗漢軍三甲喇披甲周芝可之妻年二十六守節至五  
十歲康熙六十一年旌表

李氏廂白旗漢軍三甲喇披甲安奇龍之妻年二十守節至五十  
五歲康熙六十一年旌表

何氏廂白旗漢軍三甲喇披甲周雲林之妻年二十八守節至六  
十二歲康熙六十一年旌表

朱氏廂白旗漢軍四甲喇披甲張文顯之妻年二十守節至五十

卅歲康熙六十一年旌表

魏氏廂白旗漢軍四甲喇披甲藍玉宗之妻年一十九守節至五

李十歲康熙六十一年旌表

周氏廂白旗漢軍四甲喇披甲譚問今妻年二十九守節呂氏領

催潭問客妻年二十八守節俱年過六旬康熙六十年並旌

吳努齊氏廂紅旗滿洲披甲馬勿禮之妻年三十守節至五十九

歲康熙四十三年旌表

瓜爾嘉氏廂紅旗滿洲披甲阿祖之妻年二十九守節至六十三

歲康熙四十三年旌表

卜倫達氏廂紅旗滿洲領催碩色之妻年二十八守節至五十五

歲康熙四十三年旌表

瓜爾嘉氏廂紅旗滿洲披甲馬復禪之妻年二十九守節至五十

八歲康熙四十三年旌表

覺羅氏廂紅旗滿洲披甲吳喀禪之妻年二十六守節至七十八

歲康熙四十三年旌表

多信氏廂紅旗滿洲披甲稽得利之妻年二十六守節至五十六

玉歲康熙四十三年旌表

薩各達氏廂紅旗滿洲披甲五十圖之妻年二十四守節至五十

西十歲康熙四十三年旌表

阿爾達氏廂紅旗滿洲披甲薩哈布之妻年二十一守節至五十

齡十歲康熙四十三年旌表

薩各達氏廂紅旗滿洲披甲鄂塞之妻年二十九守節至五十八

歲康熙四十三年旌表

楊嘉氏廂紅旗滿洲披甲各卜利之妻年二十九守節至五十八歲康熙四十三年旌表

納拉氏廂紅旗滿洲披甲樊泰之妻年二十四守節至五十二歲康熙四十三年旌表

西楞覺羅氏廂紅旗滿洲披甲巴什之妻年二十三守節至五十二歲康熙四十三年旌表

汪堅氏廂紅旗滿洲披甲佛保之妻年二十四守節至五十三歲康熙四十三年旌表

富查氏廂紅旗滿洲披甲碩色之妻年二十九守節至五十二歲康熙四十三年旌表

覺羅氏廂紅旗滿洲披甲鄂代之妻年二十八守節至五十歲康熙五十年旌表

汪嘉氏廂紅旗滿洲披甲勒克圖混之妻年二十一守節至五十七歲康熙五十年旌表

瓜爾嘉氏廂紅旗滿洲披甲勒圖利之妻年二十九守節至五十七歲康熙五十年旌表

葉何覺羅氏廂紅旗滿洲披甲卜色之妻年二十七守節至五十七歲康熙五十年旌表

淑淑覺羅氏廂紅旗滿洲披甲石圖之妻年二十七守節至六十四歲康熙五十一年旌表

祁塔拉氏廂紅旗滿洲披甲牛鈕之妻年二十六守節至五十歲康熙五十三年旌表

卜倫泰氏廂紅旗滿洲披甲瓦爾達之妻年十九守節至五十七歲康熙六十一年旌表

杜佛氏廂紅旗滿洲披甲沈童之妻年二十八守節至六十歲康熙六十一年旌表

納拉氏廂紅旗滿洲披甲富參崇之妻年二十四守節至五十二歲康熙六十一年旌表

伍雅拉氏廂紅旗滿洲披甲碩色之妻年二十九守節至五十九歲康熙六十一年旌表

朱克特氏廂紅旗蒙古披甲富剛之妻年二十五守節至五十歲康熙六十一年旌表

劉氏廂紅旗漢軍二甲喇披甲秦尤亮之妻年二十五守節至六十歲康熙六十一年旌表

瓜爾嘉氏正藍旗滿洲披甲溫泰之妻年二十九守節至五十歲康熙四十三年旌表

寧古塔氏正藍旗滿洲披甲杜西巴之妻年二十九守節至五十歲康熙四十三年旌表

楊氏正藍旗滿洲披甲不希罕之妻年十八守節至五十二歲康熙五十一年旌表

宋嘉氏正藍旗滿洲披甲巴什之妻年二十六守節至五十七歲康熙六十一年旌表

鮑氏正藍旗滿洲披甲劉世兒之妻年二十守節至五十歲康熙六十一年旌表

董氏正藍旗蒙古披甲花三泰之妻年二十六守節至五十歲康熙五十三年旌表

劉氏正藍旗蒙古披甲董達之妻年二十四守節至五十九歲康熙六十一年旌表

柯氏正藍旗漢軍四甲喇披甲周常壽之妻年二十守節至五十歲康熙六十一年旌表

阿爾占氏廂藍旗滿洲領催格爾杜革之妻年二十八守節至五十二歲康熙四十三年旌表

瓜爾嘉氏廂藍旗滿洲披甲岳克稀之妻年二十二守節至五十二歲康熙四十三年旌表

伍扎拉氏廂藍旗滿洲披甲喀紀之妻年二十五守節至五十四歲康熙四十三年旌表

瓜爾嘉氏廂藍旗滿洲披甲金保之妻年二十九守節至五十七歲康熙四十三年旌表

額穆特里氏廂藍旗滿洲披甲船多羅之妻年二十六守節至五十歲康熙四十三年旌表

瓜爾嘉氏廂藍旗滿洲披甲劉世之妻年二十七守節至五十七歲康熙四十三年旌表

葉何覺羅氏廂藍旗滿洲披甲額何利之妻年二十一守節至五十二歲康熙四十三年旌表

西磨力氏廂藍旗滿洲披甲雅頭之妻年二十一守節至五十歲康熙四十三年旌表

努爾哈拉氏廂藍旗滿洲披甲勒不喀之妻年二十四守節至五十五歲康熙四十三年旌表

葉何覺羅氏廂藍旗滿洲披甲胡爾呼利之妻年二十四守節至五十三歲康熙四十三年旌表

伍扎拉氏廂藍旗滿洲披甲索吉那之妻年十九守節至五十五歲康熙五十一年旌表



覺羅氏廂藍旗滿洲披甲薩爾圖之妻年二十守節至五十歲康

熙五十五年旌表

何舍力氏廂藍旗滿洲領催偏頭之妻年二十六守節至五十歲

康熙五十五年旌表

薛嘉氏廂藍旗滿洲披甲趙甘之妻年十八守節至五十歲康熙

五十五年旌表

杜勒氏廂藍旗滿洲披甲薩代之妻年二十六守節至五十歲康

熙五十五年旌表

西唐力氏廂藍旗滿洲披甲戴清之妻年二十七守節至六十五

歲康熙六十一年旌表

瓜爾嘉氏廂藍旗滿洲披甲伊哈太之妻年二十九守節至五十

九歲康熙六十一年旌表

卜何利氏廂藍旗滿洲披甲庫潭保之妻年二十七守節至五十

八歲康熙六十一年旌表

溫卓混氏廂藍旗滿洲披甲阿玉世之妻年二十七守節至五十

七歲康熙六十一年旌表

努勒德氏廂藍旗蒙古披甲古路之妻年二十三守節至五十三

歲康熙四十三年旌表

扎路德氏廂藍旗蒙古披甲蒙古爾塞之妻年二十二守節至五

十二歲康熙四十三年旌表

蘇氏廂藍旗蒙古披甲拉把子之妻年二十五守節至五十三歲

康熙四十三年旌表

莽古德氏廂藍旗蒙古披甲哈吉噶爾之妻年二十三守節至六

十歲康熙四十三年旌表

揆德氏廂藍旗蒙古披甲阿鷹泰之妻年二十四守節至五十歲  
康熙四十七年旌表

賢大赤氏廂藍旗蒙古披甲黑碩色之妻年二十七守節至五十歲  
康熙六十年旌表

趙雅思圖氏廂藍旗蒙古披甲巴達璽之妻年二十二守節至六  
十歲康熙六十一年旌表

敖漢氏廂藍旗蒙古披甲蘇泰之妻年二十五守節至五十五歲  
康熙六十一年旌表

徐氏廂藍旗漢軍頭甲喇八品蔭生王朝英之妻年二十八守節  
至六十歲康熙四十三年旌表

連氏廂藍旗漢軍頭甲喇披甲張廷君之妻年二十八守節至六  
十歲康熙六十一年旌表

白氏廂藍旗漢軍三甲喇披甲李天成之妻年二十八守節至六  
十歲康熙六十一年旌表

